



ШАРҚ ЎЛДУЗИ

# ШАРҚ ЎЛДУЗИ

Адабий-бадиий, ижтимоий-сиёсий журнал

1931 йилдан чиқа бошлаган

## ЖАМОАТЧИЛИК КЕНГАШИ

Бобур Алимов	Абдуваҳоб Нурматов
Эркин Воҳидов	Баҳамдулло Нурабуллаев
Кенесбой Каримов	Абдулла Орипов
Наим Каримов	Тўра Саидов
Тўра Мирзаев	Сироҷиддин Сайид
Иқбол Мирзо	Энахон Сиддиқова
Минҳожиддин Мирзо	Йўлдош Солижонов
Ғулом Мирзо	Хайриддин Султонов
Сувон Нажбиддинов	Рустам Қосимов

Бош муҳаррир — Улуғбек Ҳамдам  
Бош муҳаррир ўринбосари — Икром Отамурод  
Масъул котиб в.б. — Саъдулло Қурунов  
Наср бўлими мудири — Орзиқул Эргаш



## УШБУ СОНДА:

Шеърият

Абдували ҚУТБИДДИН



*Чарф иламга айлантирасам етти оламини*

*Эркин шеърлар*

*Томчидай сирған, томчидай  
Томчила, томчилаш имкони бўлса...  
Томчила...*



Наср

Гулом КАРИМИЙ

## ЛАНГАР ФОЖИАСИ

**Романдан парча**



“Рангу рўйлари ҳам бир хил – оқ-сариққа мойил. Лекин мана бу қоғозлар бўйича, – Раҳимов ҳужжатларга яна бир марта кўз ташлади, – бир-бираига мутлақо бегона, исм-шарифлари ҳам бошқа-бошқа. Фақат бир жойда ўқишиган экан. Қизиқ, бунча ўхшашикларини ўзлари билишармикин?”

Шеърият

Фарида АФРЎЗ



*Юрагимни тоғи*

*Шеърлар*



*Кунлар ўтар, кунлар бесамар,  
Кумга сингган булоқ сувидек,  
Ушиб кетар, оҳ, тўзгиб кетар,  
Вақтнинг гули қоқигулидек.*



Йиллар, воқеалар, тақдирлар

Тўра МИРЗАЕВ

## ФОЗИ ОЛИМ ЮНУСОВ



Фози Олим Юнусов фольклор намуналарини баҳшилар, эртакчилар, қўшиқчилар ва бошқа ижодкор-ижрочилар оғзидан бевосита, айнан, ўзгартирмай айтувчи шевасида ёзиб олишини бошлаб берган олимдир.



## Адабий жараён минтақалари

Мұхаммаджон ХОЛБЕКОВ

### ЛОТИН АМЕРИКАСИ РОМАНИ

Танқидчилар миғ яратыш санъатини, афсоналар ижодиёти ва “сөхрли реализм” бадиияти хусусида баҳс-мунозара юритған бир пайтада Гарсиа Маркес үзи ёзған китобларда ҳамма нарса ҳаётдан “күчириб” олинған, деб таъкидлашдан чарчамайды.



### Ён дафтардан

Дилшод РАЖАБ



### НУР ВА СОЯ

#### Қайдлар

Японияда қаратати деган дарахт ўсаркан. Үнга қайси дарахтни пайванд қилишса ҳам барибир қаратати япргини чиқараркан. Қизиқ. Бу ҳар қандай таъсир, ҳолат ва вазиятда ҳам ўзлигини унұттайдиган соғыт инсонларға ўхшайды.



### Адабиётшунослик

Рахмон ҚҰЧҚОР



### ДАРБАДАРЛИКНИНГ БЕДОР ТАЛҚИНІ

XXI аср ўзбек ёзувлчиси Исажон Султоннинг “Боқий дарбадар” романында, Гобидаги Инсон тәкомили маркази томонидан юқори технологияларни құллаш орқали сунъий бино қилинған барҳаёт одамнинг ўзини яратған инсониятга қаратма айтған биринчи саволи ҳам худди шундай янграйди: “Мен кимман?”



### Ёднома

Нурбой ЖАББОРОВ



### АБАДИЯТГА АЙЛАНГАН ЛАҲЗА

#### Эссе

Инсон умри чексизликка нисбатан қиёсланғанда, лаҳзанинг ҳам неча миллиарддан бирига тенгдир, эхтимол. Лекин, бошқа яралмишлардан фарқи шундаки, у ана шу беҳад оз муҳлатда оламга татирли ишларни бажаришга улгuriши, ўз номини абадиятга муҳрлаши мүмкін.

## МУНДАРИЖА

### ПУБЛИЦИСТИКА

**Ахрор Аҳмедов.** Оила, маънавият ва матбаа. ..... 5

### ШЕЪРИЯТ

**Абдували Қутбиддин.** Учар гиламга айлантирсам

етти оламни. Эркин шеърлар. ..... 9

**Фарида Афруз.** Юрагимнинг тори. Шеърлар. ..... 27

**Азиз Сайд.** Сувдаги излар. Туркум. ..... 31

**Ўқтамой.** Тожмаҳал. Қасида. ..... 44

**Раҳимжон Раҳмат.** Мени ўзингдан сўра. Шеърлар. ..... 62

**Фарида Ҳусайнова.** Ифорларин нисор этар гул. Шеърлар. ..... 67

### ЙИЛЛАР, ВОҚЕАЛАР, ТАҚДИРЛАР

**Тўра Мирзаев.** Рози Олим Юнусов. ..... 35

### ИЖОДХОНАДА БИР СОАТ

**Нодир Норматов, Абдулла Улуғов.**

Биз излаётган ҳикматлар. Суҳбат. ..... 52

### ҒАЗАЛ БҮСТОНИ

**Зикрилло Неъмат.** Толеим тонггин кутиб. Ғазаллар. ..... 124

### НАСР

**Ғулом Каримий.** Лангар фожиаси. Романдан парча. ..... 14

**Асад Дилмурод.** Ранг ва меҳвар. Роман. Охири. ..... 69

**Баҳор.** Ишқ манзаралари. Бадиа. ..... 144

### БИР ДАРАХТ НОВДАЛАРИ

**Олланазар Абдиев.** Йиртиқ этик. Ҳикоя. ..... 128

### АДАБИЙ ЖАРАЁН МИНТАҚАЛАРИ

**Муҳаммаджон Холбеков.** Лотин Америкаси романи. ..... 136

### ИЖОД ЛАБОРАТОРИЯСИ

**Рухсора Орипова.** Шеър заҳмати. ..... 131

### БОЛАЛАР ДУНЁСИ

**Ориф Тўхташ.** Шундай деган экан. ..... 134

### ЁН Дафтардан

**Дилшод Ражаб.** Нур ва соя. Қайдлар. ..... 147

### АДАБИЁТШУНОСЛИК

**Дилмурод Қуронов.** Завқимдан бир шингил. ..... 150

**Раҳмон Кўчкор.** Дарбадарликнинг бедор талқини. ..... 155

**Зулхумор Мирзаева.** XX аср ўзбек адабиётидаги айрим  
рамзий ифодаларга доир. ..... 160

**Муҳайё Ҳамроева.** Амир Темур образи яратилган  
ҳикоялар хусусида. ..... 164

### ЁДНОМА

**Раҳматулла Баракаев.** Зафар Диёрнинг зафарли ижоди. ..... 166

**Нурбой Жабборов.** Абадиятга айланган лаҳза. Эссе. ..... 169

### ГУЛҶАЙЧИ

**Абдураҳмон Иброҳимов.** Оиланг фариштаси. Ҳажвия. ..... 175

# ШАРҚ ЙОЛДУЗИ

**2012**

6-сон

Муассис:  
**ЎЗБЕКИСТОН ЁЗУВЧИЛАР  
ЮШМАСИ**

\* Муаллифлар фикри  
таҳририят фикри деб қабул  
килинмасин.  
Таҳририяттага юборилган  
материаллар муаллифларга  
қайтарилмайди.

\* Обунага монеълик  
кўрсатилса,  
Тошкент – 100000,  
«Амир Темур» тор  
кўчаси, 2. Республика  
«Матбуот тарқатувчи»  
акциядорлик  
компаниясига мурожаат  
килинсин.  
**Обуна индекси — 911**

**Манзилимиз:**  
100127, Тошкент шаҳри,  
«Ўзбекистон» кўчаси, 16-а уй.  
Телефонлар:  
227-00-81, 245-22-99, 245-27-87  
www.sharqyulduzi.uz  
E-mail. sharqyulduzi1931@mail.ru

Босишига руҳсат этилди  
10.10.2012 йил.  
Қоғоз бичими 70x108 <sup>1/16</sup>.  
Офсет босма усулида тип.  
№ 1-когозга босилди.  
Босма тобоги 11.  
Шартли босма тобоги 15,4.  
Наширият хисоб тобоги 17,2.  
Адади 1900 нусха.  
Буюргма № 284-12

Журнал Ўзбекистон Матбуот ва  
ахборот агентлигига 0562-ракам  
билан рўйхатга олининг.  
«Ўқитувчи» НМИУ босмахонасида чоп  
этилди.

**Корхона манзили:**  
Тошкент шаҳри, Юнусобод тумани,  
Янгишахар кўчаси, 1-уй.

Журнал иккى ойда бир марта чоп  
этилади.

Саҳифаловчи ва дизайнер:  
**Ақбарали Мамасолиев**  
Мусаххилар:  
**Дилғуз Махмудова,**  
**Раъно Ҳакимжонова**

Copyright © «Шарқ юлдузи»



## Публицистика

# ОИЛА, МАЬНАВИЯТ ВА МАТБАА

Инсоният тарихидаги жамики моддий ва маънавий омиллар унинг тафаккури ила бунёд этилади ва содир бўлади. Алишер Навоий: “Ки ҳар ишники қилди одамизод, тафаккур бирла билди одамизод”, дея таъкидлаб ўтган эди. Бунда, аллома “одамизод”нинг барча яхши-ёмон амаллари, унинг тафаккури маҳсули эканлигига ишора қиласди.

Инсоният тафаккури, маънавияти эса, дастлаб, халқ оғзаки ижоди тарзида, сўнг, ёзма шаклда ҳамма замонларда тарғиб-ташвиқ қилинган. Зоро, унинг тинчлиги, фаровонлиги, аввало, маънавиятининг, тафаккурининг бўйига қараб белгиланган. Шу маънода: шахс, оила, демакки, мамлакат маънавияти ва уни юксалтириш воситаюари билан чамбарчас боғлиқдир.

Оила, дастлаб, икки шахсадан барпо бўлади, сўнг эса, ирмоқлар йифилиб дарёни ташкил қилгани каби, улар ҳам бир юртни, дунёни ташкил этади.

Ватан, эл-юрт равнақи, умуминсоний биродарлик, башарий тинчликни сақлаб қолиш сираси инсоният тарихининг азалий долзарб масаласи бўлиб келган. Бугун атом асли, ахборот асли, деб, таърифланаётган замонда, у том маънода, ўта долзарб аҳамият касб этди. Бу муаммони ҳал этишнинг бошланғич вазифаларидан бири сифатида эса, оила мустаҳкамлиги тарзи яна бутун дунё ҳамжамияти эътиборида.

Чунки, оила мустаҳкамлиги бир хонадоннинг, бир юртнинггина эмас, умуминсониятнинг катта сиёсатига айланиб бўлди. Ҳар бир мамлакатнинг ўзи – тинчликни сақлаб қолишига, фаровонликка эришишга интилаётган катта оила. Мавзуга фалсафий нуқтаи назардан ёндошадиган бўлсак, башариятнинг тинчлиги, давомийлиги оиладан бошланишини дунё олимлари қайта-қайта таъкидлаб ўтмоқда. Оиланинг мұқаддас вазифаси эса – авлодларни жисмоний ва маънавий жиҳатдан кейинги авлоди билан боғлаш эканлиги буғунги гап эмас. Ҳамма миллат, давлатларни зиммасидаги бу шарафли вазифани бажариш маънавият, маърифат мавзусига бориб тақалади.

Буғунги ёш оилаларнинг мустаҳкамлигига эътибор, эртага жамиятнинг мустаҳкамлигига эътибордир. Прези-



*Axbor  
АХМЕДОВ*

*1959 йилда туғилган.  
Тошкент Давлатуниверситети (ҳозирги  
Миллий университет)ни  
1982 йилда татомланган. Ҳозирда “Шарқ”  
нашириёт-матбаа акциядорлик компанияси  
Боши мұхтаррири.  
Ўзбекистонда хизмат  
күрсатган журналист.*

дентимиз Ислом Каримов томонидан 2012 йилнинг “Мустаҳкам оила йили” деб эълон қилиниши ҳам мана шу жараёнга, шубҳасиз, бебаҳо, улкан омил бўлди.

Оиланинг муқаддас қўрғон эканлиги, унинг шахс камолоти, ҳаётидаги ўрни бекиёс эканлигини ҳаётий мисолларда кўп учратиш, кўриш мумкин.

Бир ҳамкасбимизни яқинда нафақага кузатдик. У шукронда кўзёши билан, оиласага давлат томонидан берилаётган катта эътибор ҳақида гапириб: “Қани энди ёш бўлиб қолсаг-у, кеннойинглар билан қайтадан турмуш курсак. Қанчалик имконият, ғамхўрлик кўрсатилаётиди. Биз ўша даврда узок вақт – тўрт болалик бўлгунча ҳам қозон-товоғимиз бут бўлмаганди, стол-стулларимиз йўқ эди. Ҳозирги ёш оиласаларга кўрсатилаётган ғамхўрлик, имтиёзлар, кредитларни у замонларда, ҳатто орзу қилиб ҳам бўлмасди”, дегани ҳаммани тўлқинлантириб юборди.

Маънавият ва маърифатсиз оилавий фаровонлик ҳам, тараққиёт йўли ҳам бошқа ўзанга бурилиб кетишини тарихда кўп мисолларда кўриш мумкин. Инсоният илм-фанда, техника, иқтисод, тиббиёт каби энг муҳим соҳаларда қанчалик тараққиётга эришмасин, оламшумул кашфиётларни қўлга киритмасин, улардан қандай мақсадларда фойдаланиш ҳам хушёрликка ундейдиган масала. Кимёгар ва саноатчи Альфред Бернхард илк бор (1866 йил) динамит ва бошқа портловчи моддаларни кашф этгач, кейинчалик, ундан қандай ёмон мақсадларда фойдаланиш мумкинлигини ўйлаб, афсус чеккан. Унинг илм-фандаги кашфиётлар учун ўз номида ҳалқаро Нобель мукофотига асос солишига ҳам (1901 йил) маълум маънода таассуфи сабаб бўлгандир. Ўзбекистон Қаҳрамони, ҳалқ шоири Эркин Воҳидовнинг “Инсон” қасидасида шундай сатрлар бор:

*Атомни ижод этиб,  
Даҳшат бало бунёд этиб,  
Оқибатни ёд этиб  
Ҳайрон ўзинг, ҳайрон ўзинг.*

Инсоният ўз фаровонлиги, тинчлиги учун хизмат қиладиган янгилик, кашфиётларни фақат эзгу-мақсадларга йўналтиришида унинг маънавияти, тафаккури масаласи сўзсиз биринчи ўринда туради. Албатта, инсон баркамоллиги эса ўлмас миллий ва умуминсоний қадриятлар, урф-одатлар, анъаналар, дунёвий билимлар асосида шаклланади ва юксалади. Аммо, қадриятлар замонлар силсиласида ўзгариб туради. Яъни, инсонийлик, хурмат-эътибор, тинчлик-хотиржамлик, билим эгаллаш, эл-юртга хизмат қилиш каби азалий қадриятлар ўрнини ўткинчи, ҳою-ҳавас, беъмани хузур-ҳаловат каби пуч нарсалар, ҳатто ёвуз ниятлар эгаллаши мумкин. Бу эса, инсонни шахс сифатида таназзулга олиб бораётганидан дарак берувчи ҳолат белгиси саналади.

Инсоният тарихига разм соладиган бўлсак, энг кам низолар, урушлар айнан маънавият, маданият ривожланишига имконият яратилган даврга тўғри кепар экан. Бу тарихда Уйғониш даври дея алоҳида атама билан таъкидланади. Шарқ ва Farb мамлакатлари ана шу даврда гуллаб-яшнаган, ривожланган, маънавий юксакликка интилган. Бу йўлда эса қўлёзмалар, китоб чоп этиш кашф этилгач, матбаачилик зинапоя воситаси вазифасини ўтаб келган.

Ҳозирда, бу борада, сўз юритганда, албатта, ноширлик ва матбаа соҳаси четда қолмайди. Ҳусусан, юртимизнинг қадимий ва бой тарихи, ҳалқимизнинг улкан маънавий бойлиги дунё илм-фани ривожига, демакки, маънавиятига ўз улушини қўшиб келган. Бугунги кунда, мазкур жараёнда, яъни, шахс, оила ва мамлакат маънавиятини юксалтиришда, матбаачилик ва матбуот воситалари асосий вазифани бажаришга ҳаракат қилмоқда.

Мустақилликнинг илк йиллариданоқ, юртимизда маънавият ва маърифат тарғиботининг асосий кўмакчиси матбаа ва ноширчилик фаолиятига давлат сиёса-

ти даражасида алоҳида эътибор қаратиб келинаётир. Маънавиятга тааллуқли, оммавий ахборот воситалари, ноширичиликни ривожлантиришга доир қатор қарорлар, қонунчиллик ҳужжатлари мазкур фаолиятнинг янада кенг кўламда ривожланиши учун йўл очди. Бу борада, жорий йилда эълон қилинган қарорга асосан, мамлакатимиздаги ноширлик фаолияти билан шуғулланувчи ташкилот ва корхоналарга янада катта имтиёзлар берилди. Бу имтиёзлар, кенг имкониятлар, биринчи галда, халқимиз маънавиятини, маърифатини янада юксалтиришга, баҳамжиҳатлигини мустаҳкамлашга қаратилган чора-тадбирлардир.

Дунё миқёсида инсон, оила, халқ маънавиятини асраб-авайлаш тобора дол зарблашиб бораётган даврда, юртимизда бу борадаги сиёсий йўналиш халқаро миқёсда эътироф этилмоқда. Унинг тарғиб-ташвиқотидаги асосий восита – матбаачилигимиз халқаро миқёсдаги турли танловлар, кўргазмаларда иштирок этиб, жаҳон стандартларига тенглашиб бормоқда.

Республикамида, бугунги кунда, матбаа ва ноширлик фаолияти билан шуғулланувчи ташкилотлар сафида салкам бир асрлик тарих ва тажрибага эга “Шарқ” нашриёт-матбаа акциядорлик компанияси алоҳида ўрин тутади. Корхонада чоп этилаётган етмишдан ортиқ газета, йигирмадан зиёд журналлар, бошқа босма маҳсулотлар ўзининг ғоявий-бадиий пишиклиги, юксак полиграфия ижроси билан ажралиб туради.

Фаолиятимиз мазмун-моҳиятининг ўзи фахрли бўлиш билан бирга, катта масъулиятни талаб қиласди. Ишлаб чиқарилаётган маҳсулот турлари аҳолининг моддий эҳтиёжини қондириши ёки ҳордиқ чиқаришига эмас, бевосита маънавиятига, тафаккурига таъсир этиши, уни маълум йўналишга буришга хизмат қилишининг ўзи, масъулиятнинг нечоғлиқ қамровга эга эканлигини билдиради. Дарслериклардан тортиб, илмий-оммабоп, ижтимоий-сиёсий, тарихий, бадиий адабиётларнинг ҳар бири, аввало, мазмун жиҳатдан сараланиши, синчков таҳлилдан ўтказилиши лозим. Бу борада, Ўзбекистон Ёзувчилар уюшмаси, унинг кенгашлари билан изчил фаолият йўлга қўйилганлигини ҳам таъкидлаб ўтмоқчи эдим. Чунки нашриётимизда давлат буюртмалари, дарслериклардан ташқари, ҳар йили икки юзга яқин номда турли йўналиш, соҳага тааллуқли китоблар ҳам чоп этилади. Уларнинг аксарияти бадиий ижод намуналариdir.

Чоп этилаётган адабий асарлар ўз жанр хусусиятларига кўра, Ююшманинг тегишли кенгашларида ўқиб, муҳокама қилинади. Холис тақриз, тавсиялар олингач, кейин нашр қилинади. Шу ўринда, ҳозирги кенгашларнинг фаоллиги, ишчанлигини алоҳида таъкидлаб ўтмоқчиман. Китобларнинг Ююшмада тақдимот маросимларини ўтказиш ҳам изчил ва амалий тус олганлиги эътиборга молик. Чунки бу янги китобнинг тарғиботига, охир-оқибат унинг ўқувчига тезроқ этиб боришига, савдосига ҳам яхши маънода таъсир қиласди.

Шу ўринда, алоҳида таъкидлаб ўтиш жоизки, аҳил оила сифатида эътироф этилган юртимизда, хусусан, “Шарқ” нашриётида дарслериклар еттита қардош тилда чоп этилади. Четдан қараганда, бу унчалик мураккабдек туюлмас, аммо унинг тайёрланиш жараёни ҳам, маънавий, хуқуқий асослари ҳам жуда чуқур. Буни алоҳида таъкидлашимизнинг боиси шуки, айrim қўшни худудларда, ўзбек ўқувчилари учун дарслериклар чоп этилмай, синфлар ёпиб қўйилаётган бир пайтда, бизда еттита қардош тилда мактаблар ва уларга дарслериклар чоп этилиши мамлакатимиздаги барча миллатларга кўрсатилаётган бекиёс ғамхўрликнинг яққол намунасидир.

Йил сайин жаҳон стандартлари асосида жиҳозланиб, шу савияда матбаа маҳсулотлари чоп этаётган корхонанинг нуфузи билан бир қаторда, иш кўлами, ютуқ ва муаммолари ҳам бор.

Гап ўзи бадиий асарларнинг, маънавият учун хизмат қиладиган китобларнинг савдосига тақалган экан, шу хусусда ҳам айrim мулоҳазаларни билдириб ўтмоқ жоиз. Республикаиздаги етакчи нашриётларда яхши асарлар чоп этилмоқда, бо-

рингки, уларнинг айримлари ҳақида танқидий фикрлар ҳам бўлиши мумкин. Ба, бу табиий ҳол. Лекин, юксак бадиий савиядаги китоблар нашр қилинмоқда. Энди, яхши китоб тезроқ ўқувчисини топса, яхши-да. Нашриётларнинг иқтисоди шунга қараб ривожланади, умуман, фаолиятининг мазмун-моҳияти шу асосга курилган. Худди шу ўринда, қийинчилик борлигини яширмаслик керак. Сабаб – китоб савдоси кўнгилдагидек йўлга қўйилмаган. Китобнинг газетадан фарқи – унга обуна бўлинмайди (аслида, буни ҳам жорий этса бўлади), почтальонлар уйга олиб келиб бермайди. Ҳозирча, ягона йўл – китоб дўконлари орқалигина китоб харид қилиш мумкин.

Энди ўйлаб кўринг, юртимизда нечта бундай дўкон бор? “Шарқ зиёкори” китоблар мажмуининг вилоят марказларидагина шохобчалари бор, холос. Хўш, туманлардаги китобхон, қишлоқлардаги китобсевар вилоятлар марказига бориб китоб сотиб оладими? Ҳали-ҳануз бутун бошли бир туманда битта ҳам китоб дўкони йўқ ҳудудлар бор. Жойлардаги ҳокимлар, маънавият-маърифат тарғиботчилари нега бу масалага эътибор қилишмайди? Амалдаги китоб савдо тизими бу жараёндан четда тургани кишини ўйлантиради. Китоб дўконларини фақат нашриётлар ўзи очиб, ўзи сотиши қийин жараён. Бу борадаги тегишли ташкилотлар, ҳалқ маорифи бўлимлари бу ишга бош кўшиши керак. Қолаверса, ҳомийлар, тадбиркорлар, фақат тўйхона, кафе очмасдан ҳар туманда икки-учта китоб дўконлари очсалар яхши бўларди. Бунга эса, жойлардаги ҳокимликлар бош-қош бўлиши лозим. Бу хайрли тадбир, савобли, маънавий жараёндан Ёзувчилар уюшмасининг вилоят бўлимлари ҳам четда қолмаслиги керак. Бўлимлар қошида савдо шохобчаларини очиш, ўйлаб кўришга арзийдиган масала. Жумладан, Фарғона вилоят Ёзувчилар бўлимида, бу борада, яхшигина тажриба бор.

Инсоннинг маънавиятга бўлган эҳтиёжи ҳеч қачон сўнмайди. Унинг тарғиботи турли воситаларда амалга оширилиши мумкин, бироқ, китобнинг азалий ўрни борки, бошқа воситалар буни босолмайди. Бадиий, илмий-оммабоп асарларнинг электрон шакллари кўпайиб боргани билан, улар китоб вазифасини бажара олмаслигини кундалик ҳаёт кўрсатиб турибди. Боғча, мактаблардан тортиб, тизимли таълим муассасаларининг барчасида китоб биринчи галдаги восита қуроли бўлиб қолмоқда.

Китоб шаклида чоп этилган бадиий ёки илмий-оммабоп асарларга, дарслик-ларга интернетдаги каби ҳеч ким ўзгартириш киритолмайди. Қолаверса, ҳар қандай китобни, жумладан, жаҳон адабиётининг ўлмас дурдона асарларини китоб шаклида сақлаш ва фойдаланиш қулай, ишончли. Техник воситалардаги каби улардаги ёзувлар, тасмалар, суратлар ва ҳоказолар турли сабаблар билан учуб кетмайди ёки тезда яроқсиз ҳолатга тушмайди. Қолаверса, электрон шаклдаги адабиёт воситаси билан китобни қўлга олгандаги таассурот, ҳиссиёт, яна жуда кўп афзаликлар яққол сезилиб туради. Замон тараққиёти билан адабиётларни тарғиб қилиш, аҳолига етказиб беришнинг янада янги шакллари кўпайиши ҳам мумкинdir, бироқ, китобнинг ўрни, юксак вазифаси сақланиб қолаверади.

Мамлакатимизда, бугунги кунда, ноширлик ва матбаа соҳаси деярли ҳамма йўналишларни қамраб олган. Сиёsat, ижтимоий-маданий ҳаёт, санъат, таълим ва инсон маънавияти, тафаккур олами билан боғлиқ бошқа кўплаб соҳалар ҳам унинг воситасида ҳалққа етказилади. Катта аҳил оилани ташкил этувчи мустақил, мустаҳкам юртимизнинг равнақи, ҳалқимизнинг маънавияти юксалишига сабитлик билан хизмат қилаверади. Бу юксалиш дунё узра бўй кўрсатиб, умуминсоний тинчликка ҳамоҳанг бўлиши, шубҳасиз.



## Шеърият

# Ҳар иламга айлантирсам етти оламни

**Узун жумла**

*Ҳасратимни элакдан ўтказиб,  
оҳ-воҳлашиб табассумга лойиқ*

*Заррани –  
Умрим дарахтини эгиб, шохлари орасидаги  
Аррани,  
Бошим осмонга теккан пайти  
завқу шавқум пайдо қилган  
Сайёрани,  
Хаста отамни елкасига опичлаб,  
Маккага оборолмаган  
Ношуд умидни,  
Руҳига монанд севгилисини  
Қарғага бериб қўйган йигитни –  
Қизилқўмда даф этсам...*

*Самарқанднинг Зомини гузаридан “Каптархона” гача  
Мотрудлик қоғозчи қоғозларини тарқатсан,  
Тўғралу Машрабни ёд билганларга,  
Битинг десам ишиқ байтларини...*

*Рафиқамнинг оқ сочларини қорайтирсам  
битта силашида,  
(У унумтса шеърбозлигимни).  
Иккимиз ҳам йигирма бирда –  
Регистонда учрашсак тағин...  
Ўтқизгунча учар гиламга айлантирсам  
етти оламни...*

*Хеч ким мени лақиллатмаса  
Ва ҳеч кимдан қолмаса кўнглим,  
Устозларим мард турса адл,  
Дўстларимдан кетмаса путур...*



**Абдували  
ҚУТБИДДИН**

1960 йилда туғилган.  
1978-1983 йилларда  
ҳозирги Миллий  
университетнинг  
журналистика  
факультетида ўқиган.

Бир қатор нашрлар  
ҳамда Ўзбекистон  
телерадиокомпаниясида  
фаолият юритган.  
Айни пайтда, “Халқ  
сўзи” газетасининг  
шарҳловчисидир.  
Абдували  
Қутбиiddин “Найсон”,  
“Хумо”, “Хаёл кечаси”,  
“Бахтили йил”, “Сен  
ва сен учун”, “Узоқдан  
олисга”, “Бор” сингари  
шеърий китобларнинг,  
шунингдек, кўплаб  
ҳикоялар, эсселар,  
бадиҳалар,

публицистик  
мақолаларнинг  
муаллифиидир.  
Абдували Қутбиiddинга  
2011 йили  
“Ўзбекистонда хизмат  
кўрсатган журналист”  
унвони берилган.

*Хувиллайман носоз, қулоқ тутаман,  
Буйруқлар беради кимдир ичимда,  
Начора,  
Бу узун жумлани муҳаббат билан  
Чизиб юбораман, шуниси маъқул.  
Бағримга қайроқлар осиб күргайман.  
Энди ўзимнимас, қайроқни ўртайман...*

### Эпос

*Ихран... гуёки тўзон... дарахт ... абрлар...  
Деразада ўтири...  
Деразадай...  
Боши ирга, сакрасин довул қасдма-қасд...  
Синдирисин оқ шуъла тун яримлаб ўтгач...  
Оёгингни ийгиб кетсин вақт лашари...  
Кессин қўлларингни япроқлар атай...  
Томчидаи сирған, томчидаи  
Томчила, томчилаш имкони бўлса...  
Томчила...*

### Ишқ мадҳи

*Дарёи маломат, анда аломатдир,  
Ошиқ овворадир, агёр саломатдир.*

*Ишқнинг қирғозида, кўнгил очиб эрдим,  
Оғир малолидан, вола чочиб эрдим.*

*Не қолди-ё, кўрмаги курмак эканму,  
Не қолди-ё, ҳалиям муртак эканму?*

*Гуҳари андуҳми, морбоз саҳар қолмиши,  
Садқаи сармикан, шаҳди шакар қолмиши.*

*Ҳайҳот, азоб сенсан, ҳассоси дард, ман-эй,  
Сўнг шароб сенсан, қассоби мард, ман-эй.*

*Ман-эй, сан-эй, ман-эй, на тошу на кесак,  
Ишқдан бирудор бўлсак, ул ишқ учун ўлсак.*

## Асл

*Хонишу сайроқ ёқимли, бизга-да асли керак,  
Тўтига мартаба қасри, бизга-да васли керак.*

*Ҳам ону ҳам жон зарур, покдомон имон зарур,  
Боши урарга шон зарур, Юсуфи Канъон зарур.*

*Ки айтибдур, умр моли лаҳадга бир мисқолдир,  
Ибтидо-ю интиҳо йўли чўпчак хаёлдир.*

*Ким билибдур, шамолнинг борлигин кулбасини,  
Ким белгилар юракнинг интизор қибласини.*

*Ҳар нечук юрмоқ афзал, кезмоққа фалак афзал,  
Карахтдан бедор афзал, нафратдан тилак афзал.*

*Аслида, бари гўзал, гўзалдан гўзал керак,  
Зебодан зебо керак, энг тоза асал керак.*

*Ҳаммага аён тақдир, битиги битилгандир,  
Айтсан ҳам, айтмасам ҳам сабоқлар битилгандир.*

## Эрдон сувчи Оқдарёда жон берди

*Пилдирайман, чулдирайман, тиззам чўккан,  
Иштихоннинг биқинида,  
Оқдарёда –  
Куюн дунё саманидай чопар юрак,  
Кум тупроққа юзим теккан,  
Оғзим теккан,  
Суяклари чуригандай –  
Қақшар кўкрак.*

*Маймун бўлиб юрганим йўқ эди асти,  
Хотинчалиши эмас эди бўю бастим.  
Милтиқдайдим, шу пайтгача шарақ-шуруқ,  
Не касофат нафас олсам, нафас қуруқ.*

*Эрдон отим, сув тарадим кетмон бўлиб,  
Гоҳо ёмгир, гоҳо катта осмон бўлиб,  
Гаштакларда гап ташладим султон бўлиб,  
Курашларда қўл узатдим сиртлон бўлиб.*

Энди эса, сувга пишган мушукдайман,  
Икки ёзи нов уланган тешикдайман,  
Ажал ниқтаб ўйнаб турган ошиқдайман,  
Аталага чўкиб қолган қошиқдайман.

Ўн чақирим қолувдия уйимгача,  
Тўрт кун қовди кичкинамнинг тўйигача.  
Ўн бир болам сув бўйига келармикан,  
Ё этимни эпкин ҳориб тилармикан?

Бу не бало, жон тиришар Оқдарёда,  
Икки оёқ икки тараф кетай, дейди.  
Каллам тошдай оғирлашар, бедаводай  
Кум ковлаган қўлим чуқур кираи, дейди.

Оловдайин тил қайтарган калима ҳам,  
Болаларга тушиб энди Ҳалима ҳам.  
Сув судраса, гум бўлсайдим, қани тезроқ,  
Лойқа тўлган хум бўлсайдим, қани тезроқ...

Эрдон отим, пирим дарё – хизмат қилай,  
Арвойимни ҳазратимга хилват қилай,  
Умр кўппак, қанжисиқлигин кўрдим ўзим,  
55 да эди ёшим, ҳасрат қилай...

### Ойбуви Элмурод найманнинг отига минди

Чиябўридай алаҳсиб, қоронгуга ўраниб,  
Кўзини чақчайтириб,  
Олиб кетди Ойбувини Элмурод найман.  
Бўридай увлаб бир гала йигит қувлади,  
Қаноти етти газ бургутдай учди Ойбувининг укаси.  
Ўроқни силталааб, ним яшил ёргуни ўриб,  
Қирнинг ўркачига ўтириб олди Қувондиқ кайвони:  
– Қувланг!  
– Ойбуви Элмурод найманнинг отига минмасин!

Беш тун ўтди, Ойбувининг укаси қайтди,  
Кўзи қип-қизил. Сўзи қип-қизил.  
– Элмурод найманни, Ойбувини, у минган отни  
Жар ютди.  
Шу гап. Оғзингизда тиши михдай турсин.  
Гулдургун.

## Диаграмма

*Тушунтириши мумкинми юрак тубини –  
Изоҳлаши мумкинми кўнгил ичини,  
Шарҳлаши мумкинми ҳаётни?..*

*Асло!..*

*Валдираши мумкин...*

*Ургутлик Худойқул галча, юз беш ёшгача  
Юз бешта эчкини сўйиб еган эди.  
Нимага?  
Балки умри эчки умрига ўхшаб кетгандир,  
Балки тогни тушунишини истагандир жонивордай.*

*Дадам, Аллаёрон чўққисида қор турса, севинарди,  
Олтмиши йил қор турди,  
Кейин турмади...  
Дадам ҳам турмади...  
Нимага?*

*Нималигин билмайди бирор,  
Лофни хуши кўради қайсар ақлу ҳуши.  
Гарчанд, бу томонга ҳилтиратиб ялов,  
У томондан ташриф буюради туши...*



## Наср



**Гулом  
КАРИМИЙ**

1962 йилда туғилган. ТошДУнинг Шарқ фольклористида таҳсил олган. Айни пайтда, Шарқшунослик институтидаги катта илмий ходим лавозимида меҳнат қилмоқда. “Карвон” (1988), “Турон қоплони” (1988), “Соҳибқирон ва аллома” (2002) тарихий қиссалари, “Наршах қаъласи” (2011) тарихий романи, “Арслонхон минораси” (2012) ҳикоя ва эсселар тўплами чоп этилган. Ўндан ошиқ бадиий, илмий ва таржима китоблар муаллифи.

## ЛАНГАР ФОЖИАСИ

**Романдан парча**

**БИРИНЧИ БОБ**

“Қизиқ, – ўйлади мактаб директори Рўзибой Раҳимов столи устида турган ҳужжатларни бирма-бир кўздан кечирар экан. – Уларни ака-сингил деб ўйлабман! Тавбангдан кетай, шунақаси ҳам бўларкан-да!”

У нигоҳини қоғозлардан кўтариб, рўпарасидаги ўриндиқларда омонатгина ўтирган йигит-қизга тикилди. Тавба, худди бир қолипдан чиқсанга ўхшайди-я!

“Рангу рўйлари ҳам бир хил – оқ-сариққа мойил. Лекин мана бу қоғозлар бўйича, – Раҳимов ҳужжатларга яна бир марта кўз ташлади, – бир-бирига мутлақо бегона, исмашарифлари ҳам бошқа-бошқа. Фақат бир жойда ўқишган экан. Қизиқ, бунча ўхшашликларини ўzlари билишармикин?”

Директордаги ажабланишни уққан йигит кулиб қўйган бўлса, қиз билинар-билинмас табассум қилди.

– Ҳаёлимдан нима ўтаётганини билиб турибсизларми дейман! – илжайди Раҳимов. – А, ўртоқ... – у йигитнинг йўлланмадаги исмига кўз ташлаб олди ва овоз чиқариб ўқиди. – Яшаржон, ростини айтсан, жуда ҳайрон қолдим. Бу тасодифми, ёки...

– Тасодиф, домла, – деди йигит самимий илжайиб, – ҳужжатлардан кўриб турганингиздек, бошқа-бошқа одамлармиз.

– Ҳм... да, лекин сизларни юборишгани яхши бўпти-да... – деди у юзига жиддий тус бериб. – Мактабимиз сиздек кадрларга жуда муҳтоҳ эди. Хўш, аризаларингизни ҳозир ёзасизларми? Ишга қабул қилиниш ҳақида дейман-да! Тўғри, бу кимдир ўйлаб топган расмиятчилик, холос, йўлланма билан келгандарга аризанинг нима кераги бор! Тўғрими, ўртоқлар? – Яшар бош ирғаб, жилмайиб қўйди. – Бўпти, қочиб кетаётгани йўқ, эртага ёзилар. Бугун эса дам олинглар, йўлда чарчаб келгансиз. Ҳа, таржима ҳолни ҳам эртага қўшиб топширасизлар – қаерда туғилгансизлар, ота-оналарингиз ким, дегандек. – У бироз ўйланиб қолди. – Айтганча, сўрамоқнинг айби йўқ: қаерликсизлар ўзи? Бу ҳужжатлар ичida, – у қоғозларни яна титкилади, – фақат йўлланмаю, қайси ўқишни битиргандарингиз ёзилган. Шу, ўзимизнинг вилюятданми? Қайси тумандан?

Яшар ерга қараганча, ўнгайсиз жилмайди:

– Билмаймиз, домла.

Кутилмаган жавобдан Раҳимов анқайиб қолди: “Бу нима дегани? Нега билмайди? Қанақасига билмайди? Нотўғри эшитмадиммикин мабодо?”

– Яъни?

– Биз етимхонада катта бўлганмиз, домла, – деди Яшар сал четга қараб. – Қаерликмиз, кимларнинг боласи бўлганмиз, ижтимоий жиҳатдан келиб чиқишимиз қандай, қариндош-уругларимиз қаерда – ҳеч нимани билмаймиз. Мавжуд ҳужжатлар бўйича ўша пайтларда гўдак бўлганмиз.

Раҳимов бир зум ҳайрат билан унга қараб тургач, танасини стул суюнчиғига ташлади, савлатли, икки юзидан қон томиб турган кабинет соҳибининг бу кутилмаган ҳаракатидан шалоги чиқиб кетган ўриндиқ норози ғижирлади.

– Э, узр, билмабман, минг бор узр! – деди у олдинги ҳолатига қайтиб, столидаги қоғозларни беихтиёр у ёқ-бу ёққа қўяр экан. – Қаранг-а, одамзод деганининг бошига не-не кўргиликлар тушмайди. Ҳали бу кунларни унтиб юборасизлар. – Барчалари учун ноқулай бўлиб турган мавзудан чиқиб кетиш учун бўлса керак, фанерадан ясалган жомадонларга имо қилди. – Бор юкларинг шуми?

Яшар бош иргади:

– Қолганлари ётоқхонамида. Жойлашиб олгач, вақтимиз бўлганида келтиармиз деб, ҳозирча ўша ерда қолдиравердик.

– Айтгандек, сизларни жойлаштириш масаласи. Бу ёққа келишларингиз ҳақида хабар беришганда, ҳозирлик кўриб қўйганмиз. Яхшигина хонадон. Умид қиласманки, сизларга маъқул бўлади. Уй соҳиби ўзимизнинг ҳамкаслардан, мактабимизда ишлайди. Исмлари Эшмамат, лекин биз ҳаммамиз у кишини домла Давланов деб чақирамиз... Хўш, яна нима десам экан... ҳа, хотини Ҳожар опа ҳам яхши, оқила аёл. – Шу ерга келганда Раҳимовнинг юзи ёришди. – Ажаб эмас, сизлар ўша ерда туриб, бағрилари тўлиб қолса, фарзандларидек бўлиб кетсангиз – ҳайҳотдек уйда ўзлари... яъни, ёлғиз туришади.

– Нима, – унга саволомуз боқди Яшар, – бола-чақалари уйли-жойли бўлиб чиқиб кетишганими?

Раҳимов бош чайқади:

– Биласизми, Яшаржон, уларнинг фарзанди йўқ. Дунёдан шундай ўтишаяпти, – деди у юзига ачиниш туси бериб. – Кўриб турганингиздек, бу дунёда ҳар кимнинг бошида ҳар хил савдо.

– Домла, балки улар шу ҳаётга кўнишиб қолишгандир? – деди Яшар бироз ўйланиб қолгандан сўнг. – Қандоқ бўларкин? Бориб ҳаловатларини бузмаймизми? Ростини айтсам, биз ҳеч қачон хонадонда яшамаганмиз. Ўзим айтган ўша... сабабларга кўра.

Раҳимов столини айланиб ўтиб, ёнида тўхтаганда Яшар ҳам унинг ҳурмати учун жойидан турди.

– Биз ҳам анойилардан эмас, аллақачон розилик олганмиз, – деди у тантанавор, йигитнинг “ӯша сабаблар” деган сўзларини эшитмаганга олиб. – Лекин, гапнинг очиги, икки нафар ёш мутахассисни юбораямиз, дейишганда мен негадир... йигитларни юбораётган бўлишса керак, деб ўйлагандим, Давлановга ҳам шунақа деб тушунтиргандим. – У Нодирага ўғринча кўз ташлаб қўйгач, давом этди. – Аммо нима фарқи бор! Қайтанга яхши – хотин-қиз ўқитувчиларимиз биттага кўпаядиган бўлди. Нима дедингиз, қизим? – деди у Нодирага, лекин кўзини ерга тикиб турган қизнинг жавобини кутмай, кўтаринки кайфиятда яна Яшарга юзланди. – Балки... тўйларингизни ҳам шу ерда, худди ўша ҳовлида ўтказармиз! А? Нима дедингиз? – ҳар иккисига навбатма-навбат, муғомбirona кўз ташлади у.

Раҳимов ўз-ўзидан (балки ҳаётий тажрибаларига суюниб) бу икки ёшнинг бирга келиши текликка эмас, деган хulosага келган, лекин аниқликни жуда яхши кўрганидан (касби бўйича бекорга математика ўқитувчиси эмас-да!), ўзини тутиб турга олмаганди.

Яшар унга аввал ҳайрон бўлиб, сўнг қовоқларини солиб қаради:

– Сиздан илтимос домла, фақат иш ҳақида гаплашсак, – деди у совуқцина, сұхбатдошининг кўзларига тикилиб.

Йигитнинг бетгачопарлигидан ўзини йўқотиб қўйган Раҳимов ғарибона илжайди. “Баттар бўл! – ичди ўзини ўзи сўқди у. – Жуда керак эди сенга шу нарса! Аммо йигит тушмагурнинг феъли сал тез, шекилли? Айтадилар-ку, бир ориқдан, бир сариқдан кўрк деб! Чўрткесарлигини-чи! Бекорга етимхонада катта бўлмаган-да! Сал эҳтиёт бўлиб муомала қилиш керакка ўхшайди. Майли, қўлим остида бир-икки ой ишлагач, ипакдек мулойим бўлиб қолади!“.

– Хўш, нега турибмиз унда? Кеч бўлмасдан сизларни уй эгалари билан танишишиб қўяй. Мактабдан кўп олисда эмас. Қани, жомадонларни кўтаринг, – деди у Яшарга худди ҳеч нарса бўлмагандек, лекин буйруқнамо оҳангда.

Икки қўлинни орқасига қилиб улардан сал олдинда, тошлоқ йўл бўйлаб оёқлари тагига тикилганча бораётган Раҳимовни йигитнинг нега бунча кескинлик билан жавоб бергани ажаблантираётганди.

“Йигит киши ўз йўлига, аммо нега қиз у билан бу ерга – дунёнинг бир четидаги қишлоққа келади? – йўларди у. – Йўлланмами? Менимча, бир жойда бўлишларини ўзлари сўрашган ва балки “ҳаммасини” аллақачон ҳал қилиб қўйишгандир! Нега энди шундай бўлмасин! Ахир, шунча йил бирга бўлиб...“

У ўз тахминларида жудаям тубанлашиб кетмаслик учун, йигитни гапга солиша қарор қилди:

– Яшаржон, режалар қандай? Йўқ, йўқ, мен бу сафар бошқа нарса ҳақида, яъни, бирон нимани баҳона қилиб, қайтиб кетмайсизларми, демоқчиман? Кадрларни сақлай билмабсиз, деб мени сўқиб юришмайдими раҳбарлар? Сизлардаги мажбурият каби, менга ҳам бу борада масъулият юкланган.

Яшар жомадонларни ерга қўйди:

– Кўрқманг, домла, гап тегмайди, – жилмайди у хийла олдинроқ қилган “бетгачопар”лигини юмшатиш учунми. – Бир йилга юборилганмиз... то қўлимизга диплом теккунча. Қийинчиликларга келсак, кўнишиб кетганимиз.

Раҳимов мамнун бош иргади ва бунга маълум сабаблар бор эди: бундан бир йил олдин ҳам ҳалқ таълими бўлимидан бошқа бир ёш мутахассис – физика ўқитувчисини йўлланма орқали ишга юбормоқчи бўлганларини, аммо у мансабдор таниш-билишлари орқали бу ерга ишга келишдан бўйин товлаганини эшитганди. Мана, мактабда ҳануз-ҳамон ушбу фандан дарсларни билим юртини сиртқида битирган меҳнат ўқитувчиси олиб боради. Умуман, бу борада катта масъулият нафақат ишга келувчилар, балки иш берувчиларга ҳам юклатиларди – улар янги ходимларнинг тўлақонли фаолият юритишлари учун барча шароитни яратиб беришлари керак эди.

– Бир йил-ярим йил деб ўтируманг! Насиб қилган бўлса, шу ерда илдиз отиб кетасизлар! Одамларимиз жуда яхши. Об-ҳавоси-чи! – деди у худди ўзи ҳам биринчи маротаба кўраётгандек ҳавас билан узоқ-узоқларга кўз ташлаб. – Қаранг, бундай тоғларни қаерда кўргансиз?

– Ростдан ҳам гўзал жойлар, – унинг фикрига қўшилди Яшар. – Туман ҳалқ таълими бўлимида бўлганимизда роса мақтовини келтиришганди, айтганларича бор экан. – У ўнғайсизланганча кулиб қўйди. – Мен ҳатто бу ерларни қаҷонлардир... кўргандек бўлаяпман. Балки тушимдадир. Нимаси биландир Бахмал тоғларига ўхшаб кетаркан. Тўғрими, Нодира?

Негадир хомушланганча кетиб бораётган қиз йигитнинг гапига фақат бош ирғабина қўйди.

Раҳимов иккаласини кўрганидаёқ қизнинг чехрасидаги мана шу доимий хомушликни пайқаган, аммо буни йўл чарчогига йўйганди. Энди эса у ҳатто тундлашгандек! Нимадан бўлса? Ҳа, кераксиз савол бериб, бунинг устига, қайгули ўтмишларини ёдга солиб, айниқса, қизни хафа қилганга ўхшайди.

Шу ўйларга борган Раҳимов бирозгина бўлса-да, “айбини” ювишга киришди.

– Ҳали баҳорда кўрасизлар, бу ернинг қанақа бўлиб кетишини! – деди у очиқ чехра билан. – Бутун атрофни лола босиб кетади. Чукирини<sup>1</sup> айтмайсизми! Ҳа, айтгандек, Яшар, от минишни биласизми?

<sup>1</sup> Равоч

– Нимайди? – ажабланди Яшар. – Ёки ишга отда бориб келаманми? Биз борадиган уй мактабдан унча олис эмас, дегандингиз-ку. – У оёклари тагида турган зил-замбил жомадонларга хавотирланиб кўз ташлаб олди. – Ҳали кўп юрамизми?

– Йўқ, келиб қолдик ҳисоб, – кулди Раҳимов. – Отга келсак, қишлоғимиз мақтовини келтирганлар бу ердаги тўйларнинг кўпкарисиз ўтмаслигини айтишмаганими? Энг керакли нарсани-я! Э, бу ернинг кўпкарисини кўрмабсиз, оламга келмабсиз! Насиб бўлса, рўзгорни тиклаб олганларингиздан сўнг, битта от сотиб оласиз. Нега куляяпсиз? Агар маошнинг яхшигина эканлигини ҳисобга олсан, бунинг сира қийин жойи йўқ. Балки кейинроқ қишлоқнинг олд чавандозига айланарсиз. Кўринишингиз шундан далолат бераяпти, – деди у Яшарнинг самбитдек қоматига кўз ташлаб қўяркан.

– Мактаб ўқитувчилари кўпкарида қатнашади, деб сира ўйламагандим.

– Нима, ўқитувчи одам эмасми? – калта, дўмбоқ кўлларини икки томонга ёйди Раҳимов. – Бизда ҳатто ўкувчилар ҳам улоқ чопади-ку!

– Нима, улар мен билан улоқ талашадими? – кулди Яшар. – Ўқитувчиси билан-а?

– Бўлмасам-чи! Ҳатто улоқни тортиб олиб, изза қилишлари мумкин! Шунақалари бор... айниқса, юқори синфларда. Бизда ўсмир ва кучга тўлган йигитлар тугул, қартайган чоллар ҳам улоқ чопишади. – Муолишдаги пастаккина тош девор билан ўралган ҳовли яқинида тўхтаганларида отнинг кишинаган товуши эшитилди. – Келдик. Эшитаяпсизми? Балки домланинг мана шу отини сотиб оларсиз? Қайси бир гурунгда, яхши харидор чиқса, сотишини айтган экан. Зўр от лекин, зарап қилмайсиз.

Жавоб ўрнида одоб билан кулимсираган Яшарнинг хаёли шу тобда кишнаш овозда эмас, бутунлай бошқа – ўзи кўз ташлаб турган томонда эди.

– Домла, – юзланди у бир пайт Раҳимовга. – Анави... узокдан кўриниб турган, тепадаги обида... масжидми? Жуда чиройли экан. Худди катта шаҳарлардагидек. Қачон қурилган?

Раҳимов ҳам энди ўша томонга кўз ташлади:

– Кўп бўлган қурилганига, тахминан... ўн тўрт-ўн бешинчи асрларда. Шунақа мустаҳкамки, беш асрдан бери қилт этмайди.

– Ҳали бу ердан шунақа зўр усталар чиққанми? – деди обидага мафтун бўлганча тикилиб турган Яшар. – Қизиқ, мен тарихчи бўлганим билан, у ҳақда ҳеч нарса эшитмаган эканман. Ким курган уни?

Раҳимов иккиланиб қолди:

– Билмадим. Масжид ва хонақоҳ пештоқидаги мармар лавҳада ким, қачон қургани... қурдиргани араб имлосида ёзиб кўйилган. Асос солғанлар аслида ким бўлганини билмадим-у, лекин қурувчи уста ва меъморлар... Миср томондан келишган экан.

– Наҳотки, ўша ёқлардан? – ишониб-ишонмай қаради Яшар. – Дунёнинг бир чеккаси-ку! Ҳатто буғунги тараққиёт даври – поезд, машиналар замонида ҳам бу осон эмас! Қандай келиб қолишган?

– Ким билади, балки... туюда келишгандир? – масжиддан кўз узмай жавоб берди Раҳимов. – Балки эшақда! Ахир, ота-боболаримиз ҳам мана шунақа уловларда ҳажга боришган-ку! – кулди у. – Кўпчилиги умрлари якунини ўша ерда кутиб, уйларига қайтмаган, боришка ва қайтишда йўлда ҳалок бўлганлари ҳам бор гап. Ҳатто ҳажга боришдан асосий мақсад ҳам шу бўлган, дейишади. Бу обиданинг асосчиларига келсак, бу ҳали ҳаммаси эмас – ривоятларга қараганда, улардан энг биринчи келгани бу ерга ўзи билан Қуръоннинг бир нусхаси ва пайғамбарнинг тўнини олиб келган экан... хирқаи муборак, дейишади.

Нодира сал нарида уларнинг сұхбатига жимгина қулоқ солиб турар, Яшар эса ўзи биринчи марта эшитиб турган “хирқаи муборак” атамасига эътибор ҳам бермай, билин-билинмас жилмайди:

– Қуръон? Ҳа, майли, бу мумкиндири. Аммо тўнингиз нимаси? Чопонми? Қайси пайғамбарники экан? Уларни жуда кўп бўлган, деб эшитганман.

Бир умр етимхоналарда яшаган, университетда эса илмий атеизмдан фақат беш олган (бундан паст баҳо қўйишга домланинг ҳақи йўқ бўлиб, икки, уч ёки тўрт баҳо олган талабалар “художўйлар” сафиға кириб қолиши мумкин эди). Яшарнинг бу борада билими ниҳоятда саёз, деярли йўқ ҳисоби, Раҳимов эса раҳбар ва фирмә аъзоси эди.

Шунинг учун, гарчи бу борада у баъзи бир нарсалардан хабардор бўлса-да, негадир “жуда чукурлашиб” ўтирамди:

– Билмадим, биронтасиникидир-да. Ҳар хил гаплар юради. Лекин мен кўпам ишонавермайман.

– Улар ҳозир ҳам шу ердами? Чопон билан Қуръонни айтаман?

Рахимов бу мавзуни очганидан пушаймон ея бошлади:

– Билмадим, бу ҳақда ҳам турли гаплар юради. Бирор у дейди, бирор бу. Лекин ҳеч ким ўз кўзи билан кўрмаган. Чопон... э-э, тўн деганим, энди хонақоҳнинг ўзида эмас, бир хонадонда ҳануз-ҳамон сақланади, қалин мато билан ўраб-чирмаб ташланган. Уни тавоғ қилгани келган зиёратчилар нарироқдан кўз ташлашлари мумкин – ушлаб кўриш қатъий ман қилинади.

– Ўзим ҳам шунақа – бор-йўғи чўпчак бўлса керак, деб ўйлаб тургандим, – деди овоз чиқариб кулиб юборишдан ўзини аранг тийган Яшар. – Чопон ҳар қандай сифатли матодан қилингани билан, бунчалик узоқ сақланмайди. Лекин мени аллақандай афсонавий чопон ёки Қуръоннинг нусхаси эмас, ўша келгандар, масжидни бунёд этгандар кўпроқ қизиқтираяпти. Нега шунча жойдан бу ёққа келишган экан? Биргина шуни куриш учунми? Наҳотки, Лангар бир пайтлар шу қадар катта мавқега эга бўлган? Катта шаҳарларга мос-ку, бу иншоот?

Рахимов одати бўйича қўлларини яна икки томонга ёйди:

– Бу энди ёш болага ҳам маълум – мусулмончиликни тарғиб қилиш учун-да! Айтишларича, уни аллақандай сўфийлар қурдирган экан. Номлари ҳам ғалати – “ишқия”. Исломда... нима деса бўлади... шунақа оқим бўлган, ҳозир ҳам дунёning турли бурчакларида бор дейишади.

– Тарғиб? – ажабланди Яшар “оқим” деган сўзга умуман эътибор бермай. – Ўн бешинчи асрда-я? Нима, ўша пайтда бу ерларда ислом бўлмаганми? Уни араблар юртимизга саккизинчи асрдаёқ олиб келишмаганми? Яъни, бутун Мовароуннаҳрни босиб олганларида? Менимча, ўн бешинчи асрга келиб, уни тарғиб қилишга ҳеч бир ҳожат қолмаганди.

Рахимовнинг у билан баҳслашгиси келмади.

– Мен фақат бир нимани қўшимча қилишим мумкин – ҳозирги кунда масжид ҳам, хонақоҳ ҳам қулф, – деди у мавзуга тезроқ нуқта қўйиш учун тўмтот қилиб. Бир зум сукут сақлаб тургандан сўнг эса ғалати илжайганча давом этди. – Нима рўй берган бўлмасин, ўлкамизнинг узоқ ўтмиши билан қизиқишингиз яхши, Яшаржон. Бунинг устига, мутахассислигинги ҳам шунга тўғри келади. Лекин, сиздан илтимос, бундай нарсаларга чалғиманг – сиз янги авлодга илм бергани келгансиз! Бизда сиёсат қандай? Биласиз-а? Баракалла: дин давлатдан ажратилган, давлат эса – диндан! Қани, кетдикими? Бошқа нарсани қўйиб, сиз ҳозирча мактабда қандай иш бошлишингизу Давлановнинг оти ҳақида ўйланг!

Яшар обида томонга яна бир марта қараб қўйди-да, оёқлари тагида турган зилзамбил жомадонларни ердан узди.

## ИККИНЧИ БОБ

Юз тузилишидан анчайин ёш кўрингани билан чекка соchlарига аллақачон оқ ораган Давланов титраётган қўлидаги пиёлани хушидан кетиб қолган аёлининг лабига тутар, аммо чайқалаётган сув очиқ қолган ёқаларига тўкиларди,олос.

– Ҳожар! – деди у бошини лўлаболиш устига қўйиб ётган аёлни ўзига келтириш учун. – Кўзингни очсанг-чи! Нима бўлди сенга?

Ҳамма лолу ҳайрон бўлиб қолган, жумладан, Яшар ҳам қўзларини тароқи гилам устида ётган аёлдан олмас ва нима бўлганини тушуна олмаётганди.

– Илгари ҳам шунақа бўлиб турардими? – деди Рахимов Давлановга юзланиб.

Давланов хотинидан кўз узмаган ҳолда бош чайқади:

– Йўқ, биринчи марта. Ҳожар! – Аёлнинг нафас олаётгани сезилиб турса-да, худди жонсиздек ётарди.

– Балки Вағизни чақиравмиз?

Давланов эгнидаги чопонини ечиб, хотини устига ташларкан, Раҳимовга юзланди.

– Рост айтасиз, мен Вағизга бориб келай, – деди-да, кўзлари кўркувдан катта-катта очилиб, бир четда ранги ўчинқираб турган Нодираға қаради. – Қизим, холангизнинг бунақа дарди йўқ эди. Ўзим ҳам ҳайрон қолаяпман.

Давланов отига апил-тапил эгар-жабдуқ уриб, жўнаш учун эндиғина узангига оёқ қўйган эди ҳамки, Яшарнинг баланд, ҳаяжонли товуши уни тўхтатди:

– Домла! Янгам кўзини очяпти!

Аввал Ялт этиб ортига қараган Давланов юргурганча қайтиб келди-да, аёлининг тепасига энгашди.

– Ҳожар! Менга қара! Мана, рўпарангда турибман! Эшитаяпсанми? Қаёққа қарайапсан?! Ҳой! Мен бу ердаман!

Уни эшитмаётган аёл чеккаларида ёш қотиб қолган кўзлари билан гўё бошқа нарсани изларди. Нихоят, ҳали унчалик ҳам жон қайтмаган нигоҳи айвоннинг бир четидаги Яшарда тўхтагач:

– Кимсан? – деди узоқ вақт тикилиб тургандан сўнг.

Бу саволдан барчанинг, шунингдек, Яшарнинг ҳайрати баттар ошди: “Нима?! Кимлигим билан нима иши бор бу аёлнинг? Нега менга бунча тикилади?”

Бир-бирларига қараб олишди ва бундан тахминан беш-ўн дақиқа илгари бўлиб ўтган воқеа яна ҳаммаларининг кўз ўнгига қайта гавдаланди: дарвозани номигагина тақиљлатгандан сўнг, аввал ичкирига Раҳимов кирди, ундан сўнг Яшар, Нодира эса ҳали остона ҳатлашга ҳам ултурмаганди. Ҳовлида қандайдир юмушларни бажариб, имирсилаб юрган Ҳожар хиёл жилмайиб (бегона йигитни кўргач, ёш ўқитувчилар этиб келганини англағанди) уларга пешвуз юрди ва кутилмагандан ранги оқариб, жойида қотиб қолди – буни кўрган Яшар ҳатто салом беришни ҳам унутиб қўйди. Аёл бир неча сония унга тикилиб турди-да, кутилмагандан хушидан кетиб, ерга йиқилди...

– Испинг нима? – яна сўради аёл ҳадеганда жавоб бўлавермагач.

– Яшар.

– Нима?! – инграб юборди бошини ёстиқдан сал узиб турган аёл, сўнг, пастки лабини аламли тишлаб, шифтга бироз тикилиб турди-да, яна йигит томон юзланди. – Эсизгина... адашибман, шекилли. Кечир мени, болам, сени бирровга жуда ўхшатибман. Балки ишонмассан... қўйиб қўйгандек ўзинг эди... бир туки ҳам бошқача эмас. Ёши ҳам, чамаси сен қатори эди ўшанда... йўқ, каттароқ эди.

У гўё алжиётгандек эди. Гарчи ўзига келганидан кўнгли анча жойига тушган бўлсада, аёлининг бу сўзларидан сўнг Давланов яна безовталанди:

– Кимни айтаяпсан? – сўради у мулоийимлик билан. – Мехмон кимга ўхшар экан?

Ҳожар рўмоли учини кўзига босди:

– Акамга... Ўзингиз яхшилаб қаранг, – деди у чуқур хўрсинаркан.

Нигоҳини хотинидан узиб Яшарга тиккан Давлановнинг лаблари четида синик табассум пайдо бўлди.

– Рост... эътибор қилмаганимни қара. Хўп, – яна аёлига юзланди у, – ўхшашлиги рост, лекин шунга одам ҳудудан кетиши керакми? Қани, ўрнингдан тур. Мажолинг етадими? Ёрдамлашайми ё?

– Шошманг, сал ўзимга келиб олай. – Шундай деб кўзларини Яшарга тиккан аёлнинг кўринишидан яна нималарнидир сўрамоқчи бўлгани билиниб турарди. Шундай бўлди ҳам. – Менга яқинроқ кел-чи... – Йигит унинг истагига бўйсунди. – Ўтири ёнимга... мана бу ерга... яхши... Демак, исминг... шунақа экан-да? Отангники-чи?

Яшар худди Раҳимовнинг кабинетида бўлгани каби сал четга боқиб, қизарганча жавоб берди:

– Хола, мен отамни кўрмаганман. – У шундай деб, аёлга юзланди ва юраги шув этиб кетди: унинг жавобидан сўнг Ҳожарнинг ранги баттар оқариб кетганди. Ё тавба, яна бир балони бошламасайди!

Давланов ҳам буни сезди, ҳаммаларига аланг-жаланг боқаётган Раҳимов турган жойида оғир қимирлаб қўйди, Нодира эса...

Шу пайтгача Ҳожарнинг нигоҳи унга тушмаган, тўғрироғи, у ҳозир Яшардан бошқа ҳеч кимни кўрмайтган, пайқамайтган эди.

– Кўрмагансан?! Нега кўрмайсан?! – худди Яшарни минг йилдан бери биладиган, ҳар куни дакки бериб юрадигандек, бемалол, деярли зуғум билан сўради аёл.

– Хўп, кўрмаган бўлса нима? – деди Раҳимов Яшарнинг ер тагидан кўз ташлага-ни ва бу билан ўзидан нима истаётганларини сезиб. – Агар жуда керак бўлса, ўзим ҳаммасини айтиб бераман. Мен ҳам сўрагандим, тушунаяпсизми? Қўйинг, меҳмонни хижолат қилманг.

Аммо Ҳожар уни “эшифтмади”:

– Онангни-чи?! – энди важоҳат билан сўради аёл. – Уни ҳам кўрмаганмисан?! – У айни шу саволга жавоб ҳамма нарсани ҳал қилиб берадигандек, йигитга еб юборгудек бўлиб тикилиб қолганди. Яшар аста бош чайқади, аммо бу Ҳожарни қониқтирумади. – Нима?! – деди у жон ҳолатда.

– Кўрмаганман, хола, – деди Яшар имкони борича ўзини босишга ҳаракат қиларкан. – Яна нима қизиқтиради сизни? – заҳарли табассум билан давом этди у. – Исларими? Йўқ, буни ҳам билмайман. Қаерликсан, деб сўрамоқчи бўляпсизми? Мен қаердан билай! Гўдаклигим, айтиш мумкинки, йўргакдалигимдан етимхоналарда катта бўлганман. Қариндош-уругларимдан ҳам хабарим йўқ. Ҳа, айтгандек, бу ерга ҳам биринчи бор келиб турибман – ҳеч кимни танимайман! Айниқса, акангизни...

Шу сўзларнинг ҳаммасини бараварига қалаشتариб ташлаб, аламли жилмайганча аёлнинг кўзларига тикилиб турган Яшарнинг нигоҳида “бўлдими, сўроқ тугадими?” деган кинояни уқиш мумкин эди. Дарров Раҳимовнинг хотирасига кабинетида бўлиб ўтган ҳолат тушди.

Ҳожар яна нималарнидир сўрашга ҳозирланар, аммо, афтидан, унга йигитнинг кескинлик билан айтган жавоблари халақит берарди. Бўлаётган ҳангомалардан хижолатга тушаётган Давланов энди гапга аралашди.

– Меҳмон, хафа бўлманг холангиздан, – деди у ерга қараганча. – Биласизми, бундан анча йиллар илгари... инқилобдан бироз кейин... холангизнинг бир акаси... – бу ёғига нима дейишини билмай чайналиб қолган Давланов бироздан сўнг давом этди. – Хуллас, у Лангарни тарқ этди. Янги ҳокимият унга маъқул келмаганди. Афғон томонларгами-еј, кетиб қолган. Билмадим яна – қайтиб келмагач, шунақа хуросага келганимиз. Ўшандан бери дараги йўқ – ўлиқми-тирикми ҳеч ким билмайди.

Ҳожар ётган жойида пиқиллади:

– Ёшгина хотини, норасида икки гўдагини ҳам олиб кетди. Олти ойлик ҳам бўлишмаганди...

Яшар ҳалигина энсаси қотиб, жаҳли чиқиб турган бўлса-да, бу сўзларни эшишиб, чўзилиб ётган аёлга нисбатан қалбида раҳм-шафқат уйғонди: бефарзандлиги, кўнгли ярим бўлиб юргани етмагандек, бундай балолар ҳам бошидан ўтган экан-да? Лекин бунинг менга нима алоқаси бор? Нима, мени ўша акасининг... ўғли деб ўйлаяптими? Гўдаклар олти ойга ҳам тўлмаганди, дедими? Икки бола ҳам-а? Буни қандай тушуниш керак? Улар... эгизаклар бўлишганми?

Ҳожарнинг дард билан “уф” тортиши унинг хаёлини бўлди:

– Бор бўлганларида худди сендеқ бўлишармиди. Дуркунгина болалар эди, эгиз бўлишларига қарамай. Ҳамманинг ҳаваси келарди, иккаласи ҳам отасининг худди ўзи эди... янгамга ҳазиллашардим, буларингизни сиз эмас, акам туқкан, деб...

– Аҳволингизни тушуниб турибман, хола, – деди Яшар унга хайриҳоҳлик билан кўз ташлаб. – Ҳамдардман. Ўша жиянларингиз... Ҳасан-Хусанлармиди?

Ҳожар аста бош чайқади:

– Йўқ, биттаси қиз... попукдеккина эди.

Яшар яна бошқа нарсаларни эшитишга шайлангандек, ундан кўз узмай қолди, Раҳимовнинг кўнглида эса бир нима ғимирлагандек бўлди, ялт этиб ҳамон бир чеккада турган Нодирага кўз ташлади: қизи!

Аммо у хуроса қилишга шошилмади (у бир марта “хуроса” қилган ва айтиш мумкинки, яхшигина таъзирини еганди) ва худди одатий нарса ҳақида гап кетаётгандек:

– Роса олатасир замонлар эди-да, ўзиям, – деди у Давлановга юзланиб. – Янгамнинг акаси қаергадир кетганлигини мен ҳам эшиштандим бир пайтлар. Лекин бунақалар, эҳ-хе, қанча бўлган! Бирор очлиқдан бир бурда нон илинжиди, бирор бошқа сабабдан. Да-а... Демак, болаларнинг исми Ҳасан-Зухра бўлган экан-да? Ўша одамнинг, яъни, қайноғанлизнинг болаларини айтаман, – аниқлик кириди у. – Одатда шунақа бўлади-ку?

– Шундай, – деди Давланов сухбатни диққат билан тинглаб ётган хотинига қарамасликка ҳаракат қилиб. – Ҳожар ҳамон номларини тилдан қўймайди, эслаб йиғлагани-йиғлаган.

Рахимов (у ҳали-ҳамон ўзининг дастлабки “хулосаси” таъсирида бўлиб, келгандарнинг туғишганлар бўлиб чиқишини сира истамаётганди) сермаъно жилмайди ва деди:

– Бўлди, янга, туринг энди. Булар бутунлай бошқа-бошқа одам. Жиянларингиз ҳам тирик юришгандир, пешоналарида яшаш ёзилган бўлса. Акангиз ва янгангиз ҳам албатта! – қўшиб қўйди у эҳтиёткорлик билан. – Балки, пайти келиб кўриш ҳам насиб этар. Яшаржон! – мурожаат қилди у ҳамон аёлдан нигоҳини узолмай, нималарнидир ўйлаб турган йигитта. – Сизни кўриб янгам худди ўз жигарларини кўргандек бўлиби! Энди шунга муносиб бўласиз!

Ҳожар устига ёпиб қўйилган чопонни аста четга олди, йиллар соя ташлаб салқиган юзидағи ёш изини кафти билан сириб, ўрнидан ярим турди.

– Ҳозир чой қўяман, – деди у. – Яшаржонга (бу номни айтатиб, йиғлаб юборишига бир баҳя қолди, аммо ўзини тутди) меҳмонхонани бўшатиб берамиз... энг шинам хонамиз ўша. Бундан буён нон-чойи, кир-чирига ўзим қарайман. – У ийманибина Раҳимовга кўз ташлади. – Раҳмат сизга, Рўзибод домла, Яшаржонни (унинг киприклири аламли титраб кетди) бизнисига олиб келганингиз учун. Ростдан ҳам худди жигаримни кўргандек бўлдим. Лекин минг афсуски...

– Яна бошлайсанми? – аёлининг лаби буришаётганини кўрган Давлановнинг энди жаҳли чиқди. – Қаердаги бўлмағур гаплар билан жинни қилдинг-ку ҳаммани!

Ҳожарнинг ўрнидан тураётганини кўрган Яшар ҳам қўзғалди, лекин кўмаклашишга журъат қилмади. Ҳожар энди унга ҳадеб термилавермас, йигитни хижолатга қўйганидан, худди Раҳимов каби аянчли ўтмишини билиб-билмай ёдига соганидан ўзи ҳам ўнғайсизланмоқда эди.

Аммо, нима қилсин, шунчалик даражада акасига ўхшаш бўлса!

Ҳожар ўзига аранг бўйсунайтган оёғини кавушига тиқаркан, бошини кўтарди ва...

– Ким бу қиз? – ҳайрон қолганича эрига қаради у. – Булар билан бирга келдими? Нега йўлақда турибди?

– Ана энди ўзингизга келаяпсиз! – кулди Раҳимов. – Томоша кўрсатишдан бўшамадингиз, топганингиз шу йигит бўлиб, қизга ҳатто қарамадингиз ҳам. Танишинг – исми Нодира! Яшар билан бирга келган муаллима. Нодира қизим! – имлади у қизни. – Кел, холанг билан кўриш.

Нодира жойидан қимирламади: ҳозиргина ўзига келган, қайси бир яқинларини эслаб дийдиё қилган, аммо таҳминларида адашган аёлнинг даҳшатга тўлган нигоҳи уни жойига михлаб қўйганди.

Юраги дук-дук ура бошлаган қизнинг оёқларига билинар-билинмас титроқ кирди: ҳозир яна йиқилиб тушади! Ушланглар!

Бу – ички, сассиз бир нидо эди, шу боис яна кечикишиди.

## УЧИНЧИ БОБ

Сочлари анчагина сийраклашиб қолган, бурни картошкани эслатадиган, ориқ елкалари бўртиб чиқиб турган Вағиз яна ўша жой – тароқи гилам устида худди ўлиқдек ётган Ҳожарнинг билагини тутганча юрак уришини санаради.

– Нима бўлди аёлингга? – бутунлай довдираб қолган Давлановга ўгирилди у.

Келиб чиқиши бошқирд бўлган бу одам бир пайтлар – узоқ Россияда рўй берган давлат тўнтариши Туркистонда ҳам ўз мавқенини мустаҳкамлаб, унинг чекка-чекка-

ларига етиб бораётганда янги ҳукумат томонидан бу ерга тиббиёт ходими сифатида юборилғанди. Бу пайтгача нафақат руслар, балки у тегишли бўлган миллат вакилларини ҳам кўрмаган маҳаллий ҳалқ уни хушламай қарши олди: гўдаклар узоқдан кўзи тушгандаёқ тум-тарақай бўлиб қочишар, паранжи-чачвон исканжасида бўлган хотин-қизлар, умрида қишлоқпаридан нарини кўрмаган эркаклар худди ёвга қарагандек қаравшарди. Янги ҳукумат томонидан тайинланган қишлоқ шўросининг раиси ўша пайтларда деярли кунора бўлиб турадиган йигинларнинг бирида уни ахолига таништириб, бу одам ўқимишли табиб, яъни “дўхтур” деб атаганда, кўплар бу нарса нима англатишини тушунмаган, “мабодо, бетоб бўлиб қолсаларингиз, шу одамга тўғридан-тўғри мурожаат қилишларингиз мумкин” деганларида, шубҳа билан қаравшанди. Айниқса, у барча муолажаларни ҳақ олмасдан қиласди, дори-дармонлари нақ Масковнинг ўзидан олиб келинган деганида, раис биз содда одамларни лақиллатяпти, бу ҳам янги ҳукуматга нисбатан бўлган мақтовли тарғиботларнинг бири бўлса керак, деб ўйлагандилар.

Шундан сўнг унга раис сўз берди ва қулогига шивирлаб, афтидан, нималарни айтиш кераклигини уқтириди.

**Романдан парча**

Вағиз қизарип-бўзарганча ўрнидан туриб, лангарликлар умрида эшитмаган ғалати лаҳжада нима учун юборилганини раис таништирувидан сўнг ҳам яна бир бор одамларга айта бошлагандан, ҳайрон қолишибди: э, тили ўзимизниги ўхшайдими? Бошқирдман, дедими? Бу қанақа эл бўлди? Демак, ўрис эмас экан-да! Нега бўлмаса сап-сариқ? Балки мусулмондир ҳам? Нега унда бу ҳақда ҳеч нарса айтмади – на раис, на ўзи (ўша пайтларда бу ҳақда деярли гап очилмас, шўро ҳукумати ўз ҳокимиятининг дастлабки кунларидаёқ ҳар қанақа диний тушунчаларни фуқаро миясидан сикиб чиқаришга уринар, улар ўрнига ўз ғояларини тиқиширишга ҳаракат қиласди, “Дин – ҳалқ учун афюн!” деган иборага катта ургу кўйилларди. Кўп ўтмай қизил чойхоналарда ва янгигина очилган идоралар, мактаблар деворларидағи “Яшасин, инқилоб！”, “Бутун ҳокимият шўроларга！”, “Бутун дунё пролетарлари, бирлашингиз！”, “Биз ер юзида абадий коммунизм ўрнатамиз！” каби қизил алвонларга ёзилган шиорлар қаторидан у ҳам жой олди).

Вағиз учун юқорининг кўрсатмасига биноан шошилинч равишда жой қилиб беришгач, ҳовлидаги шинамроқ бир уйчани оқлаб, дераза-эшикларини янгидан бўяб, иш кабинети қилиб олди.

Иссиқ жон эмасми, тезда унинг хизматига муҳтоjlар ҳам топилди: бирор қўлини кесиб олиб, боғлатиш ва малҳам қўйишга келса, кимдир от, эшак ёки нарвондан йиқилибми, оёгини синдириб олгач, гипспатиш учун хузурига “югурап”, баъзан эса кимнингдир боласи иситмаси чиқиб, ўт-олов ичиди жон талваса қилиб ётганда, аллақандай оппоқ куқунни ичиб (Вағиз оғзини тўлдириб уни “порошок” деб атарди), “отдек” бўлиб кетганида, фарзанди тирик қолишидан умидини узган онанинг дуою олқишига сазовор бўларди.

Кейинчалик унинг коғир эмас, ўзлари каби мусулмон эканлигини ҳам билиб олишибди.

Вағиз ўша пайтларда йигирма беш-үттиз ёшлар атрофида бўлиб, ёлғиз яшарди.

Кунлардан бир куни у йўқолиб қолди ва одамлар орасида навбатдаги миш-миш тарқалди: “Дори-дармон олиб келиш учун шаҳарга кетаётганда, янги ҳукумат душманлари йўлда тутиб олиб, Қапчиғайга улоқтиришибди! Мурдасини топишибди – вужудида соғ жой қолмаган, ҳаммаёғи моматалоқ, боши эса қоқ иккига бўлинни кетганмиш...”

Лекин ҳафта ўтмай худди ўзига ўхшаган сап-сариқ, лорсиллаган бир жувон билан қишлоққа кириб келгандан, ҳамма енгил нафас олди: “Хайрият! У бошлаб келган куйруқдек жувонми? Аёли эмиш! Ҳа-да, ўшани олиб келиш учун кетган экан! У ҳам бошқирд эмиш! Үқитувчи дейишади...”

Худди эри каби лаҳжада гапирадиган Марям янги очилган мактабда ягона аёл ўқитувчи сифатида рус тилидан дарс бера бошлади ва ҳануз-ҳамон мактабга қизларини беришга журъат қилмай турган ота-оналар – у пайдо бўлишига қадар ўқитувчиларнинг барчаси эркак эди – жувоннинг бир неча марта уйма-уй юриб қилган тарғиботидан сўнг, бирин-кетин, истар-истамай рози бўлишибди.

Бир йил ўтар-ўтмас Марям ва Вағиз ўғилчали бўлишибди ва бу ерларда илгари сира учрамаган исм кўйишибди – Мэлс. Кўпчилик бу ном маъносини тушунмай, янги ҳукумат

ташкыл қылган орган – халқ милициясига атаб қўйилган бўлса керак, деб ўйлади, аммо, кўп ўтмай, бу фараз ҳам нотўғри бўлиб чиқди.

Дуркунгина бола бўлиб етишган Мэлс эртадан кечгача қишлоқнинг ўзи тенги болалари билан турли хил – ланка тепиш, чиллак каби ўйинларда қатнашар, худди улардек кир-чир бўлиб юрар, ота-онасини ваҳимага солиб, кўпдан-кўп қаршиликлар, ҳатто жон оғритадиган жазоларига қарамасдан Лангардарёнинг энг чуқур жойларида чўмилар, баъзан ўйиндан ўт чиқсанда, кимлар биландир муштлашар, бировини урса, бошқасидан калтак ерди. Қишлоқ болаларининг “татар-молай” деган мазахларига (қишлоқ аҳолисига бошқирдлар ҳам татарлар сингари бир халқ ёки уларга жуда яқин эканлиги маълум бўлган, бундан энди ёш болалар ҳам хабардор эди) эътибор бермас ва энг қизиги – она тилида мутлақо гапирмасди. Ўзлари яшаётган муҳит ва ерли аҳолини ҳурмат қылган ота-она бунга эътиroz билдириб ўтирмади, ҳатто хурсанд бўлишиди: “Бизнинг “ғалча” тилимиздан кулаётганлар кўриб қўйишин!”

Мэлс мактабда жуда яхши ўқиб, жисмонан бақувват, келишган йигит бўлиб етишди, ҳатто – гарчи, ота-оналари ўлиб қолганларида ҳам “татар” йигитини куёв қилмасликларини яхши билишса-да! – қишлоқ қизларидан баъзи бирлари унга кўнгил қўйишига ҳам улгурди.

Учуви бўлишни ихтиёр этган Мэлс мактабни битиргандан сўнг (ўқитувчиларнинг “Ким бўлмоқчисан?” деган саволига у бирон марта ҳам бошқача жавоб бермаганди), кўп тенгдош дўстлари, бошқа қишлоқ йигитларининг ҳавас ва ҳасадини келтириб, узок пойтахтга жўнади.

У ўқиши давомида Лангарга йилда бир ёки икки марта келар, шунда ҳам синфдош оғайнилари билан эртаю кеч бирга бўлганидан ота-онасининг ёнида деярли ўтирмас, бундан Вағиз ва Марямнинг баъзан ғаши келса, баъзиде бир-бирига мамнун кўз ташлаб қўйишишади: “Энди у шу юртнинг одами!”.

Ҳарбий билим юртида ҳам аъло ўқиб, уни битиргандан сўнг, қишлоқ аҳли ўртасида “Мэлс ўша жойда бир ўрис – ўзи хизмат қилаётган қисм командирининг қизига уйланибди” деган гап тарқалди ва уларнинг сўровидан хижолат чекаётган Вағиз ва Марям уҳ ва оҳ тортиб, “факт”ни тасдиқлашди.

Кўп ўтмай ҳатто тўйга чақирилишга лойик кўрилмаган “қайнота-қайнона” келинларини кўргани жўнаб кетишиб, бир ойлардан сўнг жуда хурсанд – қишлоқ одамларининг назарида! – кўринишда қайтиб келишибди, лекин эртаси куни қаериидир оғриб, эри ҳамроҳлигига “врач” қабулига борган аёллардан бири Марямнинг йигидан кўзи шишиб кетгани, Вағизнинг эса жеркиб: “Ёшлар ўз йўлига – бу ердан ҳеч қаёққа кетмаймиз!” деб бақираётганини кўргани ва эшитганини ҳамма жойда гапириб юрди.

Уларнинг бошқа болалари йўқ эди.

Марям қишлоқда бўлиб ўтадиган тўйларда худди ўзи тўй қилаётгандек елиб-югурап, бўлар-бўлмас ҳазил-хуузулларга шарақлаб кулар, чимилдиқдаги келин-куёвлар номига – кўпларнинг назарида, сал бепардороқ ҳам! – қочириклар қилар, ўз тилида лапарлар айтар, ер тепиниб, биққи муштларини белига тираганча рақсга тушар, ҳатто баъзи бир ёш жувонларни бу “танца” ҳаракатларини ўрганишга ундар ва кўпларнинг “ростдан ҳам тўйларингизда ёр-ёр дейиш ўрнига русчалаб “руби-руби” дейишадими”, деган ҳазил саволларини эшитгача, даҳанаки жангга киришиб кетарди.

Марям келган йилидан бошлаб шу кунгача мактабда дарс берар, Вағиз эса куннинг қайси пайти бўлмасин, беморлардан ёрдамини аямасди. Энди унинг учун алоҳида тиббиёт пункти қуриб беришган ва бу ерда кийин жарроҳлик амалиётларидан ташкари барча муолажани амалга оширса бўларди.

Худди шу кунларда Лангарга Яшар ва Нодира етиб келишган, айни шу дақиқада Ҳожар барчани қўрқитиб иккинчи бор хушини йўқотган ва Давланов сал олдин Раҳимов томонидан Яшарга роса мақталган тулпорида елиб бориб, Вағизни олиб келганди.

– Нима бўлди, ўртоқ Давланов? – деди Вағиз яна бир марта аёлнинг юрак уришини тингларкан, қалин кўзойнаги тепасидан унга қараб.

Гўё айтадиган гапнинг ўзи йўқдек эди, аммо Давланов ва Раҳимов бири олиб-бири қўйиб, унга нима бўлганини тушунтириб беришибди. Ўзларини йўқотиб қўйган Яшар ва Нодирага бир кўз ташлаб олган Вағиз, ажабланганча бироз ўйланиб турди, сўнг

доим ўзи билан олиб юрадиган, темир қопқоғига қизил хоч тасвири туширилган қутини очиб, ундан ақыдек тиник суюқлик солинган шишани олди.

– Нашатир спирти. Ҳозир ҳидлатамиз, – деди у Ҳожарнинг бошини авайлаб кўтарааркан, қопқоғи очилган шишани унинг бурнига тутиб. Ўткир ҳид димоғига урилишидан бир сесканиб олган аёл аввал қовоқларини пирпиратиб, сўнг кўзларини очди. Аввалги сафарда бўлганидек шифт вассаларига бироз тикилиб тургач, ногаҳон ёдига бир нима тушиб қолгандек, бошини тез кўтарди ва тепасида турганларнинг биронта-сига ҳам эътибор бермай, нигоҳлари билан дарҳол Нодира ва Яшарни излаб топди.

Унинг кўзларида ўт ёнарди.

– Бу ўшалар! – нола қилди у нигоҳини энди Нодирадан узмай. – Танидим уни! Тирик экан! Худога минг қатла шукур! Энди ўлсам армоним қолмайди! Қани, икковинг ҳам аммаларинг ёнига келинглар-чи! Кўрқманглар... телба эмасман!

Асадбан чаккалари тиришиб кетаётган Давланов аёли устига энгашди.

– Тур ўрнингдан! – кутилмаганда ўшқирди у. – Бу нима қилиқ! Бўлди-да энди! Ҳадеб қайтараверасанми бир гапни!

Унинг гапидан кўрқиб эмас, танига қандайдир мадор кириб жойидан кўзғалган Ҳожар Нодирани ёнига имлади.

– Мен уни танидим! Мана, сиз ҳам кўринг! Амманг айлансин сендан, бу ёққа кел. Кўрқма... – Ростдан ҳам қўрқиб кетаётган Нодира аёлнинг истагига қарши бора олмади ва индамай унинг тепасига келди. – Ўтири, мана бу ерга, – жой кўрсатди унга Ҳожар. – Яхши. Ҳўжайнин, – энди эрига мурожаат қилди у. – Сиз ҳам бу ерга ўтиринг, тепамда бундай турманг, ҳали ўлганимча йўқ.

Давланов беихтиёр унга бўйсунди, лекин аёлининг кейинги сўзларидан энди ростдан ҳам ақлдан озиб қолмадимикин, деб хавотирга туша бошлаганди: кўзларини қаранг! Соғ одамнинг кўзлари шунақа бўладими!

– Гапир, – деди у кўрпача четига нокулай ўрнашиб олгач тишлари орасидан.

Ҳожар кутилмаганда кўлини Нодиранинг пешонасига юбориб, аста силаганди, бу тушунарсиз ҳаракатдан қизнинг вужудига баттар титроқ кирди.

– Қаранг бу ерга! – эрига қарамасдан деди Ҳожар. – Мана бу яра изини кўряпсизми? Ёмон яра изини?!?

Давланов истар-истамай у кўрсатган жойга қаради – чиндан ҳам қизнинг кенг пешонасида паашша чаққанда қоладиган, кўпчиликнинг юзи, бурни чеккасида бўладиган из ялтираб кўзга ташланиб турарди. Аммо бу из ҳам Нодиранинг кўркам ҳуснини буза олмаган, айтиш мумкини, ҳатто ярашиб турарди.

– Хўп... кўряпман ҳам дейлик, – деди Давланов ўша оҳангда. – Нима эди?

– Ахир, мен уларни эслаган пайтларда доимо шу ҳақда гапириардим-ку! –хўнграб юборди Ҳожар. – Наҳотки, эсингизда бўлмас!

Давланов қизнинг пешонасида турган аёлнинг кўлини аввал пастга тушириди.

– Биламан, айтардинг, – деди сўнг у. – Лекин...

– Нима “лекин?!?” – балки умрида илк бор эрига шанғиллади аёл.

– Лекин аканг уларни олиб Афғонга кетиб қолган! – энди Давланов ҳам бақириб юборди. – Ҳа! Бўлмаса, аллақачон дараги чиққан бўларди! Келарди қачон бўлмасин! Агар булар сен айтгандек жиянларинг бўлганда, ўзлари билмасми? Тўғрими? – му- рожаат қилди у Раҳимовга. – Сиз ўзингиз айтинг бу ахм...

Раҳимов томоқ қирди – назаридаги ҳақиқатга жуда яқин ҳолат ҳақида гап кетмоқда эди ҳозир. Ҳатто белгиси ҳам мос тушаяпти-ку! Лекин, шу исботми? Наҳотки, биргина ярани деб, иккаласи ака-сингилга чиқиб қолса!

– Мен ҳам ҳайрон қолгандим... яъни демоқчиманки, улар ўртасидаги ҳайратланарли ўхшашликни мен ҳам сезгандим. Лекин менини фақат тахмин бўлганди холос, янгам эса... билмадим тағин. Ростдан ҳам мана шу яра ҳақида, – Нодиранинг пешонасига хижолатомуз кўз ташлаб олди у, – гапиришармиди? Ўзингиз кўрмаган эдингизми?

– Йўқ. Эндиғина оила қургандик. Тўғри келмаганди. Ёки эътибор бермаганманни – билмадим! – бўлиб-бўлиб жавоб берди Давланов.

Вағизга бу баҳсу мунозараларнинг бари ниҳоятда ғалати туюлаётган, гап нима ҳақида кетаётганини сал-пал англай бошлаган, Ҳожарнинг ҳушидан кетиши ҳам мана

шу икки “ёш специалист” билан боғлиқ эканлигини тушуниб етган, уларни ўзининг қачонлардир йўқолиб қолган (эри “Аканг уларни олиб Афонга кетган эди” дедими? Бу жуда қизиқ-ку!) жиянлари деб тахмин қилаётгани, баъзи бир “факт”ларни ҳам рўяч эттаётганини (у ярага бир сония кўз ташлабоқ, нима эканлигини тушунганди – пиндинка чаққан! Бу ернинг одамлари терисида тез-тез учраб турадиган “ёмон яра!”) билган, ўзига ҳеч ким эътибор бермай кўйганидан фойдаланиб, Яшар ва Нодирани бемалол кузата бошлаган ва у ҳам худди бошқалардек фикрга келганди – бир-бирига “копия”! Лекин, наҳотки, шу гаплар рост бўлса?

– Тушунмадим, нега жанжаллашаяпсизлар? – вазиятни бироз бўлса-да юмшатиш учун оғзини катта очиб илжайди у. – Бу спорнинг кимга кераги бор? Қариндош бўлиб чиқсаларингиз бунинг нимаси ёмон! Яна нима керак сизларга? Шод бўлиш ўрнига жанжал қилиб... Ай-яй-яй!

Унинг сўзлари Ҳожарга мойдек ёқиб тушди:

– Айланай сиздан, дўхтуржон! Ана, ўзингиз қаранг! – илтижо қилди аёл уни ҳимоя қиладиган одам топилганидан йиғлашни ҳам бас қилиб. – Наҳотки, ўз жигарларимни танимасам! Ахир, Завранинг (Нодира титраб кетди) пешонасида шу яра пайдо бўла бошлаганда, янгамдан ташқари ўзим ҳам қўлларим билан шу жойига ҳар куни малҳам босардим! Бутунлай тузалиб кетсин, қиз бола, айбли бўлиб қолмасин деб! – У яна Нодирага юзланди. – Ўзим айланай сендан! Барчиндек қиз бўлибсан-а!

Ҳожар Нодирани аллақачон жиянинг чиқариб кўйган, фақат унинг пешонасидан тортиб, қошу кўзигача термилар, ҳатто Яшарни ҳам уннутиб кўйганди, ваҳоланки, бу машмашаларнинг барчаси бутунлай ўзини йўқотиб кўйган мана шу йигит илк бор дарвозадан кириб келгандан сўнг бошланганди.

Яшарнинг назарида эса факат ёмон тушда бўладиган воқеа содир бўлмоқда эди ва у нима билан тугашини билмай, караҳт аҳволга тушганди. Унинг юраги гурс-гурс урар, кўзига Нодиранинг пешонасидаги яра изидан бошқа ҳеч нарса кўринмасди: наҳотки?! Наҳотки, бу қиз ўзи кўпдан бери – ҳатто эсини таниганидан буён! – биладиган Нодира эмас, аллақандай Завра?! Наҳотки, мана бу аёл уларнинг аммаси?! Унда ўзи ким?! Унинг эгизагими?! Исли... Ҳасанми?! Шу ерда туғилганми?! Наҳотки, улар – кўпчилик шу пайтгача тахмин қилганидек! – ростдан ҳам ака-сингил?!

У оқариб кетди, Ҳожар эса худди бир нима тўсатдан эсига тушгандек ялт этиб Раҳимовга қаради:

– Домла! Шуларми сиз айтган ёш ўқитувчилар? Назаримда, сиз... – у энди қўлини ўз пешонасига юбориб, нималарнидир эслашга урина бошлади.

– Ҳа. Лекин сизлардан жой сўраётганимда, икки нафар йигитни юбораётган бўлишса керак, деган хаёлда эдим. Қайдан билай! Аммо, кўриб турганингиздек, булар экан... Яшар ва Нодира.

У беихтиёр айтиб юборилган исмлардан сўнг аёлга қўрқа-писа кўз ташлади: шовқин кўтармаса эди яна!

Аммо Ҳожар ундан қилмади, наҳотки барча айтганларим у қулоғидан кириб, бу қулоғидан чиқиб кетди дегандек, унга узоқ пайт тикилиб турди, сўнг надомат билан бошини чайқади, нафақат Раҳимов, қолганлар ҳам бу харакат маъносини тушундилар.

Энди аёлни Нодирадан бошқа ҳеч ким қизиқтиримасди.

– Айланай ўзимнинг сулувимдан! – деди у ёнида ўтирган қизнинг сочини силаб. – Акам... яъни, сизлар Афонга кетмовдиларингми ўшандা?

Нодиранинг киприклирида ёш пайдо бўлди:

– Билмайман, хола.

– Хола?! – бирдан ранги ўзгарди Ҳожарнинг. – Нега ундан дейсан?! – қичқирди у. – Айтдим-ку, аммаларингман деб! Наҳотки, сен ҳам ишонмаётган бўлсанг?! – Нима дейиши билмай бошини янада пастга эгган Нодиранинг қўзларидан шашқатор ёш тўкила бошлаганини кўрган Ҳожар уни бағрига олди. – Йиғлама, нега йиғлайсан? Энди топишганимизда-я! – Сўнг қизни ўзидан сал узоқлаштириб, юзига қаради. – Акам қаерда?! Тирикми у?! Гапирсанг-чи!!! – телбаларча қичқирди у, сал олдин Нодира, ундан-да илгари Яшарнинг ота-оналарини умуман кўрмаганлари ҳақида айтган кескин, бироз кинояли сўзларини мутлақо ёдидан чиқариб.

Нодира пиқиллади:

– Билмайман, хола... – шундай дебоқ хавотир ила бошини кўтарган қиз ўзига еб қўйгудек бўлиб тикилиб турган аёлнинг нигоҳига дош беролмай, яна ерга тикилди. – Мен... отамни сира кўрмаганман. Яшар ҳам.

– Қанақа Яшар?! – энди бор овозда ҳайқирди Ҳожар. – Нималар деяпсан, тентак қиз?! У сенинг аканг бўлади – Ҳасан! Наҳотки шу пайтгача билмасанг?! Иккаланг бирга катта бўлмадиларингми ҳали? Нега бирга юрибсизлар унда?! Нега бу ерга бирга келдиларинг?!

Рахимовнинг назарида кетма-кет берилаётган бу саволлардан қиз ҳушидан айриладигандек эди. У яна аралашмаса бўлмасди.

– Янга! Ўзингизни босинг! У ҳеч нарсани билмайди! Илтимос, сал ўзингизни кўлга олинг! – овозини кўтарди у. – Бас қилсангиз-чи бечора қизни қийнашни! Кўрмаяпсизми ахволини! – Нодиранинг ахволига ростдан ҳам ачинмасдан қараб бўлмасди: бутун вужуди дир-дир титрар, кўзёшлари шашқатор бўлиб оқарди. – Мен ҳаммасини сизга айтиб бераман! – Ҳожарнинг оғзини очганча қараб қолганини кўриб (“Ҳаммасини”, дейдими?! Нега шу пайтгача жим туриби унда?!) ўзига ортиқча баҳо бериб юборганини сезган Раҳимов чайналиб қолди. – Янга... айтишди-ку, буларингиз (у ҳеч қанақа исмни атамаслик учун атайнин шундай деди) гўдаклигидан етимхоналарда катта бўлишган. Балки, сиз ўйлаётгандек, акангизнинг фарзандлари бўлиб чиқишар, аммо буни билишмайди! Бирга бу ерга кепгандарига сабаб эса – доимо бирга бўлишган, бир жойда ўқишган. Бироз сабр қилсангиз-чи! Мана, иккови ҳам ёнингизда туриби – ҳаммаси аниқланар, жой-жойига тушар!

Вағиз мамнуният билан унга қаради: “Молодец, директор! Бу аёл жуда шошила-япти!”

Ўртага тўсатдан тушган жимликни энди фақат юм-юм йиғлаётган Нодира бузарди, холос.

Ҳожар яна уни бағрига босди, ҳўл бўлиб кетган юз-кўзидан чўллп-чўлп ўпди, титраётган кўллари билан соchlарини силаб-сийпалади:

– Амманг ўлсин... Ҳали шундай кўргиликларга дуч келдиларингми! Бўлди, йиғлама! Мен ҳам йиғламайман! Ҳах, замонангга ўт кетсин-а! Ҳах сенларни шу кўйга солганларнинг бошига бундан баттар кунларни солсин-а, худойим!

Шундай дер экан, гарчи йиғламасликка ваъда берган бўлса-да, кўзидан тинмай ёш оқар, тили учida ҳамон турфа хил саволлар айланар, аммо ўзига зуғум билан қараб турган эридан, ҳозиргина дакки берган Раҳимовдан ҳайиқиб, индай олмасди.

Ўзи сира кутмаган можаро бошланиб кеттани боис Ҳожарнинг ёнида чўккалаб ўтирганича қолган ва буни эндиғина пайқаган Вағиз яна илжайди, ҳамон қўлида тутиб турган нашатирли шишани кутига қайта жойлаб, ўрнидан турди.

– Мен борай энди, – деди у ҳеч кимга қарамай. – Бу ерда қиласиган ишим қолмади, шекилли. – Аммо кетар олдидан Яшар ва Нодирага яна бир бор кўз ташлаб олиб, бошини маъноли чайқади-да, дарвоза томон юрди. Ҳовлидан чиққач эса кузатгани ортидан эргашган Давлановнинг енгидан енгилгина тутди. – Агар яна тоби қочиб қолса, уйда бўламан. Лекин айтиб кўяй – аёлинг рост сўзлаётганга ўхшайди!

– Ақл бовар қилмайди! – унга маъносиз кўзларини тикди Давланов. – Наҳотки сен ҳам шунақа деб ўйлаётган бўлсанг?

Жавоб беришни лозим топмаган Вағиз қалин шишлини кўзойнаги ортидан унга таънаомуз боқди: “Мнение”сини айтди, шекилли? Яна қайтариш шартмикин?”

Давланов қайтиб ҳовлисига кирганда Раҳимов, Яшар, Нодира жой-жойларида турганларича хаёлга толишган, ўзини бироз босиб олган шекилли, ошхонада куймаланаётган Ҳожар энди меҳмонларга дастурхон ёзишга ҳозирлик кўраётганди. Ора-сирада унинг куйиниб, ўртаниб йиғлаётгани, кимнидир, ниманидир қарғаётгани эшитиларди:

– Ҳах, замонларингга ўт кетсин-а! Ҳах, сенларни бу кўйга солганларнинг...



## Шеърият

### Юрагимниги тоғи

\* \* \*

Бир талпинсам сизга етаман,  
Бир зарб билан эшик очилур.

Аммо,  
нечун,  
ташлаб  
кетаман,

Сизни десам, юрак сочиулур?

Бир талпинсам, баҳтни қучасиз,  
Бир ҳўрсинсам қайтар дарёлар.

Аммо,  
нечун,  
дарё  
бўлолмам,

Умр ўтар, ўтар дунёлар?

Бир талпинсам, олам гулистон,  
Бир шахт билан гина тўкилур.

Аммо,  
нечун,  
сиртмоқдир  
алам,

Оёгимга кишинадир гуурур?

Бир талпинсам меникидирсиз,  
Ўзим экиб, ўзим ўрганим.

Бу  
шабистон  
қисматлар  
аро

Кўзим очиб... кўрганим.

Бир талпинсам, юрак ҳам тўхтар,  
Кумга синггар умр тўлқини.

Одам  
бўлиб  
одам  
бўлмадик,

Учрашамиз руҳ бўлган куни.



**Фарида АФРЎЗ**

1956 йилда  
тугилган. Кўқон  
Давлат педагогика  
институтида таҳсил  
олган. Шоиранинг  
“Қирқ кокиллигим”,  
“Изтироб кўйлаги”,  
“Тунлар исёни”,  
“Кўзим маним...”,  
“Ўзимдан ўзимгача”,  
“Ушиоқ”, “Тасбех”  
каби шеърий  
тўпламлари нашир  
этилган. Фарида Афрўз  
1999 йилда “Шуҳрат”  
медали билан  
тақдирланган.

\* \* \*

*Дунё,*  
*Сенсиз,*  
*Чалажон гўдак,*  
*Тамшанади,*  
*Ҳансирар ночор.*  
*Ночор юрак,*  
*Бир кесак – юрак,*  
*Нафас зилдир,*  
*Нафасдир душвор.*

*Дунё,*  
*Сенсиз,*  
*Эски қайрагоч,*  
*Күшлар қўнмас,*  
*Куртлар гимирлар.*  
*Пўстлоқ – ажин,*  
*Ҳасрат – япроқлар,*  
*Ер депсиниб,*  
*Титрап томирлар.*

*Дунё,*  
*Сенсиз,*  
*Дастасиз кетмон,*  
*Ер тишилайди,*  
*Занглар ютади.*  
*Боши хамдир,*  
*Унутган дехқон,*  
*Боши ғамдир,*  
*Умр ўтади...*

*Дунё,*  
*Сенсиз,*  
*Чумоли уя,*  
*Борса келмас,*  
*Йўллар қатланган.*  
*На туйнук бор,*  
*На бир дарича,*  
*На умид бор,*  
*Унга аталган.*

*Дунё,  
Сенсиз,  
Дунёмас, инон,  
Бир күргилик  
Томоша бозор.  
Сени күтмоқ,  
Яшамоқ демак,  
Умр эса,  
Бир қучоқ озор.*

\* \* \*

*Эй дил, сени нима қилай,  
Нима қилсан оғримайсан?  
Кафта тутай, гулга ўрай,  
Нима қилсан ииғламайсан?  
Тилинг бўлса, айтгин, ахир,  
Кетайликми, осмонларга?  
Одами йўқ, озори йўқ,  
Мозори йўқ томонларга...  
Эй дил, сени нима қилай,  
Нима қилсан оғримайсан?  
Шабнамдайин тўқдилар-ку,  
Тариқдайин сочдилар-ку,  
Ҳар касоднинг бозорида  
Савдо қилмай, сотдилар-ку,  
Эй дил, сени нима қилай,  
Нима қилсан оғримайсан?  
Қилни ёрган, қирқ чечаксан,  
Ишқ аҳлига беланчаксан,  
Ташна келса, меҳринг булоқ,  
Кафта тутиб, жон ҳалаксан,  
Эй дил, сени нима қилай,  
Нима қилсан оғримайсан?  
Узум сабри – шароб бўлгай,  
Тоғ бардоши – туроб бўлгай,  
Сен оғрисанг, сен ииғласанг,  
Одамизод хароб бўлгай,  
Хароб бўлгай, хароб бўлгай...*

\* \* \*

Күнлар ўтар, күнлар бесамар,  
 Кумга сингган булоқ сувидек,  
 Учиб кетар, оҳ, тўзгиб кетар,  
 Вақтнинг гули қоқигулидек.  
 Юрагимнинг тори узилар,  
 Томиримда чинқирап алам.  
 Армонларнинг бўйи чўзилар,  
 Кўнглим каби чўкади олам.  
 Нима қилдим, қандай яшадим,  
 Қай күнларнинг бағрини тилиб?  
 Ўзни ўтга, чўққа ташладим,  
 Жонни, танни садпора қилиб.  
 Күнлар ўтар, күнлар бесамар,  
 Кўзларида жиққа ёши билан.  
 Паналардан ёгийлар боқар,  
 Кўлларида ҳасад – тоши билан.  
 Бунда эса, мен зору гирён,  
 Баттар ботиб рўзгор лойига.  
 Кўнгил сарсон, ишқ унда тийрон,  
 Кўёлмайман бошим пойига.  
 Ҳасрат деманг, жоним қолмади,  
 Умр эмас, бу умр эмас.  
 Бу бир ўчоқ, тугаб, ёнмади,  
 Бу бир хотир, рангги йўқ элас.



## *Сұбдати излар*

*Түркүм*

\* \* \*

*Дарахтни зўрга кўндиридим  
Бирга учишига*



*Күшига айланисишимни  
Кутамиз энди*

*Азиз САЙД*

1961 йилда туғилган.  
1979-1984-йилларда  
ҳозирги Миллий  
университетнинг  
журналистика  
факультетида ўқиган.  
Бир қатор наишларда  
шилаган. Айни  
пайтда, “Синфдош”  
журналининг Бош  
муҳаррири. Унинг  
“Чилтор”, “Дили  
қани бедилнинг”,  
“Ғойибдан дўст  
 билан сұхбатлар”,  
“Вақт манзили”  
сингари китоблари  
чоп этилган.

*Сўзга айлана олмай қийналар  
Рангли шарлар ичидаги  
Нафасим*

\* \* \*

*Иккимизнинг қўлларимизга  
Ёғар эди баҳор ёмғири*

*Шамол ҳар кун териб келтирадар  
Титрограмиз синиқларини*

\* \* \*

*Томда қуриган маккапоялар  
Күёшни қитирлаб кемирар сичқон*

*Кўкдаги қушиларга термилар  
Қариган мушиук*

\* \* \*

*Түёқ тозалаётган шаҳарлик аёл  
Қўлларига ёпишиб қолар*

*Олис яйловдаги майсалар саси*

\* \* \*

*Соғилаётган сутнинг овози*

*Ўчоқдаги олов овози*

*Сұхбатлашар*

*Күтиб турар тонг бўсағада*

\* \* \*

*Бир шода анор*

*Хона деворига осилган*

*Кўрпани бошига тортар болакай*

\* \* \*

*Пулларини санаётган куз*

*Кўзини узмас*

*Теракнинг учидаги*

*Сўнгги япроқдан*

\* \* \*

*Шамол қўнадиган шохга*

*Супургидан синган хасларни жамлаб*

*Тухум қўйди мусича*

*Мушукнинг кўзидай ялтирас юлдузлар*

\* \* \*

*Хаёлларин ушатиб бераркан*

*Балиқчаларга*

*Ариқнинг лабида ўтирас бир қиз*

*Қимирламас ариқнинг лаби*

\* \* \*

*Арранинг овози келар устахонадан*

*Хазонлар остига беркинап*

*Ўрик данаги*

\* \* \*

*Кун бўйи  
Дарахтни айланиб авради  
Сояси*

*Мевага ўҳшармиши қуиларнинг ини*  
\* \* \*

*Қафасдаги рангдор қуичча  
Сайрамай қўйди*

*Пар ёстиқ кўтарган аёлни кўриб*

\* \* \*

*Қизгиши қалпоқчали болакай  
Югуради сувсиз ариқнинг ичидা*

*Гулзордан анқироди атиргул бўйи*

\* \* \*

*Болалик бекинмачоқ ўйнарди  
Бодринг жўяклари ичидা*

*Тиззачалар изи кўмилди сувга*

\* \* \*

*Осмонга ўқталган арава шотиси  
Тўпга ўҳшарди  
Кечгача термилар бир тўп болакай*

*Қарғалар галаси кўринмас*

\* \* \*

*Ғамгин қўшиқ айтар  
Зардўзи қизлар*

*Сўлиган ўсмани ёритади ой*

\* \* \*

*Баҳорнинг сўнгги куни  
Қалдиргочлар хайрлашар  
Кўзимга чизилган овозлари билан*

\* \* \*

*Қизғиши тұманлар ортида әлас  
Қордай оппоқ икки теталик  
Юмисоқ  
Силлиқ  
Ёстиққа ўхшар*

*Мудрайди қуёши*

\* \* \*

*Қуёши ботмоқда*

*Күтқарғани отланар  
Дүкөнини ёпиб  
Намозшомгуллар*

\* \* \*

*Ез чилласи  
Дараҳтлар остида  
Әриб ётар пишган ўриклар*

*Богда анқир балогат ҳиди*

\* \* \*

*Пайқалда ёрілған қовун*

*Шира оқиб борар ойнинг нурида  
Чумолининг инига томон*

\* \* \*

*Чайқатиб юборишди  
Тунги ҳовузни  
Балиқ овига чиққан юлдузлар*

\* \* \*

*Ой юлдүzsiz қоронғы кече  
Күринмайды ҳовуздаги сув*

*Узокұдан қайтарди ҳориган хаёл*



## Йиллар, воқеалар, тақдирлар

# ФОЗИ ОЛИМ ЮНУСОВ

**“Ҳоди Зариф билан сұхбатлар” китобидан**

Атоқли фольклоршунос олим Ҳоди Зариф тоғаси, онаси Зайнаб Мұхаммадолим қызининг укаси, биринчи ўзбек профессори, йирик тишишунос, фольклоршунос Фози Олим Юнусовни ўзининг биринчи устози ҳисоблар, 1919 йили отаси Тиллахўжа Умархўжа ўғли вафотидан кейин бир муддат, асосан, тоғасининг уйида яшаганини, мустақил ўқиб-ўрганиши ва фан оламига киришида унинг алоҳида хизматлари борлигини сұхбатларда қайта-қайта таъкидларди. Чиндан ҳам Фози Олим Юнусов Қоҳира ва Истанбул университетларида тил ва адабиётдан ташқари тарих, фалсафа ва иқтисоддан мұкаммал билим олган, араб, форс, немис, рус ва туркий тилларни пухта әгаллаган йирик мутахассис эди. Юксак замонавий ва пухта билимга эга бўлган олим сифатида Ўзбекистонда маданий қурилиш, тил ва имло масалаларини ҳал қилишда фаол иштирок этди, тишишнослик, адабиётнослик, фольклоршунослик, тарих, этнография, фалсафа ва ҳукуқшунослик билан жиҳдий шуғулланди. У вақтларда Фози Олим Юнусов мазкур соҳаларнинг йирик мутахассиси, зўр билармони ҳисобланарди.

Фози Олим Юнусов Туркистон маориф ҳалқ комиссарлиги ҳузуридаги илмий кенгаш (1918-1920) ва Театр-этнографик билим ҳайъати (1920-1924) аъзоси ҳамда Ўзбек билим ҳайъати (1920-1924) раиси сифатида фольклор ва этнография материалларини тўплаш, ўқув қўлланмалари тузиш, имло қоидаларини ислоҳ қилиш ва ихчамлаштириш ишларида катнашди, раҳбарлик қилди, айни пайтда, Савдо жамиятида, Адлия ҳалқ комиссарлигида ишлади. Бу ерда адлия қонун-қоидаларини ўзбек тилига таржима қилди, иқтисод ва адлия атамаларидан икки тилли луғатлар тузди. Атоқли олим Ўзбекистон маориф ҳалқ комиссарлиги фан бўлимининг илмий котиби ва Ўзбекларни ўрганиш қўмитасининг раиси бўлиб ишлаган йилларида ҳам (1925-1929) жуда катта ташкилотчилик ишларини олиб борди. Ўзининг “Ўрта Осиё туркийларининг янги алифбоси”, “Янги ўзбек лотин алифбосини ўрганиш учун” каби мақолаларида араб имлосидан лотинлаштирилган ўзбек ёзувига ўтишининг ижобий сираварини ҳар жиҳатдан пухта таҳлил қилиш орқали бундай жараённинг илмий-амалий ва маърифий аҳамиятини қатъийлик билан асослаб берди.

“Тоғам Фози Олим Юнусов менинг биринчи устозим ҳисобланади, – деб эслаб қолди бир куни домла. – Мен В.Б.Бартольд, А.А.Диваев, Е.Э.Бертельс каби ўз даврининг таниқли алломалари билан биринчи марта унинг хонадони-



**Тўра МИРЗАЕВ**

1936 йилда туғилган. Бухоро Давлат педагогика институтини битирган. 1961 йилдан ЎзФА Алишер Навоий номидаги Тил ва адабиёт институтида аспирантликдан бошлиб то директорликкача бўлган лавозимларда фаолият кўрсатган. Ўзбекистон Республикаси фан арбоби, филология фанлари доктори, профессор. Олимнинг “Алномиши” достонининг ўзбек вариантлари”, “Достон ва баҳши”, “Ҳалқ баҳшиларининг эпик репертуари” каби монографиялари нашир этилган.

да танишганман. У фақат мени эмас, амаким – Аҳмадхўжанинг ўғли Маҳмудхўжани ҳам илм йўлига соглан олимлардан. Биласизлар, Фозил Йўлдош ўғлининг “Алпомиш”, “Интизор”, “Зулфизар” каби кенг қамровли ва бадиий юксак достонлари худди шу Маҳмуд Зарифов томонидан ёзил олинган. Кейинроқ тоғам Буюк Каримов, Мансур Афзалов каби олимларни менга биритириб қўйган бўлса ҳам, уларнинг тарбиясига алоҳида эътибор берган. Ҳатто Элбек, Ғулом Зафарий каби ижодкорларга ҳам халқ ижоди на-муналарини тўплашда йўл-йўриклир кўрсатганини биламан.

Фози Олим Юнусов фольклор намуналарини баҳшилар, эртакчилар, қўшиқчилар ва бошқа ижодкор-ижрочилар оғиздан бевосита, айнан, ўзгартирмай айтувчи шева-сида ёзил олишни бошлаб берган олимдир. Унгача эълон қилинган намуналар, ҳатто Ҳерман Вамберининг 1867 йили босилган китобидаги фольклор асарлари ҳам са-водли кишилардан олинган. Табиийки, уларда муайян “қўл уришлар” мавжуд. Тоғам ўзи кўп илмий сафарларда бўлиш билан бирга, уч йирик комплекс экспедицияга – 1929 йили Қашқадарё ва Сурхондарё вилоятларига, 1930 йили Хоразмга, 1932 йили Чирчик ва Оҳангарон воҳаларига ўюнтирилган фольклор, этнография ва диалекто-логия экспедицияларига бошчилик қилган. Унинг “Алпомиш” достони, алла жанри тўғрисидаги мақолалари ҳали ҳам ўз қимматини йўқотган эмас. 1926 йили “Маориф ва ўқитувчи” журналида имзосиз босилган “Ўзбек эл адабиётига тегишли маълумотларни тўпловчиларга кўлланма” ҳам Фози Олим Юнусов томонидан ёзилган”.

Фози Олим Юнусовнинг дастлабки мақолалари, жумладан, “Туркистон” газетасининг 1922 йил 18 декабрь сонида босилган “Ўзбекларда эл таниш иши” мақоласи фольклорга бағишиланган дастлабки илмий тадқиқотлардан ҳисобланади. Унда биринчи марта: “Ўзбекнинг биринчи эпоси “Алпомиш”дир. У Гомернинг “Илиада”сига тенг бир асардир”, – дея буюк достонимизга жуда юқори ва ҳаққоний илмий баҳо берилганди. У фольклор асарларини дастлабки нашр эттирувчилардан ҳам биридир. Масалан, 1922 йили сирдарёлик Ҳамроқул баҳши ва булунғурлик Фозил шоирдан “Алпомиш” достонидан парчалар ёзил олиб, “Билим ўчоги” журналиниң 1923 йилги 2-3-кўшма сонида эълон қилинганди. Шунга қарамай, мазкур улкан аллома ўз фаолиятининг кейинги йилларида фольклор билан деярли шуғулланмаган. Бунинг сабабини сўраганимизда устоз шундай жавоб бергандилар:

“Тоғам биринчи навбатда ўзини тилшунос ва этнограф-тарихчи ҳисобларди. У 20-йилларда жуда кўп диалектологик ва этнографик материаллар тўплаган олимдир. 1926 йил охириларида у менга: “Мана, сен фольклоршунос бўлмоқчисан, яна бир қанча ёшлар етишиб чиқмоқда. Энди мен бемалол тилшунослик билан шуғуллансан бўлади”, – деганди. Чиндан ҳам тоғам фаолиятининг кейинги ўн йилида ўзбек уруглари, уларнинг тарихи, тарқалиши ва тили тўғрисида фундаментал тадқиқотлар олиб борди. Афсуски, улардан фақат “Ўзбек лаҳжаларини таснифлашда бир тажриба” китоби нашр этилган, холос. Ҳозир ҳам бу китоб билан танишсангиз, тадқиқотчи ҳар бир шева ҳамда шевалар гуруҳига хос фонетик, лексик ва морфологик хусусиятларни жуда ҳам нозиклик билан кўрсата олганига қойил қоласиз. Китобдаги ўзбек шеваларининг этнолингвистик таснифи илмий асослангани билан алоҳида диққатга сазовордир. Тўғри, ўзбек диалектологлари кейинги йилларда жиддий ютуқларни қўлга киритдилар. Қирқдан ортиқ ўзбек шевалари ўрганилди, касб-хунар лексикасига доир бой материал тўпланди. А.Б.Боровков, В.В.Решетов каби олимлар ўзбек шеваларини янгидан таснифладилар. Ш.Шоабдураҳмонов, Ф.Абдуллаев, С.Иброҳимов, Х.Дониёров, А.Ишаевнинг тадқиқотлари эълон қилинди. Аммо бу ишларни камситмаган ҳолда айта оламанки, тоғамнинг китоби ва у томонидан амалга оширилган ўзбек лаҳжаларини тасниф қилишдаги бир тажриба ҳамон тадқиқотчиларнинг диққат марказида турибди, у ҳеч қаҷон ўз долзарблигини йўқотмайди.

Бу ўринда яна бир нарсани алоҳида таъкидламоқчиман: 30-йиллар бошида Ўзбекистонда Халқ комиссарлар кенгаши қошидаги Фан қўмитаси ўша даврнинг йирик тилшуноси сифатида тоғамга ўзбек тилининг илмий грамматикасини ёзишни топширди. Тоғам бу ишга жуда катта иштиёқ билан киришди. Ҳатто жаҳон миқёсидаги илмий адабиётлар билан танишиш ва йирик олимлар билан мулоқот қилиш мақсадида 1934-1935 йиллари қарийб бир йилга яқин Ленинградда яшади. Натижада, тўрт-беш йил ичида ўзбек тилининг илмий грамматикаси ёзил тамомланди. 1937 йили тоғам қамоқча олингач, унинг бутун шахсий архиви билан биргаликда, сал кам минг саҳифадан иборат

бўлган ўзбек тилининг илмий грамматикаси кўлэзмаси ҳам олиб кетилди. Ундан нусха кўчирилмаганди. Ҳозиргача мазкур ноёб тадқиқот ва тоғам шахсий архивининг тақдиди маълум эмас...

Эҳ, у давр ғоятда оғир йиллар эди. Бугун ўша воқеаларни эсласам, шундай ноёб ва бой мероснинг бутунлай йўқолиб кетишида қай бир нуқталарда ўзимни ҳам айбдор ҳисоблайман. (Ахир, унинг муайян қисмини сақлаб қолиш имконияти мавжуд эди-ку!) Бир мисол келтирай. Тоғам 1926 йили “Маориф ва ўқитувчи” журналида “Алла тўғрисида бир-икки оғиз сўз” мақоласини ва Эргаш Жуманбулбул ўғлидан ёзиб олинган бир алла матнини эълон қилганини биласиз. Тоғамнинг архивида оталар ва бо боларнинг болани тиззасига олиб туриб эркалаб айтадиган “Хўя” қўшиғининг ғоятда бадиий гўзал бир намунаси ҳам бор эди. Кейинги барча экспедициялар давомида бундай намунани биладиган кишини учратмадик<sup>1</sup>.

Бу қўшиқни тоғам кимдан ёзиб олгани ҳам ҳозир хотирамда йўқ. Ўша йиллари ундан нусха кўчириб олишим ёки уни эълон қилишда ўзбек тилининг илмий грамматикасини ёзиш билан ниҳоятда банд бўлган тоғамга ёрдам беришим мумкин эди-ку! Масаланинг бошқа жиҳати ҳам бор. Гап шундаки, 1934 йили Тил ва адабиёт институтида Фольклор архиви янгидан ташкил этилди. Фольклор архивини Самарқанддан Тошкентга кўчиришда турли жойларда қолган материаллар бир жойга жамланди. Ҳатто кўчишда йўқолган айрим намуналарни қайтадан ёзиб олиш тадориги ҳам кўрилди. Тоғам эса ўзи ёзиб олган ва тўплаган материалларини ҳамон ўз уйида сақларди. Бу материалларни Фольклор архивига олишда сусткашлик қилдик. Агар тоғамни кўндириб, 1934-1935 йиллари материалларни архивга олганимизда, йўқолмай, сақланиб қолган бўларми?!. Яна ким билади дейсиз? Нима бўлганда ҳам, тарих бизга бу имкониятни бермаган, энди уни ортга қайтариб бўлмайди. Ахир, айтадилар-ку: “Сўнги пушаймон ўзингга душман”.

Боз устига, ўша давр ташвиқоти, қўркув, ўз жонимизни сақлашга уриниш туфайли Фози Олим Юнусов, Фитрат сингари устозларга нисбатан сал бошқачароқ муносабатда бўлғанмизми, дейман. Ҳар ҳолда беайб парвардигор... Кўп ўтмай миллатчи сифатида мени ҳам ишдан ҳайдадилар. Ўша давр матбуоти саҳифаларига назар солсангиз: “Отажон Ҳошим, Фитрат, Фози Олим каби халқ душманлари, уларга эргашган Ҳоди Зариф, Буюк Карим сингари буржуа миллатчилари...” қабилидаги яланғоч жумлаларга кўзингиз тушади. Қизиқ, бутун умр давомида она халқинг ижодини тўплаб ва ўрганиб келсанг-у, яна миллатчи, бунинг устига, буржуа миллатчиси бўлсанг...”

Мазкур сұхбат кейинроқ бўлганди. Бундан олдинроқ, яъни, тахминан 1926 йилнинг сентябрь ойида Фози Олим Юнусовнинг халқ оғзаки ижодига доир мақолалари билан танишиб, “Билим ўчғи” журналининг 1923 йилги 2-3-кўшма сонида “Алпомиш” достонига муқаддима<sup>1</sup>сида: “Янги адабиётимизга кучли миллий асос бизнинг халқ адабиётимиз бўлиши керак” лигини таъкидлаб, достон “Тошкент ва Самарқанд уездларида яшайтурғон ўзбекларнинг машҳур оқинлари Ҳамроқул баҳши ва Фозил жиров Йўлдош ўғлининг оғизидан” ёзиб олинганини айтади. Аммо қайси ўринлари қайси баҳшидан ёзиб олингани аниқ кўрсатилмаган. Журналда босилган парчани матн жиҳатидан ўрганиш,



<sup>1</sup> Ҳоди Зарифдан кейинги экспедицияларда ҳам бу қўшиқнинг мукаммал варианти топилган эмас. Афтидан, қўшиқ унтутилиб кетганга ўхшайди. 1973 йили мен сурхондарёлик Юсуф Үтаган ўғлидан унинг чала бир вариантини ёзиб олгандим. Профессор Охунжон Сафаров 1999 йили уни “Алла-ё, алла” тўпламида эълон қилди.

уни Фозил шоирдан 1928 йили иккинчи марта ёзиг олинган нусха билан қиёслаш шуни кўрсатдик, достоннинг бошланишидан Бойсарининг қалмоқ элига кўчишигача бўлган қисм (журналда 39-44-саҳифалар) Фозил Йўлдош ўғли варианти, Бойсарининг қалмоқ элига кўчишидан Алпомишнинг сафарга чиқиб, мозоротда тунашигача бўлган қисм (журналда 45-58-саҳифалар) Ҳамроқул бахши варианти, Алпомиш ва Барчин руҳларининг айтишуви (журналда 58-59-саҳифалар) яна Фозил шоир бўйича берилган. Фозил шоирдан берилган қисм иккинчи вариантга нисбатан анча қисқалиги ҳам аниқланди. Бу нарса нашрга тайёрловчи томонидан қисқартирилган бўлиши ҳам мумкин. Аммо нашрга тайёрловчи Фози Олим Юнусов муқаддимада шундай ёзади: “Алпомиш” достони бундан бир неча йиллар илгари турк этнографи, муҳтарам профессор Абубакир Диваев томонидан ёзилиб, ўтган йил Маориф комиссариатининг билим кенгаши олдидағи қирғиз-қозоқ билим ҳайъати томонидан китобча ҳолида бостирилғон эди. Мен Қозонда босилғон яна бир қозоқча “Алпомиш” достонини кўрган эдим... Профессор Диваевнида достоннинг биринчи воқеасигина кўрсатиладур. Иккинчи воқеасики, бу достоннинг фожеъ ва шоирона қисми кўрсатилмайдур. Биринчи воқеадан-да кўп муҳим лавҳалари тушиб қолғон. Қозон босмасида бунга тескари ҳолни кўрамиз. Достоннинг биринчи воқеаси ёзилмасдан иккинчи воқеасигина ёзилғон. Факат бунда кўп гўзал лавҳалар тушиб қолғон ва оқиннинг истеъододсизлиғидан достоннинг нафосатига кўп зарар келтирилган.

Менинг томонимдан ёзилғон “Алпомиш” достонига Алпомиш ботирнинг бошидан ўтган бутун воқеалар кирадур (кўрсатилади). Мен бу достонни ўзбек оқинлари оғзидан ёзғонда эшитилганича ёзишга ва воқеаларинда-да ҳеч бир лавҳани, ҳатто айрим таъбирларни қолдирмасфа тиришдим. Бундан мақсадим шул маҳаллалардаги (Самарқанд ва Тошкент уездларидағи) ўзбекларнинг лаҳжаларини қайд қилмоқ ва воқеаларни тўлалигича сақламоқ эди”. (“Билим ўчғи”. 1923. 2-3-сон. 38-бет.)

Фози Олим Юнусовнинг бу мулоҳазаларидан олим “Алпомиш” достонини тўла равишда ёзиг олган экан деган хulosага келиш мумкин. Чунки у достоннинг Қозон ва Абубакир Диваев нашрларининг чала эканини эслаб, ўзи ёзиг олган вариантда “Алпомиш ботирнинг бошидан ўтган бутун воқеалар” кўрсатилганини таъкидлайди. Шундай бўлса, унда қўлёзма қаерда қолди? Нега олим журналдаги парчани бир бахши варианти асосида эмас, икки бахшидан ёзиг олинган матнларни аралаштириб берган? Ҳар икки бахши вариантини алоҳида-алоҳида тўла равишда қаламга олганми ёки улардан парчалар ёзиг олганми? Бу саволларни аниқлаш ҳамда аспирантлик ишларим ҳақида ҳисобот бериш мақсадида устознинг олдига бордим. Домла менинг саволларимни эшитиб, хусусан, журналда эълон қилинган “Алпомиш” матнининг икки бахшига тегишли қисмларини аниқлаганимдан ғоятда хурсанд бўлиб, шундай дегандилар: “Фольклоршунослик халқ оғзаки ижоди намуналарини ёзиг олиш ва ёзиг олинган асарлар матни устида ишлашдан бошланади. Кўплар матн устида ишлаш ёзма адабиётга тегишли деб ҳисоблайди. Бу уччалик тўғри эмас. Факат матнга ёндашув тамойиллари хилма-хилдир. Бугунги кунда халқ ижодчиларидан нимаики ёзиг олинган бўлса, уларни ёпласига “дурдона” деб эълон қилиш, кимлар оғзаки айтгани ёки куйланганига қараб чала, ҳатто сохта намуналарни ҳам ғоявий-бадиий жиҳатдан юксак асарлар сифатида асоссиз равишда ошириб баҳолаш майллари мавжуд. Фольклор намуналари ҳам бадиий-эстетик ҳодиса эканини унутмаслик керак.

Мана, сиз “Алпомиш” достони вариантлари ҳақида диссертация ёзаяпсиз. Бунда хато қилмаслик учун ҳар бир вариантга зукколик билан ёндашув зарур. Фольклоршунослик нуқтаи назаридан қараганда, архивларда тўпланиб қолган барча фольклор ёзувларимас, у ёки бу достоннинг иккинчи бир достончи бўлмаган шахс томонидан айтиб берилган мазмуни асосида ёки ҳаваскор бахшилар ижросида пайдо бўлган намуналармас, балки достончилик анъаналари доирасида бадиий-эстетик ҳодиса дарајасига кўтарилиган ижодий вариантлар тадқиқотлар учун таҳлилга тортилиши ва нашр учун танланиши керак. Чунки тингловчи ёки ўқувчи ана шундай ижодий вариантларни мустақил бадиий асарлар сифатида қабул қила олади.

Фольклоршунос у ёки бу достонни ёзиг олаётганда, бахшини “етаклаши”, ундан “замонабоп” ниманидир талаб қилиши, “замонавийлик” ҳақида унга қандайдир маслаҳатлар бериши кечириб бўлмас гуноҳи азимдир. Бунинг ўрнига тўпловчи бахшидан устозларидан қандай ўрганган бўлса ва эл орасида қандай куйлаб келаётган

бўлса, шундай айтиб беришни илтимос қилиши зарур. Куйланаётган достонга матний жиҳатдан қандайдир ўзгартиришлар киритишга фақат ва фақат бахши ҳақлидир. Чунки қачонлардир асос солинган достончилик анъаналарининг меросхўри, уни сақлаб қолувчи ва янги шароитларда янада ривожлантирувчи бирдан-бир шахс бахшидир. Шу сабабли фольклоршунос бахшилар билан уларнинг устозлари ҳақида, қай бир бахши айтган варианtlарнинг бадийлик даражаси тўғрисида, устоз ижодкорларга нисбат берилган достонлар ёки уларнинг парчалари борасида сұхбатлар қуриши ва бундай сұхбатларда айтилган фикр-мулоҳазаларни ёзиб олиши зарур. Буни яхшироқ тасаввур қилишингиз учун бир мисол келтирай. Атоқли достончи Фозил Йўлдош ўғли Бойчиборни таърифларкан, бир ўринда: “Кўтанидан берисида кири йўқ” деб айтган ва 1928 йили шундай ёзиб олинган. Бир учрашувда шоир Кўса синчи тилидан Бойчиборнинг таърифи парчасини ижро этганида, мазкур парча достоннинг энг гўзал ўринларидан бири эканини, аммо бир мисрадаги “кўтанидан” сўзи сал дағалроқ чиққанини айтдим. Фозил шоир норози бўлгандай бир қараб қўйди-ю, ҳеч нарса демади. Аммо кейинги ижроларда бу мисрани бир неча марта: “Кўйруғидан берисинда кири йўқ” тарзида ўзгартириб куйлаганига гувоҳ бўлганман. Бу бахшининг жуда чиройли бадиий топилмаси эди. Достонларни нашрга тайёрлашда бахшиларнинг уларга киритган бундай ўзгартиришларини ҳисобга олиш зарур. Аммо матнни “бадиий яхшилаш” баҳонасида унга нисбатан ҳар қандай “таҳрир” ва “кўл уришлар” қатъий қораланиши керак. Фозил шоирнинг достонга киритган бошқа бир ўзгартиришини асар руҳидан келиб чиққан деб айтиш қийин. Сизга маълумки, пойга бошида боғлаб ташланган Қоражон Алпомишнинг пири Ражабхўжа ёрдамида банддан озод бўлади. 30-йиллар охирида шоир достонни куйлаганда, бу эпизодни тушириб қолдириб, бадиий бўш олти мисрада Қоражон арқонни ўз кучи билан узган тарзида тасвирлаган. Бу факт бахшилар кимларнингдир таъсирида баъзан куйланаётган достонларга нотабиий қўшимчалар ҳам киритишлари мумкинлигини кўрсатади.

Вариантларни ўрганганда шуни ҳам ҳисобга олиш керакки, ёзиб олинган матн баъзан бахши куйлаб келаётган достонни тўла ўзида акс эттирмаслиги мумкин. 1955 йили Абдулла шоирдан ёзиб олинган “Алпомиш” достони вариантида шундай ҳол кузатилади. 1929 йилги фольклор экспедицияси иштирокчиларига Абдулла шоир достонни жуда юксак бадиий савияда куйлаб берганди. Афсуски, у вақтда достонни ёзиб олмаганимиз. Бу ўринда шуни ҳам унутмаслик керакки, ёзиб олинган матнга нисбатан бахши ҳофизасидаги вариант ҳамиша кенгроқ ва бадиий мукаммалроқ бўлади. Чунки ёзиб олинган матн бахши ҳофизасидаги достоннинг бир ижрода, муайян бир ҳолатда айтиб туриши шароитида воқе бўлган нусхадир.

Кимга тегишли экани аниқ кўрсатилмаган икки бахши матнининг чегараларини аниқлашингиз ва уларнинг бир-биридан фарқини ҳис эта билишингиз яхши. Бу сизнинг вариантлар устида ишлашни ўргана бошлаганингиздан далолат. Бунда “Алпомиш” достонининг иккичи марта ёзиб олинган нусхасининг борлиги ҳам сизга ёрдам берган, албатта. Аммо бир қарашда бир хил кўринган икки нарсанинг бир-биридан фарқини англашга уриниш ёш тадқиқотчи учун муҳимдир. Аслида, бир истеъододли бахшидан уч-тўрт достон ёзиб олинган бўлса-ю, нима сабаб биландир бешинчисида унинг номи кўрсатилмай қолган бўлса, аввалги достонлар матнини ўрганиб, бадиий-услубий хусусиятлари асосида кейингиси ҳам унга тегишли эканини аниқлаш мумкин. Ана шундай мумкинлик бир достончи ёки достончилар гуруҳининг бошқаларидан ажralиб туришини ва ўзига хосликлар касб этишини аниқлаш имконини беради. Ўз тадқиқотларимда буни мен достончилик ёки бахшилик мактаблари деб атагандим. Мен достончилик мактабларини аниқлаганимда, бадиий-услубий ўзига хосликларни бош мезон қилиб олганман. Устоз-шогирд муносабатлари, репертуар бирлиги, локал хусусиятлар ва бошқалар бош мезонни аниқлашга ёрдам берадиган қўшимча унсурлардир. Ана шундай қатъий мезонлар асосида ёндошилса, достончилик мактаблари унча кўп эмаслигига ишонч ҳосил қилиш мумкин. Менинг назаримда, улар Ўзбекистонда ўн-ўн иккитадан ошмайди. Ўтмишда бундан ҳам кам бўлган. Чунки ҳар қандай ўзига хосликлар, бадиий-услубий хилма-хилликлар, индивидуал ранг-барангликлар, йўплар, ижролар ўзгачиликлари умуммиллий бир бутунликда, унинг яратувчиси бўлган халқа хос умумий анъаналар яхлитлигига воқе бўлади...”

Ўз вақтида мендек бир ёш тадқиқотчининг ўз йўлини топиб олишида ғоятда муҳим бўлган мазкур сухбатни шу ўринда тўхтатиб, бошқа бир сухбатни баён этишга зарурат туғилиб қолди. Гап шундаки, бу сухбат домланинг юқоридаги муроҳазаларига бевосита алоқадордир. 1964 йили Тил ва адабиёт институти ҳозирги Яхё Ғуломов кўчасидаги Ўзбекистон Республикаси Фанлар академияси биносининг биринчи қаватига жойлаштирилди. Фольклор бўлимига ичма-ич ўтадиган учта хона ажратилди. Энг ичкаридаги хонада кичик илмий ходим лавозимидағи камина домла билан бирга ишлардик. “Ўзбек халқ ижоди” кўп жилдлигини нашрга тайёрлаш ишлари энг қизғин кетаётган пайтлар. Нашрга тайёрланадиган достонларни домла қўлёзмадан ўқиб, айтиб турар, мен ёзиб борардим. Бир неча кундан бери “Якка Аҳмад” достонини тайёрлаётгандик. Нима учундир домла достонни ёздира бошлаганларида, айтувчи ва ёзиб олувчини айтмадилар. Достон матни устидаги иш яримлаб қолганда тўсатдан: “Айтинг-чи, достон кимдан ёзиб олинган?” – деб қолдилар. Дабдурустдан берилган бу саволдан довдираб қолдим. Зўрға ўзимни тутиб: “Архив картотекасида Жолғош Жассоқ ўғлидан ёзиб олинган деб қайд этилган. Аммо бандларнинг тузилиши, мисраларнинг қофияланиши, дастлабки банддаги охириги мисранинг кейинги бандда учинчи мисра сифатида қайтарилиши кабилар Эргаш Жуманбулбул ўғлидан ёзиб олинган достонларга ўхшайди”, – дедим қалтираб. Домла: “Нега қалтирайсиз? Тўғри жавоб бердингиз”, – дея кўлёзма тарихини сўзлаб бердилар.

“Эргаш шоирнинг амакиси машхур Жассоқ бахшининг ўғли Жолғош бахши факат биргина “Якка Аҳмад” достонини тўла равишда куйлаб келган, – дея ҳикоя қилгандилар домла ўшанда. – Аммо шу достонни ёзиб олишга ҳаракат қилинганда Жолғош бахши уни тузукроқ қилиб айтиб беролмаган. Шунда Эргаш шоир достонни ўзи билганича ёзиб чиқиб, ўзининг айтишича: “Жолғош бахшининг ҳам номи сақланиб қолсин”, – деган яхши ниятда қўлёзмани унинг номидан фольклор архивига топширган. Шу тариқа кўлёзма архивда Жолғош бахши номи билан қайд этилган. Аммо фольклор кўлёзмаларини Самарқанддан Тошкентга кўчириш даврида Эргаш ота дастхати йўқолган. Ундан, айнан, кўчирилган нусхагина сақланиб қолган. Ҳозир достонни шу нусха асосида тайёрламоқдамиз.

Мен 1936 йилнинг кеч кузида Жўшга бориб, Эргаш отани Тошкентга олиб келдим. 1937 йилнинг апрелигача Эргаш шоир менинг уйимда яшади. Унинг айтишича, бир неча бор Тошкентга келишга ҳаракат қилган. Аммо бунга имконият тополмаган. Охири Жолғош бахши ўзидан анча ёш бўлгани сабабли бисотидаги биргина эчкини унга бериб, сотиб келишни ва пулини йўл харажати қилиб Тошкентга олиб боришни сўраган. Жолғош бахши эса эчкини сотиб, пулини ўз оиласи эҳтиёжларига сарфлаб, турли баҳоналар билан шоирни Тошкентга олиб келмаган. Эргаш шоирнинг буюк ҳиммати ва олийжаноблигига нисбатан ўз амакивачаси Жолғош бахшининг бундай йўл тутиши ўта инсофисизлик бўлган”.

Мен бу воқеага бирдан-бир гувоҳ домланинг ўzlари эканини айтиб, бўлимда ёшлар номидан адолатни тиклаш зарурлигини илтимос қилдим. Домла ҳам илгаридан шундай қарорга келган бўлсалар керакки, тезгина бунга кўна қолдилар ва достон ҳақиқий айтувчиси Эргаш Жуманбулбул ўғли номига қайта расмийлаштирилиб, “Булбул тароналари” беш жилдлигининг биринчи жилдида 1975 йили нашр этилди...

...Фольклоршунос Буюк Каримов ҳақида материаллар тўплаб юрган пайтларимда, Ўзбекистон Фанлар академиясининг архивида иккита хатга дуч келиб қолдим. Улардан биринчиси Фози Олим Юнусов томонидан 1927 йили кўқонлик машхур муаллим Пўлатжон домулла Қаюмовга, иккинчиси Пўлатжон Қаюмов томонидан 1939 йили ўша пайтдаги Тил ва адабиёт институтининг директори Сотти Ҳусайнга йўлланган экан.

Фози Олим Юнусов ўз хатида “Уч оға-ини ботирлар” эртагини юборгани учун Пўлатжон домуллага миннатдорчилик билдириб, бундан кейин фольклор асарларини ёзиб олганда, шева хусусиятларини саклашга алоҳида эътибор беришни маслаҳат берган. Пўлатжон домулла эса ўз хатида эртакнинг мактаб дарслигига киритилганида унинг номи кўрсатилмагани адолатсизлик бўлганини, эртакни 1905 йили Ҳамро бибидан эшитгани асосида, кейинчалик ёзиб чиққанини, аслида, эртакнинг номи “Уч оға-ини шаҳзодалар” бўлганини, “Подшоҳлик қонхўрлик демакдир” каби жумлаларни ўзидан қўшганини айтиб, эртакка ҳаммуаллиф эканини баён қилган. Булар ҳақида Ҳоди Зарифга сўзлаб берганимда, устоз ўзларига хос аниқлик билан шундай деган-

дилар: “Уч оға-ини ботирлар” кейинги 30 йил давомида бир неча бор нашр этилиши билан халқимиз орасида кенг тарқалди ва мумтоз эртакларимиздан бирига айланди. Халқимиз уни шу ҳолида тұла қабул қылди. Пұлатжон домулланинг ўз айтганларига асосланиб, бугунғы кунда унинг матнидан қандайдир нотабиййлик излаш мақсадға мувофиқ әмас. Қолаверса, Пұлатжон домулла ҳам шу халқнинг вакили. Менинг назаримда, жуда катта ҳофиза қувватига әга бўлган бу инсон Ҳамро бибидан эшитганларини тұла сақтай олган ва эртакнинг қадимий асослари бизгача етиб келган. Бунинг устига, Н.П.Остроумов рус тилида әълон қылган “Уч оға-ини шаҳзодалар” эртагининг оригинални йўқ, бошқа тузукроқ варианtlари ҳам ёзиб олинмаган. Шундай экан, эртакнинг Пұлатжон домулла ёзиб берган Ҳамро биби вариантининг аҳамияти ҳеч маҳал камаймайди.

Сизга бошқа бир мисолни ҳам айтиб берай. Қорақалпоқ фольклорини тұплаш ва ўрганишга улкан ҳисса құшган Қалли Алимбетовнинг: “Урушгача жировлар репертуарыда “Қирқ қиз” достони борлигини эшитмаганмиз, урушдан қайтсак, “Қирқ қиз” пайдо бўлиб қолибди”, деганга ўхшаш баъзан ўз касбдошлари ишларига ишончсизлик билан қараган ҳолларга дуч келганимиз. Ҳолбуки, “Қирқ қиз” бир әмас, бир неча жировдан ёзиб олинган ҳамда қаҳрамонлик эпоси сифатида дунё миқёсида тан олинди. Тан олинган, эътироф этилган асарларга тил тегизиш, нималаргадир асосланиб, уларга соя ташлаш имлмий ҳақиқатта тўғри келмайди”.

Ҳа, Ҳоди Зариф ҳар бир ҳолатта жицдий ёндошар, бошқалардан ҳам буни талаб қиларди. Унинг фольклор асарлари матнига нисбатан тизимли муносабати, яхлит наазарий қарави бўлиб, бундай илмий асос “Булбул тароналари” беш жилдлиги, 37 жилди босилиб чиқкан “Ўзбек ҳалқ ижоди” кўп жилдлиги каби улкан нашрларни амалга ошириша имкон берди.

“Энди сизнинг саволингизга келсам, – деб сухбатни давом эттиргандилар домла 1962 йили. – Фози Олим Юнусов “Алпомиш” достонини тұла равишида ёзиб олинмаган. Аммо достонни Ҳамроқұл бахши ва Фозил шоир ижросида алоҳида-алоҳида тұла тинглаган бўлиши керак. Шунга асосланиб, достонга ёзилган муқаддималарида унинг Қозон ва Абубакир Диваев нашрларига нисбатан тұлалиги ва бадиий юксаклигини қайд қилғанлар. Тоғам журналда босилган парча матніда қисқартишлар қилмаганлар, балки ўзлари ёзиб олган матннинг бир қисмини нашр этғанлар, холос. Фозил шоир айтган айни ўринларнинг кейинги нұсхада ҳажман кўплиги ва тасвириңнинг батафсиллигига келсак, буни Фози Олим Юнусовнинг нашрға тайёрлаш давомидаги қисқартишлари тарзида тушунмаслик керак. Чунки Фозил шоир тоғамга достонни журналда әълон қилинган тарзда айтиб берган. Чунки достончи ҳар бир ижрода қай бир эпизодлар тасвирини кенгайтириши ёки торайтириши, ҳатто ўйланмаган ҳолда, у ёки бу лавҳалар тушиб қолиши мумкин. Бу ижрочилик жараённан одатдаги ҳолдир. Достон қисмлари ҳар икки бахшидан алоҳида-алоҳида ёзиб олинган. Нашрда эса улар орасига айрма қўйилмаган. Қўләзмаларнинг бўлиши бунга янада аниқлик киритиши мумкин эди. Афсуски, қўләзма архивга топширилмагани учун ҳам НҚВД ертўлаларида йўқолиб кетган. Тоғам достонни тұла ёзиб олмагани учун ҳам 1928 йили уни Фозил Йўлдош ўғлидан қайта ёзиб олишини ташкил этғандик. Амакиваччам – Маҳмуд Зарифов достонни менинг кузатувимда, Фозил шоирнинг, асосан, Лойқа қишлоқдаги уйида, қисман Самарқандда бахшининг айтиб туриши асосида, 1928 йилнинг ёз кунларида икки ой давомида ёзиб олган эди”.

Домланинг бу айтганлари ҳар жиҳатдан асослидир. Чунки “Наука и просвещение” журналининг 1922 йил 2-сонида Фози Олим Юнусов тұплаған фольклор материалларининг рўйхати әълон қилинган. Унда “Алпомиш” достони қўләзмаси икки қисмлиги ва атиги 50 саҳифадан иборат экани кўрсатилган. “Алпомиш”дек катта достон 50 саҳифадан иборат бўлмайди-ку! Шу фактнинг ўзиёқ, уша пайтда достон тұла равишида ёзиб олинмаганини, қаламга олинган 50 саҳифанинг бир қисми журналда әълон қилинганини кўрсатади.

Фольклор архивида 18-инвентарь рақами остида сақланаётган Фозил Йўлдош ўғлидан иккинчи марта ёзиб олинган “Алпомиш” достонининг қўләзмаси 946 саҳифадан иборат. Қўләзманинг биринчи саҳифасида 1927 йил 14 июнь санаси кўрсатилган. Унинг 16-саҳифасигача бўлган қисми, яъни, достоннинг бошланиши бошқа киши, эҳтимол, машҳур фольклор тўпловчи Муҳаммадиса Эрназар ўғли томонидан ёзиб олинган. Тах-

минимизча, достон 1927 йил 14 июнда Мұхаммадиса Эрназар ўғли томонидан ёзіб олина бошланған. Аммо, нима сабабданыр бу иш тұхтаб қолган. Ҳоди Зариф айттандай, достонни ёзіб олишни 1928 йилнинг ёз ойларида Маҳмуд Зарифов давом эттирган ва охирига етказған. Демак, күләэмнинг 930 саҳифаси Маҳмуд Зарифов қаламига тегишли. 1962 йылдагы суҳбатда Ҳоди Зариф буларни унуган ёки иккінчи даражали ҳолатлар деб ҳисоблаган бўлиши мумкин. Ҳар ҳолда бу ҳақда ҳеч нарса демаган. Эҳтимол, менинг хотирамдан кўтарилиб кетгандир.

Ушбу “Сұхбатлар” қаҳрамони Ҳоди Зариф ҳаётлигига, ҳатто бу ёруғ оламдан кўз юмиб кетганидан анча йиллар кейин ҳам гоҳи-гоҳида уни камситувчи, тоға-жиянни (устоз-шогирдни) бир-бирига қарама-қарши қўювчи фикрлар ҳам пайдо бўлиб қолмоқда. Масалан, тарих фанлари доктори Ҳайдарали Узоқов “Ватан” газетасининг 1998 йил 3 сентябрь сонида эълон қилинган мақоласида шундай ёзади: “Шу ўринда, ўзбек фольклористикиаси ва унинг асосчиси тушунчаларининг айрим ўзини фольклоршунос деб атаб юрганлар томонидан нотўғри талқин этилиши борасида бир фикр айтмоқчи эдик. У ҳам бўлса, матбуот ва теларадиоларда “Ҳоди Зариф ўзбек фольклористикасининг асосчисидир”, деган таги бўш, саёз фикрлар фольклор билан шуғулланаётган айрим шахслар томонидан дардманлек билан айтиб юборилмоқда”. Хўш, Ҳоди Зарифнинг асосчилигини асоссловчи “таги бўш, саёз фикрлар билан шуғулланаётган” “дардман шахслар” ким? “Ҳоди Зариф қиёфасида биз етуқ олимни – ўзбек фольклори ҳақидаги фаннинг яратувчисини кўрамиз. Унинг тўпловчи ва тадқиқотчи сифатидаги меҳнатлари билан ўзбек халқ ижоди тўғрисидаги фаннинг мустаҳкам асоси яратилди. Мен айтардимки, унинг қиёфасида ўзбек халқи миллий маданиятини ўрганиш соҳасида янги ўйлар очувчи олимни кўрамиз”, – деб ёзган академик В.М.Жирмунскийми?!.. Ёки: “Бошловчи бўлмоқ ва бўм-бўш ерда фаннинг муҳташам биносини тикламоқ чиндан ҳам қаҳрамонликдир. Ҳоди Тиллаевич шундай қаҳрамонлик кўрсатди”, – дея уни улуғлаган академик Воҳид Зоҳидовми?! Ё бўлмаса: “Ўзбек фольклористика мактаби”, “Ўзбек фольклористикасининг асосчиси” каби таҳлилий мақолалар ёзган профессорлар Мұхаммаднодир Саидов, Малик Муродов, Тўра Мирзаевми?!.. Ҳар ҳолда улар “ўзини фольклоршунос деб юрган”, шунчаки “дардманлар” бўлмаса керак! Бундай мулоҳазаларни яна давом эттириш мумкин. Чунки устознинг қайтарилмас илмий ижоди бунга тўла имкон беради.

Бундай муносабатлар факат Ҳоди Зарифга нисбатан эмас, балки унинг тоғаси – Фози Олим Юнусовга нисбатан ҳам, афсуски, бўлиб турибди. Мазкур ҳолатларга жавоб тариқасида биз “Аниқлик керак” номли бир мақола ёзіб, “Ўзбекистон адабиёти ва санъати” газетасининг 1988 йил 18 ноябрь сонида эълон қилгандик. “Сұхбатлар” йўналишига мос келгани учун қуйида уни тўла равишда келтириши лозим кўрдик. “Ўзбекистон адабиёти ва санъати” газетасининг шу йилги 16 сентябрь сонида босилган шоира Мукаррама Муродованинг “Мен даврнинг кичик парчаси...” сарлавҳали фактларга бой, мазмундор мақоласидаги ноаник бир маълумотга илмий-адабий жамоатчилик диккатини тортишга жазм этдим. Гап шундаки, мақола мулалифи Адҳам Ҳамдам хотирасига асосланиб шундай бир фактни келтиради: “Партия сафларини тозалаш кунларида ўқитувчи Фози Олим Усмонни танқид қилди: “Бухариннинг хато фикрларини Усмон ўз докладида кўллади, лекин партия ташкилоти бунга чора кўрмади”, – деди. Ўз навбатида, Усмон шундай деди: “Муҳтарам Фози Олимович! Қадрли отахон! Сиз профессорсиз, отагинам! Мен-ку хато қилган эканман, нега сиз ўша пайтда танбех бермадингиз? Тарсаки туширмадингиз? Шунча пайтдан бери кўнглингизда сақлаб юриб, энди айтасизми? Шундай экан, иккала қулогингиз билан эшитинг: сиздек ўнта профессордан битта Бухарин яхши!” Усмон шу гапнинг индинига ўқишини ташлаб кетди...”

Бирорнинг эслаши асосида келтирилган бу маълумот ғоят шубҳалидир. Чунки Қоҳира ва Истанбул университетларини битирган, илғор рус шарқшунослиги руҳида тарбияланған, араб, форс, рус, туркий тилларнинг пухта билимдони, ўзбек тили, фольклори ва этнографиясини ўрганишига улкан ҳисса кўшган Фози Олим Юнусовдек юксак маданиятли зиёлиниң шундай дейиши ва бу жанжалга иштирок этиши қийин. Унинг ҳаёт йўли ҳам буни тасдиқлаб турибди. Фози Олим Юнусов бу йилларда Тошкентда яшади ва Маданий курилиш илмий-текшириш институтида (1931-1933), Тил ва адабиёт институтида (1934-1937) ишлади ҳамда Низомий номидаги Тошкент Давлат педагогика институтида (1931-1937) ўзбек тилидан дарс берди. Унинг 1931 йилдан

кейин Самарқандда ишлагани ҳақида ҳеч қандай маълумот йўқ, шундай бир ҳолни қариндошлари ҳам эсламайди. Аксинча, қизи Мира Юнусованинг эсласича, мақолада тилга олинган даврда, яъни, 1934-1935 йиллари Фози Олим Юнусов Ленинградда узок муддатли сафарда бўлган. Ҳатто болалари, шу жумладан, 8-9 ёшли Мира опа ҳам бир йил Ленинград мактабларида ўқиган.

Бу ўринда, яна бир факт характерлидир. Ҳоди Зарифнинг айтишича: “1933 йили Ўзбекистон Фан комитети Фози Олим Юнусовга “Ўзбек тилининг академик грамматикиаси”ни яратишни топширади. Унинг узоқ муддатли Ленинград сафари ҳам шу иш билан боғлиқ. Катта ҳажмли бу грамматика қўлёзмаси 1937 йили тайёр бўлади. Афсуски, қўлёзма ҳам, унинг муаллифи Фози Олим Юнусов ҳам 1937 йилдаги бедодликнинг курбони бўлади. Бундан чиқадиган хулоса шуки, жуда масъулиятли илмий-ижодий меҳнат билан банд бўлган бир кишининг Самарқандга бориб ишлашига, бунинг устига, “тозалаш” мажлисида иштирок этишига вақти ҳам, имконияти ҳам, шароити ҳам йўқ эди. Фози Олим Юнусовнинг бу йилларда вақтли матбуотда деярли қатнашмаганинг сабаби ҳам шунда. Демак, Усмон Носир билан боғлиқ ҳодисага Фози Олим Юнусов эмас, балки бошқа бир шахс алоқадор бўлиши керак. Чунки Усмон Носирдек зукко, тўгрисўз шоирнинг 41-42 ёшлардаги Фози Олимдек мўтабар бир шахсга “Отагинам” деб ҳақоратомуз мурожаат этиши мумкин эмас. Усмон Носир Фози Олим Юнусовнинг ўша йилларда ўзбек фанидаги мавқеини, қадр-кимматини ҳаммадан яхши билар ва эъзозлай оларди.

Яна бир гап. Юқоридаги ҳодисада Бухариннинг тилга олиниши ҳам шубҳали. Чунки бу даврда Бухаринни танқид қилиш мамлакат миқёсида тўхтаган, у СССР Конституциясини ишлаб чиқиш комиссияси аъзолигига сайланган йиллар эди. Уни қайта танқид қилиш эса, 1936 йилнинг охирларидан бошланди. Демак, ўша “тозалаш” мажлисида Усмон Носир Бухариндан фойдалангандиқда эмас, бошқа бирор масалада танқид қилинган бўлса керак.

Бир қарашда арзимас бўлиб кўринган маълумотга диққатни қаратадиганимиз беҳуда эмас. Биринчидан, бу маълумотни бошқа матбуот органлари ҳам илиб кетдилар, мутлақ ҳақиқат сифатида радио ва телевидениедан айтилмоқда. Иккинчидан, бир қатагон қурбонига бошқа бир қурбонни қарши қўйиш, юмшоқроқ айтганда, инсофдан эмас.

Ўзбек халқи маданияти тарихида ўчмас из қолдирган ҳар икки шахснинг порлок хотираси ҳақиқатни рўйирост айтишни талаб қиласди. Бунинг учун ҳар биримиз баббаравар масъулмиз”.

Шуни алоҳида таъкидлаш керакки, Фози Олим Юнусов бор-йўғи 17-18 йил илмий ижод билан шуғулланди. Шу қисқагина даврда, у бой мерос қолдирди. Аммо унинг асарлари турли манбаларда сочилиб ётиби. Кўплари қўлёзма ҳолида бўлгани сабабли, уларнинг сақланиб қолгани ёки йўқолгани ҳам маълуммас. Олим асарларини бир жойга тўплаш, йўқолган деб ҳисобланганларини қидириб топишга уриниш, маъқулларини қайта нашр этиш, фан тарихчиларининг шарафли вазифаларидан бўлмоғи зарур. Зоро, бу бизнинг Фози Олим Юнусов хотираси олдидаги бурчимиздир.



## Шеърият



### ҮКТАМОЙ

1960 йилда туғилган.  
Наманган Давлат  
университетининг  
филология  
факультетини  
тамомлаган.  
Шоуранинг “Согинч  
қүшлари”, “Сабрга  
сұяниб”, “Томаётган  
күнгил”, “Сирдон”  
сингари шеърий  
тұпламлари нацир  
этілған. Унинг  
“Айрилиқ азоби”  
тұплами ҳинд тилида,  
“Йиглаётган юрак”  
тұплами панжоб ва  
инглиз тилларида чоп  
қылған.  
1991 йылдан  
Ўзбекистон Ёзувчилар  
уюшмаси аъзоси.

## Пәжмаҳал

*Касида\**

*Бобурийлар Ҳиндистонда Ўрта Осиё  
уйгониши даврини бошлаб берди.  
Жавоҳирлал НЕРУ*

Тонглар аzon айтмииш  
субхұ сабога,  
Оғир сукут ичра  
толған салтанат.  
Муқаддас севгининг  
гувоҳи Жамна<sup>1</sup>  
Йиғлаб садоқатга  
қиласар ибодат.  
Абадий яшиллик  
беланчагида  
Беором майсалар  
айтар салавот.  
Севгидек ям-яшил  
Ҳинд бўстонида  
Икки дил қисмати  
топмиш ҳаловат.  
Бу ҳайкал жаҳоннинг  
муҳаббат Тоҷи,<sup>2</sup>  
Ишқ намоз ўқийди  
этакларида.  
Юраги бу ўтдан  
пажмурда гуллар  
Ҳақиқат излайди  
эртакларидан.  
Эй севги қисмати,  
бунча суюксан,  
Машъум хотирларнинг  
ўчмас сиёҳи...

\* Журнал варианти.

<sup>1</sup> Жамна – Ганга дарёсининг калта бир ирмоги Жамна дарёси.

<sup>2</sup> Тоҷи – Тоҷмаҳалининг қисқартирилганы.

Теграда ҳижронга  
кўниколмаётган  
Шоҳжасон Мирзонинг  
инграган оҳи.  
Ногаҳон кўнгилнинг  
қаватларидан  
Муаззам туйгулар  
кўтаради боши.  
Дарднинг сизмай кетган  
гардишларидан  
Тошиб чиқаётир  
аччиқ-аччиқ ёши.  
Замин узра зулмат  
тўрларин ташлар,  
Кўкдан тушиб келар  
туннинг лашкари.  
Севги азобига  
гирифтор кунлар  
Келар қошингизга  
кўнгиллашгани.  
Ишқ сенга бунчалар  
ярашимши Моҳим,  
Юлдузлар дийдор-чун  
тўлар ҳар тун божс.  
Остонаси тилло,  
кўшиклари лаълдан  
Кошона муборак,  
севги гултожи...

\* \* \*

...Бу ерда заҳрини  
соҷмагай аёз  
Жаззахда<sup>1</sup> тинкаси  
қўрийди Ҳинднинг.  
Фасллар алмашмас,  
яшиллик ҳоким,  
Бунда эриб кетар  
ҳар қандай тундлик.  
Иссиқдан бўғриқиб  
кетар банаңзор,  
Ташлаб қочмоқ бўлар  
пайкалларини.  
Кўллари қуёшдан  
қорайган шамол  
Силар пальманинг оқ  
баданларини.

<sup>1</sup> Жаззах – жазиралар.

Шундай бир кунларга  
кўнглини очиб,  
Сеп йигар тўйига  
сулув Аржуманд.  
Вужудин бир ҳислар  
оташлантирас,  
Тоза бир ишқча  
эди орзуманд.  
Тик боқмоқ истади  
толе кўзига,  
Недир дил дашида  
қисмат ёзуги?  
Фотиҳпур секридан  
келган авлиё  
Кўриб ҳижжалади  
тақдир чизигин.  
Гўё кимдир бошдан  
қўйди совук сув,  
Бир сўз демоқ учун  
гунгу лол эди.  
Фолбин бўлганига  
кетди ўқиниб,  
Бу қизнинг қисмати  
мудҳии фол эди.  
Мунгли сукунатдан  
ахтарар чора,  
(Тарихга қимматга  
тушган бу талъат.)  
...Мангу шаънга тўлар  
келажак тонгинг,  
Лек бошқа ном билан  
топгунг саодат.  
Шуҳратингга шерик  
бўлар ёринг ҳам,  
Фано салтанати  
бахши этсин роҳат...  
Сезади давроннинг  
узун карвонин  
Авалиё сўз тўқир  
терга ўралиб.  
Унга қандай айтар:  
– Машҳур бўлиш-чун  
ўлим останангга  
келар судралиб.  
Мехр-садоқатинг,  
гўзал ўлиминг  
дунёга бир ёдгор  
– таҳт ҳадя этар...

\* \* \*

...Эрк ва шараф кўтариади туг  
Ўт ичидага алаҳлар Ватан.  
Бағри тўлиб турган гулбоғлар  
Вайронага дўнтара дафъатан.

Гоҳ ёв босар юртни беомон,  
Гоҳо жсанглар шон-шавкат ёди.  
Тахт талашиб ё бобурийзодлар  
Бир-бирларин аямас гоҳи.

Қай сафарга отланар Мирзо  
Ҳамроҳ эди шердил Аржуманд.  
Аёл қалби бир тилсим, денгиз,  
Қилмас эди ўлимни писанд.

Ажмир, Деккон ва Рожистонда  
Малак ҳамдард, дилбанди эди.  
Кашмир воҳасига сафарда  
Хуррам жонин пайванди эди.

Кувгинликнинг зил кунларида  
Чангизору ўрмонзорларда,  
Этиқ кийиб Малика Шоҳ-ла  
Юрган мөгор босган горларда.

Бола каби Шоҳ барин тутган,  
Бир кўнгилки ишиқдан шикаста.  
Эргашарди ўтли бир соя –  
Назокатли соқчи фаршишта.

Булут кезмиши ложувард кўкда,  
Гов бўлолмас бўрон йўлига.  
Орзулари баланд ўзидан,  
Хуррам қарап унинг кўнглига.

Жанглар эмас хатардан холи  
Шоҳ сўз қотди ёрига дилтанг:  
– Сафар хавфли, қасрда қолгин,  
Сўнгра қилиб юрмайлик, аттанг!

Киприклар – ўқ, отилмоққа шай,  
У меҳрини қиласи нишон.  
Юрагида ёнар ишишибоҳ,  
Кўзларидан думалар маржон:

– Қайдада бўлар менда ҳаловат,  
Сиз ҳақда бир хабар билмасам.  
Кўксингизга тиконлар кирса  
Кипригим-ла мен суғурмасам.

Гар зиндоңда бўлсангиз банди,  
Сиз ёқлардан бўлмаса дарак.  
Сизсизликда ўтган даврону  
Шоҳона бу ҳаёт не керак?!.

Дарёлардан кечиб ўтишида  
У дуч келди ўлим тўрига.  
Шундай оғир куннинг бирида  
Шўр тўқилар бўлди шўрига.

Ориссадан ўтарда филнинг  
Оёқлари кетмиши тайрилиб.  
Қаҳрин сочиб пишқирган сувга  
Учган у Моҳ ҳуишдан айрилиб.

Айқиради қутурган дарё,  
Сув ўлжасин тортмииши домига.  
Жавлон уриб ўзидек жасур  
Оқсоқ оро кирган жонига.

Ўлжага чанг солган бургутдек  
Кўпиради дарё қонсираб.  
Моҳ ўлимга чап бериб кетди,  
Шоҳ ўтириб қолди, ҳансираб.

\* \* \*

Ишқ томарди Моҳ бармоғидан,  
Ёрсиз дунё олтин қафасдай.  
Чанқагандек сув ичра балиқ  
Согинарди ҳар бир нафасда.

Хуррамиоҳнинг дил боғларидан  
Терар ишиқнинг яшиноқ гулини  
Ва, бу гуллар ёғдуси шамдай  
Ёритарди қора тунини...

\* \* \*

...Жўмард эди ул малаксиймо  
Шижсоати дарёдек бедил.  
Жонзотларга етказмас озор,  
Кўнгли бўшаб қолган – раҳмдил...

*Ов қиларди – кўнгилочарга,  
Камонбозу моҳир бир мерган.  
Тавба қилган, бир гал шикорда  
Пушаймонлик мевасин терган.*

*Хой-ҳавас деб, бўзлатди афгор,  
Мўлжасал олиб она кийикни.  
Елинидан сути оқарди,  
Юрак-багри экан куюкли.*

*Талвасага тушган жонзотнинг  
Кўзларига боқди тикилиб.  
Сезимлари тушиб бир ҳисни,  
Тавба қилди бағри титилиб.*

*Она кийик жавдирап нолон,  
Дигиллайди кўзда жоласи.  
Бахтсизликнинг аччиқ меваси –  
Уясида қолган боласи.*

*Фожиани ҳис этган замон,  
Тўхтагандек томирда қони.  
Етимликнинг совуқ кўзларин  
Ҳис этганда ҳапқирди жони.*

\* \* \*

*...Кўнгилдай бесаранжом дунё,  
Тугай демас исён, галаён.  
Қиличлар қон ялаб тўймайди,  
Зулмларки, яшар бардавом.*

*Киргинбарот жсангардан зада  
Шоҳ отланди Бурҳонпурга.  
Оғироёқ соқчи фаришта  
Бир соядай эргашиди унга.*

*Оғриқлари симиirlар ҳали  
Битмаганди жароҳатлари.  
Филдан қулаб тушгандан бўён  
Кўрқувлари кетмаган нари.*

*Йўллар сўқмоқ, тошли, чанг-губор,  
Жанглар хавфу хатарда эди.  
Ул мўлтираб турган чироққа  
Лек, Жаҳонгир қайт, деёлмади.*

*Қиммат тушиди бу кўнгилбўйлиқ,  
Асрларга тенг бўлди армон.  
Юрагининг соҳилларидан  
Сизиб чиқди минг бир пушаймон...*

*Шоҳ тушиди бул саҳар чоги  
Шудрингларга чўмилар майса.  
Кўкдан ҳурлар сиргалиб тушар  
Тўкилади дур, абр-найсон.*

*Чор тарафга сочилган ифор,  
Туйгулардай тегралар гулгун.  
Тебранар масти гулу чечаклар,  
Ҳайратларда мавжланар очун.*

*Кўлларидан тутиб Мумтозин  
Ишқ майидан бўлибон сармаст.  
Йўл чорларди уфққа томон,  
Тогу тошлар кўнгиллардан паст.*

*Бирдан кўкни қоплади булут,  
Гулдиради момақалдироқ.  
Борлиқ чўчиб тушиди қўрқувдан,  
Шоҳ танига югурди титроқ.*

*Бўрон тинмии, кўрсаки, Мумтоз  
Айланганмиши гўзал оққушига.  
Ой нурида хиром этармии  
Ва, куйлармиши тушиб жунбиишига.*

*Шундай хонии қиларкан оққуши,  
Шамдай эриб кетибди кеча.  
Унинг ўтли нолаларидан  
Ер-кўк ёнмии куй тугагунча.*

*Сўнгра, оққуши айтиб видолар  
Тун қўйнига кетибди сингиб.  
Гафлат отин минган шўрлик Шоҳ  
Фам-кулфатдан қопти эгилиб...*

*...Бу қандай туши,  
титрарди хоқон,  
Бу қандайин корга ишора?  
Бундан қулфат иси келарди,  
Сувга тушин айтар дилпора.*

Оқкүш фақат ўлимдан аввал  
Булбул каби хонии этаркан.  
Унинг мунгли нолаларидан  
Тоғу тошлар эриб кетаркан...

...Юрагига чўккан гашликни  
Эритолмас бойлигу тојс-тахт.  
Сукут ичра гаріб бир фарёд  
Киприк қокмай туради карахт.

Кўтаролмай икки баҳт таҳтин  
Ўзлигини фоши этди дунё.  
Мұхаббат зар кўшиқида уни  
Мудҳии қисмат кутарди, аё...

\* \* \*

Ўт-оловин туркайди қуёши,  
Жазирама теракка чиқсан.  
Куриб-қақшаб пўклиллайди ер,  
Сув излайди дов-дараҳт чанқаб.

Чакиллайди ёмғир каби тер,  
Борлиқ ўзин сояга ташлар.  
Ою куни етиб Мумтозни  
Аччиқ тўлгоқ хуружин бошлар.

Кора булут қоплади кўкни,  
Кўкдан амр бўлдими, вожиб.  
Ёмғир қуйиди, чунон, челаклаб  
Бир ваҳима қўзгалди, ажисиб.

Тўлгоқ тутар, аччиқ ўлимдан  
Ваҳм ичра титрар баргдек жон.  
Моҳ курашар ҳаёт жанггида  
Яшаи учун ахтариб имкон.

Чирмаб келар қора хаёллар,  
Ўзин ҳар ён ташлар саросар.  
Биларди-ку, тўлгоқ азобин –  
Тугиш ўлим билан баробар.

Нажот излар ҳар бир шарпадан,  
Зулмат ичра алаҳлар нигун.  
Хаёлига бостириб кирди,  
Она-кийик жаводираб забун.

Кийик келар, кўкси қизил қон,  
Мијжасида қотган жолоси.  
Кўзларида зоҳирий алам  
Вужуд тўла оҳу ноласи.

Тилга кирап: – Қайтар дунё бу,  
Нима топдинг кийик бошин еб?  
Бўзлаб қолган болам, деб, ийглаб,  
Қарғагандим, куним тушисин, деб.

– Ҳом сут эмган бандангман, осий,  
Кечир оҳу, бағрим тўла чўг.  
Менсиз адo бўлар Шоҳжсаҳон,  
Болалардан эмас кўнглим тўқ.

Ҳисоби бор экан дунёни  
Нечун қасос шунча тез қайтди?!.  
Кибор эдим, меҳр-шафқатни  
Менсимаган эдим у пайти.

– Эрлар санғдил, қаттол ва жоҳил  
Сен туймадинг ҳолимни, эсиз.  
Суйған дилбанд – ишқ меваларинг  
Бир-бирини гўштини есин.

Зулмат ичра солиб ваҳима  
Кийик туман ичра йўқолди.  
Бошда ўлим шамиширин сезиб  
Моҳ таъваса ичида қолди.

Қон қусади еру кўк титраб,  
Юнатмоққа шамоллар ожиз.  
Бемажсол у малика сезар  
Умидланмоқ энди ножсоиз.

Ёсин ўқир ёмғирки, тинмай,  
Бўрон увлаб ўқир оятлар.  
Тугилажсак бола – бошема  
Волидасин бошига етар.

Қиз түғилди,  
аммо бу ташриф  
Кувонтирмас ҳеч бир гўшани.  
Кўкка ботиб борарди бу Моҳ  
Тигдай ботиб ҳаёт тўшаги.

— Хуррам, — деди, у ақли шошиб, —  
Тез чорланглар, келсин ёнимга.  
Хаёт мен-ла видолашмоқда,  
Ажал күзин тикмии жонимга.

Бу муждани етказди чопар,  
Шамол бўлиб елди Шоҳ дарҳол.  
Тез жонланиб кетди ваҳима,  
Келганда, Моҳ эди бемажол.

Ёр сочлари ёйиқ афтода,  
Нигоҳида бир хатар кезар.  
Хавотирнинг қадамларидан  
Шоҳ айрилиқ ҳидини сезар.

— Менсиз оқарарму тонггингиз  
Кўнглим шоҳи, шавкатли султон?  
Орзуларим ям-яшил эди,  
Хукм ўқий, деб, турибди хазон.

Согинч дилни эзиб, тилкалаоб  
Саҳарларда айтганда аzon,  
Ишқ ҳақига айланг тиловат,  
Мұхаббатга йўқ эмиш қазо.

Умрингизни еб битирмасин,  
Айрилиқнинг айгири гажисиб.  
Севгимизга мақбара қуринг,  
Садоқатнинг бўлсин гултоҷи!..

...Оқсоқ хона эшигин очиб  
Мўралади ичкари аста,  
Оппоқ оққуши қўлларин тутиб,  
Бехуши ётар Шаҳоншоҳ пастда.

Бемаврид бу йўқотишлардан  
Туннинг ранғги ўчиб кетганди.  
Беҳишит иси келган маъвога  
Мумтозбегим учиб кетганди...

\* \* \*

...Пардасини кўтармас очун,  
Мотам тутар ер-кўк сукутда.  
Ҳақ ишқидан яралган юрак  
Наҳот чирир сандиқ тобутда?

Тожу таҳтга боқмайди ул Шоҳ  
Борар қалбин шамолга очиб.  
Ҳижерон ошиқ учун жазодир,  
Бўзлаб борар ўзидан қочиб.

Кунлар ўтар, мисли чопқир от,  
Айрилиқнинг ўти куйдирап.  
Базмларда бўши курсига қараб  
Шоҳ ёшларин тўкиб ўлтирап.

Аммо, табиб атамииш бу вақт  
Солиб қўяр ҳаёт изига.  
Ул кўзлари қўкарған гамлар  
Аста кела бошлар ўзига.

Шоҳ ваъдасин эслаган ҳамон  
Умид ўйнар қароғларида,  
Юрагига бир шуъла инди,  
Бир ўт ёнди юрак қаърида:

— Қуриб бир обидаким  
Мумтозим руҳин хуиласам.  
Согинчининг соясида  
Кошки, минг йил қишиласам...

Танлов этди бутун ўлкага  
Чиздирмоққа мақбара талхин.  
Элу юртга кетди овоза  
Оқиб келди меъморлар қалқиб.

Келаверди Мағриб, Машриқдан  
Машҳур уста ҳам сангтарошлиар.  
Ўз касбининг моҳир довлари  
Хунарманду ҳамда наққошлиар.

Юзлаб талхлар этилди ҳадя,  
Ҳар лойиҳа ўзи бир таъриф.  
Қўли баланд келди танловда  
Бухоролик Мұхаммад Шариф.

(Шунданмикан, бу кўҳна қаср  
Гўри Амирга ўхшишиги бор,  
Аркнинг гўзал қуббаларида  
Регистоннинг мавжлари бисёр?)

Бунча жоҳил, тошибагир дунё,  
Ўз билгидан қолмагай, асло.  
Чорлади Шоҳ Уста Меъморни,  
Сирни ёймиши чақимчи сабо.

*Шоҳжсаҳон, дер, кўп ўйга толиб:*  
— Сенинг талхинг келди муносиб.  
Аммо, сенга битта шартим бор,  
Бу бир шартким, бажармак душвор.

Хеч шубҳа йўқ, бу кўҳна қаср,  
Асрларни этгувчи асир.  
Нур таратар мисоли моҳтоб,  
Ёғдусидан рашик этар офтоб.

Тонглар битар минг бир қасида,  
Асрларнинг силсиласида.  
Шундай сарой бўлар устувор  
Илло, пирлар бўлгай маадакор.

Авф эт, кўнглинг минг бор  
гашилайман,  
Кўлларингни кесиб ташлайман.  
Аммо, етти пуштингга этар  
Тиллаларга кўмиб ташлайман.

Уч кун муҳлат берди ўйлаш-чун,  
Уста умид чечаги сўлди.  
У шон-шавкат мазасин тотмай  
Бухорога қайтгиси келди.

Йўқ қуллуқдан бошқа најсоми,  
Кўрмай бўлмас тақдирда борин.  
Ортиқча сўз сизмас ўртага  
Уста рози, айтмиши қарорин...

\* \* \*

...Оқ мармар бу – оппоқ орзулар,  
Оқкуши бўзлаб ёниб куйлайди.  
У Тожмаҳал битган чўнг сана  
Ғаму ҳасрат пича камайди.

Шоҳ туши кўрди қаср битган кун,  
Оқкуши сузар ҳовуз бағрида.  
Мумтозбегим сайр этар шодон  
Беҳишт боягин равзаларида.

Кўзларида барқ урап ҳилол  
Кўйлаклари елда ҳилтиар.  
Зулук каби қора сочидан  
Жаннат гулин ислари келар.

Эркаланиб боқар ёрига  
Минг тавозе, минг бир ноз ила.  
Икки ошиқ қиғтига қўниб  
Айтишиарди булбуллар ўлан:

— Қимор эрур бу ҳаёт, асли,  
Сандиқ тўла бу очун тилсим.  
Омад отин минмоқлиқ учун  
Ниманидир бой бермоқ лозим.

Мен кетмасам, ёнмасдинг ҳаргиз  
Фироқларнинг алангасида,  
Қайгу-ғамлар судрамас эди  
Соғинчларнинг гўшангасига.

Севги – мангу,  
қурган қасринг ҳам  
Бўронларда кетмагай нураб.  
Қайгули ишиқ қисмати чорлар,  
Дунё келар бизларни сўраб...

...Мумтоз яқин келди ёнига,  
Шодлик ёши бўйнида мунчоқ.  
Дер: – Султоним, бошинг қўлма хам,  
Қутлуғ бўлсин, бу Тож – овунчоқ.

\* \* \*

...Замонларга соф ишқдан сўйлаб  
Беш асрлик силсиласида,  
Садоқатнинг мангу ёдгори –  
Тожмаҳал ишиқ ҳосиласидир.

Ситамлардан кичрайган Жамна,  
Ишиқ қисматин жонли гувоҳи.  
Беш асрки, сўйлар ҳикоя,  
Хоритмайди ишиқ деган, ёхуд.

Маҳобатли бу ошён узра  
Хуррам руҳи юрибди ялқиб.  
Айрилиққа кўнмаган юрак,  
Сизиб чиқар кўклардан балқиб...

Жамна бағри бир сандиқ сирдөн,  
Лек эттагай сирларни ошкор.  
Қаср битгач, Меъмор құлларин  
Кесиб ташламаган Шоҳ бекор.

Қаср ой-ла талашган ҳусн,  
Түнлар ёқа ушлар ҳайратдан.  
Ором топар гуллар бир күрса,  
Уста боши қотган күлфатда.

Шоҳ бишарди ҳеч ким чеколмас,  
Йигирма иил бундай заҳматни.  
Уста бундай бино қуролмас,  
Умри етмас ёки гайрати.

Аммо, бу Шоҳ – бедаво ошиқ,  
Телбаларча ёрин сүярди.  
Хатто, арвоҳидан қызганиб,  
Рашк олови ичра куярди.

Жило, оро беріб қасрга  
Уста Шоҳга ёқмоқ бўларди.  
Гўёки, у мармар девормас,  
Мумтоз баданларин силарди.

Не кўйларга тушибия Хуррам,  
Юрак-бағри титилиб кетди.  
Рашк кўзларин кўр қилган ошиқ,  
Бу Меъморга мудҳииш ҳукм этди.

Йигирма иил чеккан заҳмат-чун  
Олганди шу зайл “мукофот”.  
Икки қўли чопилган Уста  
Тақдирга тан бермиши ниҳоят.

Меъмор умрин поёни қадар  
Тентиб юрмиш, Аркда арвоҳдай.  
Қазо топгач, бу боз четига  
Дағн этилмиси, Жамна гувоҳдир...

...Замонларнинг талотўмидა  
Тож бойлиги бўлган хомталаи.

Мұхаббатни ўлдирмоқ бўлди  
Не золимлар қилиб ёвқараши.

Қароқчилар тунаган Аркнинг  
Қолмиши фақат бошидаги Тож.  
Сепин ўғирлатган келиндай  
Ҳеч вақосиз қолган, ялангоч.

Балки бу Тож унча буюкмас,  
Ишиқ қисмати буюк ўзидан.  
Бунда ошиқ ҳиммати буюк  
Аёл учун чиқиб сўзидан.

Фаҳр этаман, ватандошлиарим,  
Қурмиши гўзал севги меҳробин.  
Ҳинд диёрин эмас, оламни  
Маҳв айлаган қутлуғ эҳромдир.

Бобурларни ёзғирманг ёв, деб,  
Қудратидан бўлган бинолар  
Беріб келар, бу диёрга зеб,  
Томошага келар дунёлар.


Андижоним түкқан Бобурни  
Армони кўп, бағри тўла чўғ.  
Мулку Турон чопар Ҳинд сори,  
“Андижонда Тожмаҳал”и ийӯқ.

Ошиқади олифта дунё,  
Бир кўрсам, деб, зебо, сайқалин.  
Юрагимда ифтихор саси –  
Боболарим қурган ҳайкали...

...Қуёш нурин сочар тонг саҳар,  
Товланади заррин Тожмаҳал.  
Ишиқ қиссасин тинглашга келар,  
Юмушлардан зериккан шаҳар.

Аzon айтар субҳга шамол,  
Ҳасрат рамзи чўккан сукутга.  
Ишиқ улгайтган бу кўҳна қаср  
Боши тегиб турибди кўкка...

## Ижодхонада бир соат



### **Нодир НОРМАТОВ**

1950 йилда тугилган. Ўзбекистон Миллий университети журналистика факультетини тугатган. Унинг “Кўҳитанг ҳикоялари”, “Жарликдан қушилар учди” тўпламлари, “Дараҳт тагидаги одам”, “Бисом”, “Жазо”, “Камалак яшайдиган уй”, “Голубые орехи” қиссалари, “Баригал”, “Рўзи Чориевнинг сўнгги васијати” романлари нашир этилган.

Нодир Норматов  
“Меҳнат шуҳрати”  
ордени билан  
тақдирланган.

## **БИЗ ИЗЛАЁТГАН ҲИҚМАТЛАР**

### **Сүҳбат**

**Абдулла УЛУГОВ:** Бадиий асар яратиш, хусусан, ҳикоя, қисса, роман ёки драма ёзиш учун ижодкор воқеалар рўй берадиган замон ва маконни хаёлан тасаввур этиши, қаҳрамонлари тақдири қандай кечишини билиши, уларнинг ўй-кечинмаларини ҳис этиши, ҳаётий воқеаларни қайта ишлаб, мақсадига мувофиқ жойлаштириши лозимки, бу қанчалик оғир машаққат эканини фақат асар яратган ижодкорнинг ўзи билади. Асарни ёзиш беҳад мушкул юмуш эканлигидан муаллиф ҳар доим ҳам қаҳрамонлар ички оламини, воқеликни ҳаққоний ва таъсирчан тасвирлашга эришавермайди. Шундай бўлса-да, айрим ижодкорлар ёзганларини қайта тузатмаслигини айтади. Лев Толстой эса: “Тузатмасдан ёзаман, деган хаёлни миядан чиқариб ташлаш керак. Уч-тўрт марта қайта ёзиш – бу ҳам кам”, дейди.


**Нодир НОРМАТОВ:** Бундай қолип, андоза адабиётда, ижодда доим ҳам қўл келавермайди. Баъзи ёзувчиларда бундай таҳрирлар миясида, хаёлида рўй беради, яъни, обдон пишитиб олиш, пухталаш деганлари... Қоғоз тақчил замонларда, айниқса, ўнинчи-үн биринчи асрларда худди мана шу усул қўл келган. Ҳозир қоғоз сероб. Аммо минг бора таҳрирдан ўтказсанг ҳам, баъзи асарнинг салмоғи ўзига ярашалигича қолаверади. Чунки, минг уринган билан қозонда бори чўмичга чиқади-да. Ҳар ерни қазиган билан булоқ суви чиқмаганидек, фақат таҳрир билан иш битмас экан.

**Абдулла УЛУГОВ:** Айрим ижодкорлар асарларини барча эмас, интеллектуал даражаси баланд китобхонлар тушуниши, қадрлашини айтишиб, дунёда иккита шундай ўқувчи топилса, кифоя, фақат шулар учун ёзиш керак, деб писанда қилишади ҳамда ўзларини янги адабиёт яратувчилари санашиди. Лекин уларнинг ёзганлари аллақандай мавҳум, тушунарсиз. Бундай муаллифларнинг изланишларида ғарблик ижодкорлар асарларига тақлид яққол сезилади. Албатта, тақлид, таассуб қилиш ҳамма соҳада кузатилади. Киши нафақат ижодда, балки бошқа фаолиятида ҳам ўзи англамаган, сезмаган ҳолда кимгадир тақлид қилиши эътиборга олинса, санъатнинг турли йўналишларида изланишлар қилаётган, адабиётимизда аввал кўрилмаган

услубда асарлар битишга уринаётганларнинг интилишларини тушуниш мумкин. Аммо жимжимадор жумлаларидан маъно англаб бўлмайдиган, мақсадсиз ёзилгандай туюладиган нимарсалар, барибир, кишини ғашлантиради.

**Нодир НОРМАТОВ:** Бугунги кунда адабиётда ҳам, тасвирий санъатда ҳам ана шундай жараён жадал кетаётганлиги ҳеч кимга сир эмас. Бир пайтлар, Иккинчи жаҳон урушидан сўнг, Италия адабиётида ҳам, мусиқа ва бадиий фильмларида ҳам Америка санъатига ружу қўйиш авжланган. Бу ҳолат шу қадар кучайиб, охири кўнгил айниш даражасига етган. Шундан сўнг, тескари жараён юз бериб, миллий маданият, санъат ва бадиийликка интилиш бошланган. Қисқа вақт ичida ана шу соҳада ўзига хос дурдоналар пайдо бўлган. Бизда ҳам шундай бўлади, деб фол очмоқчи эмасман. Чунки бизда менталитет бўлакча, анъаналар бўлакча... Бизнинг қадимги маданиятимиз, миллий қадриятларимиз бутун дунёга сочилиб кетган олтин зарраларига ўхшайди. Энди уларни териб олиш, англаш бошланди. Бу жараён қанча давом этади, бу ўзимизга боғлиқ. Юксак бадиият миллий маданият заминида пайдо бўлади. Бизда бугунги кунда юксак бадиият намуналари кам. “Янги бадиият намуналари” дея эътироф этилаётган асарларнинг кўплари бошқа адабиётлар таъсирида түғилган. Менга улар бошқа қитъадан кўчириб келтирилиб, ўлкамизда ўстирилган гулларни эслатади. Албатта, уларни ҳам авайлаб-асрашимиз мухим. Аммо шу замин чечаклари йўқ бўлиб кетишларига ҳам йўл қўймаслигимиз керак. Жаҳон халқлари адабиётини ўрганиш кони фойда. Ҳар бир океан, денгизлар бир-биридан кескин фарқ қиласди. Халклар ҳам шундай. Болтиқбўй ёки Лотин Америкаси адабиётидаги анъаналарни бизда жорий қилишга уриниш тўғри келмайди. Чунки улар техника воситалари эмас. Замин ранг-баранг, дунё ранг-баранг, халқлар ранг-баранг. Чунки уларнинг минтақаси, қитъаси бошқа. Шу билан боғлиқ ҳолда, уларнинг табиати ҳам ўзгача. Албатта, **истеъододли** ёзувчилар бошқа халқлар адабиётини ўқиб, миллий адабиёт билан ўхашаш ва фарқли жиҳатларни, қалблар ва маконларнинг кўз илғамас кўламларини сезадилар, ўзларига хос шаклу шамойил топиб, мавзуларни дадил ёзишга шайланадилар.

**Абдулла УЛУГОВ:** Адабиёт асарларини мутолаа қилиш, меъморий обидаларни, спектакль, фильмларни, спорт мусобақаларини, байрам тадбирларини томоша қилиш, куй ва кўшиқларни тинглаш кишилар учун бениҳоя зарур. Қаҳрамонлик мадҳ этилган асарлар кишиларни мардликка ўргатади. Агар асарларда иллатлар, тубанликлар тасвирланса, одамларда бундай иллатлардан нафратланиш туйғуси кучаяди. Фожиага учраган, изтироб чеккан қаҳрамонлар кишиларда ҳамдардлик ҳиссисини уйғотади, кўнглини юмшатади, дейиллади. Чиндан ҳам санъат асарлари инсон руҳига таъсир этади, уни поклайди, эзгуликка ундейди. Негаки, кишилар санъат асарларида тасвирланган воқеалардан таъсирланиб, ўзларида турли ҳиссиётларни сезади. Улар санъат асарларидан яхшиларга ҳамдардликни “юқтиради”лар, изтиробни ҳис қиласдилар. Мушкул муаммоларга дуч келганларида чидамлироқ бўлишни ўрганадилар,



### Абдулла УЛУГОВ

1960 йилда түғилган.  
1983 йилда Тошкент  
Давлат университетининг ўзбек филологияси  
факультетини тамомлаган. Адабиётшунос.

“Қиссачилигимиз  
қирралари”, “Инсон  
ибратга интилади”,  
“Асл асарлар сехри”,  
“Ватан – ва тан” каби  
китоблари, “Адабиёт-  
шуносликка кириши”,  
“Туркий халқлар адабиёти” сингари ўқув  
қўлланмалари нашр  
этилган.

Айни пайтда,  
Ўзбекистон миллий  
университети  
доценти.

улардан таскин берувчи күч оладилар. Илохий китобларда инсон изтироб чекиши орқали ҳодисалар моҳиятини англайди, дейилади ва ушбу ҳақиқатни кишилар айнан бадиий асарлар асосида англаб оладилар.

**Нодир НОРМАТОВ:** Фикрловчи инсонга ҳамиша эртага умид билан қараш туйғуси таскин бериб турди. У умри ўтаётгандигини ҳис қилган кунданоқ, дунёни англай бошлайди. Шу боис, ҳар бир нарса ва воқеадан ҳикмат излаб ўтади. “Барибир, қоронгуликка маҳкуммиз”, деган ақидалар ҳам мавжуд. Малевичнинг “Қора кути”си ҳам шунга оҳангдош. Абсурд адабиётида ҳам тақдирдан қочиб бўлмаслик оҳанглари кўринади. Аммо, мияга лаззат берувчи туйғуларни ҳосил қилувчи адабиётнинг бағри кенг, ранго-ранг. У худди шу оламнинг ўзи каби.

Таниқли адабиётшунос Иброҳим Ғафуров ўз китобини бежизга “Ҳаё-халоскор” деб атамаган. Ахир, Шарқ адабиётида асл мақсад-муддао инсонда, энг аввало, ҳаёни шакллантиришdir. Адабиёт эса ҳаёнинг онасидир. Адабиётнинг асл мақсади – халоскорликдир. Бу халоскорлик киши қалбида умид, ишонч ўйғотиш, юпанч бериш, иродани тоблаш, эзгуликка интилиш, инсонни англаш, салбий таассуротлару бадбин хаёллардан фориғ этиш каби минг бир шаклда намоён бўлади. Унинг инсонни фикрлашга чорлай олишининг ўзи халоскорлик эмасми!?. Китобларнинг шакллари кўпайгани айни муддао бўлди. Электрон китоблар, интернет – инсониятнинг йигирманчи аср охиридаги энг буюк қашфиёти. Улар туфайли, дунёда қанча-қанча қофозлару ўрмонлар сақланиб қолинади. Албатта, қоғозда чоп этилган китобнинг ўрни бўлакча. Уни ушлаб кўрасан, исталган пайтда ўқий оласан. Аждодларимиз ўз ижодларини лойга, папирусга, мол терисига, тошга, қояга ёзишган. Шакллар, материаллар турлича, аммо барчасидан мақсад – ўқиш. Электрон китобнинг ҳам аҳамияти беқиёс.

**Абдулла УЛУГОВ:** Ҳамид Олимжонлар авлоди эртак, афсоналарни, халқ достонлари, “Минг бир кечা”, “Қиссанул анбиё” каби асарларни эшитиб, улғайган. Шунинг учун уларнинг асарларида халқ оғзаки ижодига хос соддалик, теран донишмандлик мавжланиб турди. Аммо ўша замонларда ҳам айримлар эртакларни, достонларни, китобларни кераксиз матоҳ деб қарашган. Минг таассубки, бундайлар бугун ҳам учрайди. Айни тоифадагиларнинг маънавияти беҳад мажрух. Кўнгли- ҳасад, нафрат, курумга тўла. Иззатталаблигини қондиролмасдан доим безовта. Ҳаётдан ҳамиша норозиланиб, аламзода бўлиб юради. Ижодкорлар ҳам инсон сифатида ўз асарлари қаҳрамонлариdek яхши ёки аксинча бўлади. Айрим қаламкашлар асарларида эзгулик, ҳалолликни ёқлаган ҳолда, ўзи ҳаётда такаббур, бебурд. Улар: “Одамларга яхшилиқ қилишдек юксак мартаба йўқ”, деб ёзишади-ю, ўз манфаати, мансаб-мартабага эришиш учун ҳар қандай пасткашликдан қайтмайди. Шунинг учун баъзида шоир, адабнинг ижодкорлиги бўлак, инсон сифатидаги дунёси бўлак, дейишади. Ижодкорнинг инсон сифатидаги дунёси шаклланишига у туғилиб ўсган оила муҳити, замон ўзгаришлари қай даражада таъсир кўрсатади?

**Нодир НОРМАТОВ:** Ижодкор табиатида ҳаётнинг минг бир хил жилвалари акс этади, замон ўйинлари унга ҳам ўз таъсирини ўтказади. Буларнинг бари зарурят туғилганда, адабиётдек буюк мўъжизани яратишида кўл келади. Аммо буларнинг ҳеч бири ҳеч кимга, жумладан, ижодкорга ҳам калондимоғ ва такаббур бўлиш ҳуқуқини бермайди. Шу боисдан Шарқу Ғарб шоирлари, мутаффакирлари бу аломатни ҳамиша танқид қилишган. Шарқона ахлоқ ҳар бир инсондан қалби кенг ва одамохун бўлишни тақозо этади. “Адабиёт” сўзининг луғавий маъноси гўзал хулқ эканлигини инобатга олсақ, сўз санъатининг жамият тараққиёти учун нақадар муҳим аҳамиятга эга эканлиги аёнлашади. Европадаги “эго” таъсирни баъзи ижодкорларимиз хулқ-атворида ҳам сезилади. Ўзини хокисор тутиш “ўн саккиз минг олам”ни англаш йўли экани тасаввуфда таъкидланади. Тасаввуф фалсафаси, эндилиқда, бутун жаҳон илм аҳлини ҳайратга солмоқда.

**Абдулла УЛУГОВ:** Ҳар бир киши учун ота-боболари макони – рўйи заминнинг муқаддас маскани бўлиб туюлади. Йиллар ўтган сайин ушбу ҳиссисёт кучайиб боради. Машҳур мусаввир Рўзи Чориев ўз туғилган қишлоғи – Пошхурд тўғрисида сўз кетганди, тўлқинланиб кетарди. Сиз ҳам тоғлар орасидаги бу қадимий қишлоқ тарихи,

ундаги булоқ, сой, коризлар, шу жойда яшаётган кишиларнинг аждодлари, уларнинг ўзига хос феъл-автори, урф-одатлари ҳақида яйраб, мириқиб гапирасиз. Бу болалиги ўтган жойлар, ҳовлисидаги дов-дараҳтлар, жиҳозлар йиллар ўтган сайин кишининг юрагини ўртаб юборадиган ҳиссиётлар уйғотишидан далолат беради. “Баригал” ро-манингизда, қисса ва ҳикояларингизда Пошхурд манзаралари, ундаги одамлар ҳаёти тасвирланган.

**Нодир НОРМАТОВ:** Яқинда таътилни одатдагидек яна қишлоқда ўтказдим. Болаликда юрган жойларни эринмай суратга олдим. Сўнгги йиллардаги бундай сафарларим натижаси сифатида 2010 йилда Тошкент Фотосуратчилар уйида “Қишлоққа қайтиш” деб номланган шахсий кўргазмамни очган эдим. Ана шу йўл билан қадрдон жойларнинг манзараларини, таниш-билишлар қиёфаларининг бир зумлик оламини фотога муҳрладим. Бу дилга таскин-тасалли бериш баробарида, фикрлашга, мушоҳада юритишга ундаиди.

**Абдулла УЛУФОВ:** Нозим Ҳикмат адабиётнинг ҳар қандай жанри эртак заминида шаклланган, дейди. Эртак қадимги давралар учун ҳам, айни замонда яратилаётган сон-саноқсиз мультифильмлар учун ҳам асос, манба саналади. Эртаклар катталарни ҳам, болаларни ҳам бирлаштиради. Улар барчани орзулар оламига бошлаб киради. Эртаклар хаёллару тасаввурларни сарҳадсиз маконларга элтади. Унда ҳамма нарса жонли, кўнгилга яқин кўринади. Болалигига эртаклар эшитиб улғайғанлар жасур, шижкотли бўлади, ёвузликка қарши курашади. Ҳар бир кишининг болалиги эртаклар оламига боғланиб кетади. Аксарият ижодкорлар болалигига кўп эртак эшитганини эслашади. Сиз-чи?

**Нодир НОРМАТОВ:** Бола эсини таниши билан, барча нарсага, жумладан, эртакка ҳам қизиқиши, табиий. Аммо мен эртак эмас, мatal, топишмоқ эшитиб катта бўлғанман. Оиласизда, асосан, мatal ёки топишмоқ айтиш расм эди. Мatal – қисқа ҳикоят. Амакимнинг хотини Банот опам ва иккинчи Банот аммам (қишлоқда бу исм жуда урф), меҳмон бўлиб келадиган Норби аммам бизларга кўп мatal айтиб берар эди. Топишмоқни эса ҳамма айтар эди, ҳали унинг нималигини яхши билмаган беш яшар боладан тортиб, момоларгача. Худди ҳозиргилар сканвордга мубтало бўлгандай, ўша пайтларда катта-кичик топишмоқ айтишга ишқибоз эди. Ўшанда нима учун эртак эмас, мatal, топишмоқ айтилганини энди тушунгандайман. Ўйлаб кўрсам, бунинг сабаби – топишмоқ, мatalларнинг қисқалиги экан. Эртак эса узун бўлади. Уни айтиш учун ҳам, эшитиш учун ҳам муайян вақт керак. Вақт эса танқис. Рўзгор юмушлари тиқилиб ётади. Бирор-бир оилавий юмуш атрофида, айтайлик, узун қиши кунлари қора чироқ атрофида колхоз вакили ажратиб бериб кетган кўркўрак (оғзи очилмаган кўсак) – кўсакларни чувишда, ҳашар қилиб, пилла теришда, хуллас, кўпчилик бирор муносабат билан бирга йиғилиб қолган кезлари топишмоқ, мatal айтиш одатий ҳолат эди. Қолган пайтларда ҳамма, айниқса, катталар ўз ишлари билан банд бўларди. Кеч кириши билан овқат ейилгач, ҳамма ўйкуга кетарди. Кундузги тинимсиз ҳаракатдан сўнг, бундай ором олишдан зўр ҳузур йўқ эди (Қаттиқ чарчоқдан сўнг, кимнинг эртак айтишга қурби етарди ёки тинглашга тоби бор эди, дейсиз). Ёз кунлари, оқшом пайтлари озгина бўш бўлсак, албатта, бектош, кўчмак, зувиллатар, ланка, тол отга миниб чопишлар, сойга тушиб балиқ тутишлару юлгун тагларига тош уйча қуриб, бир нималарни тортишиб юришлар завқли эди. Аммо бир нарсани алоҳида таъкидлаб ўтишини хоҳлар эдим: ёз кунлари Қурбонсара холам уйларига борсам (ўн-ўн икки ёшларимда), у баъзан “Гўруғли”, “Балогардон”, “Кунтуғмиш” достонларидан ўқиб берар эди.

Онамнинг мatal ёки топишмоқ айтганини эслай олмайман. У уруш охирларида мактабда ўқитувчилик қилган. Отамга турмушга чиққач, бешта фарзанд кўриб, охиргисини туғишда қаттиқ қийналиб, кўп ўтмай вафот этган эди. Ўшанда мен саккиз ёшда эдим. Онам баланд бўйли, соchlари товонигача тушган, овозлари майнин, вазмин, ҳеч қаҷон товушини баланд кўтартмаган аёл сифатида хотирамда қолган. У менга ҳали мактабга бормасимдан ҳарфларни танитган, мен қаламтарош билан хуржуннусха уйимизнинг деворларини ўйиб, исмимни ёзиб ташласам-да, бирор марта жеркимаган, қаттиқ гапирмаган. Унинг қучогида эркаланиш, эртак тинглашдан кўра

мароқли эди. Тўрт ёшимда онамнинг тиззасида ўтириб, мактаб ҳовлисида Ҳалима Носирова бошлиқ артистлар берган концертни кўрганим ёдимда қолган. Унинг номини, албатта, сал улғайгач, билиб олганман. Гапдан чалғиб кетдим. Онам барвақт алифбони ўргатган бўлса-да, биринчи-иккинчи синфда ўқиганимда ҳам эртак китоб ўқишига қизиқмаганман. Сал улғайиб, тўртинчи-бешинчи синфлардан бошлаб, шу қадар кўп эртак ўқий бошладимки, асти қўяверасиз. Ўша даврда таржимонларимиз яхши ишлашган эканми, эртак китоблар сероб эди: хитой, япон, рус, венгер, индонез эртаклари. Дунёда шундай халқлар борлигини ҳам ана шу эртак китоблар орқали билганман. Бизнинг ҳовлида эртак биладиганлар кўп бўлган. Одатда, момолар ёки боболар эртак айтади. Мен эсимни таниган кезларим момом битта эмас, учта эди. Отамнинг отаси – бобом тўртта хотин олган. Шундан иккитаси мактабда ўқиб юрган пайтимда ҳаёт эди: Муқим момом (отамнинг ҳақиқий онаси) ва Хадича момом. Хадича момом Деновда яшар (ўттизинчи йилларда Пошхурдан кўчирма қилинган), у бизникига келиши билан иккала кундош ва онамнинг онаси – Нозик момом қизгин суҳбат қилишар ёки қишлоқдаги бошқа қариндошларнига бирга боришар, биз болаларнинг уларга эргашиб юришимизга руҳсат этилмасди. Албатта, бундай суҳбатлар ойда-йилда рўй берар эди. Қолган пайтлар икки момом катта рўзгорнинг ишларидан ортмасди. Улар учун гилам тўқиши ёки урчук йигириш дам олиш эди. Биз болалар, мабодо, уларнинг гурунгларига қулоқ солгудек бўлсан: “Бор, кўчага чиқиб ўйна, ўғил бола деган аёлларнинг гапига қулоқ солиб ўтирумайди”, деб, тургизиб юборишар эди. Фақат қиш оқшомлари улар иккаласи печка ёнидаги пўстакда ўлтириб, яна урчуғини йигирғранча, гурунг қилишар эди. Хуллас, ўтган асрнинг эллигинчи-олтмишинчи йилларида, қишлоғимизда, тўғрироғи, бизнинг ҳовлидаги манзара ана шундай эди.

**Абдулла УЛУГОВ:** Инсоният табиати, айниқса, унинг хотираси туганмас сиржумбок. Ҳаммамиз ҳам гоҳида бир нарса тўғрисида гапириб турамизу ўзимизнинг эшитган, кўрган воқеаларимизни эслаб кетамиз. Ўшанда, воқеалар бир-бирига уланниб, бир тафсилот бошқа бирини хаёлда жонлантиради. Кўпинча, сўзлар бамисоли илгичга айланиси, хотира пучмоқларида яшириниб ётган воқеаларни ёдга солади...

**Нодир НОРМАТОВ:** Ҳар бир сўзнинг ўз қиёфаси, либоси мавжуд. Унинг мағзида жойланган ажид бир кўзгу бор. Адид ана шу кўзгуни қалбида сақлайди, унга ўз хотираларини бирма-бир солиб, англаган сир-синоатдан бир нима олиб, бадий тўқимага айлантириб, хамир қилиб қоради. Ёзувчи хаёлан сўзларни турли шаклга солади, ҳар гал ундан бўлак завқу маъно топади. Бу сўзнинг нақадар илоҳий неъмат эканлигидан далолат беради...

**Абдулла УЛУГОВ:** Матбуотда биринчи машқингиз эълон қилинганда қандай ҳолатга тушгансиз? Дастрлабки шеърларингиз вилоят газетасида чоп этилганини эсладингиз. Ўшанда мактаб ўқувчиси бўлгансиз. Талабаликда қандай асарларингиз боилисиб чиқкан?

**Нодир НОРМАТОВ:** Ҳар бир одам болалигида таниқли, машҳур бўлишга интилиши табиий. Буни яхши фазилат ҳам дейиш мумкин, фалокат ҳам. Иккаласининг ораси бир қадам. Киши қўядиган қадами қаерга элтишини ўз пайтида англасса, бу унинг энг катта баҳти. Йўқса, у бечоралар ичра бечорадир. Мен ҳам шу нарсани англамаслигим мумкин эди. Отам кунларнинг бирида эслашга арзимайдиган, ҳеч кимга оғирлиги тушмайдиган, аммо унга номақбул кўринган бир ишимидан норози бўлиб, менга узоқ қаради. Сўнг, сўнг пичирлаб танбех берди: “Сен ким бўлибсанки?..” Бошқа гапирмади. Отамнинг: “Сен ким бўлибсанки?” деган сўзи ҳеч қулоғимдан кетмайди. Илк машқимдан қувонган отам, ҳар гал бирор нарсам босилса, илҳоминг келаятими, деб сўрарди. “Илҳом” деган сўзни биринчи марта отамдан эшитганман. Отам ўқувчилик йилларимда “машхурлик” касалига йўлиқишимнинг олдини олган. Бунинг учун отамдан ҳамиша миннатдорман. Отам – Нормат Алимардоновнинг касби ҳисобчи эди. Ухлаганида ҳам кўли чўт урарди. Эллик йилдан ортиқ шу соҳада сидқидилдан ишлаган. Китобхон, саводли, дангал одам эди. Кўшиб ёзиш бошланган йиллари – 1970 йилда уруш ногиронлигини сабаб қилиб, муддатдан аввал нафақага чиқди. 1991 йил охирида 67 ёшида оламдан ўтди. Мен билган одамларнинг орасида

отам мустақилликни энг кўп кутганлардан бири эди. Чунки отаси Алимардон кўкчи бой сифатида (1937 йилда) қамалиб, Термиз турмаларидан бирида вафот этган. Ўзи эса ўша йилларнинг фожиасини бошидан ўтказган эди... Отамнинг ўша танбехини эсласам, ҳали ҳам терлаб кетаман. Шу боисми, билмадим, талабалиқда ҳам курснинг адабий қўлбола журналидан бошқа ерда ҳеч нарса эълон қилган эмасман.

**Абдулла УЛУФОВ:** Сиз аввал шеър ёзгансиз. Кейин насрга ўтгансиз. Бу қандай кечган?

**Нодир НОРМАТОВ:** Шоир Усмон Азим иккаламиз учинчи курсда Сурхондарё вилоят газетасида амалиёт ўтаганмиз. Ўшанда қишлоқда момомдан бир гунг одам тарихини эшишиб, “Уруш ўтиб кетган эди”, деган новелла ёздим. У вилоят газетасида босилди. Бу менга факультетга амалиёт ҳисоботи учун керак эди. Fўrroq бу новелла термизлик оқсоқол ёзувчи ва шоирларимиз Менгзиё ака, Хуррам ака, Теша акаларга маъқул бўлди. Руҳланиб, “Йироқлар” деган ҳикоя ёздим. Орадан кўп ўтмай, қарабисизки, “ёш ёзувчи” деган ном олдим. Чунки бу ҳикоям шашти баланд дўстларимга ҳам ёқкан эди. Аммо шеър ёзишни ҳам тўхтатмадим. Тўғри, атайлаб шеър ёзмайман. Улар тўсатдан туғилади. Лекин насрда ёзишни илк марта ўша амалиёт пайтида бошладим десам бўлади. Бунга ўша заминдаги ҳаётнинг юрагимга яқинлиги сабаб бўлди.

**Абдулла УЛУФОВ:** “Кўхитанг ҳикоялари” – биринчи китобингиз. Ҳозир ундаги ҳикоялардан қайси биридан қаноатланасиз-у, қайси бирини бошқача ёзардингиз?

**Нодир НОРМАТОВ:** “Кўхитанг ҳикоялари” – ёшлигимнинг, романтик, ҳаёлкашлик давримнинг маҳсули. Шу боис, унда шоирона фикрлашга интилиш кўринади. Ундаги ҳикояларнинг айримлари бўш, баъзилари дуруст. Аммо улар ўша ҳолида ҳам ўзимга ёқади.

**Абдулла УЛУФОВ:** Журналистик фаолиятингиз қандай бошланган?

**Нодир НОРМАТОВ:** Журналистлик фаолиятим 1974 йил – “Саодат” журналида ишлаётган кезларимда бошланган. Унгача, Ўзбекистон илмий-оммабоп ва ҳужжатли фильмлар киностудиясида ишлаб юрган пайтимда, “Саодат” журналида “Тиникгул” деган ҳикоям эълон қилинган. Шундан сўнг, таникли шоира Зулфия опа мени журналга ишлашга таклиф этди. У ерда ишлайдиган хотин-қизлар ҳамиша ҳам хизмат сафарига чиқа олмас эди. Менга эса, бундай сафарлар сувдай зарур эди. “Саодат”га ишга ўтгач, республикамиз вилоятлари, туман, қишлоқларини кезиб, очерклар, эсселар ёздим. Яқинда, ўшанда ёзгандаримни кўриб чиқдим. Кўпроқ қишлоқ одамларининг меҳнатини қаламга олган эканман.

**Абдулла УЛУФОВ:** Илк қиссангиз – “Муқаддас балиқлар эгаси”нинг ёзилишига нима туртки берган? “Бисот”, “Исмоил тоганинг тарозиси”, “Жазо”, “Дараҳт тагидаги одам” қиссаларининг яратилиши тўғрисида гапириб берсангиз.

**Нодир НОРМАТОВ:** Илк қиссан – “Муқаддас балиқлар эгаси” эмас, балки “Бисот”. У, дастлаб, ҳикоя эди. Пошхурдда Курбон ўғри, Курбонча дегани ўтган. Унинг ҳаётини озроқ бадиийлаштириб, ҳикоя ёздим. Ҳикояни “Ёшлик” журналига берган эдим, уни ўқишиб бундан қиссани ҳиди келиб турибди, ривожлантириб, қисса қилиб беринг дейишди. Бу таклиф маъқул бўлди. Энди қўшимча тафсилот излай бошладим. Нимагадир қишлоғимизнинг энг сулув қизи бурнидаги холи яраланиб, саратонга айланиб вафот этганини эсладим. Ана шуни хаёлан тирилтиридим. Унга бўлган эҳтиромим сифатида бадиий образини гавдалантиридим.

“Муқаддас балиқлар эгаси”нинг ёзилишига туртки берган нарса – қадимий ҳовузларимизни динамит билан портлатиб, балиқ овлашганлигидан ғазабланганим... Қиссада илк севгисига гувоҳ бўлган балиқларга, ўзининг хотирасига хиёнат қилганини билмай қолган одамнинг тавбасини ифодалагим келди.

“Исмоил тоганинг тарозиси” қиссаларининг ёзилиши қийин кечган. Унда ҳужжатлилик мени чегаралаб ташлаган.

“Жазо”да ҳам ҳужжатларга асосланганман. Аммо мавжуд далилларга ижодий ёндашганман. Умуман, деярли барча асарларимда ҳужжатлиликка таянаман. Бундай сифатлар “Дараҳт тагидаги одам” қиссаласида ҳам мавжуд. Агар китобимни ўқиб кўрган қишлоқдаги ўкувчидан сўрасангиз, у сизга асарларимдаги қаҳрамонларимни

осон топиб бера олади. Ёзганларингиз ҳужжатли асарми, бадий асарми, деган савол туғилади. Менимча, бундай саволга ҳожат йўқ. Қаҳрамонларнинг номи ўзгарар экан, демак, бадий асар. Асарнинг ҳужжатли ёки бадий асар эканлиги эмас, унинг завқ-шавқ билан ўқилиши, фикрлашга ундаши аҳамиятли.

**Абдулла УЛУГОВ:** Романингиз “Баригал” деб номланади. Бу сўз хоразмликлар шевасига хос. Асарда шу машҳур қўшиқ билан боғлиқ сюжет чизиги бор. Романингиз нега шундай номлангани кўпчиликни қизиқтиради. Шуни ўзингиз изоҳлаб берсангиз?

**Нодир НОРМАТОВ:** Аввало, роман ҳақида икки оғиз сўз. Кўхитанг тоғ оралиқларини кезсангиз, ботил бўлиб қолган қадимий қишлоқларнинг харобала-рига қўзингиз тушади. Мозийнинг ҳиди келиб турган бу жойларда қандай мусибату кулфатлар кечганлиги, ўтган аср иккинчи ярмидаги турли воқеалар, маҳаллий халқ орасида юрадиган турли ривоятлару ҳақиқатлар мени қизиқтириб келарди. Тўплаган материалларимни саралаб кўриб, фожия илдизи халқнинг, одамларнинг бирикмаган-лигига, анъаналарнинг унунтилганида эканини англадим. Тўғри, дангона деб аталган урф-расмда ҳам бирикишга уриниш бор. Аммо ҳамжиҳатликка интилишнинг заиф, мўртлиги ҳали одамларимизда имон мустаҳкам эмаслигига кўринади. “Баригал” номини танлашим, аслида, қўшиқнинг мазмунига ишора эди. Чунки бери кел, деган чорлов ҳам бирлашувнинг, аҳилликнинг гўзал бир тимсоли эмасми? Романин яқинда қайта ишлаб, аввалги нашрда тушиб қолган бобларни кўшдим. Гарчи ном асар кўрки санаалса-да, бу чиройли ном ночор асарни бекаму кўст қилиб қўяди, дегани эмас.

**Абдулла УЛУГОВ:** Ўқувчилар “Рўзи Чориевнинг сўнгги васияти” роман-эссең-гизни илиқ кутиб олишди. Бу машҳур мусаввир тўғрисида дастлаб: “Камалак яшайдиган уй” қиссасини яратган эдингиз. Сиз Рўзи Чориевнинг яқин қадрдони бўлгансиз. Бу ажойиб инсоннинг ғаройиб ҳаёти билан боғлиқ талай воқеа-тафсилотлар романга кирмай қолганини айтгандингиз...

**Нодир НОРМАТОВ:** Дарҳақиқат, бу инсон ҳақида кўп нарса билсам-да, ёзаётган пайтимда эсимга тушмаган. Бунинг устига, китоб чиққанидан кейин, уни танигандар ҳам, танимагандар ҳам рассом ҳақида эшитганлари-ю, билганларини менга айтадиган бўлиб қолишли. Китоб сўнггисида: “тугал ҳикояни сиз билан бирга тутатамиз, азиз китобхон”, деб ёзганим уларни руҳлантирган, шекилли. Шундай бўлса-да, китобга кирмай қолган бир-иккита лавҳаларни айтай. Рассом ўлимидан сал олдин, ёш рассом Худойшукур Маматалиевга баъзўр суюнганча уйидан сал наридаги устахонасига оғир аҳволда, асарларини сўнгги марта кўриш учун бораётганида, олисда ўзидан ёши сал катта бир рассомнинг хотини билан келаётганини кўриб қолади. “Улар мени бу аҳволда кўриши яхши эмас, ёшлари мендан катта”, деб Маматалиевнинг кўмагини рад этганча шитоб билан устахонаси томон чопиб кетади. Ичкарига кириши билан ҳолсиз ўтириб қолади. У дўстларию ракиблари олдида ҳеч қачон ночорлигини, кўрсатишни истамас, дардни дастурхон қилишни ёқтираси эди. Яқинда, термизлик бир санъат муҳлиси телефон қилиб: “Ака, Термиз аэропортидаги ресторон биноси таъмирланаётганда, Рўзи аканинг 10та асари бир жойдан чиқиб қолди. Улар ҳеч кимнинг балансида турмайди. Рассом ресторанга вақтинча осишга бериб кетган экан. Шулар талон-тарож бўлиб кетмасидан, Термиздаги музейга ўтказишга ёрдам беринг”, деди. Бу одам бир пайтлар қийналиб қолганида, нотаниш бўлишига қарамай, Рўзи акадан бегараз моддий ёрдам олганлигини, унинг улуғ инсон эканлигини таъкидлаб, исми шарифини айтмай, телефон гўшагини илиб кўйди. Мен куни кеча архивимни ковлай туриб, Рўзи ака билан Панжикент, Анзоб довони, Еттиқўл, Туркистон тоғлари бўйлаб саёҳат қилганимизда ёзган кундалигимни топиб олдим. Бир ой давом этган бу кундалиқда ғаройиб воқеалар бор. Бир куни Шинг дарёси ёқалаб кетарканмиз, йўлда бир гўзал шаршараға дуч келдик. Рўзи аканинг чизадиган сурп матоси тугаган, аммо бўёқлари етарли эди. Шу қишлоқ дўконига кириб, бир қоп унни бўшаттириб, анча қимматга бўлсаям, халтасини сотиб олди. Уни оби-тобига келтирди, елимлаб, охорлаб, эртаси ўшанга шаршарани чизди. Дунёнинг ишларини қарангки, ижодий сафарларда аъло навли матоларда чизилган кўп манзаралар қолиб, ўша ун халтага чизилган манзара Давлат санъат музейи учун сотиб олинди.

Баъзан учрашувларда: “Нега сиз кўпроқ рассомлар ҳақида ёзасиз”, деб савол беришади. Мен уларга ўқувчилик пайтларимда пахта чопигию қишлоқ клуби носозлиги, хуллас, кўзим нимага тушган бўлса, шитоб билан ёзавергандаримни айтиб бераман. Кейин... менинг бобом Алимардан кўкчи калава, ип, матоларни бўяш, ранглаш билан шуғулланган, эҳтимол, рангларга қизиқиш шу бобомдан ўтгандир, дейман. Ўқувчилик давримда расм чизиш билан озроқ шуғулланганман. Ақварелда тоғу тошларни чизардим. Рассомлар ижоди ҳақида ёзиш эса мархум рассом Шуҳрат Абдурашидов билан бўлган учрашувдан сўнг бошланган. Шуҳрат адабиёт муҳлиси эди, шеър ва ҳикоялар ҳам қоралаб юрарди. Бир куни унга “Санъат” журнали учун мақола буюрдим. У “Йўл бошидаги ўйлар” деган номда журналда босилиб чиқди. Анча-мунча баҳсларимиздан сўнг, унинг тавсияси билан мен рассомлар ҳақида мақолалар ёза бошладим. У менга Европадаги ёзувчилар рассомлар ижоди ҳақида профессионал мақолалар ёзишларини айтиб, бир-икки китоб кўрсатди. Мен жаҳон тасвирий санъати тарихини ўрганишга тушдим. Кўргазмаларни томоша қилишу рассомлар билан бевосита мулоқот асносида, замонавий жараён, турли оқимлар билан таниша бошладим. Шу тариқа, санъатнинг ранг-баранг оламига кириб бордим. Ўтган асрнинг саксонинчи йилларида Санъатшунослик институтида аспирантурада ҳам ўқидим. Нашрга тайёргланган “Ранглар, оҳанглар, одамлар” номли катта ҳажмдаги китобим шу тарзда пайдо бўлди. Тасвирий санъат тўғрисида қалам тебратганда, ёзувчининг ўз нуқтаи назари, баҳо бера оладиган илму қуввати бўлиши керак.

**Абдулла УЛУФОВ:** Келинг, тасвирий санъат соҳасида ҳам бирмунча фикр юритсан. Бугунги кунда оқимлар рассомларни сал довдиратиб ташламаяптими? Баъзидиа санъатшуносларнинг ўзлари ҳам баҳо беришда адашишади. Улар орасида сиз қайси бир оқимни афзал деб биласиз?

**Нодир НОРМАТОВ:** Мен бу ўринда Жаполиддин Румийнинг Мавлоно Садриддин Казвинийга айтган: “Мен етмиш уч мазҳаб билан бирдирман”, деган машхур гапини эслагим келди. Тўғри, оқимлар орасида шу қадар ғариф, эстетикага жавоб бермайдиганлари ҳам керагича бор. Аммо мен кўпроқ реализмга, унга чатишиб кетган турли хил оқимларга қизиқаман. Бундай олганда, борлиқни ўтра масофада томоша қиласангиз, реализм, ниҳоятда, узоқдан қарасангиз, миниатюра, икки-уч сантиметр яқинлиқдан томоша қиласангиз, авангардга айланади-қолади. Фикримча, оқимларнинг энг мақбулини вақтнинг ўзи саралайди. Аммо бу жараёнда муҳлиснинг ҳам ўзига хос “улуш”и бор. Унинг эса диди турлича, ўзгарувчан. Тасвирий санъат ёки адабий-бадиий асарни қайси ўлчов ва мезонлардан келиб чиқиб баҳоланади, деган савол ҳамиша бўлган. Назаримда, бу давр эҳтиёжи билан боғлиқ бўлса-да, асосий талаблар ўзгармай қолаверади. Бу, бадиий талқиннинг юксаклиги, тафаккурнинг теранлиги, бадиий тилнинг пухталиги. Бугунги кунда мана шу хислатга эга бўлмаган баъзи рассомлар матони ранг билан ғайритабиий бўяб, бу янгича оқим, бу авангард, деб тақдим этишади. Профессионал рассом ҳам, малакаси бундайроқ, заиф бўлган рассом ҳам авангард билан шуғулланётганлиги кўзга ташланади. Аммо уларнинг асарларида ер ва осмончалик фарқ бор. Буни қандай фарқлаш мумкин? Заиф рассом асарида рангларнинг кирлиги, чизикларнинг норавонлиги, композициянинг нотугаллигига кўринади. Шунга қарамай, рангтасвир асарини баҳолашда нафақат томошабин, балки таникли мутахассислар ҳам адашади. Бундай муаммо санъат турининг ниҳоятда ноzik ва сирли эканлиги билан изоҳланади. Адабиётда Жойс, Кафка, Итало Звеово, Роберт Мурзиль каби ўнлаб авангард ёзувчиларнинг асарларини ҳазм қилиш учун ўқувчи катта қомусий маълумотга эгалиги керак бўлганидек, тасвирий санъатни хис қилишда ҳам томошабиннинг маҳсус тайёргарлиги талаб этилади. Тайёргарлик ва кўникма эса кўргазмаларни кузатиб бориш орқали шаклланиши мумкин. Биргина тасвирий санъат асари эмас, ҳатто ҳалқ амалий санъат асарини баҳолаш учун ҳам шундай малака керак. Ҳалқ орасида шундай кишилар борки, кулолллик ёки гиламдўзлик намунасини бир қарашдаёқ фарқлайди. Момом раҳматли яхши гилам тўқир эди, бошқаларнинг ҳар қандай тўқиган нарсасини ушламай туриб, нуқсонини айтарди. Демак, малака барча соҳада зарур эканлиги кундай равшан.

Мана яқинда пойтахтимиздаги Марказий күргазмалар залида “Табиат ва рассом” деб номланған катта күргазма бўлиб ўти. Күргазмада манзара жанридаги асарлар анчагина. Бошқа күргазмаларда ҳам шуни кузатиш мумкин. Бу ҳам тушунарли. Чунки манзара жанридаги картиналар бугун анча бозорбоп, харидоргир. Аммо санъат бу тарзда бозор талабларига мослашиб бориши мақбул эмас. Сабабими, биринчидан, томошабиннинг диди ўтмаслашади, иккинчидан, бадиий-фалсафий тафаккур ривожланишдан тўхтайди. Ҳар қалай, бозорбоп асарларни илфор, ҳар томонлама мукаммал, деб айтиш қийин.

**Абдулла УЛУГОВ:** Ўзингиз картиналарни баҳолашда қандай мақомда ёндашасиз?..

**Нодир НОРМАТОВ:** Күргазмаларга борганимда, асарларга нафақат томошабин ёки танқидчи кўзи билан, балки дунёдаги энг бадавлат инсон нигоҳи билан қараб баҳолашга интиламан. Масалан, ўзим күргазмадан қандай асарларни харид қилган бўлардим, деган саволга жавоб излайман. Бунда мавжуд билим, кўникма, бадиий-фалсафий тафаккур захирасидан ташқари, инсонга хос бошқа интуициялар ҳам беихтиёр ишга тушади. Гўзапликка интилиш, унга эгалик қилиш ҳамда завқу шавқ туйиш деймизми, хуллас, том маънодаги “томушабин илҳоми” ана шунда юзага келади.

**Абдулла УЛУГОВ:** Қайси жанр ва йўналишларда ижод қилаётган рассомлар тезроқ мутахассислар, муҳлисларнинг назарига тушаяпти?

**Нодир НОРМАТОВ:** Мен бир муддат Ўзбекистон Бадиий академиясининг Бадиий салони бўлган “Хамар” Халқаро алоқалар марказида директор бўлиб ишлаган эдим. Шунда сиз сўраётган саволга жавоб топгандай бўлгандим. Тасвирий санъатда ҳар бир оқимнинг ўз муҳлиси бор экан. Ҳатто халтура асарларга ўч харидорлар ҳам анчамунча. Жанрлар орасида манзара, натюроморт харидоргир. Асарнинг қайси услубда ишланганлиги ҳам томошабинни қизиқтиради, албатта. Масалан, кўпинча ёши улуғ, ўрта ёшдагилар реализмни афзал кўришади. Ёшлар орасида эса, авангард, модерн услубидаги асарларга ихлосмандлик кўзга ташланади. Умуман олганда, бу ерда қайси йўналишда ижод қилиш эмас, савия, сифат, ижро муҳим ҳисобланади. Томушабинни ҳам, танқидчини ҳам биринчи галда натижа қизиқтиради. Шу маънода, бошқа услубларда, авангарддаги каби реализмда ҳам фариб, бўш асарлар тўлиб-тошиб ётганлигини таъкидлаш керак. Баъзида шундай ҳолат кўзга ташланади, тасвирий санъат ҳақида жуда билимдон рассом сизга кўп нарсаларни гапириб беради ўзи чизган асари эса чучмал, заиф бўлади. Нега? Сабаби аён – рангтасвир нафақат назарий билим, балки ҳар кунги қўл меҳнатини ҳам тақозо этади. Қўл “чиқиб қолса”, ҳар қандай билимдонлик ҳам ёрдам бера олмайди!

**Абдулла УЛУГОВ:** Ҳар бир даврнинг ўзига хос муаммолари бўлиши табиий. Ҳаёт илгарилар экан, унинг ташвишлари ҳам кўпайиб бораверади.

**Нодир НОРМАТОВ:** Албатта. Бугунги кунда эътибор қилишимиз лозим энг муҳим муаммо урбанизация (қишлоқларнинг шаҳарлашуви) ва дунёда глобаллашувнинг рўй бериши билан боғлиқ масалалардир. Ҳеч, шубҳасиз, улар инсоният учун ижобий аҳамиятга эга. Аммо унинг салбий таъсиридан ҳам кўз ҳам юммаслигимиз керак. Бу жараён туфайли халқларнинг, мамлакатларнинг маданияти, яшаш тарзи, меъморчилигига ва бошқа нарсаларида бир-бирига тақлид қилиши кучайиб кетмоқда. Бу ҳолатни эса тўхтатиш керак. Чунки тақлидчилик бир хиллликка олиб келади. Маданиятлар бир хиллашиб кетишининг олдини олиш, ҳар бир миллат зиёлиси учун ҳаводай зарур. Албатта, бунда адабиёт ва санъат аҳли зиммасига катта юқ тушади. Рангбарангликка, хилма-хилликка интилиш барча соҳа учун жуда муҳим.

**Абдулла УЛУГОВ:** Бугунги кунда одамларда мол-мулкка ружу қўйиш, ҳар қачонгидан кўра авжланди. Унинг орқасидан рўй берадиётган фожиалар эндилика, оддий ҳодисага айланиб қолди. Бозор иқтисодиётининг ўзига хос талаблари ўтган асрнинг тўқсонинчи йиллари бошида зиёлиларни ҳам бир қадар саросимага солган эди. Ўша пайтда ўзингизни қандай ҳис этгансиз?

**Нодир НОРМАТОВ:** Мен ақлимни таниганимдан буён китоблардан, одамлардан, борлиқдан олган таассуротларимни энг буюк хазинам, деб биламан. Шу боис

ҳам ўзимга тегишли ўтмишга бутунлай йўқолган нарса деб қарамайман. “Хотира” бисотимни гарчи турли бўлмағур нарсалар билан тўлдириб ташламаган бўлсам-да, лекин, унда кўнглимни беҳузур қиладиган ул-бул нарсалар, тафсилотлару воқеалар анча-мунча. Ўйлайманки, ҳаммада ҳам шундай. Шу хазинани титкилаб, ундаги ни-манидир таққослаб, нимадандир ҳикматлар излаш, мен учун кўпинча завқли кечади. Ўшанда, кўп нарса эсланади, қадри билинади. Кўнгилни чинакам шодлантирувчи асл нарсалар вужудни соғломлаштиради, руҳни тозартиради, дейишади машойхлар.

Яратганинг бандасига синовлари кўп: улар кимгадир эрта, кимгадир кеч берилади. Бу ҳикматнинг моҳиятини англашга уринишнинг ўзи катта неъмат. Бир гал қишлоққа борганимда, укаларимдан бири: “Ака, сиз бизга ундан-бундан сақлан, парҳез қилгин, соғлом бўласан, деб панду насиҳат қиласиз. Мана, япон олимлари куни кеча телевизорда айтишиди: “Худо ҳар бир кишига умрни белгилаб берган, ундан ортиқ яшай олмас экан”, деб иддао қилди. Укамга: “Вужуд деб аталмиш либосни инсонга Яратган муддатга белгилаб бериши тўғри. Аммо уни асрармай-нетмай, ана шу мўлжалнинг ярмини ҳам ўтамай, умри завол топаётганлар қанчалар кўплигини биласанми”, дедим.

**Абдулла УЛУФОВ:** Тақдир тақозоси билан хорижга чиқиб келганингизда кўнглин-гиздан нималар ўтади, қандай хулосалар қиласиз?

**Нодир НОРМАТОВ:** Бирни кўриб фикр қил, мингни кўриб шукур қил, деган нақл бор. Баъзи одамларнинг айрим мамлакатлар, юртларни идеаллаштириб гапи-риши, дунёни жўн тушуниши ғашимни келтиради. Билиб айтишган экан: “Мусоғир бўлмагунча, мусулмон бўлмайсан”, деб.

Бир йили Саудия Арабистонида ўтказилган этнография байрамида иштирок этдим. У ердаги саройларда берилган шоҳона базмларда етти иқлим неъматлари кўйилган бўлса-да, маъданли сув ёки ширин булоқ суви йўқ эди. Сабаби, у ерда шўр сув қайта ишланиб, истеъмол қилинади. Бизда сувни тежаш ҳақида кўп гапирилади. Аммо одамларимизнинг беътиборлиги ҳаддан ташқари. Вилоятларда хизмат сафарида бўлганимда, дехқончилик маданияти юксак қишлоқ ҳўжалиги ходимлари қаторида, айримларнинг сувни исроф қилаётганларини кўп кўраман. Ҳозир қайси бир жойларда сонсиз-саноқсиз артезиан кудуқлар қазилиб, тоза сув керакли- кераксиз тарзда ишлатилмоқда. Ер ости сувлари заҳиралари камайиб кетса, катта фалокатлар рўй бериши маълум.

Умуман, сув, қўёш нури, тоза ҳаво инсон учун энг ажойиб таомлардир. Бир пайт-лар китобларда ҳиндларнинг белдан юқори қисми яланғоч юришини кўриб, устига киядиган нарсаси йўқ экан-да, деб ўйлар эдим. Кейин билсам, улар кам таом еб, қолган қувватни қўёш нуридан олишар экан. Таом ейишдан мақсад – қувват олиш. Аммо бизда қоринни шишириб, нафсни лаззатлантириш учун, ейиш учун яшайдиган-лар анча-мунча. Эрамиздан аввалги донишмандлар ҳам, бугунги кун олимлари ҳам, нафсни тиймаслик жамиятни ҳам, табиатни ҳам, оилани ҳам, кишининг ўзини ҳам ҳалокатга элтишини таъкидлашганларида ҳақиқат кўп.

Бежизга: Ҳар жойни қилма орзу, унда ҳам бор тошу тарози, дейилмаган.

Вашингтонда бўлганимда, шаҳарнинг қайсиидир мавзесида тўрт қаватли турар жой уйларнинг баъзи хонадонлари деразалари синиқлигини, ойна ўрнида картон қутилар кўйилганлигини кўрдим. Истамбулдай гўзал шаҳарнинг биз турган меҳмонхонаси ортидаги хонадонларнинг томлари ниҳоятда ноҷор аҳволда эди. Ҳамма жойда ҳам бундай нуқсон мавжуд. Шу боис, пашшадан фил ясаб, дардини дастурхон қиладиган, нахжот йўлини изламасдан нолишни хуш кўрадиганлардан ҳафсалам пир бўлади. Турли мамлакатларни кўриша ҳам ҳикмат кўп.

Одамлар сўз ҳазинасидан, тоза сув ва тоза ҳаводан, қўёш нуридан етарлича фойдалана олмаяти, деб ўйлайман. Аслида, барча шифо сўзда, тоза ҳавода, тоза сувда ва қўёш нурида.

**Абдулла УЛУФОВ:** Менимча, ҳам шундай. Сўз шифобахш экан, унинг ҳикматларини излашда сизга куч-қувват, ижодингизга барака тилаб қоламан.

## Шеърият



**Рахимжон  
PAHMAT**

1961 йилда туғилган. Шоир, ёзувчи ва адабиётшунос. Тошкент Давлат университетининг ўзбек филологияси факультетини тамомлаган. “Дала гуллари”, “Хасталик дафтари” адабий мақолалар, кузатишлар ва шеърий асарларни ўзидаги жасам этган тўпламлар муаллифи.

### Мени ўзинидан сўра

#### Соғиндим

Бу ўткинчи дунёга  
Келишимнинг сабаби –  
Кўзларингни согиндим.

Ойга боқиб: “Оҳ” тортиб,  
Дард чекишим сабаби –  
Юзларингни согиндим.

Кеча-кундуз гунг бўлиб  
Юришимнинг сабаби –  
Сўзларингни согиндим.

Ҳар кўчада им каби  
Дайдишимнинг сабаби –  
Изларингни согиндим.

#### Ошиқона

Харидор бўл, ўзимни  
Кўл бозорда сотаман.  
Ўпқон бўлсанг, жонимни  
Кучогингга отаман.

Жаллод бўлгин, бошимни  
Сенга қиласман тортиқ.  
Ўткир бўлсин қиличинг,  
Бахт борми бундан ортиқ?!

Шамол бўлсанг, шам бўлай,  
Бир лаҳзада ўчиргин.  
Ёки нозик ниҳолман –  
Илдизимдан кўчиргин.

Камон бўлсанг, нишонинг  
Мана менинг юрагим.  
Ўқ отарда мўлжалдан  
Адашмагин, малагим.

*Сендан келган жафолар  
Жаннатдан минг аълодир.  
Муҳаббатсиз бу ҳаёт  
Бошга битган балодир.*

### **Ўзингсан**

*Олов ёққан ўзингсан,  
Энди сира ўчмайман.  
Куйиб кул бўлсам, ҳатто,  
Жонон, сендан кечмайман.*

*Олов ёққан ўзингсан,  
Энди роса куяман.  
Куйшишимга куйинма,  
Куйсам, қаттиқ сужман.*

*Қара, менга қўшилиб:  
Юлдуз ёнар, ой ёнар.  
Чин роҳатим ўзингсан,  
Жаннат деган жой ёнар.*

*Олов ёққан ўзингсан,  
Оловга бир тўяман.  
Хеч кимга йўқ омонлик,  
Дунёга ўт қўяман.*

*Ишқ олови офтобдир,  
Баҳор бўлинг куз, қишилар.  
Ишқ, асли, бир кимёдир,  
Тилло бўлинг кумишилар.*

### **Малика**

*Маликага ошиқ бўлибман,  
Ол, Маликам, қалбим сеники.  
Тупроққа тенг гадодирман, мен,  
Жисминг эмас, исминг меники.*

*Шаҳзодангнинг ёнига боргин,  
Ерда қолган изинг меники.  
Шаҳзодалар бари бевафо,  
Кўзёшлиаринг – кўзинг меники.*

*Сенга нисор айлайин десам,  
Бойлигим йўқ жонимдан бошка.  
Ол, Маликам, жонимни олгин,  
Арзийдими бир боқишингга.*



*Сочинг билан боғла бўйнимдан,  
Сенинг содиқ итинг бўлайин.  
Жаллод бўлиб жсонимни олгин,  
Фақат юзинг кўриб ўлайин.*

*Шаббодага айланиб хушибўй,  
Сочларингни тараи оламан.  
Юлдуз бўлиб, баланд осмондан  
Ётогингга қарай оламан.*

*Боғ айланиб кўнглинг шод бўлар,  
Сочларингга қўннар капалак.  
“Маликанинг баҳти очилсин”,  
Булбул сенга тилайди тилак.*

*Гуллар сени кўрибоқ, дейди:  
“Маликамиз мунча ҳам кўркам?”  
Бу боғ менинг қалбимдир, жоним,  
Ишонмайсан, ўзим айтсам ҳам.*

*Маликага ошиқ бўлибман,  
Ол, Маликам, қалбим сенини.  
Тупроққа тенг гадододирман, мен,  
Жисминг эмас, исминг менини.*

### Ишқ

*Пойингга тиз чўкарман,  
Бундан улуг тавоб йўқ.  
Жаннат эшик очади,  
Бундан аъло савоб йўқ.*

*Висолингга етайд, деб,  
Ер остига кетяпман.  
Жон берарда исмингни  
Минг бор тақрор айтяпман.*

*Қабрим ичин ёритган  
Ойимсан, офтобимсан.  
Машҳарда берилажсак  
Саволга жавобимсан.*

*Дунё менинг ичимда  
Ўзга бир дунё кўрди,  
Бўстонидан қувлади,  
Саҳрони раво кўрди.*

*Дунё менинг ичимда  
Ишқ деган бир гул кўрди,  
Рашки келиб, аямай  
Кўксимга ханжар урди.*

*Сен, деб, чеккан азобим  
Бошга ёққан раҳматодир,  
Борлигинги ҳис этиб,  
Жоним сезган лаззатдир.*

*Бир гуноҳим ишқ эди,  
Кўрдим минг тур жафони.  
Жаннатда сийлагайсан  
Мендек жони фидони.*

*Пойингга тиз чўқарман,  
Бундан улуғ тавоб йўқ.  
Изланг, икки дунёда  
Ишқдан аъло офтоб йўқ.*

### Истасанг

*Мени қўрмоқ истасанг, гулим,  
Энди мени ўзингдан сўра.  
Ухлаётни ўзинг ҳам сезмай,  
Айтган гапинг, сўзингдан сўра.*

*Мени қўрмоқ истасанг, гулим,  
Ўтиб кетган ийлардан сўра.  
Гала қумлар остида қолган  
Чўллардаги ийлардан сўра.*

*Мени қўрмоқ истасанг, гулим,  
Сув оқизган тупроқдан сўра.  
Ернинг ўйиб олинган кўзи –  
Куриб қолган булоқдан сўра.*

*Мени қўрмоқ истасанг, гулим,  
Томда ўсган майсадан сўра.  
Қайдалигим кўриб турибди,  
Кўзи ожиз кимсадан сўра.*

*Мен йўқдирман: на тупроқ, на сув,  
На қуёшу на юлдуз, ойда.  
Балки мени топиб оларсан  
Ер ва осмон қўшилган жойда.*

## Жонимни ол

*Жонимни ол, жонона, сенга ҳадя этаман,  
Жононасиз жонларни итлар есин, нетаман.*

*Ноз қиласан минг турли, сўзларинг ширин, сирли,  
Сенга берсан жонимни, мен ўзимга етаман.*

*Келгин, дейман, ёнимга, ором бергин жонимга,  
Келмасан ҳам майлига, келмайди, деб, кутаман.*

*Мендан нари тур, десанг, йироқларда юр, десанг,  
Кетмон олиб, гўр ковлаб, ўша ерда ётаман.*

*Сенсиз дардга даво йўқ, бу шаҳарда маъно йўқ,  
Мен ўзимни қул қилиб, лўлиларга сотаман.*

*Ўлдирса, ёр ўлдирсин, паймонимни тўлдирсин,  
ЛАҲАДНИНГ ДЕВОРИГА ИШҚИЙ ШЕҶРЛАР БИТАМАН.*

## Маъно йўқ

*Хаётимда маъно йўқ, кўнгил сира тўлмайди,  
Юлдуз кулар, ой кулар, нега баҳтим кулмайди?*

*Умр фақат айрилиқ, ҳижрон дилга урап тиғ,  
Ёр висоли лаззатин кўнглим ҳали билмайди.*

*Ёрсиз ҳаёт қулфатдир, дунё қуриқ түхматдир,  
Ёрсиз зотни кесак денг, одам деса бўлмайди.*

*Дунё ҳаёти оздир, боқий дунё хўб создир,  
Ишқсиз бўлсанг, у дунё писандига илмайди.*

*Бу дунёда камим кўп, катта-кичик гамим кўп,  
Энг катта камим ушибу – жонондан хат келмайди.*



# Ибоғлағин нисоғ этап үзл

## Куз манзараси

Қуилар ташлаб кетди дараҳтни,  
Қалби тўла нолалар қолди.  
Зумрад барглар согинч ранғидада,  
Қарогида жолалар қолди.



Изтиробдан титрайди тани,  
Кияр фақат ҳижронранг либос.  
Согинчини барг – мактубига  
Ёзар тинмай ошиқларга хос.

Таскин берар раҳмат ёмғири,  
Бошлирини майин силайди.  
Тортик этар билурый сирға,  
Поклантириб баҳтин тилайди.

Синчков шамол сирин ўғирлаб,  
Қалб изҳорин ўқийди очиб.  
Ҳаддан ойса тортқилаб олиб,  
Замин узра юборар сочиб.

**Фарида  
ХУСАИНОВА**

1959 йилда тугилган. 1976-1980 йилларда Кўқон Давлат педагогика институтининг ўзбек тили ва адабиёти факультетида ўқиган. Шоиранинг “Сунбулгинам”, “Порлаётган шуъла” номли шеърий тўпламлари нашр этилган.

## Қалдиргоч

Хофизлар қолгайдир қалдиргоч бўлиб.  
**Ойдин ҲОЖИЕВА.**

Чарх уради содиқ қалдиргоч,  
Мовий кўкнинг кенг қучогида.  
У содиқ дўст, гулми ё бўзноч,  
Муҳаббатдир дил ардогида.

У меҳрни чуқур қилас ҳис,  
Борми ёки дил тарозиси?  
Кенг осмондан юмолмайди кўз,  
Кенг осмондир мудом орзуси.

*Айрилиқда бўзлайди нолон,  
Кўзларига ёшлар тўлади.  
Ҳатто, ёви – айёр илоннинг  
Кўйнидаги гашлар ўлади.*

*Чарх уради содиқ қалдирғоч,  
Юксакларда, кўкнинг тоқида.  
Бошлирида садоқатдан тож,  
Муҳаббатдир дил ардоғида.*

### Тўлдириб кел ҳаётнинг камин

*Кўзларингдай мусаффо осмон,  
Нур сочади зиёбахи умид.  
Нур – камалак тортилган камон,  
Парқуларин судрайди булут.*

*Исминг ёдга солади шамол,  
Кувончинги ардоқлар кўнгил.  
Ҳайрат ичра қуёши турар лол,  
Ифорларин нисор этар гул.*

*Гар масофа йироқ бўлса ҳам,  
Кўнгил яқин, ахир, азизим.  
Армонларин қучоқлаб маҳкам,  
Согинчларим бедордир ҳар зум.*

*Ким айтади, осмон, деб, йироқ,  
Хаёлларим қаноти учқур.  
Туйгуларим гул очар бодроқ,  
Сим қоққандада эътибор бир қур.*

*Умидларим майсаси дуркун,  
Юмисоқ тортуб боради замин.  
Борлик тутар мўъжиса ҳар кун,  
Тўлдириб кел ҳаётнинг камин.*

**Фарғона**



Наср

*Асад ДИЛМУРОД*

# РАНГ ВА МЕХВАР

**Роман\***

18

Бўй етган қиз ёногидай лўплигина бир олма анқайиб тек қотган Комрон Вали по-йига тушиб қоқ иккига бўлинди, кимдир, қовун калланг остингда қолгур Азлар Ниёз, бир палласини майса орасидан олди-ю, қувониб ғарчча тишлади, сўнг асалдай мазали экан, боғбонлар пири Носир Охун дил кўрини қўшиб парвариш қилган-ов маъносида кўз қисди.

Зангар тулки-ей, Санамни кўнглим гули деган шоввоз, Садаф чорбогида бирон зарил юмуш-пумушинг борми, пишириб қўймагандир ёки тирроқи кўй йўқотдингми, бирдан таниёлмай хижолатда қолдим, ўзиям шоҳи чимилидиқа кирадиган кўёвтўра мисол қойил-мақом кийинган экансан-да, ҳатто қировлай бошлаган сочингни тим қорага бўятибсан, мармардай силлиқина ҳассанг дастаси соф тилладан чоғи, кўз қамаштириб ялтираши айтиётир, нархи осмон баробар бўлса керак, а, лаббай?!

Нечун ёнингда Зокир Ғиёсий йўқ, саҳрои кабирда сурув боқиб юрибди дейсанми, қўй, ҳадеб бечорага ёмонлик соғинма, ундан кўра яхшиси режаю дастурдан гапир, илҳоминг қайнаб, бугун ёки эрта бирон муҳташам саройда тағин гижба-баданг концерт кўйиш учун куч йиғиб ётгандирсан, яна Тарғил жангари рақибларини ер тишлатган, шундай қувончли пайтда сукут саклаб ўтирасанг керак.

Ишқилиб камлик кўрмагин, майнадек нималар деб чуғурладинг, салмоғи дунёларга тенг бошқа жиддийроқ мужда борми ҳали, кўп афсуски, бунисидан ғофил эканман, кўпам ичимни қиздирмай тезроқ сўйла-чи, фақат бекорчи қулоқ топдим деб кўпирма, ҳай-ҳай, ҳаддингдан ошиб ўтлаб кетмадингми мабодо, наҳот бир думалаб ҳайкалчи уста бўлибсан, қачон бунга улгура қолдинг ва қўлинг қачон ўнгландики, аллақачон бир аломат асарни юмалоқ-ёстиқ қилиб ташлабсан...

Ҳамон зўр иштаҳа билан хушбўй олма кавшаётган ва негадир олазарак бўлаётган Азлар Ниёз, дарвозадан анча берида, якка дарахт яқинида, тўқ пушти мармар билан зийнатланган баланд шоҳсупада, айрича викор билан ўмров керган баҳайбат жигари тусли улкан ҳайкал сари илжайиб бош иргади, шаклу шамойили овчарка, яъни Тарғил гавдаси ва қиёфасига монанд ҳайкал бутун борлиғида пинҳон ғурурни ошкор этганча кўкка қараб хураётганга ўхшарди, аллақачон у Носир Охун, Санам ва Тарвуз домла назарига тушибди, муҳими, тез орада мангу муҳаббат ва нафосат рамзи саналмиш Афродита номидаги хусусий совринга лойиқ топилур.

Яқинда кечган қизиқарли муҳокамада Носир Охун лутфан, қувончи ва ҳайратини яширмай, яна ғолиблик сенга буюради деб кесибди, демак, иккинчи марта муроду мақсадига етиши муқаррар, бундан ҳар қанча фахрланса ва севинса ҳақли, фақат бир нарсага ақли етмайди, чексиз азобу уқубат эвазига ташлаган дадил қадамлари на иссиқ, на совуққа чидайдиган айрим жizzаки ёру оғалари суяигига ўтиришмайтири, тунов куни заҳри-маҳрига ичib мияси ачиган Шодмон Чўтирий, бўйин томирлари ўқлоғидек бўртиб, аллада азизу лапарда лазиз Тарғил эмас, пуф деса пардек тўзғиб кетадиган хушомад ҳайкалини бино айлаганини сақич қилиб чайнабди, маза-матрасиз сафсатаси кам туюлганми нима бало, бир кеча тажрибасиз қоровул кўзини шамғалат қилиб,

\* Давоми. Боши ўтган сонда.

прожекторлар ёртган ҳайкалга қарата чоптириб қүённи урган ва панжарадан ошаётган чоғда тумшуғидан илинганд...

Хозир Шодмон Чүтирий күр бўлиб, зимзиё Нуқра ғорида, эти бориб устихонига ёпишган бадбахт ва худбин Тўра Охун ёнида, ёлғон-яшиқдан иборат тутуруқсиз латифаларини тўқиб ётиди, ўша ерда томир отиши ва тириклай чириши шубҳасиз, Тарғил ҳайкали шарафига Носир Охун зиёфат берәтганини эшитса борми, бодроқдай сочила-са керак, бу кунидан бешбаттар бўлсин ва эзгу ишлар йўлини тўсиш қандай оқибатларга гирифтор этишини билиб қўйсин...

Азлар Ниёз олма пўчогини кутига иргитаркан, бирон муҳим фикрни айтишни унуби қўймадимми маъносида ўйга толди, охири ҳалитдан овозаси ёйилган зиёфатни эслаб, қўлига таклиф қозози тутқазди-да, яна илжайиб Тарғил таърифига тушиб кетди, ғолиблик тожини кияётгани учун эмас, юрагини занг босган айрим ғаламисларни эмаклатишга эришаётгани учун баҳтиёр эканини қайта-қайта эринмай таъкидларди, кўпираётган оғзидан чиқаётган пойма-пой гаплар маъносига етиб-етмай, тилла ҳайкалча билан бирга, умри боқий гўзал маъбуда ўзини ҳозироқ суйиб бағрига босадигандек, кўзларини чирт юмиб ширин энтикарди...

Ҳадемай Комрон Вали тоб ташлайди, ахир, нуқул ўзига маҳлиё бўлаётган Азлар Ниёз сафсаталарини ўтин қилиб қалар эканми ўчогига, ғашлангани сари ҳар бир сўзи кулоқлари остида ари бўлиб ғувилларди, шашти шунақа баландки, ярим кечага қадар тинмай саннаса ҳам жаги оғримаса керак. Яхши ҳам шу он беш-олти нафар келбати келишган ширакайф мижоз савол ёғдириганча суллоҳни Тарғил ҳайкали томон судради, оёқлари ерга тегиб-тегмай борар экан, нуқул камина нафосат олами фуқаросиман тарзida қичқиради, шундай шараф Носир Охун ҳиммати туфайли буюриби...

Комрон Вали чурқ этмай аста Тарғил сари ўғирилди, бетондай қотувчи қоришмадан қўйилган ҳайкал эса маънодан маҳрум бўртиқ кўзларини ҳамон осуда шовуллаб оёқлар остига лўппи-лўппи қирмизи олмаларни тапир-тупир тўқаётган якка дарахт томон қадаганди, гоҳо чуғурлашиб идиш тўлдираётган ёшу қарини кузатиб ғингшигандек бўлади, ногоҳ шунда тушини эслайди ва дунёдан бадар кетгиси келади, якка дарахт пўстлоги остида пинҳон оҳанрабо баданидан сели ҳамда қувватини сўриб олаётир чамаси, охири ивиган латта мисол шалвираб қолди.

Якка дарахт ва Тарғилга қараш азобга айланиб борарди, ногоҳ тақдир йўллари шулар орасидаги масоффада кесишадигандек туюлди-ю, ичи сидирилиб олға босди, дарвозадан чиқсан ҳамоно сал нарида туйғун кўзлари жавдираб турган барваста қоматли мўйсафид эътиборини тортди, юраги безовта потирлаб қошига борди-да, куюқ салом берди, негадир у алик олмай, қировлаган бароқ қошларини чимириди ва кўлтиғига қистиривлни китоблардан бирини очиб байт ўқиди, сўнг ҳақ ва ўзини таниган, азалу абад яхшию ёмонаига кўнгил кўзи билан қараган нафаси ўткир авлиё марҳамат қилиб айтган лутфи эҳсон сен каби ғофил бандалар учун ҳайф маъносидан хўрсаниб илдам узоқлашди, кўп қаватли панел иморатлар панасига ўтар-ўтмас юмшоқ овози илкис қайта жаранглаб ҳавони титратди...

*Қилди бу чархи фалак расвои даврон оқибат,  
Бор-ўйқум бўлди охир ерга яксон оқибат.<sup>1</sup>*

Заргар сандигида авайлаб асралган мўъжаз ёмбидек гўзал, баҳорий абри найсонлар шиддатига тўйган шалола каби жўшқин ва равон байт, Вали бахши даъвати асосида, термаю достон билан бирга, ғазал бўстонига тез-тез интиқ мўралаган, ҳатто кўплари сехри орқали бутунлай оромидан айирган Нафиса қалбини ларзага соглан онларини эслатди, руҳни поклашга хизмат қилувчи сара ва жонли сўзларда, факат теран мазмун эмас, нафис товланувчан бўёқлар ҳам жамлиги айниқса ҳайратга молик...

Келгусида туркум кўркини оширишда ғазал табиатига хос бўёқлардан унумли фойдаланса ютқизмайди, негаки, улар тошқин аввало чархи кажрафтор қудрати нишонаси эканини теран ифода этишда қўл келади, олажуз қавми тузини ичиб улғайган айрим фаросатли зотлар тошқин тимсолида ўша курдат ичра пинҳон қаҳру ғазаб қанчалар қаттол эканини пухта билишади ва ҳануз хавотир чекишга маҳкум...

<sup>1</sup> Бобораҳим Машраб.

Садаф чорбоғида илдиз отган якка дарахт ва яқинда қўндирилган Тарғил ҳайкали сари ошиқаётган халойик эса ана шу жумбоқ магзини чақишида ўрллик қилса керак, ҳатто бу борада ўзи ҳам қиёмига етказиб мулоҳаза юритиш қобилиятидан маҳрум, яъни кўпинча ақлию кўнгли ўртасида бегонасираб ва довдираб яшайди, қаёқандир буни билган нотаниш йўловчи – юзидан нур томадиган Қария айбситгани учун ранжиши бефойда, аксинча, у ачитиб айтган гаплардан руҳланиши ва сергак тортиши лозим, қолаверса, у бениҳоя ўрнида кўллаган танбеҳу таъналар Мерган доим қулогига қуядиган панду насиҳатларга уйғун эмасми?!

Устахонага қайтгандан кейин Садаф чорбоғида кўргану кечиргани ва донишманд чол ҳақида Мерган билан фикрлашади, янгиликка ўч биродари ҳикоясини жон қулоги билан қизиқиб тингласа керак. Аксига олиб Мерган кўринмади, чўлдаги кигиз ўтовида ёлғиз қолган овчи кўппаги ёки Калхат ва Чиганоқни кўриклаб ётган муаллим ахволини билгани кетгандир, кейинроқ мавридини топиб барисини оқизмай-томизмай айтади, кўп қизиқ, яна Қария билан учрашиш насиб этармикин?..

Туғилган кунида Аливой Салим совға қилган девор соати капгири тунги ўн иккidan огоҳ этиб занг чалди, барибири Ғунча хомакиси устида куйманиш ва хаёлан Роҳила отин билан дардлашиш учун ҳозирланди, аммо жонивор уйку бу истагини рад этиб, маймоқ диван сари қистади, мундоғ эътибор қилса, ростдан туртса йиқилар даражада чарчаган экан, ахир, ғалати тушлар, Садаф чорбоғида аён бўлган сариқ атиргуллар ва ҳайбатли якка дарахт ҳақидаги мушоҳадалар нақадар қақшатиб юборди асабини, андак шу азобдан кутулиш ва куч-куват ўйниш учун сал мизгиши зарур, тиниқан руҳ мудом тафаккур ва мўйқаламга энг ишончли мададкор саналур.

Катта саҳарга қадар қилт этмай осуда ухлади, сўнг қисқа кечган тушида нотаниш йўловчи билан юзлашиб тинчи бузилди, уйғонган паллада ялписига чироқ ўчиб, бутун шаҳарни зулмат чулғаганди, ажабки, машъала ёки шам ёқилган каби устахона ёришиб турарди, ҳовуч-ҳовуч ойдин шуълалар Мерган юраги тубидан жой олган Ҳулкар картинасидан тараалаётган экан, девордаги михга илинган Жилға яшилтоб ёлқин сочаётир, ҳатто ҳали битмаган Ғунча ва Ҳомила эса лағча-лағча чўғга эврилмиш...

Сал ўтмай қайдадир дўмбира сайраб, маҳзун оҳангларга чулғанган Ҳулкар қурилмаси янада кучлироқ нурланди ва айрича улуғворлик касб этган поёнсиз кенглик тасвири ичра алоҳида кенглик туғилди, дўмбира эшилиб зорлангани сайин ғусса ва ҳасратдан иборат бўёқлар ҳаракати тобора тезлашиб борарди.

Охир-оқибат курилмада катта ўрин эгаллаган ложувард осмон гумбази ва муazzам замин оралиғида сирли жонланиш рўй берди, шу оралиқдаги жамики нарса лов-лов ёнаётган ранглар оғушида исинаётганга ўхшарди, юксакларда чаппор уриб сузаётган қорамтири парча булат шаррос қуйиб юборган ёмғир доналари бир кифти сурмаранг чўққига туташ ясси тепаликни шитирлатиб саваларди, кулликланиб бўғзига пичоқ тортилган саман хирқираши, кўксини чоклаб юм-юм ёш тўкаётган Мерган ноласи, лабларини сирли табассум ва қониқиш безаган Носир Охун ва Санам шивир-шивири турфа саслар аро қулоққа бемалол аниқ-тиник чалинарди.

Дўмбира хониши тинчиган ҳамоно чўғланиб кенгайган Ҳулкар шаклу шамойили асл ҳолига қайтди, жўрлашиб янграётган турфа овозлар сўнди ва теран жимлик чўқди, ажаб ҳолат баҳона дилини чулғаган түғён анчагача босилмади, кўз олдидан Санам иғвоси боис туёғидан ўт чақнайдиган севикли тулпоридан айрилиб бўзлаган ва ҳамон фифон чекадиган Мерган сиймоси жилмасди, сўнг хаёли қуёш ҷарақлаб турган ва ала-му армонлар дўлу жала бўлиб ёғилган кунга оғиб, Ғунча сари яқинлашди-да, дастгоҳ пойида турган китобни кўрди ва қизиб лўқиллаётган чаккасига бармоғини тираганча паришон бўзариб қолди.

Худойим шоҳид, китоб атиги икки учрашувдаёқ бутунлай дилини ишғол этган Қарияга тегишли эмасми, тавба, бу ерга қаёқдан келди ёки ўша аломат чол ўзи ташлаб кетдимикин, ҳарчанд ўйламасин кутилмаган сиру синоат тагига етолмади, ет-гунча эҳтимол соchlари бутунлай оқарса керак, нима бўлса ҳам шундай ноёб топилма соҳибиға айлангани учун шукронга айтсан, мана энди уни сира қўлидан қўймай, аввал чама қилганидек, бағридаги сўзларда пинҳон латиф рангларни ўзлаштира боради..

Қизғиши саҳтиёний муковали китоб ажабтовур маҳорат ва чексиз меҳру муҳаббат билан тикланган ҳикмат кошонасига ўхшайди, тоза ипак саҳифалар бағридан жой ол-

ган ҳар бир ғазал ёқут ёки дурдан заргарона тарзда қуйилган жозибадор митти обида каби дилни маҳлиё этади ва оҳанраболи бедор оҳанглар билан сайқал топган нафис бўёқлари ўзаро қўшилиб нозик адо мусиқий куйга эврилади.

Баъзан тунлари фақат мутолаа билан машғул, аммо ҳарчанд кўз нурини тўкиб, юрак қўрини сарофлаб ўқигани билан тўймайди, аксинча, тобора ташна бўлиб боради, ёпирај, мана бу қўйма сатр нақадар рангин экан, қалби нотинч шоири аъзам Булбул эрдим қилди ғам охир гулистондин жудо дебон мардона ва моҳирона лутф қилмоқ баробарида, тошқин ҳамласи сабабли Комрон Вали руҳини қамраган инқилобни тўла баён айлабди, ахир, киндик қони томган қишлоқ тақдир буюрган тенги йўқ сўлим боғу бўстон эмасмиди, сурон солиб келган оғат, ўша ажойиб масканни поймол айлагани етмай, орзу-умиди мўл кўплаб оға-иниси ёстигини ҳам қуритди, токи томирларида қайноқ қон оқиб турар экан, бу мусибатни қандай унутади, ундан кўра тириклий бирон очиқ мозорга кириб ётиши керак...

## 19

Кундуз билан вақтинча ўрин алмасиб, борликни қора чодирга ўраган тун бўйи дастгоҳ ёнидан жилмади, тобора сайқал топаётган Ғунча қурилмаси ботинига бутун вужуди билан сингиб борарди, маъсум тонг қуёши ним қизил шафакқа ўралган уфқ бетидан ўпич олган дамда, тинкаи мадори қуриганига қарамай, донишманд чол фойидан совға қилган саҳтиёний муқовали китобни вараклашга киришди, ажиб ташналий ила берилиб мутолаа қилар экан, қум тиқилгандек ачишаётган кўзлари беихтиёр Ӯхима маҳшаринг била ҳам етти дўзахинг куяр сатрида тўхтади, буни ҳам баҳоси йўқ митти обида деб атади ва чукур мулоҳазага ботди, у зухур этаётган изтироб ва ғамни хис этгани сайин юраги тилимланиб ачишарди, қаники шу палла бирор озгина тасалли берса ва бағридаги сирқирай бошлаган эски ярага меҳрини малҳам айласа!..

Нақадар таҳсинга сазовор, неча аср муқаддам түфилган биргина сатр гирмон ғавғосига эргашиб келган тошқин туфайли бутун олажуз қавми ва унинг бир ҳалқаси бўлған оиласи қисматида рўй берган ўтирилиш чўкишлар моҳиятига нозик ишоралар қилаётганди, бунга тамом имон ўтиргач, дарҳол ўша сатрни дилига нақшлади, энди дилида қайта ишлов кўрган нафис бўёқларини синчковлик билан Ғунча оламига кўчира бошлиди, ана шунда у аламу армон ўтида тобланган қалб катта ўзгаришлар қилишга қодир эканини ошкор этганча наъра тортиб юборса ажаб эмас.

Бир неча ғазални ёдлаб китобни ёпгач, шоири аъзам фифони дўмбира нолиши билан сезимларида қовушганини туди ва ҳайратини яширолмай аста Ғунча сари ўтирилди, сўнг жафокаш дунё ҳамдарди бўлишга яраган ғазал ва мусиқа сехрига хос бўёқлар Роҳила отин қисматини маромида тасвирлаши учун кўмак беришига амин бўлиб мўйқалам тутди, энди янада зийрак ҳолда зўриқиб тер тўкиши, яъни ўзини ўзида ёқаётган сўздаги ботиний бўёқларни кўнгил кўзи билан кўриб зарблаши лозим, оҳ, шу олам, шу тириклик авваламбор ботиний бўёқлар бағрида барқарор эмасми?!

Хаёлини олис кечишдан узмай, жонини шоири аъзам ва Роҳила отин нолалари ўртасига тикиб изланарди, мураккаб қурилма бутун олажуз қавми тошқин туфайли кечирган мотамсаро дамлар хўрсиниклари ва санчиқларини жамлаганча тўлиқаётгани англашилади, ғуссакаш ифодалар тизими мунтазам равишда безовта қалқиб туради, бот-бот улар қатларида пинҳон чақмоқ ва гулдирак ваҳима солиб бош кўтарар экан, ажиб ҳолдан янада руҳланиб олға интилади, пиёс пўстидек юқалашган қоринбой бот-бот карнай чалиб, хумор ўлгур қутурганча муттасил ғавғойи шўриш қилса-да, пинак бузмай кечани кундузга улайверади...

Фақат бугун дард чекишдан эртароқ тийилиб, якка дарахт ва Тарғил ҳайкални туфайли янада маълуму машҳур бўлган Садаф чорбоги сари судралиб бориши лозим, аслида еган-ичгани татиши гумон ўша миннатли зиёфатга оёғи унча тортмаётир, Носир Охун назар соглан ялоқдан ювинди ичадиган айрим мунофиқлар даврасида ўтириш азоб эканини ўйлаб хитланмоқда, азалдан ўша касларни кўрса-нетса албатта бадани эсканлаб<sup>2</sup> қўйишади, қолаверса, дарҳол шаробга бўкиб оладиган Носир Охун ором бериши даргумон, дастлаб албатта Калҳат ҳамон оромини бузәётганидан нолийди, иблис ва жодугар нафаси булғаган картина йўқотилгани ёлғон дея кариллаб жеркийдида, ҳалигача Семурғ қўлига тегмагани боис қаҳру ғазабини тўқади.

<sup>2</sup> Эсканлаш – тошма, хол-хол доғ (шева).

Иккиланиб ўтирганини ғойибдан сезиб улгурган Санам телефон орқали бир неча марта чорлади, ҳатто кўп ўзингни ўкситма, аслида сен маҳорат бобида ҳеч кимдан кам эмассан тарзида сўйланиб, кўлтиғига сув пуркади, латта ҳиди анқийдиган ўша гапидан кувониб нима барака топарди, унақа ёлғон соясида соялаб семиргандан кўра, ғараздан холи рост чангалида бўғилиб ўлган афзал эмасми?!

Ҳадеб елкаси тиришмай мардона тан берсин, бугунги ҳар бир ғанимат сония, жамики шону шарафи билан бирга, аллақачон ўзига бино қўйган Азлар Ниёзга тегишли, яъни бугун сўлим чорбоғда маҳаллий газеталар бонг уриши учун лойик ҳақиқий байрам бўлади, беўхшов қиёфасида ғолиблик нашидаси жонсизгина акс этган ва сирга кўмилган якка дараҳт оша йироқ манзилларга совуқ нигоҳ қадаган Тарғил ҳайкали баҳона дилига фахру ифтихор шамчироғи ёқилган Носир Охун яхшигина эриди, аллақачон биргина имоси билан юзлаб боқилган жонлиғ сўйилгани, маҳсус ўчокларда ўнлаб дошқозон бикирлаб қайнаётгани, абжир югурдаклар қамишдан бел боғлаганча чопа-чопа хизмат қилаётгани тайин...

Носир Охун башараси кўз ўнгидаги жонланиб энсаси қотди, нимадир йўлени тўсиб ётганини ҳис этаркан, яна телефон шифтни бошига кўтарганча асабий чириллади, сим қоқаётган Санам бўлса керак, гўшакни кўтармай қўл силтаб, ноилож ишни йигиштириди, борса-бора қолсин, фақат Носир Охунга қора бермай, маству аласт билан маймачалпак айтишмай, иримига озигина ўтириб қайтади, баҳонада оёғи ва дили чигили ёзилади, суварақдай чор тарағфа ўрмалаб кетган айрим гийбатлар, хусусан, чорбоғда кечаётган кейинги янгилик ва ўзгаришлар билан танишади...

Фақат бу қанақаси, зиёфат кўпчилик оғизида юрган осмон баробар мактоб таърифига умуман муносиб эмасди, шинам шийпон ва очиқ майдонларда ўрнатилган бир қанча узун столда ёзилган озода шоҳи дастурхонлар чигиртка лашкари доригандек шип-шийдам бўлиб, ҳар жойда фақат зарҳал ёрлиғига олд оёқларини кўтариб сакраётган бурама шоҳли кўтос зарбланган дароз шишалар кўйиб чиқилганди, нозик нақшлар чекилган кумуш ва тилла баркашларда қирмизи нақшин олмалар ихчам эҳром каби уйиб кўйилиби, кўзасимон чинни гулдонларда эса даста-даста сариқ атиргуллар муаттар атру бўйлар таратиб сокин товланади...

Ясан-тусан қилган Санам бир кўриниб йўқолди, Санам ортидан мўлтираб қолган ошиқу беқарор меҳмонлар дарёдек оқаётган ўткир майдан симириб шодон қаҳқаҳа ота бошлашди ва Азлар Ниёзни зуваласи ихлос хамиртуриши билан қорилган соҳиби иқтидор сифатида олқишига кўмишди, дароз шиша кучоқлаган бир гуруҳ кимса дов панжалари билан тумшуғи узун силовсин терисини шилаётган Тарғил ҳайкали (илгари манзара бошқача эмасмиди?) пойида тиззалаб мудрамоқда, бошқа бирорлар Санам кўзларида пинҳон нажот қўёшини ўлан қилиб айта-айта атрофида тинмай айланишади, яна аллакимлар ўлан оҳангига мослаб басма-басига иргишлаб ўйнашади.

Кимдир бақадек бақрайма маъносида совуқ илжайиб давра томон итариб юборган чоғда нигоҳи дастурхонни безаган ва барчани бирдек ром айлаган дароз шишага қадалганди, сўнг тушини эслай-эслай юрак ҳовчлаган кўйи якка дараҳт сари ёндошди, ажабо, бағридан аллақачон қушу қумурсқага беминнат жой берган мўъжизавий хилқат энди замин белини буқадиган даражада улкан салобат касб этганди, тобора ўйғон тортаётган танаси ва олмос тусли кўш тасмадан милтираб қон сизарди, ҳатто ўзаро чирмашган шоҳу бутоқлар, шабада оҳиста тебратаетган япроқлару мевалардан ҳам қон узлуксиз тома-тома кўлмак пайдо қилганди.

Ногоҳ ғойибдан элас-элас Санам овози келди-ю, кўриб тургани шунчаки кўлмак эмаслигига имон ўғирди, ҳадемай у пишқириб соҳилларини ювадиган муazzам денгизга эврилади, сўнг бору йўқни бир йўла кўрдим демай қаърига торта бошлайди, аввало, мушфик заминга қўшиб, тошқин овораи аброр айлаган қишлоқ ўрнида туғилган шаҳарни ютса керак, охири Комрон Вали ҳам шаксиз бир тош каби ному нишонсиз кетади тубига, илгари очофат тошқиндан амаллаб қутулган, аммо бу балойи азимдан қандай омон қолади.

Атиги бир ҳамладаёқ тирикликни зеру забар айлаб, умид ва ишонч илдизини қўпорган тошқин эгизагидек туюлган ҳайбатли ва таги йўқ денгиз косасини тасаввур қилган захоти руҳи хирадашди, сўнг қунишиб ва ғазаби бўғзига тиқилиб, файзу баракаси қочган, беҳисоб дароз шишаларни кўз-кўз қилаётган дастурхонлар томон ижирғаниб қаради. Оёғи тортмовди-я, келмаса кўнгли ёздагидек бўларкан, энди айбни

үзидан қидириб, тишини тишига босиб чидайды, фақат жилла курса дардини кимгадир супра қилиб ёйиши керак, миянг қатиги ачиб ёмонлаб қолпур Азлар Ниёз эса қорасини күрсатмай қуидираёттир, баччағар, битта-яримта зиёфатинг бошингдан қолсин дея, рўй-рост хасу хашибагини очиб ташлашидан чўчиб, қуён расмини чизгандир ёки бирон хилват гўшада Носир Охун, Санам ва Тарвуз домла билан эмин-эркин айшу ишрат сураётгани ва олқиши остида керилаётгани эҳтимолдан холи эмас, ҳали шошмай турсин, энасини учкўргондан кўрсатрун...

Иззати борида лабига кесак суртиб қайтади, ширин-шакар меваларга кўмилган якка дараҳт ва олисларга нигоҳ қадаган Тарғил ҳайкалини эса елкаси чукури кўрсин, анчадан бери улар орасида мавжуд масофа ҳар қаричида бир жумбоқ милён жумбоқни туғиб ётгани шубҳасиз, эрта улар билан боғлиқ сир шаксиз ўзини ўзи фош этажак...

Арча панасидан Санам имлади шекилли, ҳеч нарсага тушунмай жимгина ўша томон шошилди ва беихтиёр ёқа ушлади, ахир, хушими ёки туши, гирдида шамшоту тेरак тизилган, жазавадор мусиқа янграётган очиқ ва кенг майдонда бошқача манзара ҳукм суроёттир, қуш сутидан бўлак ҳамма нарса тўкиб ташланган дастурхон атрофида қўйилган суюнчили юмшоқ ўриндиқларга чўккан меҳмонлар бўкиб қолгандек сукут сақлашади, тўрдаги маҳсус креслода ёнма-ён кўр тўккан Носир Охун билан Тарғил эса, ҳеч кимга қарамай, бемалол товуқ ва ғоз гўштидан тановул қилмоқда.

Қачондир Носир Охун кекириб ва дўмпайган қорини силай-силай шоколад қофозини ғижимлаб эснаётган Тарвуз домла сари кўз қирини ташлаб сўз қотди, бугун Тарғилвой иштаҳаси чакки эмас деди чоги, сўнг Тарғилга ўтирилган кўйи чала-чулпа ғажилган суюкларни истар-истамас Тарвуз домла олдига сурди, ногоҳ мулойим илжай-ган устоз кайвони лойиқ топган насибани шошилмай барчага бўлишишири-да, тиришиқ бети ва бўйнидан сел тахлит қуилаётган қайноқ терни рўмолчаси билан арта-арта орзиқиб қутлов сўзи айтишга киришди. Чечанлик бобида тажрибаси етарли эмасми, бугунги шодиёна тангри инояти эканини далиллар асосида дарҳол исботлади, Носир Охун бутун меҳру муҳаббатини бериб парвариш этган якка дараҳт ёнида қад ростлаган жозибадор Тарғил ҳайкали муридлар қалбida чукур илдиз отган эҳтиром рамзи эканини қайд этаркан, Санам таъқибидан гарангсиб турган Комрон Вали шошилмай тисарила бошлади.

Даврани бошқараётган Тарвуз домла қўлига устухон тутқизмай қорасини ўчириши керак, фақат нечундир товони билан боши ўртасида чўғсимон нарса жадал суръатда югура кетди, сўнг руҳида бўрон кўзғалиб, элас-элас дўмбира нолиши эшитилди-ю, бехосдан ёришган осмон ойнаси остида қанотлари оҳиста тебраниб Калхат қўринди, кўзни қамаштириб жимиirlаётган мовий бўшлиқни ёриб келган йиртқич қуш давра узра сўнгсиз ғазаб билан қичқиради, ҳадемай ўлчамидан узилган думли комета тахлит қуига шўнгигиб, бақувват панжалари билан столни шу қадар қаттиқ тепдики, ҳамма нарса ҳар ёққа тухум пўчоқлари каби тирқираб сочилди. Шиддат билан кўкка кўтарилиган жонивор чиндан ҳам ваҳима шаклига ўхшарди, Комрон Вали дилидан шу ўй кечди, Санам жамолига тўймай бокаётган ва бирдан кўзлари ола-кула бўлиб кетган Носир Охун эса яраланган кимсадек инграб қулади, кетидан ўтакаси ёрилган бошқа каслар ҳам кундадек ҳар жойда думалаб қолишиди.

Калхат бўшлиқ қаърига бутунлай чекингандан кейин таҳлика аралаш жимлик чўқди, ҳалигина қайнаб тошаётган чорбоғ энди қабристон сукунати оғушида мудрарди, ҳаммадан аввал ҳушини ўнглаган ва тишлари такирлаётган Носир Охун қимирлашга кўркарди, салдан кейин қандай кунга қолдим маъносида атрофга олазарак аланглади ва уруғ-пуруги билан қиронга учрасин дебон қарғанди, сен хожангни қўриқламай нечун тош қотдинг маъносида Тарғилни беозор туртгач, қирраси заррин улкан чинни косани ўткир май билан тўлғазди-да, Комрон Вали тумшуғига тутди, ҳатто еб қўйгудек ўқрайиб тиқилинч қилди, ҳатто бир томчи қолдирмай ичиши керак, ана ундан кейин эзғиланмай эркакча гаплашади...

Мерганга берган ваъдасини эслаб бўзарди, яна ошнаси қошида қизариб қолиши яхши эмас-да, бундан ташқари бир йўла пақкос бир косани сипқориш осон эканми, нафаси қайтиб ўлишиям мумкин, аммо Носир Охун бу ёғига қилча ғам чекмай гиж-гижлаёттир, охири ён бергач, бехосдан бўлиқ соchlар чирмашди бўйнига ва косада соқин қўпираётган суюқ олов қирмизи ёноқлар ва қийик кўзларни чулғаган ғамза билан қўшилиб туша бошлади ичига...

Фаройиб зиёфат қачон оёқлагани ва мўру малахдек одам босган Садаф чорбоғини қачон тарк этгани қоронги, бир вақт қарасаки, гижинглаган Қора тулпор салонида жимгина ястанганча ором оғушига кирган шаҳар бўйлаб шамолдек елаётир, рулни моҳирона бошқараётган Санам лабларига инган табассум дилига чексиз завқу шавқ юқтириди, энди уни қалби покиза, нияти холис најот фариштаси сифатида ардоқлашни тилади, ҳатто у билан каттаю кичик суқини кўзгайдиган машинада ёнма-ён ўтириб эркалик қилаётгани учун кўкси юксалди...

Сира ақли етмаётир, ҳозир қайси маконга қадам босди, адашиб бегона жойга келиб қолди чамаси, унақа деса, лиқилдоқ эшиқдан тортиб ускуна ва картиналар бариси таниш, илгичдаги эски-туски кийимлар ҳам, пойгақдаги абжағи чиққан пойабзаллар ҳам, сукут сақлаб мунғайған сарғимтири телефон ускунаси ҳам ўзиники, атиги маймок диван ёки креслодан ҳам эскироқ бўлган журнал мизида пича газак ва дароз шиша қўйилган экан-у, шунга тилла топган тентак каби зиёда ҳовлиқибди. Кўнгил ғуборини ювурман маъносида ҳозири нозир турган дароз шиша намунча жилвакор, нуқул сирли имо-ишоралар билан қошига чорлаётир, шундай бўлгач, нафси ҳакалак отиб, ўлгур томоги баттар қичииди-да, на чора, иштиёқини бўғиб ўтирмай, бурни остига гуп эткизид бир пиёла ташлайди. Ана, кўп яшасин, ўғил болача қилиб боплади, энди Ғунча оламига шўнғиши учун чўчимай мўйқалам тутса ярашади, ахир, у муҳлатида битиши лозим, ғайрати жўшганда илҳом кўпам зориқтирмаса керак, азалдан, Аполлон замонидан бўён одати шунақа-да. Чиндан илоҳий ҳамдам нозланмай тез орада ташриф буорди, факат негадир арзи ҳолини тинглашни истамай, танлаган йўлинг нобоп дея сирли шивирлади, агар у берадиган қимматли маслаҳатларни қулоғига сирға қилиб тақмаса, боркуни ҳам йўқолади, аниқроги, эрта туркум оёғига кишан бўлиб тушади, шундай экан, ошигич ундан кечиши ва Семурғ лойихаси билан шуғулланиши лозим.

Санам нафасини сезмай, яна бир қултум ичиб, дастгоҳга сирланган бўз мато тортди-да, мўйқаламни аста бўёққа ботирди, энди Калҳат таҳликаси баҳона уйқусидан адашган Носир Охун кашф этган лойиҳа шуури қатларини буткул истило қилганди, нуқул афсонавий қуш абадий баҳту иқбол тимсоли сифатида гавдаланиши зарур тарзидаги тушунча тинчлик бермасди, ўша тимсол қудрати Носир Охун, Санам сиймоси ва Тарғил келбатида намоён бўлувчи қатъият, ихлос ва ифтихор нишоналари восита-сида бўртиб туриши лозим, токи лойиҳа мағзизда пинҳон ҳақиқат тўла рўёбга чиқсин.

Баъзан кўз ўнгидаги еру осмон бирлашиб кетса ҳам, юраги тепаётгани билинмаси ҳам ғайрату шижоати чакки эмасди, ҳали хүшёрликка чорлаган илҳом ҳамон қўллаб далда ва рағбат бермоқда, демак, мазкур лойиҳани қисқа муддатда қойиллатиб ижро этиши учун имкон етарли, факат бу ёғига чалғимай изланиши лозим. Матога мақсади ибтидосини ифода этувчи дастлабки нозик ифодалар нақш бўлди, ўзи эса шодники тўлаверди, аммо барча ҳаракатини ола-була қараб кузатаётган Мерган кўнними йўқолиб борарди, арпасини хом ўргандек нуқул қовоғидан қор ёғдиради, алал-оқибат нари-берига асабий одимлаб, қуруқ ўтиндек чарсиллаб ёнди: ҳой, занғар, туркумни дафн этиш учун аввал кўксингдан қабр қазигин!..

Заҳардан аччиқ таънадан зардаси қайнади, тили қичиди-да, хезонглаб тинч қўйишини сўради, ҳозир кўзларига дароз шиша ва Семурғдан бошқа нарса кўринмасди, Мерган қошларини уйириб бир четга ўтгач, яна ғайрат ва шижоат билан мўйқалам ту-тар экан, қалбини ўраб-чирмаган ғалати илҳом бутунлай ором бермай қўйди. Лойиҳа масъулияти мунтазам бедорликка даъват этаётгани боис сониялар оғушида вужудини чулғаган эҳтирос ва қийноқлар зарбани туйиб нафас оларди, айни шу жараёнда зимзиё кечада дафъатан тепасига учеб келган Калҳатни қўриб шайтонлаб қолган Носир Охун қилган ҳадикли нидо дилида бир неча марта акс садо берди ва картина сехрини ошириш бобида асқатадиган алоҳида имкон топилди, энди сезимларида кечеётган инқилобни иссиқ ва совуқ рангларга қўшиб зарблашга уринарди, натижада матога кўча бошлаган туғёнлар охири бутун жисмида илоҳий салоҳият зухурланган Семурғ бўлиб гавдаланди, жияклари ним қизил йирик-йирик кўзлари муazzам замин узра эмин-эркин парвоз этиш нақадар мароқли эканини ошкор айлаб чақнаётган қанотли паҳлавон ҳайбати кўрқинчли туоларди.

Анчайин энли-узун матони чулғаган жозибали кенглик патлари оку қора адрас каби майин товланаётган Семурғ салобати ва шижоати туфайли боқий ҳамда кўркам туюларди, бутун борлиғида мислсиз куч-кудрат ва матонат жамланган бақувват ва чайир

жонзот найзадек ўткир тумшуғини чүзганча самовий олов түсиқларни бемалол ёриб учаётганди, улкан ясси қоя тахлит кифтида шалпанг қулоқли Тарғилни эркалаб ўтирган Носир Охун билан Санам чехралари илиқ табассумга ғарқ ва олис уфқ ойнасига мулойим қадалган тийрак күзлари тубида ҳиммат офтоби чарапламоқда...

Мехрибон худойим астайдил қўллаб, тасодифан туғилган лойиха санъат ҳаётидан муносиб ўрин топди, энди эрта муқаррар шов-шув кўтарадиган ажойиб ютуғини нишонлаши лозим, бир пиёла оқидан сипқориб, газагига ўзини ўзи эчки ўйинига тортади, бунақа вақтда қайноқ терга пишиб, пайларни зўриқтириб иргишилаш маза-да. Бирор қитиқлаётган каби ҳиринглаб, тиним билмай узоқ шоҳ ташлади, охири тинкаи мадори қуриб, маймок диванга гуппа учди-ю, ҳадемай ширин уйқу элитди, ҳатто ўзини ҳам унугтганча ҳузур қилиб осуда ётарди, сароб тахлит туш тинчини бузгач, калласи ғовлаб ва томоғи туршак каби қотиб уйғонди, бижғиган айрон ичгандай кўнгли айниб турган бўлса ҳам ўткир май тилади.

Ҳозироқ сабуҳий қилишига тўғри келади, йўқса қоқ миясига найза санчилган касдек тил тортмай ўлажаги шубҳасиз ва жанозасига Мергандан бошқа киши қатнашмаса керак, ҳозир эса у аразлаган: қовоқ-тумшуғи дард устига чипқон бўлди, каллаи саҳарлаб оч буқадай тўрсайғанча деспингани нимаси, дароз шишани супа гирдида терилган тошга уриб майдалагани айниқса оғир ботди, Вали баҳши ва Роҳила отин гўрларида тикка туришганини алоҳида қизишиб таъкидлагандан кейин эса илкис мияси тарки очилди, дароз шишада яширинган малъун – Санам шериги дилини юпанч ва нажот нури билан ёритиши ўрнига зулмат пардасига ўраганини ўйлаб титилди, агар ер ёрилса ҳозироқ қаърига тушиб кетарди.

Абадий шармисорлик аламини чекмаслик ва хотиржам бўлиши учун билиб-билмай қилган айбини шубҳасиз ювиши керак, Мерган кесатиғи ва даъватига биноан, хаёлида шоли ичидаги курмак мисол ғариб туюла бошлаган ва кўнглидан адашган кезларда ҳайратомуз тарзда жадал таваллуд топган Семурғ баҳридан ўтади, ўша картина келтирадиган шуҳрат омонат, пули эса барибир юқмайди, жилла курса шу жиҳатини ўйлаб, савил қолгурни балки яшириқча ермойига булаб ўчоқ-пўчоқда ёқар, балки қиймалаб чуқур-пукурга кўмар ёки ўраб-чирмаб анҳорда оқизар, хуллас, из-пизини қолдирмай бутунлай йўқотиши лозим.

Фақат кеча тенгсиз хилқат монанд лолу ҳайрон қилган ва дилида ғурур ўйғотган Семурғ бугун қайси гўрда қолди, ўпкаси шишиб жон-жаҳди билан ҳамма ёқни титкилаб ташласа-да, ер ютган ёки сомон ўюмига аралашиб йўқолган ингнадай топилмади, нариберига чопгани сайин Мерган кўхна креслода пинак бузмай ўтиради, ҳали тўнғиллаб безор қилган одам, охири пиқирлаб кулди, сўнг бошмолдоғи билан тўрга ишора берди ва ногоҳ шунда нигоҳи айрича чақнаб кетди.

Мерган ҳоли-руҳида кечеётган хайрли ва беозор ўзгариш дилига қувват ҳамда шижаот бағишлиди, аллатовур руҳланиб ўгирилди, сўнг ёнартоғ кўрган кимсадек саросар бўзариб қолди, шубҳа ва ҳадик ичра бир зум кафтини бетига парда қилиб тутгач, художон дея энтиқди. Зигирча муболага эмас, сал нарида тириклик уйи ва кўнгил иклизмини сабру қаноат офтобдай ёритиб турражагидан огоҳ этиб нотаниш картина сокин жило сочаётганди. Алал-оқибат Мерганни унутиб, ҳамон ақлу ҳушидан жудо ҳолда, тағин ҳам орзиқиб картина сари ёндошди, диққатини ягона нуқтага тўплаб, назарда тутилган мудда мантигини теран ёритган, укпар булатни ёриб ўтаётган нур толалари тахлит ноzik чизиқларни авайлаб силади, терчилаган иссиқ кафти ўлардай қилтириқ бўлса ҳам беҳад бесўнақай қоя ортмоқлаб олган Туячумоли тасвирига теккан пайтда ток ургандек туюлди, хиёл титранаётган бармоқлари орқали аста-секин бутун бадани ва сезимларига ажиг сууруга мойил ёқимли ҳарорат ёйилди.

Ипсимон мўйлови синар даражада ортга қайрилган жонивор бениҳоя қўпол ва залварли юқ остида шағалу қумга қоришган нўхатдай аранг қорайиб қўринарди. Бутун борлиғи ва айниқса хиёл эгри оёқчалари қуёш пуркаётган жазира ма селида чўяндек чуйкалиб кетганди, ҳозироқ жон таслим қиладиган беморга ўхшаса-да, сира ўзини йўқотмай, чидам ва қатъият билан тириша-тармаша ўнқир-чўнқир тиканакли тор сўқмоқдан тап тортмай дадил олға интилаётгани англашилади, анчайин ҳорғин нигоҳида, нафақат қатъият ва сурлик, самимият чўғи ҳам яққол чакнаб турарди, яъни митти жуссаси ҳатто яшин ҳам тешолмас қатқалоқ ердан битмас-йтмас куч-қувват, файрату шижаот ва қаноат сўриб олаётганди.

Нигоҳ узмай орзиқиб тикилгани сайин Туячумоли ботини ва зуҳурида пинхон оҳанрабо тобора ақлу ҳушини ўғирлайверди, сўнг шундоқ кўз ўнгида недир илоҳий ислоҳни кечирган ифодалар тирқираб сочилидди, яна бир олам ҳайратга чулғаниб, эрий-эрий улар сеҳри билан қовушди-ю, ёқимли мусиқий оҳанглар тарата бошлаган, ўзаро бир-бирига тобе ранглар замирауда исмисиз ранг бўлди, йўқ, елкасига баҳайбат қоя ортган ва олисдан-опис манзилни кўзлаб бораётган жимити жонивор ортидан эргашиш учун иштиёқманд жимити хилқатга эврилди...

Мерган ҳамон ёмби топган гадо каби қувонаётир, гоҳо мийифида сокин жилмаядида, сен гумроҳ ҳамон кимлигингни яхши билмайсан дея ғурданиб тилини қисади, ажабо, қайси куни Садаф чорбоги бўсағасида, бир неча китоб кўлтиқлаган барваста қоматли Қария ҳам шу хил таъна билан иззат-нафсини оғритган эмасмиди?!

Дунё ишлари қизиқ-да, баъзан девоналик асқатар экан, анча илгари беҳад сирли жараёнда Дўлана туғилгани бежиз эмас, мана энди тақдир тақозоси билан яна ҳақиқий мўъжиза рўй берди, қони қайнаб ва қанот боғлаб заминдан узилиш баробарида, шону шуҳрат, мартаба ва иқбол ваъда айлаган Семурғ оламидан узоқлашган, хаёлан уни чизган-у, амалда эса бутун фикри-зикри тошқин ҳақидаги марсия саналмиш туркумга даҳлдор Чумоли тарҳи билан боғланган ва бу ёғи маълум...

Туркумда алоҳида ўрни ҳамда мавқеи бўладиган Чумоли орқаси тутиб мўйқалам юритган, руҳи ва қалбини чирмаган мудроқни ҳайдаган инқилоб билан ҳисоблашиш учун журъат топган онлари меваси эканини ўйлаш нақадар мароқли туюларди, ахир, томирларида тасаллига муҳтоҷ улус назарига тушган кимсан Вали бахшидек сўз ва дўмбира ошиғи қони оқади, бир вақтлар у ҳам бадиҳа йўлида оғиздан кўпик сочганча ҳув-хувлаб жирлаган, бадани совуб осуда тортиб қолгач, қандай калима ва маънони дилидан ўтказиб нағмага солганини сира эслолмай елка қисарди...

## 20

Мехрибон худойим қўллагани рост бўлсин, Туячумоли беҳисоб нодир тошлар орасидан саралаб олинган ноёб гавҳар ва ҳатто туркум моҳиятига муносиб бетакрор хилқатга ўхшарди, яхлит қурилмаси ботини ва зуҳурида мужассам жозиба қирралари турли томондан турфа малоҳат касб этиб қўринади ва қўзни қувонтиради. Туячумоли қурилмасига алоқадор ажиб ҳолни теран тушунишга уринган онларда илҳом албатта руҳини мовий осмон кенглиги, тоглар салобати, боғу роғлар яшиллигига хос ажиб шукуҳ билан мусаффо этади, ногоҳ шунда Фунча сари ўғирилиб, ажиб титраниш түядида, қурилмани қўшимча нозик белгилар билан бойитишга киришади, натижада аччик оғриқ ва қийноқлар қўнгли иқлимини қоқ иккига айирган поёнсиз йўл бўйлаб олис кечмиш сари ёвуқ боришига кўмаклашади.

Шаффоғ қўклам ёмғири қўқартирган майса-ниҳоллар каби жонланган ифодалар қаърида дўмбира эшилиб инграйди, ин талашаётган каби сонсиз қушлар безовта чуғурлайди, шамол визиллатиб ҳуشتак чалади ва мотамсаро кунлар заминида етилган тошқин пишқиради, тизгини узилган ёлдор тўлқинлар шовқину сурони кучайгани сайин омонат устахона ҳалинчак каби тебраниб қисирлайди, гупиллаб қалампирмунчоқ ҳиди анқигач (қачондир иссиқ оғушда ушбу бўйдан ҳузур қилганча эркаланиб ухламасмиди?!), рўпарада Роҳила отин паришон қад ростлайди.

Охиатга улкан армон тоғини орқалаб кетган онаизори атиги бир зумгина дийдорлашиш ва юрагини тўкиш учун тоабад даҳлсиз ранглар чегарасини бузиб ўтгандек ту-юлади, не юмушга жазм этганини билмай, учига қалингина учбурчак тумор боғланган қировли соchlари, озғин баданига чиппа ёпишган одмиёна чит қўйлаги ҳўл эканига аҳамият бермай хўрсинади, мунг чўккан кўзлари барча нохуш ҳодисалар гирмон жоријаси Санам қишлоққа оралаган ва дилларга надомат уруғини қадай бошлаган онлардан юзага қалқиганини сўйлаб ғилтиллайди...

Роҳила отин ҳатто Вали бахшидек зотни йўлдан оздиришга уринган Санамни охирги нафасига қадар қарғаганди, тўлин ой ёритган ўша жазирама ёз оқшомида, ишком остидаги чорпояда жуфти ҳалолини мегажин қучогида кўриб сочини битталаб юлгани ва ёшига етмаган эмизиқли боласи билан аразлаб жўнагани ҳамон ёдида, ҳақиқат илдизи очилиб, падари афсун қурбони бўлгани аниқланган пайтда эса, ногаҳон диллардан сочилиган дўлу жалалар тошқинга эврилиб кўпиррган ва очопат ёлдор аждар мисол ёпирилган қишлоқ устига...

Қонсираб қутурган тошқин арафасида рўй берган можаро, нафақат Роҳила отин ва Вали бахши, ҳатто ўзини ҳам ниҳолдек букиб, ўсмир қалбини ларзага согланди, ўшанда қанчалар эзилганини эсласа, ногаҳон кўз ўнгида еру осмон чирпирак бўлиб, кўкси қайта-қайта увалади, сўнг ана шу ҳолат газагини Фунча мазмунига сингдириш учун қону зардоб ютади. Тангри ёрлақаб Фунча туғилган куни дафъатан руҳи юксалди ва бир умр белига қувват бўладиган юпанч туйди, химмати баланд Аполлон фаришталари уни йўргаклаб олгани дилидан кечгани сайин айрича орзиқарди, кейин билсанки, Фунча билан боғлиқ тасалли галдаги чегарасиз қийноқлар дебочаси экан, ҳаргиз мўйқаламига интиқ Ҳомила қошига борган лаҳзадаёқ, яна сезимлари тебраниб, аъзои баданини қалтироқ босди, нуқул хаёлида жар қирғодан аламзада лочин мисол куйига юзаётган Нафиса жонланарди.

Вақтдан ютиш ниятида энди ҳар сония жар тубида мўлтираб узилаётган Нафиса тасвири ёнида титраб-қақшаб ёш тўқади, шўрликни мудҳиш ният сари ундан изтироблар зарбини туйиш ва ифодалар замирига қўшиб юбориш учун интилгани сайин чорасиз қолиб бўғиларди, охири кўмак истаб ҳалиги китобга мурожаат қиладиган бўлди. Бошқа чораси йўқ: Нафиса бағрини ўйган дарду алам ҳамда уни йўлдан оздирган ака-укалар мақсади ва Санам ҳийлаларини ҳар тарафлама қиёмига етказиб тўқис шарҳ этишда ҳам Оҳима маҳшаринг била ҳам етти дўзахинг куяр сатри бўёқларини қўллаши лозим. Охири бемаврид ҳазон бўлган маъсума жон билан олис мозий оша келаси кунларга назар ташлай олган шоири аъзам нолаи афғони ўртасида мавжуд үйғунлик ишига унум ва сифат берди, энди Нафисани эслаганда, фақат ўксиниб бўзламай, иложи борича гулдек сўлиётган дамларда руҳсорини чулғаган сояни тасаввур қиларди, сўнг ўша сояни дилидан ўтказиб ва рангларга қўшиб матога кўчиради.

Энди кўнгли тўқ, негаки, Ҳомила анча тўлишиб қолди, ҳар бир ифодаси ёлғон ва қибр қадру қиммат ва ору номус кушандаси қабилидаги тушунчани бир қадар теран англатиб турарди, тун бўйи мижжа қоқмай шу тушунчани кенгайтириди, тонг отган паллада ҳам Нафиса нолаларини элас-элас эшитганча заҳмат чекаётганди. Остонада эса бирор асабий ғудраниб депсинди, бемаҳалда қайси гўрсўхта йўқлаётир, агар Санам бўлса иш расво, ахир, ярамагур тағин шаксиз пинжига сўйканиб Семурғ ғавғосини бошлайди, агар буюртмани тез кунда битириб коллекцияга тақдим этмаса, Носир Охун мўйқаламдан тоабад жудо айлаши, хону монини ёқиб юбориши ва Нуқра ғорига маҳкум этишини айтиб пўписа қилади, сўнг бепарда ва бетуз латифалар билан сувни лойқалатган Шодмон Чўтирий қаноти синган қарчигайга айлангани ҳақидаги узунқулоқ гапларни саржиндек қалаشتариб ташлайди...

Ҳомила хомакисидан узоклашмай аста ўғирилди-ю, ланг очиқ эшикдан мўралаган йилтироқ башараага назари тушиб, Санамни кўргандек аъзои бадани жимирилаб кетди, картина ботини ва зуҳурини эгаллаган ҳалиги тушунча дили ҳароратидан қанча кўп озиқланса шунча яхши эканини чамалагач, бемаврид ташриф буюрган бадавлат ва безбет меҳмонни хузуридан осонроқ ҳайдаб юбориш чорасини қидира бошлади.

Қутурган итлар талагур Семизвой бўқиб ичган одамдек ишшайиб ва чайқалиб бўйлади рўпарасида, мой босиб қисилган калта киприкли кўнғир кўзлари хиёл маъюсланиб умидвор жавдирашига қараганда, жиддий муддао ниҳон бўлса керак кўнглида, ҳаммасидан ҳам тўтидек сайраб бадига тегиши ва лофни қофга никоҳлаб юборишидан ўлардай кўрқади, ана холос, ростдан ҳам таҳмин қилгани бўлди, яна ўша маза-матрасиз эски ашулани варанглатиб айтишга киришди, тутуруқдан маҳрум даъвои достони бемалол томни босиб тушиши мумкин...

Ўшанда соғиниб ва зориқиб тилаган нарсасига етишолмаган завжай ҳалоли охирни хўнгиллаб йиғлай-йиғлай чала туғиби, натижада ғам-андуҳ ютавериб, аъмоли бадидан нолийвериб чўпдек озибди, кўча-кўйга чиқолмай боши эгилиб, жун арқонни совунлабди-да, ошхона шифтидаги қандил қозигига ўзини осишига сал қолибди, агар сув ичгиси келиб кириб қолмаса, шўрига шўрва тўкилар экан...

Барака топгур худо ёрлақаб яна юкли эмиш, фақат аввалгидай йўқ жойдан инжиқлиқ қилиб чарчатаётгани учун ташвишда, яъни дастлаб эгизак бузовлаган ола сиғир сутига бошқоронғи бўлибди, тушига тишлари синик энсиз суюк тароқ билан тўзиган соchlарини тараётган Санам кириб аҳволи ўзгарибди, ўшандан буён кўзига нуқул тим қора узун чопон кийган қассоб сўяётган ва бўғзидан тизиллаб қон отилаётган саман

тасвирланган картина кўринади, агар шунаقا асарни тезроқ бағрига босганча тўйиб-тўйиб ўпмаса ва мириқиб томоша қилмаса, юраги остида аста-аста қимирлабгина во-яга етаётган чўкиртагидан тагин айрилиши ва бир умрга бетоб бўлиб қолиши мумкин, бемаврид жудолик нақадар даҳшат эканини чуқурроқ ҳис этиб, инсофу диёнат юзасидан кўмагини дариф тутмасин...

Ора-чорада бурга ёки кана чақандай ягринини қитирлатиб қашлаётган Семизвой чамалаганидан кўра бешбаттар савдоириоқ экан, ахир, онаси маҳрига тушгандай на-мунча суюлиб кўз тикади бисотига, илгари Калхатга чанг солиб жонидан тўйғазувди, мана энди бало-қазодай Ҳулкарга ёпишиб тайёр куйдирги бўлаётир. Намак йўқ чоги лафзида, ахир, сиркаси сув кўтармас унақа дарди бедаво тантик ойимчани қайси гўрдан хасдек илаштирган, ҳадеб қошида ниҳолдек эгилавермай, жавобини берса олам гулистон эмасми, ҳозирги вақтда учраган дараҳт ёки ҳатто симёғоч тепилса дувиллаб бинойидек эпли-сепли ва сулув қизлар тўклилади, нима, чертиб-чертуб бирови-ни танлаши ва шартта қалбини пеша қилиши қийинми, тўй-пўй ташвишини айтмаса, никоҳ ўқитиш навдадан бир дона япроқ узгандек осон...

Худо кечирсин-у, ҳадеб ваҳима уясига олов қўявермай, Семизвой яна тушини сувга айтаверсин, на тошни эритгудек ўтинчи ва на даста-даста мўмай пули инобатга ўтади, пошингни бурдалайман деб, кўзлари пахтаси ситилиб ўқирса ҳам зигирча пинак бузмайди, нуқул ҳовлиқмай Калхат каби Ҳулкар ҳам туркум тизимида беҳад муҳим ҳалқа эканини пухта билиб қўйисин, арзимаган гап туфайли уни ажратиб сотгандан кўра, шартта кўксидан юрагини сугуриб беради.

Бариси тушунарлидир, энди тезроқ түёғингни шиқиллатиб қол, қайтиб эшигидан ҳаволаган бурнингни тиқма ва оғриган бошини баттар оғритма, сен гумроҳсиз ҳам бўғзигача ташвиш ва ғурбатга кўмилган, буни сен қаёдан ҳам тушунардинг, қачондан бери туркум айниқса суягини сил қилаётгани сабабига икки дунёда ҳам фаҳминг ет-майди, айрим каззоблар аллақачон унутган тошқин учун хос оғриқларга эътиборни қаратадиган Ғунча куни кеча ёруғ дунё билан юзлашгани туфайли терисига сиғмай қувонаётгани ёки жувонмарг кетган севгилиси Насиба қалб туғёнларини ифода этувчи Ҳомила ёнида куйиб-ёниб ўй сураётгани сен учун сариқ чақа бўлса керак...

Ичкари қулоғинг карлиги аниқ, шундай экан, Ҳомила ифодалари ботини ва зуҳурида ўша кезлар Нафиса дилида акс садо берган нидолар жаранглаб турганини қаёдан ҳам билардинг, ўша нидолар ҳатто бутун борлиқни қамраб бормоқда; жон таслим этаётган сонияларда Нафиса қакроқ лабларини аранг қимирлатиб айтган ал-видо ҳам бемалол эшитилади (бўйимда олиб юрганим Санам ёлғони деб неча марта беҳол инграган), гоҳо нафис чизмалар умидвор бўлиш хосияти улкан эканини шарҳлаб ҳайқирса, гоҳо умидсизлик жонга занг юқтиришидан огоҳ этиб оғир хўрсинади, гоҳо вафо иморатини парчалаб юбориш қасдида хиёнат мудом жами имконини сафарбар қилажаги хусусида алёр куйлайди...

Агар суръатни бўшаштирмай, имону ихлос, ёшлиқ ғайрату шижоати ва хотира-ларига суяниб, сабр-тоқат билан тер тўйса, Ҳомила ҳадемай битиши ва туркум са-фига қўшилиши шубҳасиз, фақат баъзан ялқовлиги тутиб, хуморга ихтиёрини бериб чалғиши, чўнтағида хемири йўқлиги боис, узоқ вақт тиши кирини сўриб феъли бузилиши ва ўзидан ўзи аразлаб кўнглига қил симмай қолиши чатоқ-да. Баъзан эса гийбат ва миш-миш қамалган афсунгар қутича каби беўхшов туюладиган телефон жигига тегади ва бекорчилик тегирмонига сув кўйиш учун мажбур этади. Искот қолгур бекор эсига тушди-ёв, дилидан кечган фикрларни сезгандай, асабий чириллаб қошига чорлади, ноилож гўшакка оғриниб кулоқ тутаркан, бинойидек кўрланиб турган иш белига теп-ган Аливой Салимни ичиди яхшилаб ёғлади, ахир, қаламинг сингур жийда-пийда ёки ёнғоқ-понғоқ тагидан ўтган чамаси, нуқул сахар билан тонг фарқига бормас даканг хўроздек бемаврид оромини бузадиган бўлди, устига устак, аввалгидек бирон асарини дилдан баҳолаб руҳлантириш, ийиб дастурхон ёзиш ва қийналганда чўнтағига беш-тўрт танга тиқиб қўйиш одати йўқолди, эндиликда меҳрини нисор қилиш ўрнига, иложи борича нуқул қуруқ сафсата сотади, йўқ ердаги сирпанчиқ таънаю маломатларни ёғдириб калласини ғовлатади, ҳатто дарё бўйига етаклай бориб суформай қайтариш ҳадисини эгаллагани ҳам эҳтимолдан холи эмас...

Мана ҳозир қайси бир ичаги эгри томорқасига тош отиб оромини бузган ва иззат-нафсига оғритгандай хуноб эканини яққол англали, қудук тубидан келаётгандек паст

овозда маликаи дилороми билан алал-оқибат эсон-омон қовушганини баён қиларкан, мийигида кулди ва ҳажиқизга ўхшаб минғирламай аниқрок сўйла деб жеркиди.

Дангали бундай: кечалари бўйнига чирмовуқдай чирмашиб ухлайдиган ёстиқдоши иккикат бўлибди, ҳомиласи бир ойлик пайтида ҳамма ёқни қоплаб ётган сариқ атиргул исига бошқоронғи экан, беш-олти кундан бери авзойи бўлакча, нуқул бўғзига пичноқ тортилган саман бедов тасвирланган Ҳулкар аталмиш картинани сўроқлайди, ўша савилга мириқиб тикилмаса, боласидан айрилиб, ўзи фалаж бўлиб тўшакка михланар эмиш, тангри ғазабига учрагур қайси бир ташмачи, ҳа-я, Санам орқали сен худди шунаقا асар яратганингни билибди, қизғанмай шуни арzonроқа сотгин, камига ўзинг ва етти пуштингни дуо қиламиз!..

Сўз майдони чавандози, тентаклик муборак бўлсин, ахир, нима жин чалдики, хотин қули Семизвой ошнангдан ҳам ўтказиб чўпчидинг, аммо ҳадеб ҳовлиқишинг бекор, зигирча фойда бермайди, ахир, Ҳулкар кўчада қолган уч пулга қиммат тўқим ёки супурги эмаски, учраган гумроҳга кулоқ қоқмай узатиб юбораверса, хуллас, ранжишини ҳатто хаёлга келтирмай, тошингни тер, пандавоқи!..

Гўшак садақа ўрнида берсанг ҳатто гадо қайрилиб қарамас ўша дардисар матоҳни тишинг кавагида асрарб ётганинг билан қўшалоқ шоҳинг чиқармиди маъносида оғир хўрсиниб тинчили, қалампир янглиғ аччиқ кесатиқни ҳазм қилолмай, анча муддат беҳолу безабон ўтириди, сўнг ҳардамхаёл тарзда имиллаб Ҳомила ёнига қайтди, астасекин кўзни қувнатар даражада етилиб қолган ҳомаки намоён этаётган ўтсса оламига тамом шўнғиган, ўша оламдаги армон тоғи кўнглига кўчган бўлса-да, баъзан телефонда кечган суҳбатни эслаб оғир хўрсиниб қўярди.

Аслида бир жиҳатдан кўнглида борини тўкиб боплади, бошқа ёқдан эса, неча марталаб оғир-енгилига яраган қадрдан дўсти дилини оғритгани сира ҳам ўхшамади (пули сандиқда мағорлаб ётган Семизвой йўриғи бўлак-да), кетини тузукроқ ўйламай, бетингда кўзинг борми демай гап юмалатди, агар чиндан ҳам ўша мусибат юз берса, келинчаги билан бирга, барча ёру биродарини қарғаб ўтса керак.

Қарғиш бир учи албатта келиб ўзига ҳам тегади, шуки ҳақиқат экан, туркум шакли ва мазмунида мувозанат бузилса-да, Ҳулкардан дадил воз кеча қолсин, туркумни бутун сақлаб шону шухрат ва давлат топгандан кўра, таҳлика ва хатар оғушида умид ришталари узилаётган эру хотинни қўллаб юборгани минг марта афзал, агар уларга атиги бир чимдим ёрдами тегса, улкан савоб остида қолади, муҳими, боқий ҳаёт зебу зийнати санаалмиш жозиба замирида холос этувчи қудрат яширин эканини амалда яққол исботлаган бўлади... .

Бошқа изоҳ ноўрин, бас, ҳозироқ рақам теради, йўқ, яхшиси эрталаб Ҳулкарни хонадони сари кўлтиқлаб боради-ю, атир-упа ҳидига тўла ётогига ўзи осиб қўяди, токи қорнидаги увоқдай гўдаги ноласини тинглаб, беарада дарду алам чекиб инграётган келинчак кўзлари қандай чарақлашини кўрсинг, нажот ва завқ бор экан-ку ёруғ дунёда дея, чехраси ёришиб айтган сўзларини эшитиб юпанч туйсин...

Ана сизга қойил-мақом ҳангома, ҳар қанча ҳовлиқиб ва ичи сидирилиб айбига иқрор бўлса-да, ясси бурни сабзидек қизарган ва лабига қистириувли сегаретни ўчиқ эканини сезмай сўраётган Аливой Салим юмалоқлаб ўралган Ҳулкар сари ҳатто қиё боқмади, дарҳол қиммат мебеллар билан жиҳозланган ҳашаматли меҳмонхонага етаклаб кирди-да, чакаги сира тинмай, иккита гулдор пиёлани ўтқир май билан тўлғазди...

Келинчак бир кеча тушида Санам билан күш учса қаноти, одам юрса оёғи куядиган яйдоқ чўлга улоқиб кетибди, уйғонгандан кейин бўғзидан тизиллаб қон отилаётган бедов тасвирини эсламай, тошойна олдида соchlарини ўйғанча узоқ йифлабиди, иштаҳаси муаттар бўйли жайдари олма тилаётгани ва у факат Садаф чорбоғида ўсишини тусмоллаб айтибди. Ўтинчи бажарилгандан кейин бирдан ўзгарибди, ҳар кун ўша олмадан истаганча тўйиб ейдиган, кечаю кундуз фарқига бормай хотиржам ва осуда ухлайдиган, очила-социла хандон ташлаб куладиган, ҳар қанақа оғир ёки енгил юмушни зумда уddeлаб завқу шавқ тудиган ва тилидан бол томадиган бўлибди.

Фақат илож қанча, хуштаъм нақшин олмани иштаҳа билан чайнаётган маҳалда мўлтираётган кўзларига зимзиё чукурда бир-бирини ғажиб наъра тортаётган ва сувлайиб ётган маҳлуқлар, ёз офтоби тигида тандирдек қизиган поёнсиз дашту далалар, дўмпайган мўъжаз қабр узра бўй чўзган мурғак ниҳол ва кўк сари юксалган баҳайбат дараҳт кўринади, ҳар ҳолда буниси жуда ҳам кўрқинчли эмас, кун сайин ўсаётган ва эрта бир олам қувонч баҳш этадиган гўдагига зарар етмаса кифоя-да...

Ора-чорада телефонда гаплашаётган келинчак овози эшитилиб қоладиган меҳмонхонада кечган қисқа сұхбат чоғида анча таскин топди, омади чопиб фарзанд кутаётган Аливой Салимга қайта-қайта омад тилади, хайрлашиб күчага чиққандан кейин эса, ногоҳ ҳалиги түшни эслади-ю, бирваракай гүё ичида ўнлаб кирпи думалади, тишларини зиреклаб ингреганча мушт ўқталды номард тақдирға. Анчадан бери ўша ғалати тушлар изидан келгандыр турли ғаройиб ҳодисалар орасида ўртана-ўртана қисиниб юрганини кимга айтсина, тушуниш маҳол сирни бир умр юраги тўрида сақлаб қабрга олиб кетса керак, муҳими, ўша ҳангома ва воқеалар замирида пинҳон жавҳар сеҳрида қандай ҳикмат ва ғұrbat жамлиги қоронғи, ҳарчанд бош қотириб ўйласа ҳам бу борада бирор тайнинли ху-лосага келгандыр эмас. Ҳозир эса хаёlinи нуқул келинчак банд қиласытири, нима учун у олмага бошқоронғи бүлгани дилидан кечган ҳамоно қулогига дилни ўртаб юборувчи ёқимли күлгү чалинди, сўнг олдини товусдай хиромон йўргалаб ва ҳавоий бўсалар ҳада этиб Санам кесиб ўтди, зулукдай қошларини ўйнатиб қайгадир чорлаётган малак қўлида тишлари синик сүяқ тароқ ялт этиб товланди ва туйкүс Семизвой ҳикоясини эслади.

Санам қия қараш қилиб ва тўзғалоқ соchlарини тарай-тарай атрофида ўралашаркан, шамол ҳайдаб келгандыр кулранг булутлар ним татир исларга ғарқ шаҳарга соя ташлади, гирд теварагида деразаларига панжара тутилган ўйлар бўйлаган сайилгоҳ шовқин-суронга тўлиб бораради, ўрталиқда баланд дор қурилган бўлиб, тахминан ўттизни қоралаган чайир йигит томоша кўрсатиб олқиши оларди, кўзлари боғланган бўлса-да, белига ўралган сондек йўғон чипор илонга нимадир деб пичирлайди-ю, қилич дамидан қолишимас сим арқонда ғизиллаб нари-берига бориб келади. Ёруғ дунёни кўрмаган ҳолда тигдай арқон узра олмахондек бемалол адашмай зипиллаб йўргалаш нақадар қийин ва қалтис, кўзи очиқ ва филдек бақувват қанча-қанча одам ҳатто кенг ва равон йўлда ҳам эплаб юриши душвор<sup>3</sup> экани назарда тутилса, дорбоз масъулияти нималиги яққолпроқ сезилади. Аммо ҳаётда ундан бир неча чандон машаққатли ҳунару касб мўл, фақат улар билан ошна тутиниш керак. Баъзан дўппуни ерга ола қўйиб ўйласанг юрак ўйноқлар, ахир, ранглар оламида муқаррар сеҳрга ипсиз боғланиб тинимиз бел ва мия оғритиш, ўша оламдаги не-не зотлар назаридан четда қолган хазинани юрак ютиб қидириш ва топилган ҳар неки дур ёки гавҳарни яхшилик йўлига хизмат қилдириш учун мўйқалам юритиш осон эканми?

Анчайин оғир савол – тўғрими, жавобига киришмоқдан олдин Мона Лиза исмлик оғатижон сулувнинг ҳаёт ва хусусан меҳвари олам нафосатга суюнгани туфайли боқий ва мукаррам эканига нозик ишоралар берувчи афсунгарона табассумини машҳур айлаган Жоконда муаллифи<sup>4</sup> чеккан дарду ситамнинг жилла курса миллиондан бирини ҳис этишга уринмоқ лозим, Жоконда бўёқлар дунёни маърифатга ундовчи ва қалбни адолат кўёшига ошна этувчи қудратли омил эканини тарғиб ва ташвиқ қилувчи илоҳий мўъжизалар орасида энг сараси бўлиб, жаҳолат охир-оқибат эзгулик қошида муқаррар равишда тиз чўкишига яққол ишонтиради...

Ҳеч шубҳасиз бу ҳақиқат, қанча-қанча оқиллар қаторида, Винсент Ван Гог қалбига ҳам чукур ўрнашган, хўш, шундай экан, нечун унга Комрон Вали бутун вужуди билан ихлос қўймасин ва унга ўхшаб изтироб рассоми бўлиш учун фақат изтироб қўйнида қолиши керак, шу тоифа рассом күшдан олдин инни чизади, нозик дид талаб этиладиган бу ишни жону дили билан бажаради, сўнг севикислиси күшни ноумид бўлмай зориқиб ва бетоқат кутади-да, жозиба ва ҳайрат, жасорат ва соддалик, кувонч ва эҳтиросдан чимдим-чимдим сингиган барглару майсалар зумрадлиги, шабада салқинлиги ва қуёш чанглари акс этган тасвирни боғу роғлар, ўрмон ва чанглзорлар қўйнига осиб қўяди, агар жуда узоқ соғинтириб қайтган қуш расмни орзиқиб кузатмаса ва бутун вужуди билан баралла сайраб юбормаса, бариси ҳайҳотки бекор, агар шодланиб маству масрур хониш қилиб чарх урса борми, ҳақиқий байрам бошланур ва атиги бир дона патга айланган рассом истаган томонига учishi мумкин<sup>5</sup> бемалол ва эринмай...

Аввалию охири йўқ мулоҳазалар билан овора бўлиб қайси маконга қадам қўйганини аниқ билмасди, шаҳар четроғида жойлашган кўриқхона заминида тентираб

<sup>3</sup> Абдулла Орипов.

<sup>4</sup> Леонардо да Винчи (1452-1519).

<sup>5</sup> Жак Превер (1900-1964).

юрганини бехосдан ёнида пайдо бўлган ва ҳамон тўзғалоқ соchlарини тараётган Санаам эслатди. Зил-замбиль жимликни баъзан ўкирик ва хирқирашлар бузид туради, бир пайт зарур юмуш билан ичкарироққа кетиб ҳаяялаган ҳодиманинг шийпон айвонидаги беланчакка белаб кўйилган гўдаги бигиллаб йиғлай бошлади, интиқлиқ ва очлик боис бужмайиб қолган болани бошқа аёллар овутишга уринишарди, аммо қанини эплашса, курмагур баттар бўғилиб чирилларди, овқат улашувчи гумашта томонидан тасодифан эшиги ёпилмаган темир қафасни ими-жимида тарк этган урғочи шимпанзе тулупдек таранг эмчаги учини оғзига соглан ҳамоно тинчиди ухлаб қолди.

Чақалоқ ёнида гажак думини ликиллатиб ўйнататётган шимпанзе кўзлари тарататётган сиёҳи ёлқинни ҳис этиб юраги увишди, ҳоли-руҳини сезгандек ишшайган махлук эса дараҳт ва симёғоч орқали томга чиқди, тутун қувури ва антенналарга сакраб овунди, топган эрмаги охири бадига уриб, тунука тарнов орқали осилиб кўчага тушди ва нариги тарафда алоҳида савлат тўкиб турган уйга мўрлади.

Четдан барисини қизиқиб кузатаётган Комрон Вали таажжуб ичра тим қора пайваста қошларини чимиради, тавба, қочоқ шимпанзе қадам ранжида қилишини билгандай ҳеч ким пинак бузмаганди, кутилмаган меҳмон эса парраклаб кесилган қазидан газак қилаётган тепакалди киши тиззасига кўниб тилини осилтирди, сўнг пиёладаги ўткир майдан бир қултум ҳўплагач, кимдир узатган қорамтири дастали устара билан тақир курсида қунишиб писта чақаётган, лаби четидаги сўғали лип-лип учайтган хушрой жувон соchlарини қиртишлаб ташлади.

Шимпанзе устарани айлантириб кўра бошлаган маҳалда кўчага бошқа уйлардан вағир-вуғир кўтариб бошлари тап-тақир турли ёшдаги қарийб бир хил кийинган хотин-халаж ёпирилди, сўнг улар чувиллашиб, ҳамон ҳайратга ғарқ Комрон Валини ҳалқага олишиб, ишқий эҳтирослар қули бўлган дил аслида хур эканини тасдиқ этувчи ўйноқи алёр куйлашди, хиёл дағал ва майнин оҳанглар кўксида акс садо берарди. Юзлари тўйин ойни уялтиргудек беғубор, қошлари камон аёллар (ҳар бири бир Санам эмасмикин?) ҳазилу пичинг ва гийбатни қийиб кўйишаркан, демак, шундоқ ҳам оғриган бошига бирон маломат ёки ғурбат орттиримай тезроқ қочиши керак. Аммо ултурмади, кўлига бир даста сариқ атиргул тутқазган жононлар қиқирлаб кула-кула ва алёрни баланд пардада айтиб қайгадир судрашди, сўнг нималар кечгани ёдида йўқ, кўзларини очган пайтда санъат музеи рўпарасида туарди, ҳайтовур ғашлиги ва қўрқуви бир оз тарқаганди, ҳорғин руҳи эса караҳт жисмини қўш табақали бағдодий эшиқдан аранг кўтариб кирди.

Саройдан қолишимас ёп-ёруғ кенг зал бозор кўчиб келган каби шовқин-суронга кўмилганди, бир-бирини тутиб-суртиб ўтаётган қасларга тикилгани сайин диққати ошарди, ҳатто кетмоқ истагида аста ортига бурилди, гирди ҳошиядор маҳсус таҳтадаги Азлар Ниёз автопортрети эътиборини тортиди-ю, терчилаган бетига истеҳзоли табасум югуриб тўхтади; таҳта қуириғида пориллаб айланаётган нурли ёзувлар матбуоту радиода қайта-қайта чайналган таржимаи ҳол ҳамда таҳсинга сазовор ижодий излашишу кашфиётлар хусусида муфассал аҳборот бериб порларди, бурчакни эгаллаган муғаний ва хонандалар ҳеч нарсага парво қилмай ижро этаётган қичиғи авж куй ва кўшиқлар эҳтиросларни жўштириб юборишига мойил...

Ҳозир шубҳасиз қийиқ кўзларини ишвали сузиди ва фунча лабларини илтифот билан буриб Санам соллона-соллона қаршилайди, ярамагур у енгидан кириб бунисидан чиқади-да, дарҳол Семурғдан гап очади, жавоби дудмал бўлгани сабабли сухбатга Но-сир Охун аралашади ва заҳаролуд сафсалалари билан бутунлай қонига ташна қилади, ишқилиб таъзирини яхшилаб ейиш учун ҳозирну нозир турсин, аммо вақт аллақачон тушлиқдан ошгани ва маросим чўғи совуб бораётганига қарамай улар дому дараксиз, сабаби эса қоронғи, айрим бесабр кимсалар суриштира бошлагач, чилл-чилл шоколад шимиётган Тарвуз домла тумовлаб қолишгани, ланг ўпкалари ва бошқа турли аъзоларига асорат бергани сабабли қули енгил ҳакимлар қарамоғида даволаниш учун шифохонада ётишганини эълон қилди, сўнг четга ўгирилиб синиқ кулди, лаб-лунжига кўра, атиги бирон шингил гапига ҳатто ўзи ҳам ишонмасди, ён-верига ўғринча аланглагач, лоппилик билан асосий масалага кўчди, ногоҳ шунда авзойидан ичиди аллатовур титроқ борлиги ва ниманидир яшираётгани сезилди, барибир бўш келмай, мухлислар назарига тушган Азлар Ниёз хусусий кўргазмаси эски услубларни инкор этиш ва янгича йўналишга асос солиш йўлида чекилган қийноқлар самараси эканини изоҳлай кетди.

Ростдан ҳам кўргазма бедор ва бегараз қалбда ботиний тарзда мунтазам амалга ошадиган испоҳлар андозаси ҳисобланур, тез орада санъат оламида тўла амал қиласидан мазкур йўналиш қиммати баҳту омад қуши шакли ва табиатини ғоят гўзал талқин қилувчи бетакрор картиналар жамлаган сеҳр қудрати билан ўлчанади, муҳими, эрта улар янада шуҳрат топади ва Носир Охун тасарруфида тобора бойиб бораётган хусусий ҳазинани тўлдиражак, барча ижод аҳлига мудом шундай доврукли ютуқлар буюришини тилаб, гулдирос қарсак сўраймиз, таъби нозик азиз меҳмонлар!..

Совундек кўпираётган лутфи эҳсонлар салмоғи остида забардаст бино майишиб қолгандек туюлди, ёру биродари даврасида Азлар Ниёз эса қилт этмай кўкрак кериб турарди, чечанлик бобида барчани бир чўкишда қочирган Тарвуз домла астагина қўлини ўпгач, камтарга камолу манманга завол мақоли шиори эканини ошкор этишни тилади чоғи, факир санъат аталмиш муборак даргоҳ эшигини супурувчи ва ўрнида уни дахлизиз асраш учун жон фидо қилишга тайёр хизматкор холос маъносида хиёл эгилди...

Фақат инсоғ қилиб озгина уялса яхшимиди, ахир, зўр бериб жавоҳирга қиёсланиб кўкларга кўтарилаётган асарлари орасида пичоққа илинадигани борлиги гумон-да, чор тарафида заррин ва пушти ленталар ҳилпираб турган бошловчи маҳсус бўлимни кузатар экан, тахмини ҳақиқатга айланди, мазкур бўлимда нукул хом-хатала ва қўл учиди чизилган сариқ атиргул чаманзорлари санчиларди қўзларига...

Алоҳида нафис безакларга ўралган ўрта бўлимга рўпара бўлган ҳамоно ақлу идрокини бир кеча бутун вужудини алғов-далғов айлаган алоғ-чалғоғ туш ваҳимаси билан йўғрилган ола-була ҳарир парда чулғади, парда орти чегарасиз бўшлиққа ўхшарди ва унга шифил-шиғил мева соглан якка дарахт салобатини ғира-шира намоён этадиган қоралама тахлит ўндан зиёд асар ғарифона тус берганди.

Кўпчилик руҳий инқилоб манзараларини нозик талқин айлаган силсила сифатида юқори баҳо бераётган ва маҳлиё бўлиб тикилаётган якунловчи бўлим қошига юрак ҳовучлаб борди, суратларни назардан ўтказар экан, бетига ногоҳ муздек ҳаво урилгандек туюлди, худо шоҳидки, ўзаро бир-бирига бегона ранглар уфқ гардиши оша олтин тусли шуъла сочаётган улкан сариқ атиргул сари парвоз этаётган Қора тулпор шиддатини акс эттириш учун бехуда уринганди, бунинг устига, икки ёнидан қордек оппоқ қанот ўсиб чиқкан хилқат қўйнида ачомлашиб ўтирган ва алланарса хусусида ширин хаёл сураётган Носир Охун билан Санамни ва шалпанг кулоғидан тили узун Тарғилни таниш маҳол...

Тўрдаги гирдлари зарҳал ҳошияли, оёқларига сариқ атиргул чамбарак қилиб чирмалган панно нақадар салобатли ва кўркам экан, панно қарийб шифт баробар бўлиб, жуда юқсан вазифани адо этаётганини сезиб шодланаётган тирик жонзотга ўхшарди, эни ва бўйини қоплаган ёлғиз картина эса уни янада улуғвор қилиб кўрсатаётганди, картина шаклу шамойилида акс этган мантиқ дарҳол хуш-ҳаёlinи ўғирлади.

Наҳот кўзлари алдаётir, ахир, паннодаги картина қайси куни сирли йўсинда туғилган ва сароб янглиғ беиз йўқолиб ҳайратига ҳайрат кўшган Семурғдан кўчирилган оддий нусха эмасми, шаклан ва мазмунан қарийб ўша асар тақорори эканлиги шубҳасиз, фақат санъат тамоийллари тақозо этадиган сифат бобида кескин оқсанарди, шу жиҳатдан бениҳоя ғариф бўлиб, ифодаларида мафтун этувчи латофат қуввати етишмасди, ботини ва зухури яхлит шиддатдан маҳрум улкан афсонавий қуш, кучли бўронга дош беролмай қулаган, чирпирак бўлиб қояга урилган ва тирқираб сочилган қари дарахт бўлакларига ўхшаб қолганди.

Панно ёнидан аста жилар экан, қандайдир бўёқ тўла ҳовуз тубига тортиб кетаётгандек бўғиларди, наҳот Афродита ҳайкалчаси тақдирни шу кўргазма орқали ҳал бўлади, бошқалар қатори Тарвуз домла кўра-била увада латтадан чопон бичгани кимга фойдаю кимга зарар, ҳозир жамоа ўртасида юрагида борини тўқади, токи барча шолидан курмакни фарқлаш мавриди келганини англасин...

Ўзидан адашган издиҳом дардини тингларми, мабодо тингласа бирон нарса англарми, ҳайтовур унақа шоввоз топилиши гумон, кўпдан бери думчаси сувлаб, Носир Охун ва Санам назарига тушмоқ арши аъло мөхрини қозониш билан тенглигига шубҳа қилмай қўйган Азлар Ниёз маслаҳатини зигирча назарга илмайди, баччағар ўзидан айб излаши, яхши-ёмонини тарозига қўйиши ўлимдан қийин, керак бўлса камина маҳорат

жабхасида беҳзоду рафаэллар белини синдиридим дейишдан ҳам тоймайди, шундай экан, унга жағ оғритиб сўйлашдан кўра, деворга танбур чертишни афзал билиб, мўйловни бурай-бурай жўнаворсинг...

Асаби тараг тортлиб, қўшга қўшилган ҳўкиздек чарчади, маймоқ диванда эрта пешингача тарракдай қотиб ухласа керак, туркум ва Ҳомиладан узоқлашгани учун афсулсланиб ёстиққа бош қўйганда тун яримлаганди, сабрни мўйқаламга никоҳлаб беришим лозим деган ўйда илжайди ва оғирлашиб қолган киприкларини аста юмди, уйқусида ҳам ичида кирпи ағнаётганини сезиб ётарди, ором бутунлай бағрига тортуб улгурмай, ногоҳ гулдурук янгради ва ҳовлиқиб отила турди, машъала ёқилган каби ёришган ва тўлқин кифтидаги қайиқдек оҳиста тебранаётган устахона оҳу воҳ, йиғисигига тўлди-да, ноилож кафтлари билан қулоқларини аста ёпди, сўнг тасаввурида Қария жонланиб истеҳзоли кулимсиради, аслида ўша мўйсафири таънаю дашномида бир оз оғир ботадиган маҳобат мавжуд, ҳарқалай ўзига унча бегона эмас-да, бору йўғи ва ҳатто кўнглидан озгина воқиғ, йўқса мўйқалам, бўёқ ва дастгоҳ ёнида қолиш имконини аллақачон йўқотарди, демак, ҳадеб руҳини чўқтирмай, туркум муаммосини ҳал этиш чорасини қидириш орқали ўзи сари дадил интилавергани маъкул, кечаю кундуз бутун ҳуш-фикрини Ҳомила иҳтиёрига беришдан бошқа манфаати бўлмаслиги, шоири аъзам ва Нафиса нолай зори ичра нафас олиш баробарида қайта-қайта кечмиш билан учрашмоғи лозим.

Аҳду қарорини пишитгани сайин *Оҳума маҳшаринг* била ҳам етти дўзахинг куяр сатри мунтазам дилида акс садо беради ва ўша сатр заминида жам ҳикматлар ногоҳ ҳовуч-ҳовуч олов бўлиб сочилади, аста-секин олов тўқ алвон ва оч қирмизи бўёққа эврилиб, қиёмига етиб қолган Фунча қурилмасига кўча бошлайди. Ажиб жараён не-дир түғёну изтироблар билан кўшилиб гоҳ жадал, гоҳ осуда кечарди, тахминича, Фунча Апаллон фаришталари томонидан йўргаклаб олинишига қисқа муддат қолганди, тиним билмагани сабабли охири бу оқшом ўлардай тинкан мадори қуриб, оз-моз куч йиғиш истагида маймоқ диванга чўзилди, ёстиқ ёғочдек қаттиқ туюлса-да, оғзини капа-каппа очиб ҳомуза тортди-ю, ҳадемай тарракдай қотди...

Фақат тушуниш маҳол, тўшакда жимгина роҳатланиб ётармиди ёки ҳар бир қаричини рутубат, тўзон ва сароб чулғаган, бағрида нима пинҳон экани номаълум сергулув оламда санқиб юрармиди, симиллаб оғриётган юраги йўлдасан деб шивирлади, мундоқ қарасаки, теграсида қўёш улкан тилла баркаш каби ланғиллаб порлаётир, олисда бир-бирини суюб бўйлаган ва қордан салла ўраган чўққилар булутлар чодирига ўралиб мудрайди, тизгини узилган бебош шамол ҳезланиб дуч келган нарса билан ўйнашади ва тупроғи кўпчиган тик энишда думалаб-сумалаб чопаётган маҳлуқлар кўринади.

Баданини оқимтириш ва кўкиш жун қоплаган, йўғон бўйинни баргсимон зумрад шода безаган капакалла бақувват ит (исми Дўлвор бўлсин) кўпроқ эътиборини тортди, бўрибосарлар авлодидан бўлган сўйлоқ тишли важоҳати бузук Дўлвор чўпдек ориқлаган ва тили осилиб зўрга ҳансираётган Тарғилни тириқтириб қувалаб келарди, ҳолдан тойган Тарғил охири метин тахлит қаттиқ панжалар исканжасида типирчилаб жон бергандан кейин юраги кўксини ёриб чиқар даражада ўйноклаб уйғонди, ханжар тахлит ўткир тирноқлар ўз бўзига ҳам ботгандек дағ-дағ қалтираб ўтириди маймоқ диван четида...

Ҳар бир тафсилоти хавотирли айқаш-уйқаш ғалати туш бот-бот хаёлида жонланиб оромини бузарди, кўзларига кекирдаги узиб ташланган, қияликда жон узоммай ғингшиётган Тарғил кўрингандан айниқса ваҳимага тушади ва қўли ишга бормай ўқсинади, кейинча ўша туш яна тақрорланиб, бутунлай уйқусидан адашди, ишқилиб восвос бўлиб қолмасайди. Негадир устахона чор тарафдан қисиб келаётир, охири нафаси қисиб, Зарбанд тоғ тизмалари манзараси ва ҳавосини қўмсади, ҳозироқ ёшлиги кечган ва тошқин излари қолган ўша томонларга бадар кетади, Долқоя дарасидан оҳудек тошдан тошга сақраб тушадиган, шаҳарга яқинлашгани сайин ювош тортадиган сой кўпригига қадам босгандга ҳадемай кечмиши кутиб оладигандек орзиқарди, сой ёқалаб озгина юргандан кейин рўпарасида саъваю какку ва бошқа хил қушлар инлаган, кўхна дунё омонат эканидан огоҳ этаётган чолдевор кўндаланг бўлди, ажриқ ва ғумай қоплаган урим-бурим соҳилда бир гала йилқи майса чимдийди, шабада авайлаб супураётган ола-байдоқ яйловда чўпону чўлиқлар яшайдиган чайла ва ўтовлар қад ростла-

ганди, атрофда гавропўши титилган бўм-бўш бешик, чириган эгару жабдуқ, занглаған турфа аспаҳа ва идишлар қалашиб ётарди, бир туда қитмир майна чуғурлашганча шўр тупроқ ялаб мўъраётган бўғоз сигир белидаги чипқон тахлит қизғимтири шиши навбати билан чўқилаб қочиб қолади, юмонрез безовта чийиллади қайси бир кавакда...

Ўркачсимон қири адирлар ортида мулойим алла янгради, хиёл эзгин ва қувноқ тарона борлиқ узра таралар экан, ёмғири сел ўйдим-чукур қилиб юборган торгина тошлоқ кўча бўйлаб қадди дол икки қария ва бетларини темиратки босган икки озғин ўсмир йигит алвон чит ўралган зил-замбил тобут кўтариб ўтаверди.

Ногоҳ ён томонда бировлар маастона қийқириб кулди, бировлар ўпкасини босолмай эркакча сўқинди ва хаёли пардек тўзгиди, сўнг қадду қоматлари дол ва ранг-рўйлари чуйкалган тобуткашларга ёрдам беришни истаб, оёғини қўлига олиб юргуди, бироқ ҳарчанд шошилса ҳам улар йўлиқмай, ноилож шовқин келган томонга бурилди. Болалиги кечган ва тошқин рўй берган жойларни жони оғзига тиқилгудек ҳолда олазарак кузатарди, тоғу тошлардан Вали баҳши суйиб жирлайдиган терма оҳанглари, Роҳила отин тўйларда қувнаб айтадиган лапарлар, кифти ер искамаган полвонлар ҳайқириги ва кўлқарида улоқни илиб кетган бедовлар кишинаши сизиб чиқаётганга ўхшарди.

Долқоя дараси этагида димогини чўғда жизиллаб пишаётган зираворли ка-боб иси қитиқлади, бир тарафи чўққига туаш зарангзору олчазорда йигирма ҷоғли киши аллақайда элас-элас янграётган чилдирма нағмасига мослаб шоҳ ташлаётганди, ўртада эса ним пушти ва оч қирмизи ҳарир либосга ўралган Санам муқом билан ўйргалайди, энди у ўн етти ёшли барно келинчак мисол дуркун бўлиб, хусни ҳар қандай хурилиқо дилдорни уялтирас даражада янада тиниқ тортибиди.

Санам кўш чўққидек бўртиқ маммаларини атай диркиллатиб, ним қизил дудоқлари болу шираси мўл-кўл эканини нозик имолар билан уқтириб, баҳор чечаклари жамолига мафтун капалақдай қанот қоқади, сўнг ҳар ким соchlарим сиртмогида бўғилиб ўлишга ишқибоз маъносида майнин жилмайиб, булоқдай қайновчи дароз шишани намойиш этади, сархуш жазманлар қадаҳларга ёпишиб пойида тиззалайди-ю, тоабад муҳаббатинг шаробига ташнаи зормиз қабилида баравар хитоб қилишади ва муруватини дариф тутмасликни ўтиниб сўрашади.

Ғамзаю таманноси тобора сирли ва магуруона тус олаётган Санам нукул бепарво жилмайиб жавоб қайтарарди, охири ёрилган кафтларини кўқрагига босганча хўрсиниб ёлвора бошлаган, анчайин келишган рафторида макру ҳийлага мойил ху-шомад сояси акс этган бўйчан эркакни, ажин тилимлаган ясси пешонасини юмшоқ-юмшоқ силайди-да, билагидан ушлаб кўкни болиш қилган чўққилар томон етаклайди. Оби-ҳаёт оқадиган дарёда чўмилгандай янада ёшариб кўркам тортган Санам ортидан жимгина эргашган баҳтиёр ошиқни танимади, майли, барисини кейинроқ билиб олар, ҳозир аҳволи руҳиаси нақадар забун ва абгор, илгари босгани сайин кўксидаги чегарасиз аламу армон кўзғалиб, юраги кўқсини ёргудек безовта потирлаб тепаётир, ахир, қадамда орзу-умидлари билан бирга ҳазон бўлган ўнлаб орқадоши қора тупроқ кучиб ётурс ва улар хокини босиб ўтаётгани учун гуноҳкор-да...

Қачондир Вали баҳши жаннат билан дўзах ўртасида иблислар қазиб қўйган чоҳи қаттолга тенглаштирган Нуқра ғори кўзга ташланди ва кўкси бир оғир қалқиди, ҳайҳот, аслида ёруғ дунё тубсиз зулматдан иборат эканига ишора бериб ётадиган ғор тошқин каби кимлар ёстигини қуритмади, ҳатто бир қизиқ важга биноан, аникроғи, Ишва картинаси чизилгани муносабати билан у ўзини ҳам ямламай ютишига бир баҳя қолганди. Қодир эгам амрими, замона зайлар ёки бошқа сабаби борми, отинг ўчгур ҳамон тўйган эмас, аксинча, иштаҳаси янада карнай экани хусусида совуқ овозалар ўрмалаб юради. Айни дамларда ҳам қарғишига учраб шўри қисган қанча-қанча кимсани бағрида хамирдек ийлаётгани шубҳасиз, чарх оёқ ости айлаган тақдирлар зимзиё йўлакларида кесишиб гумдон бўлиши айниқса ҳайратга молик...

Бир амаллаб ғорни четлаб ўтиши керак, аммо ногаҳон руҳига ғубору тўзон ва саробсимон соя илашиб, аллатовур куч жисмини қуюндеқ ўраб-чирмаб ичкарига судрай кетди, қадамда учраб турадиган кавакдан ваҳима мўралаётгани боис ҳадемай ўтакаси ёрилиб ўлса керак, кўп афсус, наҳот лоши тоабад шу ерда қолади. Аслида, токчаларда ўрнатиб қўйилган жинчироқлар ғира-шира ёритган аломат гўшада, тешигу тирқишилардан шовурсиз ўрмалаб чиқадиган арвоҳлару кўланкалар куршовида, минг азобда жон таслим айлашдан кўра, аллақачон тирик мурдага эврилган Тўра Охун билан

лан юзлашиш күпроқ оғир ва қўрқинчли туюлаётир, ахир, шунчаки арзи ҳол қилгани ёхуд жилла қурса бирров бетига қайрилиб қарагани журъат савилни қаёқдан топади.

Энди бу ёғи худойимга таваккал, фақат очофат ҳашаротлар эт-пети тугур суюклариға қадар кемириб қўйгандек, олажуз қавмини неча марталаб надомат кўчаси бўйлаб эмаклатган ва охири укаси Носир Охун берган чил туфайли бели синган банда кўринмади. Кўп юраги жигилламай илгари босиб, зингил солиб қарасин-чи, қировлаган сочу соқоли ғовлаб, бурни қарғанини тахлит сўпрайган шир яланғоч манови кимса Тўра Охун бўлиши мумкин, йўқ, кўзлари қароқиб қолгандек янгишибди, ноилож ортига қайтади, лекин бутунлай уни учган бу киши ҳам таниш шекилли, илгари кўрганга ўхшайди, ана халосу пишди голос, наҳот юлдузни бенарвон уриш, ҳатто ер киндигини сугуриб олишга қодир Носир Охун қошида эсанкираб турибди, тунов куни у Азлар Ниёз ташкил этган кўргазмада иштирок этмагани, Тарвуз домла тортинмай ёлғонни сувдек ичгани сабаби энди ойдинлашди, ёпирай, қачон бошига кулфат тушди-ю, қачон кела қолди қаттол гўшага?!

Пўпанагу чирмовуқ босган ўйдим-чукур намчил шифтдаги тош қозиққа оёқларидан осилган Носир Охун одам фарзанди экани ва баланд охурлардан ем еб юрганини унтуганди, мундоғ сал қимирилаш ва сўйлаш тугур, ҳатто инграниб қўйишга ҳам мадори етмасди, буришик рафтори ва ҳорғин нигоҳида изғиётган афсус сояси аста-секин учади, занглаган оғир кишан исканжасида шилинган тўпиқлари, қамчи зарбидан пуфаклаб ииринглаган елкаси ва кўксидан хиёл йилтираб сизаётган қон баргисиз бутага ола-була арқондай чирмашган кобра оғзига читирлаб томади ва алвон тусли доналар тезлашгани сайин у шишина боради...

Жуволдиз тешигидек кўзлари яшил аланга сочиб жилдираётган газанда дафъатан вишиллаб бетига чанг соладигандай илкис тисарилди, турфа қўланса исларга қоришган бўғиқ ҳаво ўпкасига қипиқдек ёпишарди, охири асосий йирик ҳужра бир неча хонага ажралиб ақли шошди-ю, ҳар бири дўзах бўсағаси билан уланишига шубҳаланмай ташқарига отилди.

Хабар бер, худойим, бутун бошли қишлоқни бир қанча қишу адир, боғу роғга қўшиб ҳаворлаб ташлаган баджаҳл ва очофат тошқин Нуқра ғори билан жарликни нечун кўмиб юбормади экан, айни шу ғаройиб сиру синоат тоабад қулфу қалит бўлиб қолса ажаб эмас.

Пастлаб сузаётган рутубат айрича тус берган жарлик тубига тикилиб бу фикр ҳақ эканига яна имон ўғирди, сўнг ҳар бир қарич ер, каттаю кичик қоялар, чирмашиб ўсан имирға буталар ва улкан дараҳтлардан кўкка тинмай ўрлаётган оху фифонлар чалинди кулогига, аслида улар қорнида типирчилаб беун нажот тилаган гўдагига ачиниб куйган, Санам кўндаланг айлаган тикан товони қолиб сийнасига ботганини ниҳоят англаған Нафиса нидолари эмасми?!

Тепасида сон-саноқсиз күшлар безовта чағ-чағлашиб учайётган жарлик томон яна бир марта тикилар экан, тасаввурнида жавдираб узилаётган Нафиса чехраси аниқтимиқ гавдаланди, сўнг безовта дилида ўша онлар ҳақиқати барча майда-чўйдаси билан тирилиб, қайноқ туйғулари шиддатли йўсинда жунбишга келди ва янгиланган яра оғриклири қўққисдан бутун вужудини суюгига қадар сим-сим қақшатиб юборди. Мана энди уларни тезроқ Ҳомила қурилмаси ботини ва зухури, аниқроғи, матодан билиб-бilmай кўнгли кўргонини хиёнат ва риё ихтиёрига топширган мендек ожизани кечиринглар тарзида мунғайиб боқаётган Нафиса қароқларига борича жойлаши керак...

## 23

Устахонага қайтган заҳоти дадил енг шимаради, хавотир ичра Мерган тиқ этса эшикка қараб ўтиргандир, ҳали қайда эдинг дея тергаб, ялқовлиги туркум манфаатига зид эканини писанда қилишиям мумкин, тасодифан Нуқра ғорида Носир Охунни учратгани ва илма-тешик баданидан сизаётган қони бир илонни боқаётганини айтса, масҳаралаб кулса керак, балки кулмас, бу дунёда бариси қайтади, жигарим, Носир Охун иншооллоҳ қилмишига яраша худо қарғишига учрабди, қирчинидан қийилур энди дея, елка қисиб қўя қолар, аслида боядан бери ўзи ҳам шу фикрда...

Ошиқиб шаҳарга кирганда уфқ гардишига қўнган қўёш хайрлашаётгани учун хафадек ҳорғин ва хира порларди, ҳавода муаллақ қотган қуббали баланд иморатлар қизғимтири шуълада сокин жимирилайди, анчайин жимжит торгина кўчадан кўркам соқолли кимса ўзи билан тортишиб одимларди, ён томонидан қизиқсиниб қараб беих-

тиёр ҳаприқди, ахир, не ажабки, ҳалиги Қария билан яна учрашиб турарди, фақат энди у кенгингина елкасига оғзи бўғилган қирқямоқ бўз халта осиб олганди, халта остидаги тешикдан бот-бот жиринглаб ва ялтираб тилла тангалар тўкилади, кўзлари ола-була боқадиган, жағлари ва бурунлари қийшиқ каслар мўмай ўлжаларни талаша-тортиша териб чўнтуға қўйинларига тиқиш билан машгул...

Нобакорлар охири чуғурашиб халтани тортқилай кетишиди, апил-тапил титкилаб ундан бир неча эски китоб, қоғозу қалам, яримта зогора нон, гирдига кўзмунчоқ қадалган тумор ва тасбехдан бўлак ҳеч вақо топишмагач, мийигида истеҳзоли кулаётган Қарияни ўлмичи қилиб тепкилашди-да, одмиёна салласи билан оёқ-қўлларини боғлаб, четроқдаги лойқа ва шўр босган ним қоронғи ўрага тиқиб ташлашди...

Нафрати қўзиганча отилиғиб борганда Қария чуқурда титраб-қақшаб ғужанак бўлиб ётарди, бир амаллаб ташқарига чиқаргач, аста бағрига тортиб шивирлади: ўғлим, бу олам хасу ҳашак билан тўлган кўпик<sup>6</sup> эрур, сен сохта жилвасига алданиб қолмагин! Нуқул хўрсинаётган Қария бу гапни икки марта дона-дона қилиб тақрорлади, сўнг серажин япалоқ пешонасини силай-силай бафуржга йўлга отланди, ажабки, бир неча қадам босмай, ямоқи бўз халтаси тешигидан яна ҳовуч-ҳовуч тилла тангалар сочила бошлади...

Тилла тангалар ҳазондек қоплаган хиёбондан узоқлашган ҳамоно ўлгур қоринбой карнай чалиб борлигини билдириди, жуда соз, бемалол ғавғо солиб азоб бераверсин, устахона остонасидан ҳатлагач, дарҳол Мерганни сухбати жононга тортади-да, қулинг ўргилсин ўрдак шўрва тайёрлаб, курмагурни албатта тинчитади, сўнг ғанимат вақтни бой бермай, дастгоҳ ёнида хотиржам тиз чўкади ва янгиланган туйғуларига суюнганча хаёлан Нафиса билан қизғин баҳсга киришади.

Фақат нечун дарҳол эсламади, ахир, ҳозирги пайтда сандиқасидан ҳатто бир бурда қоттан нон ҳам топилиши душвор-ку, чўнтағи эса ҳар доимгидек шил-шийдам, бозорга мўлжаллаб чизилган картиналари харидор кутавериб сарғайиб ётибди, аслида уларни қайси нодон газагига дори қиларди, пичоққа илинадиган асарларига отнинг калласидек ақча бермоқчи бўлган Семизвойни кетига лой суваб жўнатди, айни шу қилмиши учун эрта қайта-қайта пушаймон оловида қоврилса керак...

Тўғри ва самарали тадбир шуки, нуқул Мерган қўлига мўлтираб қараб ўтиrmай, берсанг ейману урсанг ўламан демай, бугуноқ пул-мул бетига қарамас бирон жўмард бойвачча ошнасидан ярим-бир ойда қайтариш шарти билан каттароқ қарз кўтарсин, акс ҳолда, шўри қисиб дарди бедаво кўтарам махлуқа айланиб қолади. Энг ишончли ва кўли очиқ ҳожатбарор биродари Аливой Салим эканига заррача шубҳа йўқ, шундай экан, кўп тайсалламай қурмагурни ҳозироқ уйига йўқлаб боради (тунов кунги ноҳуш мулоқот туфайли ичига муштдай гинаю гидир сақлаб юрган бўлса-чи), ҳадеб гумонсирамай шундок қилгани тузук, баҳонада аввал тўлиб-тошиб соғинчини изҳор этади, тезда кўзи ёрийдиган севикили хотини аҳволини суринширади, охирида сал дўпписи тор келиб қолгани ва ёрдамига муҳтоҷ эканини қулогига куяди, йигит бошини эгиб келгани ва ғужала қилмай дангал сўйлагани учун эриса керак, фақат дўсті эшикни жуда кеч очди, оёқларида аранг лиқиллаб турарди, кўзлари эса қон тўлгандай қизил...

Кўп марта қадами теккан меҳмонхонада Санам доим суйиб сепадиган фарангий атири ифори ҳукмронлик қиларди, макр маликаси шоҳи дастурхон ўртасида сирли ялтираётган дароз шиша қаъридан ёқимли ва хушхол жилмайиб боқаётир, афсун қилувчи сирли нигоҳни туйди-да, дафъатан ажаб зориқиши оғушида хўрсинди, наҳот ҳумор хуружига бўйсунади, йўқ, нима бўлса ҳам сабру бардошига суюниши керак, кайфи тарақ Аливой Салим чўллаган түядек тинмай симираётганига эътибор қилмай, асосий дардини вақтинча ичига ютиб, аввал оғироқек бека аҳволига қизиқиши лозим. Фақат оғиз очар-очмас мезбон ногоҳ тўрсайди, бирон каломини тузукли тингламай, ҳар хил газак уйилган тўғарак мизни муштлаб, жуфтни ҳалоли гўрига ғишт қалай кетди ва уни қўлтиғидан чиққан чипқонга менгзади.

Мехрибон қодир эгам, қат-қат шўр қоплаган пешонасини қайси девору қайси тошга уриб ёрсин, ҳатто ўлимига ҳам рози бўлаётир, ахир, палаги нотоза эканини ўлибирилиб яширган мегажин дастидан юзи ерга қаради. Аслида кўп қилиғига индамай чидади, ҳатто кечалари турли баҳоналар билан санқиб кетганда ҳам пинак бузмади,

<sup>6</sup> Мавлоно Жалолиддин Румий.

қайси куни бекитиқча Санам билан ошу қатиқ ийлқибоз бойвачча түйига борганини эшитгандан кейин эса, тутакиб қаттиқ ранжиди, ҳомиладор нарса масикқан асов бедовга минсин деб қайси рисолада ёзилган, хуллас, бегунох гүдагини жувонмарг қилгач, сабр косаси тұлади ва киндигидан бүғзигача пичоқ тортиб ёки мушукчадай бүғиб ўлдиришни чүтлайди, лекин шайтонга ҳай бериб, беозорлық билан кавушини ўнглайди, әнді ҳатто осмон узилиб тушган тақдирда ҳам исмими тутмаса керак.

Хәёт гүзәл ва боқыйдир, умр эса ғанимат, қолаверса, ҳеч ким онадан қайта туғилмайды, шундай экан, бутун жону дили билан ҳар бир сонияни әззозлаш вә ардоқлашни тилайди, дунё пасту баландини таниган, қадру құмматини билган одамга үхшаб роҳату фароғатда яшаши ва олажуз қавмида нұфузи беҳад юқори саналған ша-жараси әртасини таъминлаши бурчи саналур, нима бўлса ҳам ортида чирогини ёқиб ўтирадиган томир қолсин, ана шунда қоронғи гўрида тинчу хотиржам ётади.

Бирламчи, ана шу муҳим масалаларни назарда тутиб, иккиласи, қалбини жароҳатлаган ва номусини сариқ чақадай хорлаган бевафони товадаги балиқдай қовуриб, яна үйланишга бел боғлади, худойим яратиб қўйған ёруғ жаҳонда қиз жони-вор қаҳат эканми, онаси ўпмаган бир дилбари жонона билан аллақачон аҳду паймон қилди. Омади чопган келин сепию тўй ҳаражати тап-тайёр, ҳадемай баҳт уйида никоҳ қайд этилур, оқила ва сулув қайлиғи ҳаётида бир марта рўй берадиган шодиёна ша-рафига бирон дидли рассом суратини чизишини истаб қолди, қурмагур боқийлик ва нафосат эгизак эканини балодай билар экан-да, агар шу мушкулини осон айлашда яқиндан кўмаклашса, доим этагида намоз ўқииди, ҳатто мўмай пулдан ҳам қарашибади, йўқса бариси тамому вассалом, биргина имоси билан худосини танимас бирон қайсар феълли ўқтам шотири панада чавақлаб ташлаши мумкин...

Ёру биродарлик ҳурмати учунгина эмас, инсоф юзасидан кўп димоғу фироғ қилмай, шу кичик хизмат биз тан, санъатга ишқибоз келинни сийлаш ва севинтириш вазифамиз деса, нақадар ярашарди, аммо туркум юмушларидан чалғиб кетишини ўйлаб чўчиди-да, бўғзига ҳақу ноҳақ пичоқ тирангандай елкаси тиришди, тайинли гап айтмай, ҳатто неча кундан бўён қоқ нон кавшаб юргани, қайтариш шарти билан қарз сўрашга келганини унугди ва этак силкиб жўнаворди...

Гавжум кўчадан довдирай-совдирай лўқиллаб боради, қоринбой аҳволи билан ўчакишиб баттар таталайди ва бир йўла эна сутини оғзидан келтирмоқчи бўлган каби тарс ёрилгудек даражада бураб оғриди, бунақада турмуш ўзани путури кетиб, ишидан файзу барака қочса керак, фақат ҳадеб ваҳима ичра ўқсинаши бефойда, токи қалбида умид муқим эшар экан, охир-оқибат барча тўсиқларни янчиб ўтади.

Қачондан бери Мерган қанотида муқим эканини асло унумасин, кўпинча оғаси ва илк устози, қуруқ кўл билан келмагани устига, бағридаги тузалиши маҳол жароҳатга малҳам босиш пайида жонҳалак, қисматига айланган туркумни тезроқ қиёмига етказиб битиришга ундейди, туркум асосида хусусий кургазма ташкил этган куни бутун ола-жуз қавмига худойи беришини айтуб чарчамайди, Калхат билан Чиганоқни бир зонга кўрсатмай асрәётган муаллим кўрасида бир неча кўй-эчкиси кўпайиб ва семириб ёт-ғанмис, эрта шулар ҳар қандай катта ҳаражатни бемалол кўтарар эмиш...

Мерган дилида майсалаган эзгу ниятдан хабар топғандан бери турли важда ялқовлик қилаётгани учун хижолат чекади, аслида ўзи ҳам оромини бутунлай ўғирлаган ва ҳақиқий қувончи ҳисобланмиш туркум ташвишидан тезроқ кутулишга орзуманд, фақат ўша улкан вазифа ижроси тирноқ билан ариқ қазишдек оғир бўлса, ҳар сония жигарини хуну бийвурини бийрон айласа иложи қанча, бунақа вақтда ҳатто сабру бардош ўзи ҳам чирик арқондек тоб беролмай ситилса ажаб эмас...

Бугун ноилож Нуқрағорига кириб қолгани ва у ерда, жазосини ўтаётган Тўра Охун ўрнида, Носир Охунни учратгани ғалати бўлди, йўлда яна тасодифан йўлиқкан Қария ўйлаганидан кўра оқилроқ экан, сирли халтаси шаксиз ҳеч бир таърифга сиғмайди, кўхна олам хасу ҳашакка тўла кўпик эрур деган мағзи тўқ ҳикмати эса жонига осон пайванд бўлиб кетди.

Мана энди тағин дилкаш Қария суҳбатини қўмсаётir, агар манзили қайда эканини билганда хозироқ йўқлаб бораради, бир жонинг минг бўлгур Мерганга донишманд чол хусусида албатта сўйлаши керак, сўнг ўрнини топған пайтда орага Зарбанд тоғ тиз-малари, Долқоя дараси, жарлик ва поёңсиз дашту далалар қаъридан кўкка аввалию охири йўқ алам-ангиз оҳу нолалар ўрлаб ётганини ҳам қистиради...

Хиёбон четидаги гужумлар панасидан ботинмай қараб-қараб кўяётган хушрўй жувон ким бўлди, гўдагини хазон айлаган ва Аливой Салим юзига қора суйкаб жўнаворган келинчак эмасми, ростдан ҳам кўнгли кўчасида адашган ўша бевафо экан, қўли билан ҳадеб тўхтанг маъносида имо-ишора қилаётганига кўра, бирон жиддийроқ арзи ҳоли борга ўхшайди, ёпирай, ним пушти гулдор кўйлак ёлган қоринчаси тарвуз-дек дум-думалоқ-ку, асов тойдан йиқилгани оқибатида ақлу хушидан айрилгани, уйга қайтгандан кейинвой-войлаб бола ташлагани хусусида куёвтўра озмунча нолиган эдими, сүф-е, оби-дийдаси фирт ёлғон экан-да, ҳозироқ буни аниқлайди, алдову бўхтон умри ҳеч қачон узун бўлган эмас...

Худойим йўл бермаса қийин, атиги бир сўз демай, тарвуздек дўймпайган қоринчаси орқали Аливой Салим иғвосини фош этаётган келинчак сухбати буормади, биродарим тили остида тиличак яшириб юришига энди қатъий ишондим деган ўйда беш-ўн қадам босиб улгурмай, қархисида булутдай бир балойи азим бўйлади. Хаёли юкли келинчак ва чакаги тинмай сўйлаган Аливой Салимда бўлгани сабабли дастлаб парво қилмади, сўнг бел баробар яшил девор панасидан дафъатан ирғишлиб чиқкан ва бўйин тасмасига баргсимон зумрад қадалган бўрибосарга зимдан қайта тикилди, тавбангдан кетай, атрофга асабий ғингшиб ваҳимали боқаётган маҳлук тунов кеча тушида Тарғилни кувакува ерга қапиштирган ва ғолибона вовуллаб юборган Дўлвор эмасми?

Салдан кейин ёф томса ялагудек озода бетон йўлақдан ғудинг-ғудинг сухбатлашиб ўтаётган кимсалар эътиборини тортди, кувончдан ёруғ дунёга сифмай сафсата сотаётган Тўра Охун ва уни астойдил тинглаганча хандон ташлаб кулаётган Санамни таниб ичи музлади, сўнг бирдан хотиралари қўзғалди-ю, тўзим тилаб худога ёлборди, энди бу ёғида нималар кутаётгани ғира-шира маълум, ҳайтовур келгусида шундоқ ҳам жароҳати етарли бошида илгари синмаган калтаклар синса керак...

Бир тахминки, Тўра Охун Нукра ғорида шунчаки ғаму андух ютиб ва канага талашиб ётавермай, жами имконидан мосуво этган Носир Охунни чалиб йиқитиш йўлини қидирган, мудҳиш режасини фақат Санам кўмагида эплаш осон кечишини билгани туфайли у билан яна яхшироқ тил топишади ва охири ниятига эришади. Ҳозир сурмали қийик қўзлари олма-кесак тераётган Санам ёнида қирчиллама йигит мисол бемалол ўйргалаётгани ва завқу шавқ билан юрагини тўкаётгани бежиз эмас, қанчалар уқувли, феъли кенг ва сероқибат одам эканини пухтароқ исботлаши лозим.

Авзорига қараганда, мийигида беозор илжайланча бафуржка ингадан тuya ясаёттир, тепадаги ушлаган жойини кесувчи зотлар орасида ишончига кирган мардлар бехисоб эканини орага қистираётгани шубҳасиз, қолаверса, марди майдон суюнчиқлари билан муштни бир жойга уриб тез орада мавқенини тиклаб олиши, омади тўла юришгач, ола-жуз қавми ва айниқса санъат жабҳасини астойдил кўллаб-кўлтиқлаши, ниҳоят, дили мағорлаган Носир Охунни ва унга қуллук қилиб чарчамас нобакорлар тоифасини тоабад тийиб қўйиши хусусида вайсамоқда.

Фақат Тўра Охун оломондан ажralиб орқароқда ранг-рўйлари докадек оқариб ҳорғин одимлаётган Мулла Ширин – Тарвуз домла (чилл-чилл шоколад шимиби ғудраниб кўяди гоҳида), Азлар Ниёз ва Зокир Ғиёсий турқига қандай тобу тоқат қилаётгани сабабини тушуниш қийин, ҳали ақлу ҳушини тузукроқ ўнгламагани боис, қўйнида оғу суртилган пичоқ яширган ва уни исталган пайтда курак орасига санчадиган гумроҳларни кўрмаёттир чамаси, кўрса қаҳру ғазабга миниб кўпирishi, ҳар бирини, аямай буралатиб сўкиши ёки тепкилаб қувлаши мумкин, истаса Нукра ғорига маҳкум этади, токи бошқа ҳеч қачон овозларини эшитмасин...

## 24

Тирноқ остидан кир қидириш ва дил майлини қондириш бўйича Тўра Охун ҳар қанақа устаси фаранг доғули, ҳатто золлар золи Носир Охундан бир поғона ўтказарди, истаган одами бурнини ерга ишқалаш, бировни бировга қайраш ва девор ортида кечётган турли хил ўйинни кўриб ҳузур қилишда айниқса бесуяк...

Олажуз қавмидан чиққан айрим зийрак зотлар гирмон қонли оёғи билан чегара тўсинини бузмай ва тошқин арафасида Тўра Охун надомат камонидан отилган қаттол ўқ эканига неча марталаб имон ўғиришди, бир гал жаҳл ва ғазаб устида Вали баҳши суллоҳни кекчи қарға деб уялтирид, киноя суюгини тешиб ўтгани боис, отаси жонидан ортиқ судидиган ҳамдами -- гулпопукли бобомерос дўймбирани тортиб олди ва маҳсус

термада шаънини улуғлаган куни қайтаришга ваъда берди. Раҳматли ялтоқланиш ўрнига, аксинча, гижинглаган ҳажвиёт отига янада қаттиқроқ қамчи босиб, қисқагина термада Тўра Охунни одамзод терисини тириклай шилаётган гирмон малайига қиёслади, оқибатда эса боши бутунлай балойи азимга қолди.

Ҳар бир сўзи ўнлаб илмоқдан иборат термани эшитган заҳоти Тўра Охун какрадек кўкариб шайтонлади, кечалари ўйкусидан адашиб ажриқа ағанаб ётадиган, панжаларини беихтиёр томогига ботириб жазава билан чинқирадиган бўлди, қайси бир оқшом аранг мизғиб ёмон босриқди-ю, тамом қуюшқондан чиқиб кетди.

Тушида Тўра Охун ўғри мушукдай пойлаб ва аланглаб Вали баҳши ҳовлисини ўраган пахса девордан лип этиб ошади, меҳр ва ихлос билан авайлаб парвариши қилинган ўндан зиёд қандак ўрикни қасди бордек роса кучаниб тошлайди, сўнг биррига тирмашиб, айрига қўнади-да, асалдек ширин мевасидан тўйиб ейди, чопқиллаб уйига қайтгач, қорни дамлаб қулдирайди, қаттиқ санчиб оғрийди ва зир-зир ҳожатга чопавериб ҳолдан тояди; тонгга яқин алаҳлаб уйғонади, қарасаки, тушдагидек дўмбира бўлиб шишган қорни биқир-биқир қилаёттир, шип-шилта таги ва иштонидан димоқни ёргудек қўланса ҳид анқийди, тепасида Санам ажабсиниб ва хавотир чекиб жавдираМОҚДА.

Тушини апир-шапир айтади-да, қишлоқ зийнати саналмиш қандак ўриклиарни илдиз-пилдиз билан кўпориб ёкиш ва кулини кўкка совуриш бўйича амр қиласди, ҳеч бир рисолада йўқ манзара шоҳидига айланган бўзбола Комронбой ёруғ дунёга сифмай бўғиларди, кум тиқилгандек ачишаётган кўзларига нуқул инграй-инграй ер тишлаган ва очофат гулхан емига айланган дарахтлар кўринарди. Беун бўзлайвериб сабру қарори битди, озгина бўлса ҳам таскин истарди, сўнг тунлари мунтазам қора чироқ ёруғида сувда эритилган бўёклар билан сирлаша бошлади, аста-секин оппоқ қоғозда, ажиб қурилма шаклланиб, япалоқ ва бужир манглайида қорамтирик якка шоҳ бўртган, бурни тол қошиқдай осилган, кўзлари икки томонга бақрайиб қараган, бели майишиқ Тўра Охун гавдаланди, қурмагур сардор қилтириқ бутларини йириб, соқол ўрнига сўгал босган иягини тутамлаб, тишламоқ қасдида ириллаётган баҳайбат кўплак сари хезланиб турарди.

Худо қувват ва матонат берган эканки, шу тасвирни бир неча нусхада эринмай чизди, сўнг тўлин ой ёринган кечада барисини каттаю кичик назари тушадиган жойларга илиб ташлади, атиги биттасини кўрган Тўра Охун дарҳол қўёнчиғи тутиб ўлишига ишонарди. Аммо нобакор бир мўйига шикаст етмай омон қолди, сўнг сендек жайдари рассом дунёга ортиқча юқ дея, қобирғалари саналиб қолган қари жийрон қашқа думига оёғидан боғлатди, чўгир имиллаб дашт сари жўнагач, қувончини чойхонада палов дамлаб нишонлади.

Носир Охун тўкин дастурхон атрофида улфати чор бўлиб айшини сураётган пайтда, зормонда чўгир тиззалари қалтираб чопа-чопа гармсеп уфураётган чўл ичкарисига кириб бораарди, охири силласи куриб зорли кишинади-да, улкан саксовул соясида тўхтади, қизиган тандирга бош тиқсан каби ёнаётган Комронбой арзи додини ким эшитарди, қайнок кум уммонига кўмиллиб, ғуж-ғуж чивину сўнага таланиб ташнаи зор ётаверди, нуқул тезроқ азроилини юборишини сўраб худога ёлборарди, охири овози ҳам чиқмай фалак супрасига ноумид тикиларкан, кимдир оғзига сувдон тутди, бўз қиийча танғиган Мергани таниб синиқ кулди ва хушини ўйқотди...

Санам жазманлари орасида энг садоқатлиси бўлган Тўра Охун жони шунча ҳам қаттиқми, ҳалиги ғалати карикатура қошида шайтонлаб ўлмагани гўрга дейлик, аммо жаҳаннам каби даҳшатли Нуқрага горидан эсон-омон кутилиб чиққани ва ҳеч нарса кўрмаган каби дадилу мағрур юргани, худойим кечирсинг-у, бот-бот қаҳру ғазабини кўзғаёттир, агар ўша жаҳаннамда тоабад қолса ёки жон таслим қилса, ҳозир муттаҳам билан яна юзлашмаган ва қайгули хотираларини эслаб куймаган бўларди...

Тўра Охун ҳамон ортидан йўргалаётган Тарвуз домла, Зокир Ғиёсий ва Азлар Ниёзга сира эътибор қилмаёттир, ахир, омади чаппа қайтган мудхиш кунда, шамолу бўрон баданига турли шакллар соглан улкан қояга чапараста ўраб- chirмаб ташланган дамда, подадек гурас-гурас ёпирилиб келган ҳалойиқ қаторида, башараларини буришириб улар тошбўруну кесакбўрун қилишгани ва гупдек шишган бурнига игнаю жуволдиз тиқиб қаҳқаҳа отишганини наҳот ёдидан ўчириб юбормиш, бўлса бордир, фақат буни-сига нима дейсиз, ҳозир уларни, кўздан йўқотиш ва бирон муносиб жазога маҳкум этиш ўрнига, сал нарида қантариб қўйилган Қора тулпор салонига чорлади, сўнг кетдик маъ-

носида Санамга имо қиларкан, ногоҳ Комрон Вали бетига тикилиб қолди ва пешонаси ажинлари ечилиб кетди.

Тұра Охун наҳот дийдор насиб этгани учун севинаётир, инсоф майса урибдими дилида, ҳозирча бу ёғи қоронғи, лекин күрсатгич бармоги билан имлаб қошига чорлагани аниқ, анчайин дүріллоқ овозда қысқагина ҳол-аҳвол сұрашгач, омонат дунёда аразу ўраз ва ўпкаю гина ҳеч бир дил ярасини тузатишга қодир эмаслиги, аксинча, баттар газаклатиб юборишини құлогига астагина шивирлади, сұнг олажуз қавми ва үз тақдиди билан боғлиқ янада жиғдий масалага күчди, қысқаси, бундан бу ёғига күп шубхага берилмай құнглини түқ тутсын, узоқни қүришга қодир кимсалар билан бирга, чүчимай қанотига кирса, күтгани ва умид қылганидан күра күпроқ нарса ютади...

Ана холос, бир вақтлар даврада кайфи ошиб қолған Носир Охун ҳам шу хил ўғитлар билан энсасини қотирмаган әдими, мана энди Қора тулпор жиловини күлга кириптан Тұра Охун укаси каби недир тилақда юрагига құл солаётир, аслида мақсади яхши аён, кечмишда қишлоқни овораи абор қылған жами кирдикоридан тоабад күз юмб, ғаҳ деган ондағे қулоқ бурмай кафтига құниши керак. Жуда калта ўйлаётир, бунинг иложи бор эканми, ахир, барисини унугтан тақдирда ҳам Носир Охун билан талашиб Нафисаны бадном қылғани ва умр гулини бемаврид сұлдирғаннини қандай унугтади, ўшанда шүрлік қыз мана шу дөғули олифта ва худбин укасидан бир неча марта ұтказиб берган ҳавойи ваъдалар охир-оқибат йўлини надомат үпқони сари буриб юборишини қаёқдан биларди, барисини англаган дамда ғишт аллақачон қолипдан күчганди...

Жаноза яшириқча ўқылған дағн маросимида жардан учган Нафиса ҳатто қабрида ҳам осуда ётиши гумон эканини яққол ҳис этувди, аламу армон ёшлари эса қайтайдай қайта юрагига томди, милт-милт томаверди, сұнг ёруғ дунёға сиғмай ва Роҳила отин арази баҳона эзилаётган падари далдаси ва насиҳатини эшитмай тұшакка михланди. Баъзан Нафиса арвоҳи чорлаётганига ишониб, тақдирига үкиниб лаънат айта-айта, рутубатга چулғанған жарлик сари жұндарди, күпинча ўша ерда узоқ санқиб юрарди ва Нафиса боши аралаш елкаси билан урилған чүзинчоқ тош ёнида узала тушиб ётарди, күтилмаган ҳолға құнишиб қолған Вали баҳши, урари ёки сүкарини билмай, алдаб-султаб етаклаб кетарди...

Бутун вужудини ўраб-чирмаган ҳижрон дарду алами муттасил газаклаб бораверди, изтироб ва ҳасратта тұла дили, тоабад аза тутишга маҳқум эканидан огоҳ этганча, инграниб нимагадир ундарди, аста-секин дили даъватидан айрича руҳланиб, ажиб ҳаёлий оламга күчди-ю, турли хил оддий бүйеклар замиридан армони шакпини қидира бошлади, баҳоли күдрат изланиб, қалин оппоқ қоғозға зарблаған лавҳаси, фожиавий руҳдаги тасвирдан кўра, ғуссали можарога мойил карикатурага күпроқ ўхшарди.

Тўқис сайқал берилмаган қурилмани банд этган Тұра Охун билан Санам рафтори макру ҳийла пардаси остида айрича кўпчиб турганини ҳали-ҳали яхши эслайди, ўйғон бўйнига сурмадек қора жингалак гажаклар чирмашган Тұра Охун ҳайбати отни ҳуркитарди, шолғомдек қизарған ясси бурни, бир ёнга қийшайған тұмтөқ жағи ва ботик ёноқлари ошланмаган терига ўхшаб буришик бўлиб, аллатовур ғашлик уйғотарди, қалин жун босган қишиқ қўлида совуқ ярақлаётган қўпол дастали дудама ханжарни эндигина таваллуд топған мурғак бўталоқ бўғзига ботириш ниятида ўнглагани, аҳду қарори қатъий ва кескин экани англашиларди, сал нарида жигарпорасини эмизиб ултурмаган тиззапари қўтири озғин она тұя маъюсона жавдираб туради ва ҳар тола мўйидан шикаста нолай афғон тараплади...

Ҳамон қаршисида думбул карикатура сокин товланаётган каби чуқур ҳасрат ичра бош чайқади, ўшанда уни кузатиб хаёлан Нафисага тупрогинг юмшоқ бўлсин дея муружаат қилгани, бутун борлиғи қақшаб депсингани ва бўғзи ачишиб ҳұнграгани кечагидай ёдида, қош қорайғандан кейин жангари мушук бетига сапчиган сичқон каби ўзини хатар бағрига отди, тонг ёришган паллада топилдиғи оқишу пушти мармар увоги билан сувалған деворни ғаройиб палак мисол безаганди, сұнг ҳадемай қиёмат-қойим авжига минишини тасаввур қилиб илжайди ва ҳали буниси хамир учидан патир маъносида мушт ўқталди. Фақат падар қусур тасодиф тутаётган ўтинга ермойи сепиши ва мисли йўқ ёнғин чиқишини қаёқдан билсин, бир йўла тириклай лаҳадга тиқадиган ҳазил аралаш қитмирлиги Тұра Охун таваллуд топған кун баҳона уюштирилған зиёфатга тўғри келган экан, тўғриси, буни эшитгач, аввал тилла топған тентак каби севиниб ўлардай

ирғишилади, кейин жами қувончи бурнидан булоқ бўлиб оқдики, мабодо эсласа нўноқ уста омбир билан шартта тишини сугургандек беҳол инқиллайди.

Сўфи азон айтмай кутлов учун совға-салом қўлтиқлаб ташриф буюрган пешқадам меҳмонлар сал кам икки қулочли қофозга қинғир-қийшиқ тарзда зарб этилган башарага тикилганча шалвираб қолишади, баридан хабар топган мезбон эса тўқ ургандек сапчилайди, дарҳол зиёфат баҳридан ўтиб, хилват хонада тўнтарилган кўйи иситмалаб ётади. Чехраси анча сўлғин Санам тасалли бериш, маслаҳат қилиш учун мўралаган чоғда эсу хуши оғиб-оғиб турарди, суюнчиғи ташрифи баҳона сал юпангач, бепичноқ сўйган муттаҳамни топмасам ва ит азобида жаҳаннамга жўнатмасам ўзимни теракка осганим, жилла қурса отимни бошқа қўйганим бўлсин маъносида кўкрагига муштлайди ва бир неча эпчил малайни қишлоқ бўйлаб йўрттиради, ҳид олишу из билишда устаси фаранг исковуч босиб кетади ҳамма ёқни...

Хом-хатала карикатура туфайли рўй берган ноҳушлик ақл бовар қилмас даражада ғовлаганидан ҳадемай хабар топади, сири очилиб қўлга тушган ҳамоно таъзирини ейиши тайин эканини билса-да, яна қамишдан маҳкам бел боғлаб, қофозга мук тушади. Энди нифоқ бандаларини муҳаббат бўстонида гуркираб ўсаётган навқирон сарв илдизини кемириб семираётган кўшалоқ митти жонзотга менгзаб тасвирлашни чама қилганди, агар шу режасини ҳам эплаб-сеплаб амалга оширса, наздида, бемаврид сўлган Нафиса арвоҳи шод бўлиб, дилини муттасил ёқаётган аламу армон ўти босиларди.

Иложи қанча, кейинги гал тақдир қўллаб-қувватлаш ўрнига, омадидан жудо айлаб, шаштини синдириди, бошига қатрон шимдирилган зилдек оғир қоп ёпилганда, вақт яrim кечадан оғанига эътибор бермай, ғира-шира лампа чироқ ёруғида уйкусираб дард чекиб ўтиради, тиришиқ бети аралаш манглайига тушган билакдай ёғоч гурзи суробини тўғрилади, тонг пайти ҳеч нарсани эслолмай бийдек дала ўртасида бемажол думалаб ётарди, қаттиқ оғриқ ҳукмрон сезимларида...

Худо қарғаб шўри қисгани шудир-да, бундан ортиқ мусибат бўлиши душвор, мўмай ўлжа илинжида бўлгувчи йиртқич қушлар дастлаб киртайган кўзлари, сўнг по-ра-пора жигари ва ниҳоят юрагини чўқилаб ейишини ўйлаб отила турди, бир амаллаб даҳшатли якунга чап беришу хавотирга кўмилган Вали баҳшини тинчтишдан бошқа истаги қолмади, тишини тишига босиб телбаларча олға интиларди, охири толиқиб юра-юра кум ва саксовул қоплаган қовжироқ сайҳонлиқда мўру малаҳдек уймалашаётган саҳроиилар тўдасига қўшилди, бирор кимсан дея сўрамади, ўзи ҳам чурқ этиб оғиз очмади.

Негадир маконига ошиқмаётган қуёш тиғида кўмирдек қорайган ва чўпдек озиб-тўзиган кимсалар ғаройиб юмуш билан машғул эдилар, гирдларида хасу ҳашак аралаш қизғиши тупроқ уйилган қатор-қатор чуқурларни кўргандан кейин сир тагига етди-ю, бетига истеҳзоли кулги югурди, ҳадемай ўзи ҳам тақдир ҳукмини ими-жим адо этаётган каслар изидан жўнайди, сўнг қоқ балиқдек буришган гавдасини на бирор ва на ўзи топа олади, яна ҳам қизиги шундаки, қазув ўзингдан деб таъкидланди, топшириқ бажарилгунча она сути оғиздан келган бўлса-да, охири лаҳад тахлит чукурда оёқ узатиб ётиш беозор ва ҳатто гаштли туюлди...

Етаги калта нимдош бўз яктак кийган муштдайгина ҳорғин кўса оғир кетмон билан устига чангитиб тупроқ торта бошлагани ёдида, қолгани хушу хаёлида йўқ, бир пайт инқиллаб кўзларини очсаки, димиқан ним қоронғи кигиз ўтовда бузоқ ўлигидай тарвайиб чўзилмиш, қичимсиб турган димогига қуруқ ўтин тутуни, пишган гўшт, пўстак ва латта-путта ҳиди урилади, қийиқча танғиган Мерган лўқиллаб оғриётган қайноқ пешонасига авайлаб ҳўл латта босмоқда.

Норғул гавдаси анча чўқкан илк устозини аранг таниди, эй, суюнган товим, капам кўйди-ку дея, мўлтираб қулт-қулт ютинаркан, дилидан киртайган кўзлари оша тўклигандўлу жалалар заъфарон ёноқларини дарёдек дувиллаб юва бошлади, ўша дарё охири бир тармоқ мисол тошқинга қўшилиб кетганига ҳали-ҳали имони комил...

Атиги биргина расм бошига кутилмаган ғалваю ғурбат орттирганини эсласа кўпинча ўқинади, баъзан эса кулгиси қистайди, сўнг у думбул бўлса ҳам дамига зоғора пишадиган Тўра Охунни ва барча жазмани бўлишини орзу қиласиган Санамни эсан-киратиб ташлаганини ўйлаб, муросасиз рақиб кифтини ерга тегизган ва келгусида ҳам ҳеч кимга ён бермас полвон каби атрофига мағруона боқади...

Ҳали гавжум хиёбонда рўй берган учрашув Нафиса ўлиимидан кейин бағрини тиғлаб қанчалар эзилгани, ҳар неки аламу армонини ўша хом-хатала асарга сингдиришга уринганини яна ёдига туширди, ажабки, шу баҳона дилини илҳом шамчироғи ёритди-да, дадиллик ва рағбат туйиб, туркумни тезроқ тугатиш жуда зарур ва муҳим эканига яна икрор бўлди, туркум ёруғ дунё билан юзлашган куни онадан қайта туғилажак...

## 25

Аслида, бутунлай оромини ўғирлаган туркум, фақат ўзаро қовушган ўйчан ранглар марсияси эмас, айни пайтда, умид ва тасалли уйғотувчи ғуссаю армон суратларини жам этувчи мажмуа ҳам саналади, қиёмига етиб қолган Ҳомила ҳам шу фикрни исботлаб сокин жило сочаётир, муҳими, курилмаси дилни дилга пайванд этган ишонч кўпинча ўз қобиғида урчийдиган фитна ва мақр соясида қолиб кетишига қўпроқ ишора бераётганди, курилма малоҳатини ўзидан безган ва ноумидлик сари оғиб кетган жон қўйноқлари босиб тушганди, бинобарин, рутубатли жарликда мўлтираб узилаётганди Нафиса чехрасидаги чексиз қайғу ва ҳасрат, сал наридан шўрликни бўйларини чўзиб кузатаётган Тўра Охун билан Носир Охун ва айниқса Санам рафторини қоплаган истеҳзоли юмшоқ табассум ифодаларида мудхиш хотима залвари пинҳон...

Картина табиати учун хос зиддиятли кечинмалар ва ўтдек куйдирувчи ҳасратлар асосида ботиний ва зуҳурий фарқланишни маромида бўрттириш, бир нуқта ичра беҳудуд олам бунёд этиш, ҳар бир чизиқ мантиқ устуни бўлишини таъминлаш осон кечмади, бу борада тўла қониқиши ҳосил қилиш учун лаҳза изидан келган лаҳза замира минг ўлиб тирилди, она сути оғиздан келгани эвазига Нафиса арвоҳи олдидағи қарзини узганди...

Ҳомилани Аполлон йўллаган покиза қалбли фаришталар қарамоғига олганини ҳис этган ҳолда аста маймоқ диванга чўзилди, энди қисқа муддатли танаффус эълон қилиб, нафас ростласа бемалол ярашади, қодир эгам одамзодга беминнат ҳадя айланган уйқу садағаси кетсин-ей, ноёблик бобида унга тенг келувчи неъмат бор эканми ёруғ дунёда...

Тангри ёрлақаб, эрта-индин шахсий кўргазмаси очилса, Фунча ва бошқа картиналар қаторида, Ҳомила алоҳида шов-шув қўзғashi борасида мулоҳаза юритаётган чоғда кипприклини ниҳоят юмилди, оҳорли пар тўшакда бегам ётган гўдак мисол қилт этмай осуда пишилларди, яқин-орада бу қадар тиникиб ва тўйиб ухлаган эмас, ҳатто ҳар бир ҳужайраси ва тукида хотиржамлик ҳукм сурарди. Субҳидам күёши шафақ чимилдиги безаган уфқ кифти оша мўралаш учун ҳозирланиб турган дамда жисму жонига қувват бергаётган роҳат бирдан пардек тўзгиб йўқолди, ҳатто юрак уришида ҳам мувозанат бузилди, фақат ажаб ҳолни сезмай, безовта руҳи қанотида парвозга чоғланди, сал ўтмай юксак фазони қучган аввалию охирни йўқ мовий ҳарир парда оралаб думли комета каби шитоб юзизб борарди, заминга чуқур томир отган пурвиқор чўққилар увоқдай, муazzам асов дарёлар қилдай, қирғоқларига сапчиётгандан баҳайбат денгизу уммонлар кўлмакдай кўринади кўзларига...

Қайга қўнди ёки ҳамон муаллақ учәтирими, буни аниқлашга қийналиб энтиқкан ҳамоно, зарб билан улкан гранит қояға урилган жисми тарикдек тирқираб сочилиди, сўнг ўзида қайта йигилди-ю, бору йўғи бегона ўлчам иҳтиёрида эканини пайқади, рўпарада жамол очган дунё ҳавотир оғушида юкли аёлдек ҳансиради, еру осмон оралигини ваҳима уйғотувчи даҳшатли шовқину сурон қоплаган, кеча зулматини бурдалаб сариғу қизил мушаклар порлайди, қону лойга беланганд жасадларни босиб ўтаётган милтиқли кишилар кўркув кўланкасини ҳайдаб юбормоқчилик томоқ йиртиб ҳайқиришади.

Эти устихонига ёпишган ва лаблари гезарган савдойи сиёқли манови банда наҳот девор дармиён қўшниси Дамин полвон – гирмонни пешонасидан отиш ва ғавғони тинчишига аҳду қарор берган Мерган бўлса, ахир, жондек азиз биродари туғилган она қишлоғини сафархалта елкалаб тарқ этганда тоғни уриб талқон қиласидан сириқдай азамат эди-ку, энди охирги қатра кучини ҳам шайтон сўриб олгандай намунча ҳоли ҳароб?! Тинкаи мадори қуриган Мерган гандираклаб аранг чопади, баъзан оғир хўрсинади-да, қарами кенг худойим, мададингни дариг тутмагил, ўлигимни кўтариб қайтай элимга дея шивирлайди, сўнг тепкини босиш учун шайланар экан, ногаҳон кўкси ва кураклари орасига баравар чирсиллаб ханжар санчилади, олд томондан

келган нобакор одам гүштига тўймаган гирмон экани аниқ, аммо орқадан хуфия иш битирган ва жон риштасини кесган мурдор ким бўлди. Ҳолсизланган Мерган ишкални ажрим қилолмай инграганча бомба ҳозирлаб кўйган хандаққа шўнғийди, сўнг икки тарафлама тиғ еган яна қанча-қанча ярадор гусирлаб ёнига қулайди, шўрликлар халос бўлиш соатини интизор кута-кута қатланиб ётишдан бошқасига ярамайди, најотдан эса дарак бўлмагач, охири бир-бирларига жимгина суюнган ҳолда, шилимшиқ тупроқ билан бирлашиб кетишади...

Дабдаласи чиқиб кўпчиган ўтлоқ ўртасида мунғайган хандақ юздаги чандиқдай эътиборни тортарди, сўнг хасу ҳашак билан тўлиб, ўринида шафақ тусли дўппидай пайкалча пайдо бўлди, тақдир мурувватидан тамомила умид узгандай у доим хомуш мударрди, гоҳо сутдек оқарган тонг палласи, баъзан зулмат қуюқлашган ярим кечада сурон солиб оҳиста қимирлайди, ногоҳ шунда остидан зорланиш ва илтихога ўхшаш ни долар сизиб чикади, маҳзун товушлар ёғин-сочинли уйғониш фаслида бутун борлиқни тутади-ю, хиёл дўмпайган пайкалча тупроғи ёмғир сувида чанқогини қондиради ва кучогида мурғак ниҳол нишлайди.

Тақдирига таҳсину тасанно ўқигандай ниҳол чор атрофига маству масрур алфозда эмину эркин тикиларди, иштиёқ ва шижоат или қуёш сари интилиши айниқса мароқли туюларди, охири яйраб-яшнаб ўса-ўса кўзни кувнатувчи шафақ тусли нафис бинафша қиёфасига кирди, бутун борлиғи номоён этаётган латофатда, фақат қуёш ва замин меҳри эмас, олдию орқасидан тиғ еган ва умид дунёси умиддан маҳрум эканини англаб-англамай тупроқка қоришган кимсалар дарду ҳасрати ҳам мужассам эканини сезмай, оламни муаттар атру бўйларга тўлдириди, таажкубки, кумурсқадан тортиб то кушу капалакка қадар жамики тирик жон, ҳатто поёнсиз осмон ва чарагон сайёralар жамолига маҳлиё бўлиб боқишини орзу қиласади.

Вақт ғилдираги бирров айлангач, ҳур-ҳур салқин шабада ўрнига чор тарафни тўздириб қайнок гармсеп эса бошлади ва тезда мудҳиш ташналикка чулғанди, худодан зорланиб нуқул ёмғир тиларди, аммо илтижоси тангри қулоғига етмай, нозик жуссаси ва латиф япроқлари бужмайиб қовжиради, энди тенги йўқ чиройидан айрилиб, барча тилаклари чил-чил сингани учун зор қақшаб ингранарди...

Алвон бинафша бағридан узилаётган афсус ва надоматга йўғрилган эзгин саслар Комрон Вали жон қулоғига яққол эштилди, сезимлари оша улар шуурида қайта янграгач, қора терга пишиб ва алаҳлаб аста ёстиқдан бош кўтарди, аввал нимагадир тасавурида бир неча марта шафақ тусини олган хандақ ва пайкалча гавдаланди-ю, гарангсиб маймоқ диван билан миз ўртасида чўнқайди. Ажабо, бу қанақа босринқираш, Мерган нечун тушида бундай безовта қилмиш, мавридини топган заҳоти барисини айтиб, таъбирлаб беришни ўтиниб сўрайди, бугун эса иложи бўлса туркумни мижозлар эътиборига ҳавола этиш бўйича кенгашмоғи лозим, шахсий кўргазма уюштиришини ортиқ чўзиш бефойда – имкон борида отни қамчилаб қолишга нима етсин, қолаверса, айрим содик муҳлислари қачондан бери янги асарларини томоша қилиш ва қувончига шерик бўлиш учун интиқ...

Орзиқиб Ҳомила қошига келган Мерган дувиллаб ёноқларини юваётган ёшини ти-йолмади, ўзи ҳам бўғзига тиқилган аччиқ йиғини ютолмай ҳиқиҷоқ тутгандек ҳиқилларди, майин қовушган ифодалар ортидан хомуш боқаётган Нафиса билан сўйлашгиси келарди, ахир, энди энг яқин ҳамроҳи ва ҳамдарди шу сурат эмасми, бундан кейин иложи борича мудом шу ажиб хилқат ёрдамида қайғу ва қувончга тўла ўсмирлик онлари билан юзлашади, дафъатан ҳижрон ва армонга эврилган илк муҳаббатини ёдлаб ўй суради...

Ҳомила дастлабки куниёқ Апаллон йўллаган канизакларни ҳам маҳлиё этгани шубҳасиз, бундан истаганча фахрланса арзиди, қурилмани эса яна бир марта эринмай муфассал назардан кечириб, тасодифан кўздан қочган айrim каму кўстни охиригача меъёрида тузатиши лозим. Аммо отинг ўчгур телефон атай ўчакишган каби бунга йўл қўймади, кўхна дунё айвони ёниб битаётгандай бўғилиб чинқиради. Узук-юлуқ хириллоқ овозни танимади, салла деса калла келтиришдан тоймас шотирга ўхшайди, курмагур анча ҳовлиқма экан, аввал хабаркаш бўлиш насиб этганини айтиб оғиз кўпиртириди, сўнг омади чопгани муносабати билан қавмдош оғалари олдига дастурхон ёзаётган Тўра Охун муҳтож одамга оёғини ҳам кесиб беришга тайёр зот эканини чулдираб узоқ таърифлади, келгусида кайвони чўнтагида борини қизғанмай сочар экан,

масалан, дастлаб истироҳат боғиу ҳовузи билан бирга етимхона қуради, сўнг уни замонавий мебелдан тортиб қиммат картиналар билан жиҳозлайди...

Чарх ишлари нақадар ғаройиб, қачондир Қора тулпор жиловига эришгани шарафига, ғурури ва ифтихорини ичига сифдиролмай, дasti узун валломат йигитлар сиртлони камина дея керилиб, Носир Охун бутунлай ўзини кўйвориб эриганди (ўшандада орқаолдига қарамай, хурмачаси ёрилар даражада ичиб роса таъзирини еган), қуш сутидан бўлак ҳамма нарса иттириқин сочиб ташланган зўр зиёфат довруғи қанча вақтгача тиллардан тушмади, харажатни ўшандада Зокир Фиёсий ёки Азлар Ниёз қилгани бошқа масала, қолаверса, бу жиҳатини бирор билса, бирор билмайди.

Анчадан буён Қора тулпорни гижинглатиб минаётган Тўра Охун ётти ёт бегонадан ҳам бегонароқ укасидан қолишар эканми, қуюқ ва мазали мақтовга тўймай, шоҳу бутоҳи қайрилиб қолиши, шашти эса синишидан чўчиб зигирча ён бермаса керак, адашиб нетиб бирон деворни тепса, хазондай шовуллаб энанг ўлгур пул тўклилади, демак, дупни кетган тақдирда ҳам обрў кетмасин, одам боласи аслида шу нарса билан тирик-да...

Чиндан ҳам гирд тевараги яшил девор билан ўралган майдонда Тўра Охун тузган улкан давра ғаройиб эртакларда таърифланган, оғиздан олов сочадиган афсун-гарлару афту боши бўялган тили етти қарич масҳарабозлар иштирок этадиган шоҳона базми жамшидни эслатарди, давра узра саховатли осмон чексиз кувончу сурур билан йўғрилган файз ва шукуҳ ёғдиарди, шунга яраша қопчиқларга солинган тўёна ва совғасалом беҳисоб бўлиб, бир неча шотир ҳисоб-китобга шўнғиганди. Карнаю сурнай садолари бутун шаҳар ва ҳатто осмон гумбазига қадар ишғол айлаганди, факат майдондан сал берироқда бўйлаган чор тарафи очиқ, ёғоч устунлари ва шифтига нақш ўйилган тўрт бурчак шийпонда тиззалаб дир-дир қалтираётган банда шодиёна шаънига ярашмай турибди, ким бўлса ҳам оғир чўян фул бўйни ва бутун борлигини эзғилаб юборганди, шунчаси камдек, тепасида яшин тилидай липиллаб калтагу қамчин ўйноқлайди, қошлари чимирилган Санам эса, бемор жонга шифо ва мадад бўлур дея шивирлаб, қуруқшган оғзидан гулгун шароб қўйиш билан машғул, аммо бир қултум ҳам ютолмай нуқул ўғжид ғулдирайди...

Санам соядек йўқолгандан кейин чексиз афсус ва надомат акс этган заҳил қиёфани таниди, ақл бовар қилмас, наҳот маҳкум ростдан ҳам Тўра Охун билан бир товоқдан овқат еб ўғсан Носир Охун бўлса, атиги бир ҳафта ёки бир ой муқаддам у одам сукини қўзговчи Қора тулпор нисбали уловни савлату виқор тўккан кўйи миниб юрмасмиди ёки каттаю кичикни оғзига қаратиб айюҳаннос солмасмиди, мана энди нечун аҳволи бунчалар хароб, нечун бирор эшитмайди арзи додини, бунақада ҳадемай ўлжа излаб юрган азоил элтиб лаҳадга тиқиб ташламасми, эй қодир эгам?!

Чексиз ҳайрат ва шубҳа ичра ўзини жавоби тайину нотайин минг хил саволга кўмб ғижинди, қўлига ғадир-будир тўқмоқ тутқазишган фурсатда қоқилган қозиқча ўхшарди, буниси жуда ошиб тушди, тавба, тантана майдонига ўтишдан аввал разолат ва хиёнат бандаси додини бериши зарур экан, шундай қилған тақдирда омади чопиб, Тарвуз домла, Зокир Фиёсий ва Азлар Ниёз каби аллақачон эътибор қозонган ақли расо каслар ёнида учаворага қўшилади, акс ҳолда бориб лайлак ҳайдасин, довруғи тобора ошаётган кимсан Тўра Охун пойабзали гардига ҳам лойиқ эмас...

Қон юқинқираган оғиргина тўқмоқ билан шундоқ ҳам мажақланган афту башара-га туширдими ёки бунга ботинмадими, гангид қолгани боис, кейинча сира эслолмади, ҳатто недир куч майдон сари судраганда ҳам ақлу ҳушидан жудо телбага ўхшарди, қақажон Санам кулгилари сехри билан омихта мастона овоздан беихтиёр сергакланди. Оч пушти камзулу оқиш шимда савлатига савлат қўшилган Азлар Ниёз майдон тўрида вақтингча тикланган безакли саҳнани эгаллаб, баҳт ва омад қуши саркашу магрур эканлиги, бўш-баёвларни писандига илмаслиги, марду майдон зотлар сояи давлатида улғайиши ва қанотларини кенг ёзиб учиши хусусида ўзи қоралаган машқларни жўшиб куйлаётган экан; лекин уммон мисол қайнаб тошаётган даврада, пардаси авж мусиқа ва қўшиклар нашидаси эмас, қийиқ қўзлар таратётган сиёҳи ёлқин ҳукмронлик қиларди, ҳар доимидан кўра яхшироқ бўяниб-безанган малак ёруғ оламда мавжуд жами фирибу фитнани ягона нуқтада жамладим маъносида товусдек хиромон йўргалайди, юпқа лаблари ва шабнам чайган гул япроғидай тоза кафтлари орқали ҳавойи бўсалар йўллайди, ана шунда эсдан оғар даражада қиёмига етган ошиғу шайдолари баралла телбavor оҳ чекиб ёқа чоклашади...

Келиштириб тузалган қатор-қатор узун столлар күхна дунё кошонасига фақат фаровонлигу тұқылк үйрекларига асосланған саодат ва шодлик муносиб зебу зийнат бўлишини тасдиқ этаётганда, иштаҳа қўзғаётган турфа сархил нозу неъматлар орасида, зарҳал ёрлиғига кейинги оёқларида тик турганча кўкка сапчиётган, нимасидир кўтосга ўхшаш баҳайбат қоплон зарбланған дароз шишалар алоҳида ўрин эгалланғанди, фақат ҳар жойда бегонасираб кўнкайған ва турнаники тахлит узун тумшуғидан кўкимтири турун сизаётган жимжимадор нақшли матоҳлар нимайкин!?

Беихтиёр миясига қайноқ қон тепчиди, наҳот бу нарсалар ушовидан тушови қиммат, пиёда тугур отлиққа ҳам топилмас чилим бўлса, исқот қолгур қайси гўрдан келди, ахир, у нималиги ва қанақа қилмишу қидирмешларга қодир эканидан анча-мунча хабардор, жами ишқал сархонасига жо қилинувчи унсур хилига боғлиқ, агар тамаки ўрнида қора қарғиши теккан гиёҳ кукуни ишлатилса борми, шайтоний хаёлларга гирифтор этувчи макри ва азиятига ҳатто фил ҳам чидаши маҳол...

Нуқра ғорида дўзах азобига йўлиққан, миясида турли хил режаю дастур пишитган Тўра Охун бирон балони чамалаган, йўқса дарё тошидай қилиб бунча чилимни тизиб ташламасди, кайфу сафога ўч баъзи енгил мижозли мазадаҳан кимсалар, бежирим наякилар орқали аллақачон кўкнор тутунидан тортиб олишган чоғи, даҳанаки жангни қиздириб юборишибди, кошки улар товус каби хиромон Санам, сонсиз зарраларга бўлина-бўлина, ўша афсунгар турун билан бир қаторда, этлари билан суюклари қатларига кириб чиқаётгани ва томирлари бўйлаб оқаётганини сезишса!..

Барча кўнглини баравар овлашга ишқибоз Санам боши кўклирга етиб қувонаётган масти масрур Тўра Охун пойига қучоқ-қучоқ лола монанд нафис товланиб тўшаларди. Бугун фақат Санам эмас, ҳатто дунё ўзи ҳам кайвони атрофида гавҳар доналари мисол сочилиб ётарди, у, шу имтиёзни жами салобати ва таровати билан тўласинча ҳис этиш тилагида, гоҳ малакнинг елкаси оша сийнасига тўкилган бўлиқ соchlари, гоҳ Дўлворнинг мой суртилгандек ялтироқ тўши ва бўйини силай-силай, устма-уст қадаҳ бўшатарди, Азлар Ниёз баҳт ва омад қуши ҳақидаги қўшиғини такрор айта бошлагач, нигоҳини номаълум нуқтага қадади-да, олажуз қавми пешонасига азалу абад битилган Нуқра ғорини хотирлаб хўрсинди.

Гулдек бадан ва жилвакор соchlарнинг ёқимли атру бўйидан кайфига кайф кўшилаётган Тўра Охун чакаги тинмай сўйларди, зифирча гуноҳи бўлмагани ва нуқул савоб ишлар қилгани ҳолда, дўзах бир бўллаги саналмиш ўша маконда узоқ муддат чириалиб азоб чеккани, азиз ва қимматли умрининг энг хосиятли онлари бир кўриниб сўнган камалақдай беиз йўқолганини куйиниб изоҳларди.

Иложи қанча, жисмини буқкан ва қалбини жароҳатлаган барча кўргану кечиргани тақдир иродаси саналур, ёзукдан қочиб қутулиш қўйинлигини беш панжадек яхши билгани туфайли Мулла Ширин (нимагадир Тарвуз домла дегани тили айланмайди), Зокир Гиёсий ва Азлар Ниёз каби бир вақтлар пайини қирқишига тиришган ва тузлуғига тупурган зотлар тавбасини инобатга тутишни лозим топди, ҳатто энди худбинлик бобида ҳаддидан ошган ва бир неча марта белини синдирап даражада панд берган, олажуз қавми пойига мунтазам болта уриб завқланған Носир Охунни ҳам, гажирлик отидан тушиб тиз чўкса, албатта афву этиб сийлайди, сўнг хиргойини ванг қўйганча истаган томонига бадар кетаверсинг, агар мабодо бундан кейин тағин олдини кесиб ўтса ёки шаънига ярашмаган гап айтса аяши даргумон, энди бир йўла Дўлворга талатиб тинчитади, дарвоҷе, бир вақтлар ўзини Тарғил қора қонига бўягани ва бурдалаб ташлашига бир баҳя қолганини унугтан эмас, ҳеч қаҷон йўқолмас чандиқлар бор ҳамон баданида...

Тўра Охун одамзод умрини япроқдаги қуёш нури тегар-тегмас қуриб қолувчи томчи умрига қиёслади, шуни ўзак ҳақиқат санагани боис, ҳар сония ва ҳар соатни ғанимат билиб, бутун олажуз қавмини қўллайди, шу қавм қўлидан туз ичган иқтидори юксак, меҳру оқибатли зотлар, айниқса, нафосат меҳробига сажда қилувчи жамоа ёнида бўлиш бурчидир. Мудом шу жамоа дарди ва қувончи билан яшайди, ҳамир учидан патир сифатида Афродита номида хусусий мукофот таъсис этилди, таклиф юқорида маъқулланғач, ажойиб тимсол соф тилладан ясалиши учун керагича маблағ ажратди. Нақадар аянчли, аввалги ҳайкалча қалай ва бринж каби арzon маъданлар қоришмасидан мендан кетгунча эгасига етгунча қабилида қўйилган экан, бариси майдада-чуйдасигача чиғириқдан ўтказилди ва бу ҳолни Носир Охун батафсил шарҳлаши лозим...

Жағи толиққан Тұра Охун бир муддат сукут сақлади, сүнг үтмас қилич билан әз-гулиқ дүнёсини ишғол қилишни чүтлаган худбин бандаларни мазахлай кетди, мангуда баҳор шукухі ва тароватидан баҳраманд ўша дүнёға ўзи ҳайратта молик әзгү амаллар орқали кириб боради, ҳайрли ниятини тушунишни истамай қовоқ солаётган ва думи юлинган фаҳмсиз хүроздек бемаврид қичқираётган ичаги әгри нодонлар чучварани хом санашибди, аслида тутантариғи йүк ўша зормондалар атиги бир мүйига ҳам арзимайди, бариси ўлат теккан дардисар қашқирлар галаси янглиғ қирилсін!..

Аччиқ ичақдай чўзилган ваъзини кўтаринки руҳда қизишиб якунлаган ва бир зарбда қадаҳ бўшатган Тұра Охун бўйин томирлари ўқлогоидек бўртиб чиққанди, ғалати тамшаниб қўйгач, чилим тутунини газак қилди, устидан яна ўткир май сипқоргандан кейин, бурмача ёқали ҳарир либосда бадани оҳиста диркиллаётган Санам сари ошиқона на зар ташлади-да, елкасига бошини қўйиб ғингшиётган Дўлворни кучоқлади ва хотиржам пинакка кетди.

Энди Тұра Охун ачқимтири турун билан сезимлари оша вужудига кўчган Санам ёрдамида ҳаво симираётганга ўхшарди, айни пайтда, ўзи ноchor ҳазон ёки бир гард каби малак олами – сиру синоат ва афсунга тўла кўнгил иқлимига тушиб қолганди, сүнг ғашиқиб ҳура бошлаган Дўлвордан ажралди-ю, бир ёнга қийшайиб хуррак тортиб юборди, шуни кутиб тургандек, анча ошиб қолган меҳмонлар ҳам жимгина қунишиб мизғишиди, ҳатто давра аҳлини кузатиб энсаси қотаётган Комрон Вали, қирғоқча чиқиб қолган балиқ каби оғзини каппа-каппа очиб эснагач, суварак ўрмалагандай аъзои бадани вижирлаб мудрай бошлади...

## 26

Теграсида салобат билан шовурсиз айланәётган ва кўп ғалваю ғурбатдан огоҳ этаётган кўхна дунёни атиги бир дам унуди, сўнг бирор силкигандай ногоҳ сергакланиб, қулочини ёзиб оҳиста керишди, ҳамон борлиғи музлаган каби караҳт бўлгани учун қимирлашга кўрқарди, охири бўйни аралаш кўксига бўлиқ соchlар занжирдек чирмаштида, таҳир майга қаноат қилмай, хўриллатиб наяки сўрди. Суюқ олов билан бирга вужуди ва ҳатто руҳини асир этаётган турун аслида даврани бошқараётган Санам нафаси эмасми, фақат бу ҳақиқатни эътироф этиш малол туюлмоқда, ҳатто ўша тушунчани миясидан қувиб, ҳушу бехуш ҳолда еттинчи осмонга кўтарилади ва умбалоқ ошиб қуйига шўнғииди, шўрлик жони эса қил устида...

Зиёфат якуни можарога уланди, кўз ўнгидага бирор патлари оппоқ қарға, кимдир пўстлоққа ёпишган жунли курт, аллаким сабзи ғажиётган қўёнга эвриларкан, бурнини жийирди, сўнг мен кўнглим султони бўлдим дея ҳайқириб жўнади, коронғи кўчаларда Санам совға қилган матоҳни қўлдан кўймай санқиб юрди, амаллаб эшигини топганда саҳархез хўролзлар оламни бошига кўтариб жар солаётганди, ташқарига термилавериб кўзлари тешилаёзган Мерганни чўлл-чўлл ўпгач, ғалати қийшанглаб хиринглай бошлади.

Шайтонни учраттандек тутикаётган Мерган қулоқ-чаккасида шовла қайнатишни чўтларди, аммо буни лозим топмай ҳоврини босди-да, ийгитлик лафзини бузмак имонни сомон бозорида пуллаш билан баробар эканини таъкидлади, тикандек ботувчи кесатиқ чивин чақанча бўлмай, лаби чети билан илжайиб, сирланган сурп тортилган ёғоч дастгоҳ сари юзланди. Қўланса ҳиди деворлар, матолару бўёқлар ва картиналарга сингиётган кўкиш тутундан тўйиб шимиргани сайин хаёли ажабтовур қанотланади ва ҳар қандай қудратли рақибни ер тишлатишига қодир шердек кучу ғайратта тўлиб боради, аста-секин содиқ најоткорни учратганига ўзини тамом ишонтириди, тез орада у бўёқ сеҳргари бўлиб танилиши ҳамда қадим дунё қиёфасини ўзгартириб юборадиган қашфиётлар қилишида бемалол қўллаши мумкин...

Наякини яна устма-уст хўриллатиб сўрган маҳалда ногаҳон устахона дид билан жихозланган муҳташам сарой бўлиб кўринди, шифтда баҳайбат биллур қандил осилиб турагди, шундоқ рўпарасида эса, ним пушти ва оч жигари қўланка жимирламоқда, қўланка Санам нигоҳидаги сиёҳи ёлқиндан сирли ва исёнкор туюларди, ҳатто зиндандан баттар Нуқра ғоридан мардона кутулиб юзи ёруғ бўлган ва Қора туппорни гижинглатиб минаётган Тұра Охун кўнгил үйини безаган эътиқод эхромига ўхшайди, яъни ҳар доим ҳам насиб этмас бетакрор тимсол бўлса ажаб эмас, шундай экан, имкони борида қунт-чидам ва айрича маҳорат билан уни матога иншо этади, у намоён этаётган жо-

зиба Тўра Охун ва Санам қалбини эгаллаган дуру гавҳар қадру қимматини бўрттириб кўрсатишга хизмат қилиши лозим.

Худо ёрлақаб анча мукаммал лойиҳа топилди, энди орқасини совутмай зудлик билан ижрога киришмоғи зарур, фақат аввал ҳурмати учун бир марта Мерган олдидан ўтсин, агар у холисона оқ фотиҳа берса кони фойда, нафаси кесишига имони комил, аммо Мерган бугун чап ёни билан турғани нима бало, гап учини чиқарган ҳамоно, сопқондек бетига сачради, тумшуғи остида мушт дўлғагач, дўриллаган товушда дангалига кўчди, иштиёқи қўзиб жуда истаётган экан, ўша лойиҳа устида иш бошлиши мумкин, фақат аввал имони, орзу-умиди ва эртасини дафн этиш учун кўксидан қабр қазимоғи лозим...

Гарданига зил калтак тушгандек эсанкираб, ҳамон тутикаиб хўрсинаётган Мерган оғзига жимгина термилди, суюгига қадар тешиб ўтган тагдор сўзлар мағзини чаққандан кейин кайфи тарқаб, зўриқиб безовта тепаётган юраги тўхтаб қолаёзди, сўнг бехол вуҷуди тариқдек тирқираб сочилиди ва ягона доира ичра йиғилди, кутилмаган ажаб ҳолат хуфия ва ошкора тарзда қайта-қайта такрор бўларди. Кўпинча бариси еру осмон орасини чулғаган тиниқ шуълалар шарораси ичра кечеётганга ўхшарди, ўзини ва дунёни унугиб кўярди, сўнг эзгу ниятим йўлида жонимни курбон қилмоқчиман деб ўйларди ва орада неча марта хаёлан кечмишга бориб келди, баъзан эса хаёлини хусусий кўргазма масаласи ўғирлаб энтикарди.

Туркум эрта иншооллоҳ назарга тушади, умуман панд бермай, чинакам сурур ижозиба ҳикмати, зоҳир эмас, ботинда пинҳон бўлиши, ёруғ олам билан ичкаридан алоқа ўрнатишини яққол исботлайди, қолаверса, туркум таркибиға кирган ҳар бир асар вужудига тамоман пайванд бўлиб кетган, ҳатто пушти камаридан туғилган фарзанди каби азизу қадрдон эрур. Фақат ҳозир наҳот кўзлари алдаётир ёхуд наҳот сархушлик оғушида чалғиди, ҳайтовур заҳираси қаторида турган йирик бир картина бегона туюлди, кўкси ғалати қалқиб тушди-да, афту боши Тўра Охун ва Носир Охун рафторига ўхшаш икки бақувват қора кўчкор ўртасида кечеётган муросасиз жанг ва тепада тумгадек кўзлари ғазабнок чақнаб юзаётган кўкантой тасвирига полу ҳайрон тикилиб қолди.

Нотаниш картина эса асло ётсирама, ахир, маним томирларимда қайноқ қонинг ва меҳринг оқаётир маъносида шивирларди, анча мураккаб қурилмасида мужассам мақсад сийрат орқали маромида нурланиб турарди, муҳими, уйғун қовушган турфа бўёқлар чираниб шохлашаётган, ҳатто пахмоқ жунларигача интиқом найзасига эврилган қайсар махлуқлар шиддати, қаттол туёқлари остида қалашиқ беҳисоб майибу майриқ гавдалар ҳолати, пуфаклаб шилинган яралардан томчилаетган тим қизил қон пайдо айлаган кўлмаклар жимирилаши ва юксак маъволарда ўткир нигоҳи воситасида нафрату надоматини ошкор этиб қанот қоқаётган қийғирлар оиласига мансуб йиртқич күш важоҳатини оғишмай яққол ифодалабди.

Елкаси осмон тўшиғига тегиб-тегмай осуда учайдиган кўкантойга негадир кўпроқ интигу интизор термиларди, охири ҳар бир ҳужайрасига қадар ҳайрат ва ҳавасга эврилганини хис этаркан, йиртқич күш ажаб тарзда тиниқлашган бўёқлар заминидан узилди, сирли йўсунда чўғланган ўткир нигоҳи эса юраги боғига чиппа санчилди ва бутун борлиғи, ақлу идроки ва сезимларини сурурга мойил ҳарорат чулғади.

Наҳот куппа-кундузи туш кўраётир, ахир, илгари бутун заҳираси, ҳатто тобора қаддини тиклаётган туркум таркибида дилни ларзага соладиган бунақа мўъжизавий картина бўлган эмас, меҳрибон худойим ёрлақаб у қаёқдан, қачон ва қандай келди. Барча тафсилотдан аввалгидек Мерган бинойидек воқиф бўлса керак, ана, қувларча порлаётган кўзларини атай ўйнатиб ва оғзи қулогига этиб кулаётгани бехуда эмас, ҳозир мушукдай пинжига суқулади-да, кўнглига қўл солиб, ҳаммасини майд-чуйдасига қадар билиб олади, фақат ишқилиб сукут сақлаб жигига тегмасин, ҳайрият, бирдан тили тугуни ечилди, фақат лоффдан қоф ясади чамаси, лекин айтганларида зигирча ҳам ёлғони йўқ эмиш, бундан чиқди, гўрингга раҳмат нури ёғилгур падари арвоҳи тағин кўллабди ва орқаси тутиб мўйқалам суребди-да...

Мерган аллатовур ийиб ва рухланиб сўйларди, баъзан мўйқалам ва имон бутунлиги дунёни асрайди деган мулоҳазани қистиради орага, ҳар бир фикри сезимларини юмшоқ тебратиб ўтади, агар ижозат берса бу асар номи Кўкантой бўла қолсин, бундан маъқулини топиш қийин, адашмаса, Кўкантой худбинлик охир-оқибат адолат ва қадрни

паймол этиши, эзгулик кошонасини эса ёқиб күл қилишини ошкор этаётир, шу боис туркумга ярашади, ҳатто шахсий күргазмаси бекиёс шухрат топишини таъминлайди.

Фақат аввал күргазмани ташкил этиш лозим, бу борада Мерган шаксиз кўмагини аямаса керак, ҳатто меҳмону изломни сийлаш учун зарур харажатни кўтариш учун катта ваъда берган, эрта юзи шувит бўлиб қолмаслиги учун чўлга бўзчининг мокисидек қатнаётир ва дўсти кўй-эчкисини қандай боқаёттанига қизиқмоқда.

Анча илгари Аливой Салим ўзидан кетиб дилида умид майсалаши учун астойдил куч сарф этганди, кўпдан бери санъат музеини бошқариб ва баланд охурлардан ем ейвуриб гупайган акахон имосига маҳтал экани, омади чопиши учун беминнат қулай шароит яратиб беришини писанда қилгани ҳамон ёдида, умуман, орадан анча вақт ўтган бўлса ҳам дўсти кўйини пуч ёнғоқка тўлдирмагани ва аҳду қарорини бузмаганидан умидвор, аммо ҳамма қатори хом сут эмган банда эмасми, келинчаги суратини чизишни истамагани боис, тўнини тескари кийгандир, тўй ташвишига кўмилганини баҳоналаб дардини тузукроқ тинглаши маҳол ёки пича кутишга мажбур эканини айтиб оғзига урса керак.

Ҳадеб шубҳа остида эзилмай, ҳозир сим қоқиб авзойини билади ва шунга яраша қадам ташлайди, табиатан кўпинча бир қоп ёнғодай шалдирайдиган биродари дарҳол алоқа ўрнатди, овози гўшақдан дўриллаб эшитилаёттанига кўра, шашти ва шижоати баланд бўлиб, омади чопаётганга ўхшайди, чиндан ҳам онаси ўлмаган барно билан жуда тез чиқишгани ва иноқлашиб кетгани учун боши осмонда экан...

Юрагини ўша дилбарга багишлаган кундан бери ҳаётга қизиқиши ва муҳаббати янада ошибди, чироқ ёқилгандек руҳи ёришиб, хонадонига файзу барака ҳам, кувончу қадр ҳам қўша-қўша ёғилмокда, эътиборга лойиқ ажойиб ўзгаришларга жавобан, таникли рассомлар билан ошна тутинди, бўлажак ёстиқдоши эса чертиб-чертиб охири Азлар Ниёз билан ҳамкорлик қилишни лозим топди, вазиятни тўғри англаган валломат йигит мўйқалами биноиидек тобланганини исботлаб, буюртмани атиги ярим кунда қотириб адо этди ва мўлгина чой-чақа ишлади, хўш, жайдари Винсент Ван Гог, ўша мўмай пул сен кўтариб юрган қоринчани оғритармиди?

Аливой Салим бузилган рўзгорини бутлаш ва келгусида баҳту таҳти пойдевори мустаҳкам бўлишида бору йўғини аямай сарфлашга тайёр эканини қайтадан изоҳлай бошлаганда Комрон Вали қулоғи том битгандек овозини эшитмай кўйди, охири бариси ҳолвадек манзур дея минғирлаб, аста гўшакни улоқтириди, чаккасини қашлаганча пича хаёлга ботгандан кейин Кўкантоини чорчўпга торта бошлади, ғувиллаётган миясини эса кўргазма ташвиши банд қилганди, иложи қанча, қулай вақтини топганда димоги шишган ва унча-мунча рассомни патакча билмайдиган бошқон билан ўзи гаплашади, фақат у дардини тушунармикин, Тўра Охун билан қирпичоқ экани, Санамдан ўзини йироқроқ тутишини яхши билгани учун олдидан борса тишлаши, кетидан йўласа тепиши аниқ, хушомад тегирмонига сув қуишиш бундан ортиқ бўлмаса керак...

Ҳаёт йўриғи кўп қизиқ, қадамда бир ғалва бошқа бирини туғиб нафас олгани кўймайди, калласини гиж айлаган шунча ташвиш камдек, ана-мана тўй жонивор зипиллаб яқин келди, хўш, катта умид билан қовушаётган келину кўёвни нима билан қутласин, бирон арзийдиган совға харид қилиш нияти тинчлик бермаётир, аммо ҳар доимидек худо ғазабига учраган чўнтағи ўғри қоқлаб кўйган каби шип-шийдам, яқинда бозорга мўлжаллаб чизилган ва тасодифан сотилган картинаси пулини чойхонада атиги икки марта ўтириш қилиб қуритди, қани энди аҳволини билиб оғринмай қарз берадиган азamat топилса, унақаси анқонинг уруғи ҳозирги замонда ва мудом Мерган қўлига қарайвериб юзи қолмаган...

Аслида ҳозир йўргакда теккан касали жабрини тортаётир, сал узоқни кўрадиган бирон одам, эй гумроҳ, намунча калланг калу кўнглинг нозик деб кесатса, ўрнига ярашиб тушарди, ахир, ўшанда мундоғ танасига тузукроқ ўйлаб кўрса ва келинчак портретини ўзи эплаштириса ҳаром қотармиди, озгина вақт ажратиб шундай қилса биноиидек ютаркан, яъни қулинг ўргилсинг зўр тўёна соҳибига айланар экан, аттангки кечикиди, ғишт қолипдан кўчган, энди икки қўлини бурнига тиққанча сўлпайиб боради тўйга...

Бошқа нима ҳам қиларди, аммо нуқул ич-этини еб эзилиши бефойда, негаки, ўлимдан бошқасига чора топилади, эрта худо кўллаб бирон ўнғай йўли чиқиб қолар, ҳозир кўргазма ташвишини чекишдан бошқа муҳимроқ вазифаси йўқ, тезроқ отини қамчиласи керак, ахир, қолган ишга албатта қор ёғади. Кўргазма хусусида жиддийроқ

үйлагани сайин жисму жонида ажаб бир туғён бош күтараётир, сұнг дафъатан үзини шу туғён ичра күрди-ю, ҳар бир хужайрасида дастлаб дүмбира хониши, сал үтмай Охима маҳшаринг била ҳам етти дўзахинг куяр сатри жаранглаб акс садо берди, шу заҳоти остию устида зилзила қўпгандек устахона лорсиллаб кетди, қатор тизилган картиналар ҳам харакатга келди ва бариси туси ҳар хил ланғиллаган олову оташга бурканди.

Ёнма-ён турган Ғунча ва Ҳомила шаклу шамойилини исплоҳот қилишга мойил исён қамраб олганди, охир-оқибат ҳар иккала картина ёқут каби тиник алвон пардага ўралди, парда лов этиб чокидан айрилгач, бешик сари умидвор интилаётган Роҳила отин ва жарлиқда жавдираб ётган Нафиса қиёфасида мудхиш тақдир қолдирган излар яқол кўринди, муҳими, бояги сатр ботиний бўёклари улар кўзлари тубида чайқалаётган ала-му армон залварини ифода этиб товланарди; сұнг дилни ларзага солувчи нолаю афғон янгради, офтоб тушган лолазор янглиғ ловуллаб ёна бошлаган ифодалар қаъридан узилган тиник ёғдулар, илғаш маҳол қайсири нуктада туташгач, ногаҳоний шиддат билан айрича ярақлади ва охири гув этиб портлади.

Нақадар ғаройиб ва ҳайратта молик, ахир, шундай ҳолат нохосдан диллар қобигини тарқ этган дўлу жалалар мудхиш ёввойи тошқин бўлиб тириклик устига ёпирилган, гирмон дагдагаси ва Санам макридан задасираган қишлоқ силкиниб тутдек тўкилган, олажуз қавми оҳу фифони дуди фалак тоқига етган мотамсаро дамларда ҳам рўй берган эмасмиди ва ўшанда Санам ҳамда унга ошиғу бекарор бўлган Тўра Охуну Носир Охун каби олғирлар тантана қилиб айшу ишрат суришмаган эдими?!

Худойим шоҳид, ақлу хушдан жудо этиб, жонни сим-сим қақшатувчи ўша таҳлика энди матога нақш этилган мунгли қароқларда пайдар-пай сурон солиб кечеётир, қароқлар тубида мужассам қаҳру ғазаб, нафрат ва надомат қурдатли яшину гулдирак бўлиб ҳамма ёқни титратмоқда, аниқроғи, ўша кезлар эндинини бўз йигитлик палласига кирган Комронбой кўнглида илдиз отган тоғдек оғир дарди қаттолни фаол намоён этган жонли ранглар бемалол наъра тортаётганди.

Аста-секин ранглар исёни кўксига кўчди, бу исён тоабад тақрор бўлиши хаёлидан ўтиб ғалати орзиқиб қўйди, чексиз қийноққа мубтало этган орзузи ушалгани, яъни бировлар аллақачон унугтан, лекин ўзи унумаган толотумлар даҳшатини тирилтира олганига яна қайта-қайта имон ўғирди, эрта шахсий кўргазмаси келаси кунлари билан туташган кечмиши ва айниқса ўсмирлик фасли тўғрисида ажаб ҳикоятлар сўйлаши, чучварани хом санаб юрган Тўра Охун ва Санам дунёсига ўт қўйиши муқаррар, ҳай-ҳай, ана шунда етти пуштига татиидиган овунч туйса керак...

## 27

Туркум таркибиға кирган картиналар ботини ва зухурида ақл бовар қилмас исён муттасил давом этаётир, ҳарир ёғдулар ажаб тарзда кенгайиб кетган устахона чор та-рафига ҳовуч-ҳовуч ёғилмоқда, ҳамон бариси асосан Ғунча ва Ҳомила борлиғида кечарди, ахир, бу икки асадар, факат Роҳила отин ва Нафиса эмас, умри охирига қадар толиқмай жаҳон кезган шоири аъзам қалб нидолари ҳам зарбланган...

Ҳамон қирмизи-пушки пардага чулғанған Ғунча ва Ҳомилага тикилгани сайин кўксида ажаб ғурур уйғонади, ахир, моддий бўёқлар билан бирга, кўнгил ва ақлу идрок, ҳатто ҳаёлот рангларини кўра олгани ва уларни бирлаштиришга эришгани чинакам мўъжиза эмасми, айтсанг биров ишонмайди, ҳатто бағри кенг ва нигоҳи тийран Мерган ҳам шубҳа қилиши мумкин, шов-шув кетидан қувадиган Аливой Салим йўриғи бўлак, бунақа вақтда қизиқарли мақолага асос бўладиган озгина далил یиғади-ю, кўп миясими ачитмай қалам тебратади ва улоқни илиб кетади. Кўпинча ярамагур атайлаб бир тоғора ёлғон-яшиққа атиги бир чимдим рост кўшади, шу одати энсасини қотирса-да, сирли кашфиётини қаламга олиши ва илдизини очишига рози бўлиши мумкин, факат ҳозирча янги оила қасрини қураётгани сабабли бу хусусда чурқ этмасин, ўрни келса, яъни кўргазмаси иш бошласа албатта гап кўзғайди...

Бугун кечкурун қўш қаватли маълуму машҳур ресторонда никоҳ тўйи бошланур, эслагани кўп яхши бўлди, факат ҳамон куриб кеттур совға ғами кўндаланг, тўғри, агар икки қўлни бурнига тиқиб сўпплайиб борса осмон узилиб тушмайди, факат дўйту душман кўзига тузук эмас-да, жилла курса бир даста гул билан қутлаши лозим, мана бу бошқа гап, ахир, шундан зўр тўёна борми ёруғ дунёда, нечун илгарироқ миясига келма-

ди. Фақат бу ёғини қандоғ тушунсин, кулбаи вайронаси яқинидаги дўконда фақат алвон бинафша сотилаётган экан, улар тароватини сақичдай чайнаб кўкларга кўтараётган жононга зидан қаради-ю, Мерган қисматига алоқадор бўлган аломат тушни эслади ва дардини айтди, супув қиз индамай қовоқ соларкан, худо буни биной ҳусн билан сийлабди-ю, ақлу фаросатдан қисиби-да дея ачиниб, катта бозор сари лўкиллаб жўнади.

Лекин овораи сарсон бўлиб чарчагани қолди, бу ерда ҳам сидирға алвон бинафша тикилиб кетганди, умидини узмай, товоналари қавариб шаҳар кезди, тозидек изғисада, самара бўлмади, ҳамма ёқни ҳадсизу ҳисобсиз ўша хил чечаклар тутиб ётарди, димоги чоғ маству масрур мижозлар ипак ленталар билан боғланган нафис дасталарни талаша-тортиша қиммату қирон нархларда харид қилишиб, қайгадир ошиқаётган йўловчилар ва ҳатто бир-бирларига улашиб хандон отишарди.

Садағанг кетай, қодир эгам, юкори амал эгалари амру фармони билан шаҳарда алвон бинафша сайли бошланган шекилли, ёшу қари тўйиб-тўйиб ҳидлаётган тўқ гулобий латофатли гулбарглар нақадар майнин ва тиник жилва қилаётир, фақат бу жозиба сехрида пинҳон нарсадан аттандиги улар тамомила ғофил...

Падарига қусур, пароканда хаёллар оғушида ўпкасини қўлтиқлаб етиб келсаки, базми жамшид аллақачон авжига минибди, сал-пал нафас ростлагач, баҳту тахтинг қасри бошқа лат емасин маъносида Аливой Салимга аста бош ирғади, оппоқ либосга ўранган келинчак чиройига маҳлиё куёвтўра кечикиб келганига ишора бериб мушт ўқталгач, пирқ этиб кулди-ю, тириклик бўстони муҳаббат ва вафо чашмасидан чанқоғини қондириши, аксинча, хиёнат саҳросидан эсувчи ҳижрон шамолида куриб-қақшаб қолиши устида кечаетган сұхбатга аралашди, бас, сариқ чақага қиммат айрим тахмину хулосалари билан баҳсни боши берк кўчага киритиб қўйган турқи совук жўжакхўроларни четга суриб ташлаши лозим.

Фақат Мерганга берган ваъдасини бекор бузибди, майдада анча тортган эмасми, даҳанаки жангда фаол иштирок этолмади, ҳар қанақа ҳужуми тўсиққа учраб, тикан устида ўтиргандек ғашлана борди, энди бекорчи мардикор каби ортиқ пашшалашиш ноўрин бу ерда, битта-яримта банда дилини оғротиб қўйиши мумкин, буниси майли-куя, бирдан хўрлиги ошиб қасофат тошқинни эслаб бўзлаши, гул япроғидек нозик дилларда яна дўлу жалалар тўплана бошлаганини шарҳлашга тушиб кетиши, қисмат уйини мунтазам таҳлиқага гирифтор этувчи зарурат ва тасодифларни маломат қилиб сўқина бошлаши чакки-да. Ростдан ҳам обрўси ва иззати битди, келин-куёвга муҳаббат завқи ва қувончини тилаб аста жилади, фақат не ҳолки, ногоҳ оёқлари тош боғланган каби оғирлашиб қимирламай қолди, ҳадемай эшиқдан кибру ҳаво билан безовта алантлаган кўйи Тўра Охун ва Санам етаклашиб кирди, изларидан қора аралаш оқимтири юнг қоплаган бўйнига зумрад баргак тақилган Дўлвор калта думини ликиллатиб бафуржга йўргалаб келарди. Илдам югуриб илгарига ўтган ҳайбатли бўрибосар асабий ириллаб сархуш йигитлардан бирига суйканаркан, шодиёна ва қувонч нашидасидан ному нишон қолмай, бутун давра тизгинсиз бўрон учирган ғарам мисол тўзғиди, капалак нусхали бўйинбօғ боғлаган жиккак ва сергап ўртакаш узок жавраб бир оз тартиб-интизом ўрнатган чоғда, шундок ҳам сархил нозу нeyerматлар билан безатилган дастурхонни қоринчасига митти баргли гиёҳ зарблangan, силлиққина наякиси учидан тарам-тарам кўкиш тутун сизаётган чилим тўлдирганди.

Бекитикча фармойиш бўлгандай, шундоқ ҳам алжираб қолган меҳмонлар чувиллашиб чилим сари талпинишиди, ҳаял кечмай ақлу ҳушларини шайтоний нашида ихтиёрига топширишгач, хуфия кўз уриштираётган Тўра Охун билан Санам қўлида нимасидир кишини айрича мафтун этадиган алвон бинафша ёқутдек товлана бошлади, сўнг улар юмшоқ кула-кула қизиган давра бўйлаб айланишиди ва сехри тобора ортаётган чечакларни эҳтиром сақлаб жавдираётган келину куёвга тақдим этишди...

Салгина наридан барисини юрак ҳовучлаб кузатаётган эмасмиди, руҳида гувиллаб бўрон қўзғалди-ю, ҳозироқ бино ер қаърига чўқадигандек шошманг дебон бўғилиб қичқирди, чексиз хавотир жамланган овози эса, номаълум куч тўсган каби, ачишаётган бўғзида сўнди, афсусланиб тамом караҳт тортгани етмай, ногоҳ ипақдай майнин сочлар чирмашди бетига, момикдай оппок кафтда нажот вайда қилганча чинни пиёла соқин жимиirlарди, сурмали қийиқ кўзлар эса, мириқиб нўш айла тезроқ, у, оддий шароб эмас, меҳр ва ихлос манбаи эрур маъносида тусланарди.

Қийик күзларда пинхон маъно гумонли туюлди, шундай бўлса ҳам чурқ этмай ва бир зарбда лим-лим чинни пиёлани бўшатди, қаршисида кула-кула жон сўраб турган нозик ниҳол паривашни суюқ олов билан кўшиб бемалол ютиб юборганди, сўнг қонини аллатовур тафт қиздирди-да, туйкус кўпчиликни аллақачон еттинчи осмонга йўллаган ва яна мижоз кутаётган чилимга талабгор бўлди. Силлик наякидан бурқираётган илимсиқ тутун руҳи равонини мулоим аллалаб эркаларди, сўнг қуюқлашиб қат-қат пардага эврилди, вужудини хасдек комига тортди-ю, рўпарасида ола-чалпоқ кўланкалар билан ойдин шуълалар чулғаган кенг тўқай жамол очди.

Поёнсиз ўнқир-чўнқир саҳрои кабирга ёндош маконда борлигу йўқлик жам бўлганга ўхшарди, эрталаб ва кечкурун кўёш оташин лабини оҳиста уфқ гардишига босади ва ҳар қаричда недир инқилоб рўй беради, ранглар ўзаро жой талашаётган дамда шалвироқ тожи дуркун жуссасига ярашмаган хўroz омонат катакни тарк этади, тиззалари қўтирилаб оқарган ва мен қичқирмасам тонг отмас маъносида кериладиган дакангвой тинмай гўнг ва сомон титкиларди, охири зериқди чоги, тузукроқ эрмак топиш пайига тушди-ю, чирий бошлаган хом терини қитирлатиб тимдалаётган сариқ қўнғиз қошига шошилди, охири уни бирон кор-ҳолга яраши мумкин бўлган ноёб молни илматашик қилиб ташлаган ғаламис деб атади ва шартта чўқилаб тинчидти.

Дакангвой ҳаддидан ошган газанда таъзирини бериб қўйганига зифирча шубҳа қилмасди, айни шу хуносасини ёру бирдарлари билан бўлишиши истаги оромини бузди, омад ҳамда ғалаба фақат ўзига буюришини ўйлаб, мамнун ҳолда лўк-лўк чопар экан, панадан отилиб чиқкан тулкивой паҳмоқ думини ликиплатиб йўлини тўсди, тўқайда хуфия қиликлари билан маълум ва машҳур бўлган догоули, иркит нарсани кўргандек ижирганиб, бечорани митти жонларга озор берувчи жангариilar қаторига қўшди, ёруғ дунёда сенга ўрин йўқ тарзида қўшимча қилгач, илкис бўғзига чанг солди ва патларига қадар қолдирмай ғажиб ташлади.

Оқу қора ичра қўзи пишган тулкивой барисини ҳовлиқмай енг ичиди битирди, сўнг ашаддий муртад пайини қирқиб қўйганини тўқай жамоаси ўртасида тарғиб қилиш бўйича режа тузишга киришди, нуқул кичиклар соябони бўлиш бурчи экани устида бош қотиргани боис, тишлари айри ёлдор сиртлон изидан тушганини пайқамай қолди.

Улкан ғалабадан умидвор пайлари чайир сиртлон еру кўкка сиғмай астойдил шишинарди, бақувват панжалари билан ўт-ўлан қоплаган ерни тирнай-тирнай, хўрозни матонатли ва адашмас жарчи сифатида хурматлаб келганини исботлашга тушиб кетди, шундай содиқ ва захматкаш дўст ёди учун қайғурмаса тинчимас экан, катта хато қилган нияти қилвир тулкивой ҳозироқ пойига йиқилиши лозим.

Мазали юмшоққина этга тўйволган сиртлон фитнаю айёрлик уругини бутунлай қуритганига амин бўлди ва тезда ўзини тўқайдга осудалик бўлишини таъминлаш учун ҳар қандай тажавузкор додини бериб қўядиган валломат қасоскор деб эълон қилди, фақат бу қарори оғир-босиқлиги билан танилган қўнғир айиқ иззат-нафсига тегди, тадбиркор ва укувли тулкивой ўлимини катта жудолик деб баҳолагач, бир муддат инида мотам тутиб, дийдасига ўрнашган донғи ювиш тилагида ҳамон тумшуғини кўтариб юрган сиртлонни ҳаёт-мамот жангига чорлади.

Олишавериб ҳолдан тойган, бўйни ва бели синиб, қора қонига бўялган сиртлон охири айиқ луқмасига айланди, кутилмаган айрилиқ хабарини эшитган йўлбарс дарҳол аза тутди, мотам маросимида қатнашган оғаларига сиртлонни мудом оғирини енгил қилиб келган матонатли ва ботир суюнчиқ сифатида қизишиб таърифлади ва нафас ростлаб улгурмаган очофат айиқ танобини тортиб қўйгани отланди.

Навбатдаги тонг отгандан кейин савлатидан от хуркадиган икки забардаст маҳлуқ телбаланиб роса олиши, ҳайдалган пайкалдек остин-устин бўлган майдонда бирбирини йиқолмай бўғишиб туришганда, фалак бир бурчини тарк этган улкан ёритқичдан саҳраган шарсимон учқун тўғри келиб тўқай қоқ ўртасига қўнди, ҳаял кечмай ундан ҳайбатли олов қочди, вишиллаб кўкка ўрлаган ёнғин аввало ўзини ёқди, сўнг жами ҳўлу куруқ ва қочишига улгурмай қолган барча жониворни домига тортди...

Худо қарғаган ва кули кўкка совурилган тўқай барисидан ғоғилдек нафас олмай жимгина мудраб ётарди, вақт кечгани сайин ҳар неки қувончи ва қайғусидан узоқлаша борди, фақат кўпинча мағрибу машриқ чопари шамол ҳар қанақа ўлик унсурда ҳам тириклик нишонаси мавжуд эканидан огоҳ этиб муттасил оромини бузарди. Шамол увиллаб эсганча уволу савобдан яхши хабардор кекса овчи тўплаб қўйган суюкларни

қум ва тупроқ билан шиббалаб кўмди, алал-оқибат бир вақтлар айиқ ва йўлбарс бир-бири билан курашган майдон ўртасида майда эхромни эсплатадиган дўнглик тикланди, ҳадемай у юксалиб айрича салобат касб этди, баъзан нимадир хусусда вазмин оҳангда арзи ҳол қиларди, баъзан эса тебраниб нола чекарди.

Кўклам фаслида ёғин-сочинга тўйган тепалик ям-яшил ўт-ўлан кўрпасига бурканди, нафис япроқлари кўм-кўк дуркунгина ниҳол алоҳида ажralиб жадал ўсаиди, қуёшни эма-эма вояга етиб, ҳайбатли дарахта эврилди-ю, вужудида жамланган қудрат ва иштиёқни изҳор этмоқчидек, кўхна дунёни бошига кўтариб шовқин солди, ногоҳ шунда қулоч етмас силлиқ танасига зарблangan ҳилол тахлит тумор ва бежирим дастали ханжар сирли товланиб кўзга ташланди ва ҳар икки тимсол турфа ғурбатдан чўпчак айта бошлади.

Фаройиб дарахт навбатдаги баҳорда узоқ муддат хотиржам мириқиб ухлаган паҳлавон каби энтикиб уйғонди, меҳру муҳаббатини нисор айлаб чараклаётган қуёшга бағрини кенг очиб чамандек гуллади, шоҳу бутоқларни чирмаган шода-шода беҳисоб туксиз ғўралар покиза яшил дур янглиғ тиниқ жило сочарди, беҳисоб ғўралар жуда тез етилиб, тилни тилим-тилим айлагувчи шираю шарбатга тўлди ва атрофни тилладек сарғайиб ҳил-ҳил пишган нашвоти иси қоплади.

Қай маҳалдир қарға ёки майна ғужурлаб чўқилади чоғи, бир дона йирик нок чирт этиб бандидан узилди, сўнг шабнам чайгандек беғубор барглар оралаб қуига шитиршитир шўнғиб, ҳайрат ичра анқайган ва кўзлари кувнаётган Комрон Вали қаншарига гупиллаб тушди, зарб анча кучли бўлганини зътироф этиб мундоғ қарасаки, ғира-шира ёришган жимжит устахона деворига суюниб ўтирибди, совуқ еган одамдек дағ-дағ қалтираётир, кучоғида – сархонаси олови учмаган ва наякиси ачимсиқ тутун пуркаётган чилим...

## 28

Мехрибон худойим кечирсин, елкасида омонатдай лиқиллаб турган ва тарс ёрилгудек ҳолда сирқираб оғриётган хумдек оғир бош ўзиникими ёки бошқа биронники шунчаки улаб қўйилганми, қурмагур сапчадек узид ташланса нима ютқазади, қирқоёқка ўхшаш нарса ғивирлаб миясини кавлагани сайин ажалига минг бора рози бўлаётир. Айбни эса бирондан эмас, фақат ўзидан қидирсин, бариси учун яна шаксиз ўзи сабабчи, ахир, қайда ўтирганини хис этиб нафсини жиловласа бир йўла ҳаром қотиб қолмасди-ку, худо қарғаган дароз шишага қаноат қилмай, чилим деган балога ёпишиб олгани қанақа сурлик саналур, бас, ривоятдаги пасту баландни фарқлашда укувсиз филай шогирдан кам ери йўқ экан, бир куни ўша барака топгр кўзига битта шиша жуфт бўлиб кўринади, қачонки, ўлламай-нетмай уни чил-чил синдиригач, ҳақиқий аҳволни билиб<sup>7</sup> афсус чекади, лекин кейинги пушаймон сут айламас-да. Ҳозир ўша ривоят мағзини яхшироқ чақиши учун Мерган билан тортишгиси келаётир ёки рутубат қоплаган шуурида ҳалигина гавдалантган тўқай ҳангомаси устида баҳс курсинми, шундай қилгани маъкул, фақат аксига олиб дардисар телефон чириллаб юборди, боши пақкос ёриламан деб турган пайтда қайси гумроҳ ўйқлаётир, ишқилиб орада илгари ҳеч нима кечмагандек, Тўра Охун соясига эмин-эркин кўрпача тўшаётган шоколадхўр Тарвуз домла, бу борада ундан қолишмай йўл туваётган, ҳатто Қора тулпорни ялтиратиб ювгани эринмай навбат кутадиган Зокир Фиёсий ёки Азлар Ниёз бўлмасин...

Сим қоқаётган одам хайрият буткул нотаниш экан, ийманиб ва тутилиб сўйлашига қараганда, оқу қорани эндиғина таниётган, мўйқалами ҳали тузукли ўнгланмаган ҳаваскор чамаси, ҳайтовур ғойибона муриди эканини айтишни унутмай кўнглини кўтарди, тинмай сиз билан етти иқлимни пиёда кезиб чиқиш ва ҳатто жаҳаннам сари боришига ҳам тайёрман деб ғулдиради, фақат холис ниятда ёнига тортса, қимматли вақти ва меҳрини аямай, маҳорати сирларини ўргатса ва истеъододини пешласа кифоя...

Темир қонунларни муқаддас сановчи мурид азбаройи ихлос туфайли мунтазам пейзаж қоралаб машқ қиларкан, аммо тушида бўйин тасмасига зумрад баргак осилган, Тўра Охун билан Санам қўлию бетини ялаётган Дўлвор аён бўлгандан бери бу юмушдан совубди, энди эртаю кеч тинмай уларни тўлин ой ёки бошқа бирон номаълум сайёра сатҳида сайру саёҳат қилиб юрган ҳолатда тасвирлаш билан шуғулланади, ахир,

<sup>7</sup> Мавлоно Жалолиддин Румий.

бунақада шаҳардан бутунлай бадар кетиш ёки ақлдан озган каслар шифохонасига тушиб қолиш эҳтимоли йўқ эмас ва кўпроқ шу тарафидан доғда...

Охирида бешбаттар ҳовлиқкан мурид ўпкаси узилгудек хўрсиниб ва ҳиқичоги тутиб, ботинмай йўл-йўриқ сўради, энди ҳар бир каломи маҳзун янгарди, ҳартугур бу ёғи ошиб тушди, хўш, биродар, ўзингни симёғочга осгин ёки ҳар иккала қўлингни электр арра билан кесиб ташла ва барисидан тоабад қутул десинми, йўғ-е, бечорани ўтакаси ёрилар даражада кўрқитиши мардликка ётмайди, мундоғ корига ярайдиган жўялироқ маслаҳат бериши лозим, фақат жаннат боғу роғлари насиб этгур волидаси бунақа ҳунарга туғмаган-да...

Охири энсаси қотиб тили алланмаётганини сезган мурид ақли ишлаб алоқани шартта узди, тўғриси, гўё елкасидан тоғ қулаб илжайди, аммо телефон тинч қўймаслик учун қасам ичгандай яна жиринглади, тавба, етти ёт бегона яна бир ҳаваскор рақам терибди, гап-сўзидан пихини ёрган ва юлдузни бенарвон урадиган чапдастга ўхшайди, йўқса Санам отлиғ париваш меҳри ва ихлосини қозонганини қайта-қайта айтиб мақтамасди.

Омади чопгани шуки, ҳали баданига жир битмай, ҳар кечада ўша соchlари сунбул оғатижон қўйнида эркаланиб ишқ эртагини тинглайди, тонг оламни оппок сутга чайган ҳамоно кулгисидан уйғониб, айрича илҳом билан күёшга тикилиб хураётган ёки барқ уриб очилган алвон бинафшазор қоқ ўртасида дўмбиллаган қанжиқни искалаётган Дўлвор ҳамда шу ажойиб жуфтлики кузатиб завқланаётган Тўра Охун ва Санамни чиза бошлайди, айни шундай мазмунда яратилган ўнтача кўркам асари танловга жалб этилди, агар бу ёғида ҳам худо қўлласа, Афродита ҳайкалчаси соҳибига алланур.

Кўпчилик эртасига ишонч билан қараётганда, тавба, қорни ўзидан бир қадам олдинда юрадиган Тарвуз домла ноёб истеъодини шўрлаган девор тагида занглаб ётган ўрокқа қиёслагани нимаси, капангни лўлилар талагур ҳар қанақа масалага сукма қошиғини суқиб турмаса энаси талоқ бўлса керак-да, мияси қатиги ачиган шу қари тулкига қолса ёруғ дунёда Зокир Фиёсий ва Азлар Ниёздан бошқа беданаси сайдайдиган рассом умуман йўқ, ахир, сўппайган бир-икки дарахтни ўрмон дейиш лўттивозлиқ ва кўрлик эмасми, исбот талаб қилмас бу ҳикматни яхши билса ҳам эътироф этмай нуқул писиллайди, мабодо тан олса-нетса сатанг хотини чўлтоқ супурги билан уйдан қувласа керак-да...

Оғзи бедарвоза ҳаваскор фикрларини бўлмай тинглаб, кулгисини аранг тийди-да, минғирлаб омад тилади, рости, икки гапи бирида санамлаб эсидан оғаётган шу дум-булвойга ҳам қийин экан, майли, атала-патала ичса одам бўлиб қунини кўриб кетар, энди қайси шоввоз жигига тегаркин, аслида уяси бузилган қушдай безовталаниб сим қоқишаётгани бежиз эмас, Тўра Охун ҳомийлиги остида ташкил этилган танлов бугун тушдан кейин поёнига етади, муносиб асари йўқлиги боис ўзи унда иштирок этмади.

Ўғилбола гап шу: бунга зигирча ҳам хафа эмас, фақат Тарвуз домла билан ҳамтовоқлари қаллоблиги очилиб қолишидан чўчиб панага қочишни афзал билди тарзидаги маломатни катта қозонда қайнатиб ётишгани нозик жойига қаттиқ ботаётир, шулар дастидан дод! Кўргазмага бирон нарса тақдим этишини истамаган экан, жиддийроқ сабаби бордир дейдиган мард топилмади, фақат Азлар Ниёз телефон орқали бижғиган катагингда туллаган кўпракдай бўғилиб ўлмасдан бурун ёруғ дунёга мундоғ тузукроқ қара қабилида кесатгач, бирдан пайтавасига курт тушди, инсоф юзасидан жилла қурса якуний босқичдан хабардор бўлса зарар қилмайди...

Кечалари тушларига кириб чиқадиган санъат музейи биноси яраклаб кўринган заҳоти тўқ ургандек туюлди, ахир, қачондан бери шу кошона бағрида туркум мижозлардан оқ фотиҳа олишини тилайди, келажак сари йўлини туркум шу даргоҳ бўсағасидан бошласа ажаб эмас, фақат аввал бир қанча тўсиқни ўйқотиши, масалан, бошқон дийдасида юрак ўрнида ўрнашиб олган бир парча музни эритиши лозим...

Қўш табақали бағдодий эшиқдан ҳадиксираб мўралар экан, ногоҳ ғашлик аралаш лоҳасликка чулғанди, жиҳозлари ҳавас қўзғовчи ҳашаматли ёп-ёруғ зал эмас, зиё ва сурурдан мосуво, рутубатли изғирин уфураётган ғира-шира олам билан юзлашганди, сўнг азалу абад бир-бири хизматига шай бўлган, бир-бири қонини сўрмаса тинчимас, ҳатто мондимас шуҳрат ва хушомад қиёғаси жадал суръатда хомумата акс этирилган беҳисоб картина қошида турганига имон ўғирди, каттаю кичик барча асар курилмаси замирида аввало Санам жамолига ошиқлик завқу шавқи ва нозу ишвалари-га хайриҳоҳлик истаги ётгани нақадар ҳайратга молик...

Ҳадемай даҳанаки жанг бошланса, бетингда кўзинг борми демас айрим қопонғич билагонлар барисини мажақлашса керак, фақат ундан бўлмади, айнан мантиқий мувозанатни бузган, туйғулар ўзанини тескари томонга буриб юборган ранглар эҳтиромли юмшоқ оҳанглар билан кўкларга кўтарилиди, қўйиб берилса санъатни томорқам дейишдан тоймас Тарвуз домла айниқса товушига эрк берди.

Оғзига бир бўлак тахта шоколад соглан Тарвуз домла баъзи сабабларга кўра уйқуга кетган бўёқ ва мўйқалам атиги биргина туртки билан сергак тортганини мароқ билан эшилиб изоҳларди, барисини мириқиб тинглаётган Тўра Охун қайта-қайта мамнун кўл силкиди, сўнг бир неча картина қурилмаси марказини эгаллаган келишган қомати, сув париси қиёфасида боши узра муаллақ қанот қоқаётган Санам рухсори, оёқларини эркаланиб елкасига тираган Дўлвор савлатига орзиқиб назар ташлади, ҳар бир чизигига дабдаба нафаси қоришган ифодаларга тикилиб тўймасди, фақат бундай тасвир манзил сари етиши маҳол чўгиридан фарқ қиласлиги, забонига кишин урилган бўёқлар суврати ва сийратини борича талқин қилишни эплолмай ширасиз ёғоч каби қотиб қолганини қаёқдан ҳам билсин.

Жаги яхшигина қизиган Тарвуз домла ҳамон ҳеч кимга ён бермай бошқа томонда ўтлаб юрарди, охири Тўра Охун буюртмаси ўзагини огишмай топишда ҳеч ким Азлар Ниёз олдида ип эшолмаганини исботлаш учун назария уммонига калла ташлади, кўпгина зийрак нигоҳли мусаввиirlар, ҳатто Зокир Фиёсий сингари азамат ўғлон нишонни аниқ олишда адашган экан...

Нозик диду ўткир фаросатга суняниб, азобу укубатдан чўчимай мардона изланган ва бетакрор ижодий йўналишига асос соглан Азлар Ниёз илоё доим томири сувга етган дараҳтдек кўкарсин, эрта соясида яхши одамлар бемалол соялашлари, фақат эзи эмас, етти пуштини ҳам дуюи хайр билан сийлашлари шубҳасиз. Дунё эса азалдан бири кам-да, йўқса шундай буюк қувонч ёнида буюк ғусса тоғдек юксалиб турармиди, аслида бу ҳақда сўйлаб ўзи, бутун жамоа вақтини ўғирлаши ва бошини оғритиши но-жоиз, аммо виждони тинч қўймаса нима қилсин, сўз қандайдир қобиққа ўралиб олган гумроҳлар устида бораёттир, шулардан бири Комрон Вали эрта албатта бадном бўлса керак.

Кўпиклаган оғзига яна бир бўлак тахта шоколад тиққан Тарвуз домла инида мудрайвериб очиқкан айиқ мисол тамшанаарди, сўнг кўнглида йиғилган ҳасратни охирги томчисига қадар тўқмоқчидай, бадном сўзини тағин икки маротаба оҳангга солиб тақорлади, кажава қорнини минбардан узаётуб лаби чети билан сокин илжайди-да, сал нарида тавозе сақлаб мамнун мўлтираётган Азлар Ниёзни кучогига тортди: Афродита ҳайкалчаси иродали йигит илҳомига илҳом қўшажак, бундай саодатни фақат гулдирос қарсаклар билан нишонлаш керак, жаноблар!..

Заҳару зардобга тўла пичинглар изидан ҳайриҳоҳ тарзда янграган хитоб ғолиблик ва ифтихор нашидасини изҳор этувчи сурону қийқириқлар билан қўшилиб кетди, ҳаяжон босган мухлису муридлар кутловни бир-бирларидан ошириб айтишга уринишарди. Фақат йигинга не-не умидлар билан ясан-тусан қилиб келган Зокир Фиёсий оёғига болта тушган кимсадек бўзрайиб қолганди, иложини топса беҳад долзарб масалани хамирдан қил суғургандек оппа-осон ҳал қилган, тирноқча уялмай-нетмай номини қора ерга тиқиб юборган Тарвуз домлани ҳозироқ бўғиб ўлдиради, кўпчиб оқарган чехрасида изғиётган соялар камина олдида Азлар Ниёз чивинча ҳам курбати ва ҳурмати йўқ олчоқ эмасми тарзидаги маънони англатарди.

Тарвуз домла нақшинкор мўъжаз сандиқчада олиб келинган Афродита ҳайкал-часини, боши узра кўтариб, намойиш айлаган ва қувонч ила Азлар Ниёз илкига топширган дамда бирор пихилаб сўқинди, дағал овоз алоҳида ажралиб янграгани сабабли ҳалидан бери устозга қойил қолиб қараётган Комрон Вали бирдан сергакланди, сўнг нигоҳи патак соқолига панжа ураётган Мерганга тушди, нафрат ва надомат сояси изғирди бирордари бетида, салдан кейин энаси байталлар дея ғурданиб, анчайин бўйчан ва энли тахтани ёпган кўкимтири пардани аста шифиллатиб бир томонга сурди.

Негадир дарҳол замирида дашту далаларга хос вазминлик жамланган осудалик чўқди, кўп ўтмай теран сукунат таърифга сиғмас қандайдир туғён аралаш талотум етаклаб келди, ўз тилида сукунат ҳайратомуз ҳикоят сўйлагани сайин безовталик тобора кучаярди, сўнг бутун бино таги ва устида алланарса гулдирашиб, биллур қандиллар хиралашди ва яна чарагон бўлиб порлади, бир неча баробар кенгайиб кетган муazzам

зал эса қутураётган түлкін киғтидаги кема каби оҳиста чайқалиб, баланд шифт, гумгурс девор ва айланна устунлар зийнати саналмиш нақшлар шитирлаб палағза-палағза тұқила бошлади...

Залда не ҳол кечәётгани қоронғи, бошқа кишилар қатори ажабланиш ва худодан түзим тилашдан бошқаchorаси йўқ, салдан кейин тарсаки еган болакай мисол қизара-бўзара довдиради, ахир, наҳот боя Мерган томонидан пардаси тортилган гирдлари жигари тусдаги таҳтада елимлаб кўйилган картина сирли тарзда туғилган, дилига чўғ солиб, бошини қувончнинг еттинчи осмонига еткизган Кўкантой бўлса, худо ҳақи ишониши қийин, куппа-кундузи оёқ устида туш кўраётганга ўхшайди...

Аслида эса ростдан ҳам қаршисида ҳаёт ва мамоти саналмиш туркум мазмунига алоҳида бадиий салмоқ юқтирган ўша асар йирик олмос парчасидек жило сочаётганди, ҳайрат ва ҳавас ичра қизиқсиниб кузатаркан, ногоҳ борлиғи тасвир билан бирлашди ва қаттол түёклар остида эзилган гавдалар ёнида беҳол жуссага эврилди. Илкис аллатовур оҳанрабо таъсирига тушшиб қолган картина ва бутун жисми биргаликда нурланарди, охири ажиб маҳобат ва сирли жозиба касб этиб жимирилай бошлаган қурилма чегарасига сифмай тирқираб сочилиди, ўша заҳоти жисми қайгадир учиб тушди-ю, ногоҳ жазирама ёпирилган каби бутун зал тандирдек димикиди.

Мана энди тобора қизиётган бўшлиқда ҳеч балодан тоймас аламзада саркаш кўчкорлар маъраши, мунтазам тарзда аёвсиз тўқнашаётган темирдек қаттиқ шохлар қасирлаши, түёклар остида қолган ва сяякларига қадар эзилган бемажол фуқаролар оҳу фифонлари янграрди. Кўчкорлар маъраши тинган пайтда, қурилма юкори қисмида ҳам сирли инқилоб кечди чоғи, поёнсиз мовий осмон акси пичоқ тортилган бўздек қақраб йиртилди, пўстак йиртиғига ўхшаш эгри-буғри ёриқлардан майнин куқунлар тўкилди ва тасвир намоён этган ниҳоя билмас ниҳоя ботинидан потирлаб Кўкантой узилиб чиқди, сўнг зални фақат күш уясида бўладиган нимтатир тер ва пат ҳиди тутди, баъзан эса қуриган тезак ва шох-шабба иси анқиб қоларди. Кўкантой довулу бўронда тобланиб улғайган жонзот эканини билдириб кўймоқчидай ёввойи овозда тинимсиз қичқириб учарди, бир неча чақирим наридан ҳатто чумолини кўришга қодир тийран нигоҳи билан ҳар бир қарични узоқ синчиклаб кузатгач, жами шижаоти ва журъатини ола-чипор қанотларига жойлаб қўйига ўқдек шўнғиди-ю, ҳалидан буён бир-бири пинжига суқилиб ҳангуманг бўлаётган Тўра Охун билан Санам узра чарх уриб айланаверди.

Тўра Охун наздида, атиги тўрт-беш газ баландда, важоҳати бузук йиртқич күш эмас, замону макон билан келишишни истамас нафаси совуқ ва қаҳри қаттиқ ажал фариштаси юзётганди, ўтакаси ёрилгани боис, оддий томоша кўраётгандек бепарво кулаётган Санамга қайрилиб қарамай, ёрдам қылгани тапир-тулир чопиб келган шотирлар кўмагида панага шошилиб, бунақа балою қазодан ўзинг асрарин тарзида бир неча марта ғулдиради.

Тўра Охун бошини чангллаган пайтда, нигоҳи бошқача чақнаётган ва ҳайбатига ҳайбат қўшилган Кўкантой эса шитоб юқорига ўрлади, сўнг янада қаттироқ чинқириб, азроилни кўргандек бўзарив қолган Тарвуз домла сари ташланди. Иштонини ҳўл қилган устоз қаёққа қочишни билмасди, рўпарасида илкис сультанган чангак панжаларни яқол кўргандан кейин айниқса нафаси бўғзига тикилди, кучли зарб, сяякли билан бир қаторда, шуурига қадар сирқириатиб юборди, фақат тузукроқ оҳу воҳ дегани ярамай, пешонасида оқишу сарғиши соққалар ўрнида пайдо бўлган қонталаш ўймоқчаларни кафти билан аранг ёпиб кулади, қачондан бери олажуз қавми қасдига шаҳарда нафосат ва эзгулик боғини пайхон этиш учун бел боғлаган иблис – ёвузлик хуфияси изғиётганини дудукланиб айта-айта ҳушидан айрилди...

Қайси бир хилватда ўрнашган, кечакундуз яширинча изғиб нафосат ва эзгулик боғини, ҳайрли юмушлар билан машғул кишилар ҳаётини ҳавфу хатарга кўяётган иблис ўзи бўлса керак, фақат нимагадир Тарвуз домла номини тилга олишни истамади, лекин каттаю кичик, хусусан, ичидан пишган Тўра Охун ким назарда тутилганини англади, энди вазият тамом ўзгариб, калава бешбаттарчуваланди, курмагур Мерган нечун олиб келди экан Кўкантойни бу ерга...

Ростдан ҳам шов-шов қўзғайдиган ва тоабад эсда қоладиган ақл бовар қилмас ғаройиб ҳодиса рўй берди, ҳамон Тарвуз домла оёқ-қўллари тортишган кўйи беҳуш ётиби, гоҳо бирдан ўзини ўнглаб, тош юракли ўша иблис мени еди, сен гумроҳларга ҳам навбат етур дея ғудранади-да, сал нарида ҳангомани жилмайиб кузатаётган Санамдан кўмак тилайди, малак индамай лабларини буриб жўнагандан кейин яна тинчиб қолади.

Панада аранг жон сақлаган Тўра Охун эса бутунлай хону мони куйган одамдай дарғазаб, аммо Қора тулпорга етишгандан бери суюб келётган устоз аҳволи оғирлигини эмас, Кўкантойда пинҳон ҳайратга молик тилсимни ўйлаб хуноби ошаётир, картина қурилмасини кузатгандан кейин айниқса хўл ўтингек тутаб ёнди, ер ютгур Носир Охун калласи билан бирга, ўзиники ҳам кўчкор танасига уланган ҳолда чизилганини ва ҳар бир ифода тошқин арафасида вужудга келган тараған ҳолат, бинобарин, не-не бегуноҳ ва мискин бандалар бағрини бийрону дилини вайрон айлаганини бот-бот ёдига солаётганини ҳазм қилолмади...

Тош қотган ва тилу жағдан айрилган жамоа ниҳоят сир тагига етгандай оҳиста чайқалди, Санамдан нажот кутаётган Тўра Охун ҳамон муз остидан чиққандек титраётир, охири дунёга ўт қўядигандек чакчайиб, Кўкантойни бурдалашни буюрди, кўпчилик бехосият тимсолга қиёслаган картинадан ному нишон топилмагач, ҳар бир туки найза мисол тикрайди-да, Комрон Вали тумшуғига мушт тиради: гўрингни ўзингга қазитаман! Фазаб ва истехзога йўғрилган овоздан қулоги қоматга келиб, хаёли олисларга учди, саксовулига қадар қовжираган, қатра сув ёмбига тенг поёнсиз чўлда, афту башараси чуйкалган саҳрои ғандалар ёнида, терлаб-пишиб ўзи учун қабр кавлаганини ҳалига қадар унугтан эмас, ўшанда ҳам дил амри билан чизилган биргина сурат сабабчи бўлган барига...

Тақдир экан, яна даҳшатли жазо кутаётир, буни мижозлар боқишида акс этган шубҳа ва таассуф ҳам тасдиқ этмоқда, қовоги солинган Азлар Ниёз сен ўз пўстига ўралиб ўладиган маҳлуқсан тарзида кесатди, аслида шу баҳона камина иқболу шуҳрат осмонини қучдим, юрагини қурум ва лойқа босган сен қайсар лўттивоз эса тубсиз надомат ҷоҳига қуляяпсан демоқчи бўлди, балки у чиндан ҳам хақдир, қодир эгам?!

Мўл-кўл қувонч ва ифтихор бир жиҳатдан татимай Азлар Ниёз ичини қиринди сидираётир чамаси, ахир, суянган тоғи ва ишонган боғи саналган зот ажал билан олишаётган қалтис пайтда ҳатто бирорвга лаб четида жилмайиб боқиши ҳам ярашмаса керак, (андишани унугтан Зокир Фиёсий эрта сен қари туллак жағини ўзим бойлагум маъносиди ер тепиб тўнғиллаган онда нақадар ўқинди), демак, ғалаба зиёфати бўлиши гумон, маслаҳат билан уни бир-икки кун ортга суради, битлари тўқилишига ишқибоз каслар шароитга қараб хулоса қилганини тушунишса керак.

Ер тагида илон қимирласа биладиган Тўра Охун гарангсиб хомуш турган Азлар Ниёз кўнглига қўл солди, ғолиб йигит Афродита ҳайкалчасини бағрига босганча икки ўт ўртасида қолганини сезиб жонига ора кирди, кўп хитланиб қийналма, ҳаётда қайгу билан қувонч ҳамиша эгизак келур маъносида хуфия кўз қисгач, файзи қочган ва дилларни хуфтон айлаган расмий маросим ҳадемай базми жамшидга уланди, жазавадор мусиқа ва кўпираётган шароб дафъатан оёқ остидан чиқкан фалокатни унугтишга чорлаётганди...

Ранглар заминини тарқ этиб Тўра Охун, Санам ва ҳатто бутун жамоа ўтакасини ёрган, Тарвуз домлани қароқларига панжа уриб қонига бўяган Кўкантой, тез орада насиб этадиган муқаррар жазо ҳаёlinи банд айлагани сабабли Комрон Вали зиёфатга қўл силтади, ахир, юрагига қил сиғмай бўғилиб турган пайтда хурсандчилик қилишга бало борми, ҳозир факат чинакам нажот баҳш этувчи эрмак топиши керак, кўнглини чирмаган ва бот-бот оромини бузадиган тугунлардан ҳалос бўлишни тилайди, тавба, баттар энсасини қотириб ким пиқирлаб кулаётир ёнида, оббо, чаккасига алвон бинафша қистирган Санам атрофида гириллаб айланётган экан, ярамагур ҳар бир лаҳзада минг байрам барқарор маъносида сузилиб қараётганди, нигоҳида чақнаётган сиёҳи ёлқин туйкус дилига кўчиб аҳди ўзгарди ва эзмаланиб Азлар Ниёз маҳорати ва ютуғини эътироф этаётган сархуш рассомлар сафига қўшилди, нечундир улар орасида бошқа сайёра фуқаросидек эсанкираб қолганди, ғойибона сирли таъқиб тагин ҳаёлинини ўғирлагач, хумор хуруж қилди-да, жиловни бўшатиб қандайдир доира ичра заррага эврила борди.

Зулмат чулғаган, нимасидир панжарадан иборат ўтовга монанд доира торайгани сайн лим-лим қадаҳни қайтармай оқларди, баъзан эса хўриллатиб наяки сўради, кўкимтири турун бир йўла кўнгил иқлими орқали бутун жисмини ёнгинга гирифтор этаётганини сезмай, ранг-рўйи кўпчиган Тўра Охунга ғилтилаб тикилади, рўпарада Санам кўш чўқиси диркиллаб рақс тушади, беихтиёр руҳланган кайвони малакни белидан кучади, мойланган каби ялтирай бошлаган соchlарини бўйнига ўрайди, яна ҳам кайфи ошган ҳолда жойига қайтган ҳамоно томирлари кўкимтири кафтларида олмосдек чараклаб жуфт юлдуз ёнади.

Дастлаб эътибор қилмай шунчаки елка қисди, сўнг ўгирилиб жиддий назар со-лувдикни, кўзлари қамашиб ажидишида туйди, сониялар кечгани сайн ҳайрати ошиб энтикарди, охири ҳеч бир таърифга сифаси ҳақиқий мўъжиза туғилгани, биргина ўзи эмас, бутун давра аҳлини мафтун этганига бутунлай ишонди, сархонаси чўғи учмаган чилимни кучоқлаб, баъзан ёрига ҳасрат қилган каби унга дардини тўкиб, устахона сари қайтганда, ўша тушунча бағрида илдиз отиб улгурди...

Кеча бўйи тинмай мириқиб наяки сўрди, ҳар бир ҳужайраси қўланса турун чангалида титранарди, тонг арафасида мизғиб, ўзини Азлар Ниёз берган данғиллама зиёфат тўрида, Санам чехраи малоҳатига тўймай бокәётган Тўра Охун ёнида кўрди, етилиб қолган кайвони, маним дилимни фақат сен ларзага сола олурсан дея бидирлаб, қайта-қайта омад тиларкан, бирдан шифтни бошига кўтарганча қаҳқаҳа отиб уйғонди.

Ҳамон кайфи тараңг эканига қизиқмади, ҳали ҳеч ким етмаган туббизизлик тубини ишғол қилмоқчилик ва шу баҳона номини оламга ёймоқчилик, мириқиб турун сими-рарди, охири нафси қонгандай туюлиб, оёқларида туролмагани сабабли дастгоҳ сари эмаклади, дастгоҳ жуда узоқда ўрнашганди, етгунча орадан минг йил кечди.

Кўнгли ва шуурини банд этган айрича илҳом кечаги базми жамшидга алоҳида файз ва шукуҳ бағишлаган юлдузли кафтларни кечикмай зарблашга ундаётганди, анамана лойиҳани хаёлан пишилди, ғойибда баъзан Санам овози янграрди, Санам билан сирлашиб бўёқ танлаш ва тайёрлашга киришди, худо ёрлақаб мўйқалам кўмагини дариф тутмаслиги, илҳом рағбат баҳш этишига умид боғларди, сўнг сабру қарори охирiga қадар бардош бериши ва нишонга аниқ уришини чамалаб, оҳорли сурпга бирон маъно англатмас хиёл юпқа чизиклар тортида ва туйқус янграган дилгирона чарс хитоб кулоқлари пардасини тешиб юбораёзди: имонинг ва кечмишингни дафн этгани кўксингдан қабр қазигин аввал, бандай гумроҳ!..

Ногаҳон бикинига бигиз санчилгандек чўчиб тушди, қаники ҳозироқ ер ёрилиб, жимгина қаърига қуласа ва баридан бир йўла қутилса, дор остидан қочган шумғия каби инсоф уйига ўт қўйди ўзиям, энди биродари бетига қандай тик қарайди ва дард устига чипқон бўлган айбини қандай ювади ёки Нафиса каби жардан учсинми?! Чексиз пушаймондан иборат аҳволи билан ўчакишган каби хумор баттар хуруж қилаётir, лаънатини даф этайн деса, зиёфатни тарк этар маҳали Санам берган чилим буғланиб кетгандек кўринмасди, жаҳли бурни учига қўнган Мерган уни эски кудуққа улоқтирган чамаси, куйиб-пишиб изласа ҳам ҳатто изини тополмади.

Энди тақдирга тан бериб, тишини тишига босиб чидайди, иложи борича мўйқалам билан овунгани маъкул, баҳонада туркум оламига қайтиб, айрим картиналар курилмасига жузъий тузатишлар киритади, биринчи навбатда Кўкантоj каму кўстини битирса бўлгарди, аммо иложи йўқ, музейда рўй берган ноҳушлиқдан кейин эҳтиёткор Мерган уни чўллик фидойи оғайниси қўлига топшириб келиби.

Муруватли эгам кўллаб аста-секин хумор чекинди, анчадан бери руҳини чулғаб турган зориқиши умид баҳш этувчи сурурга эврилди, сурур сезимлари оша бутун вужудини қамраб, руҳига қувват бағишларди, бениҳоя чўзилган сирли жараёнда гўё онадан қайта туғилди, устахонада эса фақат поёнсиз кенгликлар қўйнида бўладиган тароват сехрини намоён этиб бутунлай нотаниш картина бўйлаганди...

Худойим хабар бергил, фармойишинг билан у фалакдан тушдими ёки тупроқдан униб чиқдими, ахир, бунақаси йўқ эди-ку бисотида, аммо ҳарчанд бегона эканига қарамай дарди дунёсига жуда яқин туюлаётir, ҳатто ўзаро уйғун ранглари таратаётган эзгуликка ундовчи мусиқа садоларини жон қулоги билан бемалол эшитмоқда, чарх ғаму қувончларига уйғун тароналар ипакдай эшилиб янграйди.

Полу ҳайрон хаёл сургани сайн бўёқлар пайдо қилган ва чуқур маъно жамлаган шиддат тез суръатлар билан нурдек қалбига қўйиларди, натижада ҳар бир ҳужайрасига қадар ранглар асири бўлиб, пурвиқор тоғлар этагидан илгари босаётган карвон тасви-

ри ичра мустақил тимсолға үхшаб қолди, энди эски аравалар шалдираши, тепонгич отлар кишинаши, сигир-бузоқни оч нигоҳ билан таъқиб қилаётган бўрилар улиши кўксидা акс садо бериб жарангларди.

Латиф бир қавариқлик бутун курилма ботини ва зоҳирига тегишли мантиқни бўрттириб рўёбга чиқарганди, манзарани бойитган қиёмдаги куёш жами тафти ва шуъласини қайси манзил сари ошиқаётгани номаълум карвонга атагандек туюлади, укпар булутларни чимилдик қилиб тутган уфқ этакларигача ўрала-бурула чўзилган ола-байдоқ саф аслида машриқ билан мағрибни улаб турган беҳисоб ҳалқадан иборат арқонни эслатарди, кифтига шинам тахти равон қўндирилган улкан ташбақа шу арқонни судраган кўйи имиллаб ва ҳансираф илгари босади, кўкси ва бўйини тутган хол-хол доғлар замирида лоқайдлик ва ҳадик пинҳон экани, қўтиргаган харидек йўғон бақувват оёқлари оҳиста титраётгани, лаб-лунжида жам малол аралаш киноя учқун бўлиб теваракка сачраётгани сезилади.

Мўйқалам билан аҳилона ҳамкорлик қилган ранглар тошбақа шижоати ва куч-қудратини атайин яшириб, гумбазсимон қорамтири ва сарғиш косасида ўрнатилган айвонли кўшк тароватини бинойидек ёрқин кўрсатиби, кўшк ташқарисини безаган нақшлар, ичкарисида тўшалган кўшқават адресу кимхоб кўрпача, мўъжаз сандиқ ва турли бошқа ашёлар кўк гумбазини бекасам белбоғдай ўраган камалак билан ҳусн талашаётган каби майнин ловуллаб товланади, такрори йўқ жозибадор мулк оғушида хотиржам қўнган тулки сиёкли басавлат махлуқ, бир кўлида ингичка жилову бирида силлиқ заранг говрон, камина борки кўхна дунё қадрли маъносида кувларча сокин кулиб бораради...

Ногоҳ устахона шифти қисирлаб, эсу ҳушини йиғди-да, ҳамон хаёлни ўғирлаб, дилни қитиқловчи эзгин-эзгин залварли куйлар тарататётган Карвон (шундай атаса ярасар) сари яна ҳам қизиқсиниб тикилди, мураккаб қурилма латофати ва мантиқий йўналишини амалиёт нуктаи назари билан берилиб муҳокама қиларкан, ғаройиб кўшқда виқор тўкиб ўтирган боқиши сирли махлуқ безовта ҳолда қимирлаб қўйгани, ҳатто ёнимга кела қол дегандай юмшоқ кулгани ва бош иргаганини пайқади, ана шунда у кейинги пайтларда этига эт қўшилган ва сира тортинмай Санамга сунадиган Тўра Охунга үхшаб кетди, ёпирай, анчайин ғовлаган қомат, бир неча қатор ажин тушган ялпоқ пешона, арчилган тухумдек силлиқ рафтор ва зимдан айёrona бокувчи қўнғир кўзлар замирида кайвони олами яширинмиш...

Карвонни аллақачон Аполлон фаришталари йўргаклаб олишгани ва жозибаси қошида шошиб қолишгани шубҳасиз, ҳатто Карвонга тикилгани сайин ўзи ҳам ақлидан адашмоқда, буни яқол пайқаган Мерган мийигида сокин кулаёттир, демак, ҳар доимиги дек тафсилот сиру синоатидан яхшигина хабардор, барисини ипидан игнасигача билади, фақат бу гал уни эзғиланиб қийнову қистовга солиши шарт эмас, негаки, унча-мунча одам ақлига келмас ажаб жараённи энди ўзи яққол ҳис этаётир, яна кечани кундузга улаб, орқаси тутиб мўйқалам сургани, рангларга ҳукмини ўтказгани ва ҳар дақиқа ўзи билан ўзи савашгани аниқ, ҳар бир қалтис дамда эса Вали баҳши арвоҳи қувватлаб турган бўлиши керак, муҳими, кўксини тоғдек қўтарган Карвон, Санам нозу ишваларига учмай, қўнгли иқлими, яъни ўзи сари ботиний йўуллар орқали интилгани самарасидир, агар матога юлдузли кафтларни зарбласа шўрига шўрва тўкиларди...

Худо ёрлақаб Карвон туфайли туркумда, мундарижа ва мазмун анча кенгайгани баробарида, бадиий жозиба салмоғи ва ҳатто жанговар руҳ яна бир неча баробар ортди, Карвон намоён этаётган ҳажвиётга мойил драма бутун туркум, Фунча ва Ҳомила замирида пинҳон оҳу нолалар, изтиробу оғриқлар ва исёнкорлик билан ўйғунлик асосида бирлашса моҳият ўзаги ҳақиқий маънода жиддий құдрат касб этади. Энди шахсий кўргазма очиш ва турли тоифадаги муҳлислар билан ошкора мунозара юритиш учун чиндан навбат етди, фақат соясидан ҳам ҳуркадиган бошқон ҳамон юмшаган эмас, ақсинча, Афродита ҳайкалчаси шарафига бўлган танлов якуни мотамга айлангач, қовоқтумшуғи баттар осилди.

Кўнглига турли шубҳаю таҳлика оралаган бошқон кутилмаганда кеча эрталаб телефонда ёрилди, ўша кундан бери шўри қисиб, нуқул Тарвуз домла қисматига ачинар экан, бемаъни жумбоқ қошида Тўра Охун айниқса мисли йўқ қайғуда қолибди, падар қусур Кўкантой бир оқшом тушида кайвони эсхонасини чиқариб, кўзлари қолиб миясини чўқилаб еган эмиш, баъзан кундузлари тепада шахт или ҳайбатли қанотларини қоқаётганини кўрса, оғзидан кўпик сачратиб ва оёқ-қўли акашак бўлиб йиқиларкан, нашатир спирти ҳидламаса ақлу ҳушини ўнглаши душвор экан, ол-ҳа-а!..

Худо қарашди чоғи, шундок ҳам турли ғалваю ғурбат оғушида яшаётган шаҳарни вахима ва хавотир чодири ўраб, маҳаллаю мавзелар бўйлаб Кўкантой ҳақида бирбиридан қизиқ миш-мишу маломатлар ўрмалай бошлади, ҳар куни у қаёқдандир арвоҳ каби хуфия учеб келаётгани ва аллакимларни ёруғ дунёни кўришдан мосуво айлагандан кейин зумда йўқолиб қолаётгани оғиздан оғизга кўчуб юрарди. Аслида ҳар эрта ёки кечкурун Кўкантой кўксидаги ҳатто ўзига ҳам номаълум кўналғадан парвозга шайлланади, таҳликаға тўла сафар сари уни ўзи юрак ҳовучлаб узатиб қолади, сўнг айрим далилларни суриштириб ёқа ушлайди, негаки, энг муҳим аъзоларидан айрилган ва ғулдираб қарғанаётган жабрдийда каслар умр бўйи Санам чилдирмасига ўйнаган ашаддий жазманлар бўлиб чиқишиди.

Кўргазма тақдирини ўйлаб шошганида вақт ҳам шошиб, олисда бетоқат кутаётган улогини соғинган она кийикдай елаёттир, бугун янада жадал ҳаракат қилган қўёш муддатидан илгари қизариб ботди, кундузни таҳтидан суриб ташлаган тун пардаси жуда илдам қалинлашди, бағрида мудом яхши ва ёмон қовушиб урчидиган қоронғилик, фақат бутун борлиқ ва шаҳар эмас, дилини ҳам чирмаб бораради.

Айни фурсатда Тўра Охун нобакор Кўкантой дафъатан ҳужум қилишидан чўчиб асаби бузилаётгани ва кўрпага бурканиб худодан мадад тилаётгани шубҳасиз, тез орада Кўкантойни қидириб топиш ва бошқа асарларига кўшиб йўқотиш бўйича алоҳида топшириқ бергандир, ишқилиб қодир эгам бунисидан асрасин, кўп нарса шахсий кўргазма тақдирига боғлиқ, демак, ҳаялламай жумбоқ ечимини топиши керак, нуқул исқот қолгур санъат музейи залига оғзи сувини оқизмай, шаҳарда қаторлашиб кетган оқартув саройи ёки клублардан бирини танласа нимаси ёмон, айрим мижғовлар ба-шараларини буриштириб топган жойи латта-путта асраш учун ҳам ярамайди тарзида сафсата сотишгани билан неча пуллик иши бўлиши керак.

Кимдир сал четроқдаги жуда кўп қувончли воқеаларга шоҳид ўтган тарғибот уйини кўпиртириб мақтади, эринмай бориб кўрсаки, дидига мос тузукнина бошпана экан, ҳарқалай ғижинмай бемалол чидаш мумкин, фақат яқинда эридан ажрашган бир ходима билан донлашиб қўйган мудир думи тугилгани халақит берди, расмий идора томонидан ўрнига ким тасдиқлангани ва қачон иш бошлаши даргумон экан, майли, шу арзимас ғалвага ҳам ота гўри қозихонами, яхшиси бошқа манзилга бора қолади...

Кун сайин вахима кўзғаб шаҳар оромини бузәётган Кўкантой ёдига тушиб илжайди, ажабо, эрта-индин у Санам жамолини бир дам кўрмаса ва қўнғироқ соchlари тўлқинида чўмилмаса оромини йўқотадиган қайси гумроҳ додини бераркин, қанийди навбат бетига етти қават чарм қоплаган, бирон фойда кўрмаса қорни сувини қимирлатмас бошқонга етган бўлса, тезроқ шу муттаҳам сўқирллик ва надомат балосига йўлиқиб, ўрнини бўшатиб қўйишини тилайди.

Аслида эса ҳаммадан аввал, Тўра Охун билан бирга, қуюшқонга сиғмас қилмишлари учун Санам муносиб жавоб бериши керак, қани энди ҳамон бемалол макр тўрини тўқиётган малак кўчу кўронини орқалаб ёруғ дунёдан жаҳаннамга кўчса, аммо бундай ҳодиса рўй бериши маҳол, бир вақтлар уни йўқотиш учун Мерган не-не тадбирларни ишга солмади, аммо барча уриниши зое кетгани ва охири тўйдим дея қўл силтагани ҳамон ёдиди...

Санам қасдига худойим атаган бирон сийлов бордир деган ўйда бағри увалиб хўрсинган дамда, кибру ҳаво билан қоришиқ дўриллаган овозлардан хаёли бўлинди, сал нарироқда тўрт хушсуврат йигит отанг тўнғизу энанг байтал дебон ёқа бўғишарди. Хиёл жажожи кўн ҳамён можаро сабабчиси экан, ҳар бири, энг аввал илғагани боис, у фақат ўзига тегишли эканини исботлаш пайида чиранарди, панада қулай пайт пойлаётган чайир бола оёқлар остида эзғиланган ўлжани қўйнига тика-сола ҳакалаб девор ошганда, аллақачон қора қонларига бўялган даъвогарларни таниб бўлмасди.

Жангарилик ва сурликни бўйинга олган йигитлар аҳволни билишган ҳамоно бара-вар қутуриб соchlарини юлишди ва ҳамон Санам билан азроил муносабатини чамалаб ғашланаётган Комрон Вали сари масиқкан буқадек ҳезланишди, нуқул ризқу насибамизни сен муттаҳам ўмардинг, ҳозироқ инсоф қилиб қайтармасанг энангни учқўрғондан кўрасан қабилида томоқ йиртиб қичқиришарди. Нима қиларини билмай, гоҳ тутақиб, гоҳ энсаси қотиб ўзини оқлашга киришди, лекин бирон каломи зифирча инобатга олинмай, устидан мағзава ағдарилди, тумшуғига гурзидек муштлар тиralган пайтда, яхши

ҳам тўқсон яшар чолдек судралиб Аливой Салим келиб қолди, йўқса шаксиз ёлиб ё ўлмай гўрига думаларди.

Кўнгли ийиб айтган катта раҳмати нимагадир паришон боқаётган Аливой Салим қулоқлари остидан чивин визиллашидай ўтиб кетди, ранг-рўйи сомон бўлиб, қошу қовоқлари шишгани ва лаблари гезарганига қараганда, анчадан бери орқасини қўймай сурункали ичса керак, ҳозир ҳам бурнидан тортса йиқилар даражада сархушу сармаст экан, тавбангдан кетай, бекўним дарбадар каби кўча-кўйда санқиб юргандан кўра, онаси ўпмаган фунча даҳан сулув ёрини қучоқлаб ётмайдими гўшангада...

Кўча ёқалари, иморатлар пешидаги майдонлар ва хиёбонларни қоплаган алвон бинафшаларга бот-бот гумонсираб назар ташлаётган Аливой Салим ҳозироқ дорга тортиладиган маҳкумдек нуқул хўрсинади ва бу ёғи хуржун деб инқиллайди, қисқа сукут сақлагач, бирдан чакаги очилди-да, шодиёна садолари кўкка ўрлаган тўй кечасини лаънатлай кетди...

Ҳайратомуз жин базмию эчки ўйинига уланган қувноқ давра нақд ярим ошшомда якунланади, эртанги ойдин кундан огоҳ этувчи ёр-ёр ва лапар нашидасидан янада сархуш бўлган Аливой Салим сулув келинчакни, тарқала бошлаган меҳмонлар шоҳидлигига, қучиб ўпмоқчи бўлади, чаккаларига ял-ял товланаётган алвон бинафша қистирган қайлифи эса бирдан тўрсайиб четга суринади, сиз патагимга илашган гард ёки қилсиз маъносида олу лабларини буради-да, қировлаган соchlари силлиқ таралган Тўра Охун пинжига киради ва масрурона кишинаётган Қора тулпорда елиб кетади, ҳалига қадар бирон марта қомати туғур ҳатто тола сочини ҳам кўрсатмаган эмиш, эҳ-ҳей!..

Қирғоқ қаҳқаҳа отиб кулса, дарё бўзлаб йиглар экан, Аливой Салим дарё аҳволига тушган чамаси, балки чўплаган туюдек қамаб май симиравериб восвос балосига йўлиққандир, киртайган кўзларини лўқ қилиб лофдан қоф тўқиётган бўлиши мумкин, ахир, тўй олдида суратини чиздириб, тоабад азиз жонингни иситгувчи оташингман дея, булбулдек бийрон сайраган маъшуқа наҳот бирдан ёнғоқ тагидан ўтгандек айниб, тани ва юрагини ҳаргиз қарилигини тан олмай юрган Тўра Охун ихтиёрига топширган бўлса, азму қарордан тониш ва қадру қимматни йўқотиши шунча ҳам осон эканми?!

Аслида осон-посон эмас, аммо Санам қадами етган жойда замини фитнаю фасоддан иборат фалокат ҳамиша тайёр-да, ўзларини Санам билан эти тирноқ санайдиган жазманлар қашқир мисол ҳамма ёқда изғиб юришлари айниқса дард устига чипқон эмасми, боя котта холалари молу мулкини талашгандек, тариқча уялмай куйиб-пишиб ёқа бўғишиган саёклар юлдузни бенарвон урадиган ўша тоифадан экани шубҳасиз, тавба, тақдир такозоси билан тушиб қолган нарса ягона-ю, эгалик қилишга ишқибоз гўрсұхта эса бир талай...

Дунёйи кўтири, намунча ола ўйининг бисёр, охири бири бўлмаса бири одамзодни боши берк кўчага ўнглаб юборади-да, ҳартугур худо ана шунаقا тасодифу заруратга дучор этмасин, йўқса кулфат устига кулфат ёғилиб, кўхна дунё ўзини умуман танимай қон қақшаб йиглайди...

Нуқул маза-матрасиз хаёл суравериб толиқди, энди бунга чек қўйиб ва миясини тинитиб, яқинда маросимлар зали таъмир қилинган санъат литсейи томон шошилиши керак, янги тайнинланган мудир ҳаммага бирдек яхшилик қилишга ишқибоз одамшаванди киши эканини эшитди, иншооллоҳ ўша билан тил топишса бариси ўнгланиб кетади.

Йўлни яқинроқ қилиш ниятида анча илгари кўтариб ташланган токзору анжирзор ўрнида барпо этилган бозор орқали ўтади, чор атрофида мұхташам қаҳвахонаю ресторонлар, кийим-кечак ва темир-тақа дўйконлари ёмғирдан кейинги қўзиқорин каби бодраб бўй чўзган кенг майдон тинимсиз ғувиллаб асаб торларига тегарди; ажабтовур шиддат ва ҳовлиқишига мойил урҳо-ур тўполонда ит эгасини танимайди, қатор-қатор энли пештахталар ва палос тўшалган ерда қуш сутидан бўлак ҳамма нарса учрайди, иш кўзини пухта билган тижорат ахли бир-бирига гал бермай молу матоҳини кўкларга кўтариб мақтаганча харидор чорлайди. Тим остида ҳашам учун тикланган олти қиррали мармар супада ногоҳ пайдо бўлган мош-гуруч соқолли йигит дарров бутун жамоа эътиборини жалб айлади, қизиқиши ортиб ўгирилган дамда у кулочини кенг ёзиб, кечикмай кеб қолинг, бир париваш Қора тулпор соҳиби бурнига соглан бурундуқ фазилати ҳақидаги ичакузди латифаларни сув текин сотаману кетаман тарзида шанғиллаб бақира бошлаганди, анчайин йўғон овози тимни тешгудек даражада кескин янгардди.

Тобора қизиётган бозор бирдан совуди, ҳангомага ишқибоз мижозлар, ҳамёнларини дарҳол қўйинларига тикишиб, тиззаларига муштлаб қиқир-қиқир кулишарди, пул ҳиди

димоқларини қитиқлаб турмаса мазаси қочадиган олғир каслар эса, савдо-сотиқ хайру баракасини қочирған гумрохни эгасини танимас бўкироқ түя дебон уриб-сўкиб кувлашди, оғзи-бурни қонаган, бели лат еган ва шундоқ ҳам увада кийими баттар йиртилган бўлса ҳам у бўшашибмай айюҳаннос согланча ҳалиги гапини тақрорларди.

Охири чўтири бурни қарғаникидек сўппайган, ранг-кути учиб, қўй кўзлари киртайган тўпори йигитни кимгадир ўхшатди, сўнг бирдан юраги нотинч ўйноклаб, шўрликни қўлтиғига кириб сужди, тахмини тўғри эканига ишонч ҳосил қилиб, тоғораси тешик дунёда тирик бормисан, азиз оғажоним Шодмон Чўтирий дея ҳиқиллади-да, оқем тошган тиришиқ пешонасидан бир неча марта чўлп этказиб ўпди.

Кечаги кунига дахлдор арзидиган бирон эсдалиги йўқдай, йигит зифирча пинак бузмади, нуқул ён-верига безовта аланглаб, қавариб ёрилган қўлларини ҳавода дўлғаб бақиравергач, энсаси қотиб тўрсайди. Ростдан ҳам чалғиган кўринади, энди фақат ўзидан ўпкалаб, орқасига қарамай тирақайлаб қочиши керак, сертўполон бозор эса қўйиб юбормаслик учун аҳду қарор қилгандай борлигини занжир каби ўраб-чирмаётir, қадамда ақлу идрокни шоширувчи бирон галва рўкач қиларди.

Мана бу томоша айниқса антиқа экан, галла ва бошқа захира неъматлар солинган халтаю қоп, қути ва кажава тахланган, пештоқига йирик ҳарфлар билан бирники мингга, мингники туманга мақоли битилган айвон болорида улкан тарози муаллақ осилганди, олачаю бекасам чопон кийволган ориғу семиз кимсалар чувиллашиб, беш-үн ҳовуч сомон ва кепак ўйилган паллага қайрилиб қарашмай, жавоҳирли безакдор сандиқча қўйилган паллага тинимсиз зўр бериб юқ босишарди.

Елка қисиб этакроққа жилди, ажриқлаган томи ва девори нураган шийпон узра кабутару мусичалар дон талашиб чўқишиарди, қаёқдандир чаг-чаглаб бир гала зағча учиб келган ҳамоно улар тумтурақай тарқаб кетишиди, энди зағчалар ўзаро жой талашиб бир-бирларини патлай бошлишди ва зумда лойсувоқ том ғалати саваш майдонига эврилди.

Ким томонидан қачон қурилгани номаълум узун шийпон остида қатор қўйилган ёғоч чорпояларда аллакимлар тош қотиб ухлаб ётишарди, куялаб титилган бўйрада ҷўқкалаган ўрта ёшли сўқир киши бир маромда тебранган кўйи ёшу қарига инсофу диннат тилай-тилай пичирлаб дуо ўқиди, кулранг қийиқча тангиган қилтириқ шотир, ён-верига ўгринча аланглагач, дуогўй олдидаги бўтқаси буғланиб турган толтовоқни имла-тешик бўм-бўш тоғорага алмаштиради ва адашган йўловчини манзили сари ўнглаб юборгандай мамнун илжаяди...

Толтовоқни кимгадир тутқизган шотирни шартта ёқасидан ола-сола бўғиб ташлашни тилади, суллоҳнинг яра-чака чандиги қолган ва недир кўланка қоплаган рапида тахлит башарасини зимдан кузатгани сайин ичи сидирилган ҳолда тутақиб борарди, ҳўрпайиб илгари босаркан, иягida туки йўқ бир пакана йўлини тўсади, нимагадир у қўзларинг ғар экан, ҳадеб улар билан оқу қорага кўп ютоқиб қарама, акс ҳолда гуноҳи азимга ботасан маъносида тўнгиллаб койина бошлиди.

Гуноҳи азим ҳозироқ ботқоқ каби комига тортиб кетадигандек, шашти сўниб гезариб қолди, ҳатто аъзои баданини қалтироқ чулғаб, худодан нажот тилади, ногоҳ шунда оломон орасидан ажарилиб чиқсан, эскироқ бўз ҳалта орқалаган истараси иссиқ чол ҳамон қовоқ очмай таъна ёғдираётган кўсани бафуржা бир четга сурди, сўнг тийрак нигоҳи осуда порлаб, аросат ва ғафлат мағори исканжасида тарашадай қотиб яшагандан кўра, қодир эгам нафрати ва қаҳру ғазаби рамзи саналмиш жаҳаннам азобига йўлиқишиш маъкул маъносида лутф қилди, зухурий кўзни юммоқ кўнгилни кўзга айлантиримоқ<sup>8</sup> заруратини тақозо этишини ётиғи билан алоҳида қайд этгач, юмшоқ жилмайиб хайрлашди ва тили калимага келмай мулзам бўлиб қолган кўсани негадир етаклаб ўзи билан ола кетди ...

Қиревлаган соқоли ихчам кузалган, чехрасидан нур томаётган барваста қоматли чол беш қадам юриб-юрмай ҳалтаси тешигидан жиринглаб тилла тангалар сочилди, ҳалойиқ уларни йиғишириб чўнтағига тиқа бошлагандан кейин беихтиёр кафтини манглайига босди, ахир, имонинг тоабад басаломат бўлгур Қария билан учрашган экан-ку, қўзларини шира босгандек нечун дарҳол танимади, ҳозироқ ўпкасини қўлтиқлаб изи-

<sup>8</sup> Мавлоно Жалолиддин Румий.

дан югуради, пойида тиз чўкиб этагини ўпади-да, кейинги вақтларда кўрган тушларини таъбирлаб беришини сўраб ўтинади, яна бир қанча жумбоқ бор ичиди, иложи бўлса шулар ечими бўйича ҳам маслаҳат қиласди...

Бахту иқбол кошонасини тортиқ этувчи фаришта ҳузурига ошиқкан ўғлон каби юраги дукирлаб тепарди, роса интигу интизор бўлиб ҳамма ёққа олазарак мўраласада, сал муқаддам ягона ҳикмат эвазига юрагини суғуриб кетган Қария дараги топилмади, барибир умид узмай, товони қавариб ва ўпкаси шишиб чопаверди ва ҳадемай шовқин-сурони юлдузлар ошёнига қадар етган бозорни ортда қолдириди.

Яна озроқ жадал юрса санъат литеий қаршисидан чиқади, мудирни авраб эритгач, шахсий кўргазмаси йўли очилажаги шубҳасиз, лекин бир аксига олса қийин-да, шошгани боис адашиб Садаф чорбоги жойлашган мавзега ўтиб кетибди, негадир ҳаво кўрғошин каби оғир туюлди бу ерда ва аъзои баданидан иссиқ тер қўйилди. Гавжум хиёбонда хаёли қочиб елка қисди, аллакимлар қўша-қўша ўрдагу ғоз ва қуёну қўзичоқ солинган йирик-йирик хивчин сават кўтариб чорбог сари илдам одим отишарди, орқадан келаётган йигирма ҷоғли киши тим қора қўзойннак тақиб олганди, тўсилган пешона ва чаккаларидан милдираб сизаётган йирингаралаш қон тимдаланган ёноқларини ювганча кўйлагу камзувлари ёқаларига томмоқда, наҳот булар барисини аллақачон оғизга тушган Кўкантоj жазолаган?!

Садаф чорбоги темир панжаралари кўринган ҳамоно турли хотиралари қўзғалиб типиричилаб қолди-да, зувва ўзини панага уриш ва бошига яна бирон ғалваю ғурбат орттирмай ортига бурилиб қочишни чўтлади, бироқ ўша заҳоти миаси қатларини сиёҳи ёлқин тилимлаб, ихтиёрини бой берди-ю, ноилож бир ботиниб, бир ботинмай жимгина олға босди, қадамда худодан ёлбориб тўзим тиларди, силлик мармар бўлаклари ётқизилган зинадан берироқда маъюсланиб тўхтаган заҳоти бутун чорбог бошқача қиёфа қасб этгани, ҳатто қандайдир нотаниш ўлчамга кўчгани ва нималиги қоронги турли испоҳларга ҳозирлик кўраётганини пайқади.

Ақл бовар айламас, чорбог ҳар бир қаричи, тупроғиу гардидан тортиб ҳар бир митти гиёҳи ва япроғига қадар, ҳар қандай дилга санчила оладиган сеҳрли нигоҳ орқали боқарди ёруғ дунёга, улкан дарвоза икки қаноти ва айвонли пештоқда илгари товланиб турган сариқ тусли сопол атиргул ўрнига зарблланган сиркорий кошинли алвон бинафшада, шунингдек, бошқа турли нақшу нигорлар, белгию нишонлар ва рангларда эътиборни жалб этувчи сиёҳи ёлқин ҳукмрон...

Чорбог кўрки саналган ва бағрида не-не сиру синоатни яширган кўп қаватли марказий ғиштин кўрғон шимолдан жанубга кўчибди, томи шифер ва тунука билан ёпилган бошқа катта-кичик кўркам бинолар ва кўшклар ҳам аввалги чегарасидан узоққа силжибди, аниқроғи, чигиртка каби апиш-шапир сакраб бошқа жойга кўнибди, сув пургагичлари арслон жаги ва фил ҳартуми таҳлит ясалган думалоқ мармар ҳовузли фаввора бўсағани тарқ этиб этакни танлабди, кўкимтири бетон лаҳтакчалар фарчланган хиёбону йўлклар, майнин оқимтири кум сепилган майдонлар ва ёқаларига турли ниҳолчалар қадалган ариқлар ҳам аввалги ҳолатидан кечиб чапараста жойлашган...

Чорбог дарвозасидан эллик қадамча ичкарида кўкрак керганча эртаю кеч меҳмону излом қаршилаган Тарғил ҳайкали бурунги ҳайбатини йўқотиб буришиб қолганди, атрофида ғужурлашиб ниманидир мухокама этаётган шотирлар бетини нафррат ва истехзо сояси қоплаганди, сал берида эса улар каби носранг коржома кийган Азлар Ниёз тавозе сақлаганча Санам чехрасига маҳлиё бўлиб тикилаёттир, сүяқ тароқ билан сочларини тараӣ-тараӣ Санам нимадир деб шивирлагагач, чағир кўзлари айрича чақнади-да, Тарғил бўйнига сим ҳалқа солаётган йигитларга жон-жаҳди билан кўмаклашди, барча юмуш маромида адо этилгандан кейин мотори варанглаб ишлайтган ҳартумли машинага қаратади мамнун қўл силкиди, машина бир кучаниб силтанган ҳамоно Тарғил ваҳимали қасирлаб қулади. Тарғилни қисмларга бўлаклаш ва уловга ортиш жараённида авжига мингандан талотум ва шовқин-сурон замин тугур ҳатто фалак тоқини ҳам титратиб юбораётганди, ўзаро қовушган ёки қовушмаган ҳаракатлар балки минг йил, балки ундан ҳам зиёдроқ фурсат давом этди, сўнг недир фарофат ва ўзгаришдан дарак берувчи теран жимлик чўкиб, енгил шамол кулранг булутлар карвонини йироқларга ҳайдади ва поёнсиз осмон ним зангору оч мовий тусга кириб ёришди.

Тарғилдан айрилганига парво қилмаган сўлим чорбог кутилмаган ажаб жараён оғушида яна ҳам тўлишиб борарди, аста-секин поёнсиз даштдек чор тарафга кенгашиб, ёғоч дарвоза олдида недир сиру синоатдан огоҳ этганча алвон бинафшалар ча-

манзори осуда жимирлай бошлади, ҳаял кечмай дилга олову оташ қалаб жон сўровчи ёқимли кулги янгради-ю, зумда бир олам чирой касб этган чаманзор қоқ ўртасида қир уни учি нақд фалак тоқига етгудек ҳайбатли якка дараҳт бўйлади.

Мехрибон худойим, ўзинг хабар бергил, бош-охир тим яшил маъдандан моҳирона қуилгандек нафис ва улуғвор якка дараҳт жаннат қўйнидан чиқсан мўъжизавий хилқат эмасми, ажабо, қулоч етмас силлик танасида ҳилолга монанд тумор ва дудума ханжар тасвири ўйилган бўлиб, жозибадор зумрад баргак тахлит ғуж-ғуж япроқлари бир маҳзуну бир қувноқ мусикий оҳанглар таратиб сокин шовуллайди. Баъзан у теран хаёлга толиб, пасту баланд бобида мулоҳаза қилаётгандек туюлади, сўнг бирдан жонланиб, боримда ҳеч вақо йўғу йўғимда ҳамма нарса муҳайё маъносида шивирлайди ва япроқлар орасидан ногоҳ беҳисоб сара нашвати шодалари тилладек товланиб кўринади...

Ғаройиб якка дараҳт танасидаги тумор ва ханжар акси тунов кеча бутун вужудини алғов-далғов қилиб юборган, кўнглига шубҳа ва таҳлика уруғини қадаган ҳайратомуз тушини ёдига солди, наҳот ўша туш аввалидан то охирига қадар ҳушида қайта кечеётир, нимадан дарак бермоқда бу ажаб савдо, бирон жиҳати ҳам худо ҳақи ақлга сиғмайди, ҳозироқ ҳаяжон ва кўркув ичра жони узилса керак.

Бутун вужуди билан ҳоли-руҳини чирмаган афсус ва надомат эмас, ҳатто чорбоғда амалга ошган ажабтовур испоҳотлар ҳам ўз кўмачига кул тортишни хушлайдиган олон-мон парвойига пансир келмади, тобора ҳайбатига ҳайбат қўшилаётган якка дараҳт зумда жадал ўраб олинди ва энг тепа шоҳларига қадар ишғол қилинди.

**АСАД ДИЛМОРОД. РАНГ ВА МЕХВАР. РОМАН**

Беҳисоб оғир юқ остида якка дараҳт майишмай, аксинча, қадду қоматини тик тутиб ўйчан боқарди теварагига, ким билсин, балки хаёлни тириклилик ғаму қувончи қўмган тўқайда мунтазам кечган олишувлар ва мудҳиш ёнғин тафсилоти банд этгандир, балки хаёлидан бутун танаси, салобатини оширган бақувват навдалари, қадрига қадр кўшган меваларида бир-бири пайини қирқиб яшаган, аммо барибир ўлжа бўлишдан кутила олмай доғда қолган маҳлуклар қисмати жам экани ўтаётгандир, балки бодраб тўкилаётган меваларига шунчаки маҳлиё бўлиб боқаётгандир; чиндан ҳам улар дўлдек ёғилади, камайиш ўрнига узлуксиз болалаб, биз ҳиммат ва қут-барака тимсоли дегандай, иштаҳа қўзғаб дув-дув сочилади, тинимсиз кўз ўйнатиб сочилаверади...

Тушида кўрганини кўриб турганига бир ишонниб, бир ишонмай беихтиёр қайта-қайта ёқа ушларди, сўнг ҳар қандай шубҳаси беҳуда эканини англатиб қўймоқчи бўлган каби ногоҳ якка дараҳт бор кўрки ва салобати билан кўнгли иқлимига кўчди, энди сонсиз бутоқлар недир куч хуружига тоб беролмай ичиди қарс-курс синиб, ичиди барқ уриб ўсади, буни туйгани сайин тушни эслаб ўқинади, баъзан бутун бошли тўқайни кулга айлантирган ёнғин ичра ўралашиб юргандек аста нола чекади ва афсус билан ўғрилган овози бўғизда сўнади...

Қани энди яна шунчаки туш кўраётган бўлса, бирдан ҳовлиқиб уйғонса ва бариси саробдек тарқалиб йўқолса, балки шунда елкасидан тог қулагандек енгил тортармиди, қайда, ғаройиб ҳодиса ақлини шоширганча кўз ўнгидага рўй бермоқда, сокин шовуллаётган якка дараҳтни кузатгани сайин савдоидек ўзини ҳар ёнга ташлаётир, ҳатто чорбоғни қачон тарқ этиб, устахонага қачон қайтгани ёдида йўқ, ачишаётган кўзларини инқиллаб очган пайтда, маймоқ диванда иситмалаб ётарди...

Кўргиликдан беҳабар Мерган, яна итдек тўйиб ичгани ва ўлардай наяки тортганини тахмин қилган шекилли, түяning думи ерга тегса тегар, аммо сен галварс икки дунёда ҳам одам бўлмайсан тарзида тўнғиллаб, ҳўл латта босаётир қайноқ пешонасига, қани энди кулогига гап кирса, нуқул димофини Санам соchlари бўйига ўхшаш олмурт иси қитиқлаётир, бот-бот кўз ўнгидага кулоч етмас танасига тумор ва ханжар шакли но-зик ўйилган ҳайбатли якка дараҳт гавдаланади, ҳамон у тўқай жонзотлари қисмати хусусида ҳикоят сўйлаганча нотинч кўнгли иқлимида юксалиб турарди.

Ажаб ҳол токайгача давом этаркин, ҳайтовур эндилиқда амаллаб ғалати туш, тўқай ва якка дараҳт ҳақидаги барча телба-тескари тушунчадан қутулиши керак, йўқса яна тоғдек улкан армон орттириши мумкин, бунга зигирча тобу тоқати бор эканми, шахсий кўргазма муаммосини кечиктирмай ҳал этиш учун ҳозироқ оёққа қалқиши зарур, фақат яна падар қусур хумор ғавғо солиб ором бермаётир, наяки сўргиси келиб тамшанар экан, ёндариси қийшайган эшиқдан бирор аста томоқ қириб мўралади.

Беихтиёр анқайиб ёқа ушлади, наҳот қорин қўйишида Тарвуз домла билан бемалол беллашадиган Семизвой қадам ранжида қилмиш, куриб кетгур кўзидан учиб турган эдими, хўш, бемаврид қичқирган хўроздек энсасини қотириб яна нима истайди, бе-

зиллаётгани ва шошиб турганини пайқади чоги, тавозени келиштириб ўрнига қўйгандан кейин бирдан ҳовлиқиб Кўкантой мавзусига кўчди, иштаҳаси жуда зўрга ўхшайди, воҳеъй!..

Семизвой гўё бутун малоҳати ва сехрини намоён этаётган Кўкантой қаршисида тек қотганди, ҳозироқ у ўзиники бўладигандек, кўзлари чақнаб энтикарди, сўнг туйкус биққи эт ва жир қоплаган баланд кўксига гурс-гурс урди-да, нима, ўша савилни пишириб ермидинг, қизғаниб ўтирумай каминага сотсанг яхшигина барака топасан-ку, кўркмай оғзингга сикқанини сўрайвер тарзида дўрдоқ лабларини ялаб ғудранди.

Семизвой тунов куни санъат музеини титратган, барчани ҳайрат ва таҳликага солган воқеани эштибиди, шаҳарда ҳамон турли ғаройиб овозалар суваракдай ўрмалаб юргани боис, сира иккilanмай устахонаси сари оёғини кўлига олиб чопиби迪, энди айни шу картинани қўлга киритмаса ва табиати ҳар хил одамлар узилмайдиган данғиллама уйи айвонида гулчамбарга ўраб илиб қўймаса тинчмайди, сабабики, тоабад у оиласи ва молу мулкини кўзикишдан асрashingа имони комил...

Семизвой диди ва мақсади эътиборга лойиқ туюлди, фақат масалага шошилмай жиддийроқ қараши керақ, аслида у санъатга ишқибозлик ва ҳомийлик қилиш бобида Тўра Охун ёки Носир Охун каби бурнига хода билан тезак етказиш қийин зотлардан кам эмаслиги, ҳатто ҳар жиҳатдан зиёда эканини исботлаш пайида эмасми, ёруғ дунёда шунчаки нафсини қондириб, кекириб ва кариллаб юришдан бошқа каттароқ муроди ҳам борлигини алдаму қалдам билан исботламоқчи шекилли, мана шу жиҳати иззатнафсига оғир ботаётир-да...

Илгари Семизвой бир неча марта сазаси ўлиб ва тавбасига таяниб қайтганини наҳот унунди, агар ростдан шундай бўлса, мушти билан танқайган тумшуғини мажақлаб, барисини ёдига тушириб қўяди, бас, туркумга тегишли бирон картина ҳозирча сотилмайди, бу борада виждони ва орини ўртага тикиб қасам ичган, шахсий кўргазмаси фолият бошлагач, мусаввир қадри, мўйқалам ва бўёқ қудратини теран ҳис этадиган мижоз топилса эрийди ва олди-сотди бобида жиддийроқ ўйлаб кўради.

Тутақиб бўғилаётган ва ҳадеб пулни аямаслигини айта-айта чўнтағини ковлаётган Семизвойни алдаб-сулдаб жўнатгунча шаксиз бир неча тола сочи оқарди, хумор эса ҳамон бўғзига ёпишиб олганди, охири хумдек оғирлашган калласини кўтаролмай тутақди, ҳоли-рухини сезгандай ғойибда Санам ҳандон ташлаб кулган чоғда бўлари бўлганди. Сўнг устахонада қандайдир кўланканлар изғиб, элас-элас мастона товушлар янграй бошлади ва гулқоғози сарғайиб йиртилган девор кунжагида айланана туйнук очилди, туйнук токчасини эгаллаган сирти гулдор чилимга ишонқирамай тикиларди, исқот қолгур эса жами нажот менда маъносида кўкиш тутун таратиб қошига чорламоқда.

Кейинги пайтларда боши узра мунтазам назорат калтагини дўлғаётган Мерган йўқлигидан фойдаланиб қолсин, фақат аввалгидек жиловни ортиқча бўшатмайди, биринки марта мириқиб тортса ва сал-пал овунса кифоя-да, мана бўлди, ажиб сурур аввал қонини жўштириди, сўнг руҳи ва дилини чулғаганча илҳом завқини қўзғади, энди кувнаб мўйқалам юритиши мумкин, вақти жуда тифиз бўлса ҳам туркумни бойитадиган яна бирон асар чизади, ишқилиб худо мададини дариғ тутмасин.

Навбатдаги картинада алданган ва белигача яланоч Санам қошида чексиз надомат ичра нафрят ва ғазаб билан боқиб турган Вали бахши қиёфаси акс этажагини ўйлар экан, андак хиралашган кўзлари ногоҳ бир-бирига туташиб турган Фунча ва Ҳомилага тушди, бугун улар дилдан тўқилган дўлу жалалар тошқинга эврилган хавфу хатарга тўла суронли онларни эслатиб янада сирли порлаётганди.

Ҳадемай ўзаро майин қовушган бўёқлар бийрон дўмбира тили билан сўйлана бошлади ва борлиқни маҳзун оҳанглар қоплади, мусиқий нидолар замирида мужассам сирли оҳанрабо кўкимтири тутун нашидаси каби афсунгар туюларди, сўнг тағин наяки сўргандан кейин янада жунбишга келган руҳи тан қафасини кўтариб учди ва тезда ўзини ҳар бир қаричини турфа ранглар қучган воҳада кўрди...

Рўпарасида жимжит далаю дашт салтанати ястаниб мудрарди, ажralиб қўзга ташлананаётган бўзлоқ ва сайҳон жойларда тизилган беҳисоб кигиз ўтов ва омонат чайлалар узра мезон ипларига ўхшаш тарам-тарам оқиш ва қизғимтири шуълалар осуда сузади, найзасимон ходачалар ва буқрайган бужир тошларга кўнволган бойкушлар тангри бунёд этган бу қадимий мулк тоабад бизники маъносида тинмай ғув-ғувлаб сайрашади, бир гала очофат зағчаю чуғурчук арпа ва буғдой ўюмларига ёпирилган дамда, ёқалари сарғайган ўйдим-чукур йўлда чангу тўзон кўтарилди, билқ-билқ тупроғи

тўпиқка чиқадиган йўл бўйлаб қартайган икки зиёли гупчагиу шотилари чириб ёрилган бўм-бўш эски аравани аранг судраб келарди.

Толу тераклар соясини тарк этган сочу соқоли ғовлаган бўйчан йигит ёрдам беришга шошилди ва устида атиги бир тутам хас ёки бир ҳовуч кепак йўғу нечун савил қолпур бу қадар зилу замбил дея ийманиб сўради, қора терга ботган кекса йўловчиilar кулоклари том босган ва тиллари кесилгандек аввал чурқ этмай оғир хўрсинишиди, савол яна айтилгач, бир-бирига навбат бермай ҳасрат қила кетишиди.

Қайси устахонада ясалгани номаълум аравага етиб ортадиган айбу уволлари ортилган экан, ҳайхот, бундай дарди бедаво эски улов ва нигоҳ илғамас оғир юқ билан тангри иродасига кўра бунёд бўлган шафқатсиз пули сиротдан қандай ўтишида, имкон борида бу жабҳада жиддий ва оқилона тадбир чекмаслик муқаррар кўргиликка гирифтор этишини ғиш қолипдан кўчгандан кейин англашди, мана энди ҳар бирининг nocturne нотавон кўнгли ёруғ дунёга келиб лойига билмай бота қолдим<sup>9</sup> дебон тинмай оҳу фифон чекиб йиглайди-ю, лекин кечиккан пушаймон сут айларми ёки сийнада ўрнашган кемтикларни битиарми?!

Пули сиротда майдалаб ўлчанадиган айбу увол залвари остида майишган эски арава ортиқ юришга тариқча мадори ва тоқати қолмаган аламзада маҳлуқ каби имиллаб илгариларди, охири пишкириб оқаётган кўприксиз улкан дарё бўйида тақдиридан зорлангандай гичирлаб тўхтади, дарҳол атрофини кечувдан ўтолмай чувиллашаётган ёшу қари ўради, сурма тусли япалоқ қоя гирдида кўкрак керган ва гардиши заррин қора ойнак тақсан Тарвуз домла лабларини қўмтиғандан тез-тез бош чайқарди, сўнг силлиқ ҳассасини туйкус илгарига чўзиб ҳайқирди: эй мардум, ёвни дўсту дўстни ёв билган Тўра Охун билан Носир Охунни дўппослаш савоби азим эрур!..

Мириқиб чилл-чилл шоколад шимиётган Тарвуз домла даъватидан аввало издиҳом ўртасида тўрсайиб хаёл сураётган ва текис ёноклари лип-лип учётган Зокир Фиёсий билан Азлар Ниёз руҳланди, нуқул улар дағдаға билан йўғон таёқ ўқталиб, кекирдак чўзганча ҳалиги сўзларни такрор қилишарди. Кўп ўтмай барча ёпласига хужум қилиб, ур калтагу сур калтак авжига минди, қора қонига бўялган ака-укалар сулайиб қолишиди, сочу соқоли ғовлаган йигит, бирордан иримига ёрдам сўрамай, амаллаб уларни арава устида чўзилтириб, бафуржа ярғоқ кучанни бўйнига кийди, белига чарм қайиш боғлаб, худога таваккал қилиб илдам олға босди...

## 32

Тебраниб ва шалдираб оҳиста елаётган арава кўринмай қолгандан кейин тушинуксиз иштибоҳга чулғанди ва сочу соқоли пата克拉ган куйинчак йигитни илгари қайдадир кўргандек бўлаверди, вақт кечгани сайнин дилини тахмин тобора кучлироқ чирмаб борарди, фақат уни қайда ва қачон учратганини сира эслолмади, ногоҳ шунда ғойибдан бирор ғофил эканини бетига солди ва наҳот ўзингни танимадинг мазмунида кесатди, олисда янграган дағал овоз кўксидаги қайта-қайта акс садо бергач, эсанкираб ўгура кетди.

Шалоқ аравани ҳадемай қувиб етишига заррача шубҳа қилмай жайрондек еларди, аммо қуёш азалий ва абадий ошёнига жўнаб, пурвиқор чўққилар узра нозиккина кумуш ҳалқа янглиғ ҳилол ялтираса ҳам нияти ушалмади, ўлардай чарчаб ва ҳафсалари пир бўлиб ортига қайтаётиб, кўрайдинда чирик кундага тўқишиб ғиқилди-да, оёқлари чўрт сингандай алам-ангиз ингради, сўнг оғриқ исканжасида аста киприкларини кўтарди, ёпираи, ҳовуч-ҳовуч чўғ сачрататётан Гунча ва Ҳомила ёнида наяқисидан қўланса тутиун бурқираётган чилимни кучоқлаб ўтиради,

Сал нарида сукут сақлаб ўқсинаётган Мерган нигоҳи ўқдек дийдасини тешиб ўтаяэди, энди галдаги қилмиши, яъни лафзини бузганини қай йўсун оқлайди, ҳартугур нафсини тиймай ҳаддидан ошгани ярашмади, миясидан бир мурватча тушиб қолганини яна ношудлик билан исботлади, бу кунидан ўлгани яхши, энди қаҳру ғазабини аранг ютаётган ошнаси атрофида пашшахурда бўлмай турсин, баҳона эса тап-тайёр, ҳозироқ лўқиллаб санъат литеий томон бориши ва маросимлар залида шахсий кўргазмаси фаолиятини йўлга кўйиш масаласи бўйича аҳдлашмоғи лозим.

Бир омад юришмаса кўп қийин-да, тия устида ҳам ит қопади, ўпкасини қўлтиқлаб борганига яраша қурмагур мудир топилмай куйдирди, тўсатдан ичбуруғми ёки

<sup>9</sup> Бобораҳим Машраб.

кўксовгами чалиниб, шифохонада егану ичгани оғзи-бурнидан келиб хирқираб ётган эмиш, тузалишини кутишга тоқат қайда, кетидан кувиб шифохона сари боради, энзалири ўлсин, бунинг учун майда-чуйда харид қилиш лозим-да, ҳозир беш-үн сўм ақча топишдан кўра ер шарини айланниб чиқиш осон эмасми, шундай экан, биргина картина учун бир дунё пул ваъда айлаган Семизвойни нима учун саёқ итдан баттар бехурмат қилиб ҳайдади?

Хаёлан Семизвой билан тортишиб анча юргандан кейин пешин қёёши ҳавони беҳад димиқтириб юборди, ҳарорат тобора ошгани сайин бутун борлиқ жунбишга келиб тўлғанарди, фақат темир панжаралари учига алвон лента ўралган Садаф чорбоги баҳор ҳавосига ўхшаш салқин ва ёқимли ҳаво қўйнида яйраб нафас олаётгани сезилади. Чатнаб қизиган ўрта кўча тиқинига парво қилмай, анча бўйчан йигит бир чеккадан шалдиратиб эски арава судраб одимларди, ҳайҳотки, бўйнига илинганд ямоқи кучан ва ғовлаган сочу соқол шўрликни ўтар дунёда омад ва умид нима эканини билмаган мискин гумаштага ўхшатиб қўйганди, баъзан паришон ҳолда қайрилиб, арава устида ёнма-ён ётган жасадларга нигоҳ ташлайди-да, бағримни зангдек емирган армонни тушинар валломат топилурми маъносида хўрсиниб қўяди.

Фижим сурп чойшаб гирдидан чиқиб турган томирлари бўртиқ, терилари пуфаклаб шилинган оёқлар қўприги йўқ дарё бўйидаги мажарони эслатди, сўнг наҳот анови йигит ўзим деган мулоҳаза миясини банд қилди-ю, тутақиб мушт дўлғади ҳавога, арава илғаш маҳол нуқтага сингиб йўқолгач, ҳарчанд қўнгли тиламаса-да, ўрдагу ғоз, куёну қўзичоқ солинган хивчин сават кўтарган, улкан қийғир қиёфасида учиб келадиган арвоҳ тўғрисида бидирлаб тортишаёттан халойиқ ортидан Садаф чорбоги сари шошилди...

Дарҳол пайқамай ўлибдими, шаҳар кўрки ҳисобланган макон еру осмон оралиғида тангри амри билан бунёд бўлган мўъжаз жаннатий даргоҳ сингари яшинар киши суқини қўзгарди, ҳар бир қаричида ҳайрату ҳавас уйиготувчи айрича тароват ҳукм суроғтири, баланд пештоқи ва икки ёнига сиркорий кошин билан алвон бинафша зарбланган ёғоч дарвоза олдида шотирлар тавозе сақлаб тек қотишган, хушқомат чолғусозлар ижро этаётган шўхчан кўй ажиб сурур ифода этиб жаранглайди ва дилларда акс садо беради.

Қўлдан қўлга ўтавериб қадру қиммати янада ошган ва жозибасига жозиба қўшилган чорбоғ заминида, бўлакча ғаму ташвишлари борлигини сездирмай осуда мудраётган алвон бинафшалар чаманзорида, чуқур илдиз отган ва кўкни болиш айлаган якка дарахт ҳамон савлат тўкиб оҳиста шовуллайди, эндилиқда ҳар бир япроги ва бутохидан тортиб то бутун жисмига қадар афсонавий макон тақдири билан тоабад боғланиб қолганини англагандек, саховатли қуёш сари тағин ҳам чексиз иштиёқ билан интилади, гоҳо тунлари шарпадек йўқолиб аллақайларга, самовий ўлчамлар бағри ёки етти қават ер остигами жадал бориб келади, балки жаннат ёки дўзахда бўйлиб қайтар – тағин ким билсин, субҳидам арафасида яна жойига бемалол қўниб, боримда ҳеч вақо йўғу йўғимда ҳамма унсур муҳайё маъносида сирли шивирлашга киришади...

Кўқдан ёғилаётган илиқ ҳовурга беланган чаманзордан анча олисда хомушланиб тўхтар экан, қулогига элас-элас ўша товуш чалинди, тасаввурида эса бутун вужудини алғов-далғов айлаган ғаройиб туш ва бағридаги бир дунё ғам-андуҳ билан қўшилиб лов-лов ёнаётган тўқай жонланди, сўнг якка дараҳт танасини безаган тумор ва ханжар шаклига мароқ билан қизиқиб боқаётган кимсалар сари жилди, сокин товланаётган икки тимсол замира ида қандай ҳикмат ёки ғурбат пинҳон эканини билишмаса ҳам улар ниманидир ўзаро қизишиб муҳокама қилишарди.

Куч-ғайратга тўлган ва қўзлари чақнаётган пахлавон келбатли йигитлар ва қошлари камон сулув-сулув дуркун қизлар териларига сиғмай қувониб бўсағада рақс тушишади, нақшинкор ёғоч дарвозадан мўралашган заҳоти якка дараҳт айрисига сакраб минишади-да, янада шодон қийқириб ва қўшиқ хиргойи қилган кўйи чайир қўлларини ишга солишади, тинимсиз шитирлаб силкина бошлаган шоҳлардан, иштаҳани карнай қилиб, йирик-йирик тилла тусли сариқ мевалар узлуксиз дувиллаб тўкилади, камайиш ўрнига урчиб қўпаяди-да, бутун чорбоғ ва ҳатто борлиқни кўммокчидаи ола-тасир тўкилаверади. Чаманзорда хирмон каби уйилган муаттар бўйли мевалар ҳар қанча талаш бўлгани билан тугамасди, айни шу ҳолга қайта эътибор бериб янада ажабланган заҳоти ўзини тушида куйиб кулга айланган тўқайда кўрди, сўнг ердан эзилган нашвотини олиб ҳидлади-ю, ногоҳ қўнгли ағдарилди, ақлу ҳушини бир оз ўнглагач, йўлида беҳисоб жумбоқни кўндаланг қилаётган ва идрокига тобора чуқур ўрнашаётган тушни лаънатлади.

Худди шу пайт кимдир қүёш бугун фақат Азлар Ниёз шарафига порлаб нур сочайтганини орага қистириди, сүнг баҳс бошланиб, лилипут тахлит кимса бир зарбда Тарғилни йўқлик оламига суріб ташлаган Дўлвор ҳайкали Азлар Ниёзни ҳалига қадар бирон азаматга буюрмаган шуҳрат оламига етаклаб кирганини таърифлай кетди, шаклан ва мазмунан янги асар Садаф чорбоғи ва ҳатто бутун шаҳар чиройига холдек ярасиби, бунақа мукаммал хилқат ҳар доим ҳам яратилмас экан...

Лилипут нотиқ оғзига бир бўлак тахта шоколад соганини кўриб бирдан елкаси тиришди, дилидан бу сайроқи тўти Тарвуз домла қафасида донлаб улғайгани шубҳасиз тарзидағи ўй кечди-да, аста ён-верига аланглади, ёғоч дарвоза рўпарасида, илгари Тарғил ўрнашган жойда, улкан Дўлвор ҳайкали мени вақтида илғамаганинг учун айбдорсан маъносида ўмров керганди.

Дўлвор атрофини ўраган, тиззалаб пойини тавоғ қилаётган айрим каслар хуфтон сояси тахлит ғивирларди, наздида, барчани назарга илмай кузатаётган Дўлвор тобора шишиниб боради, сүнг думини ликиллатганча дунёни бошига кўтариб вовуллаб юборади, бўғзидан таралаётган дағал овоз чаманзор ўртасида бўйлаган ва ҳалойиқ мўру маляхдек ёпишган якка дараҳт шивирлаши билан кўшилиб тобора кучлироқ жаранглайди...

Аслида Дўлвор недир рутубат қоплаб оҳорини йўқотган ва охири букилиб мажақланган мувозанат синиклари воситасида тикланган омонат ҳамда арzon матоҳга менгзарди, ҳатто шаклу шамойили мудом ҳакалак отиб турадиган нафс ва тама нафасидан ҳомила орттирадиган, хушомад ва бўҳтон ҳомийлиги остида кўзи ёрийдиган хиёнатдан иборатдек туюларди, бутун ҳайкал важоҳати намоён этган викорда зухур бўлган сохталик шундоқ ҳам турли қисмлар ичра яширинган хиёнатни пардадек тўсиб турарди ва шу боис ҳайкал қиёфасида қиёфасизлик хукмрон...

Барчани тўзонида қолдириб кетганига шубҳа қилмай қўйган Азлар Ниёз буни икки дунёда ҳам сезиши гумон, аслида у учиб-кўниб бадга тегадиган хира бир чивин, аммо ўзини ҳайқириб оқаётган муazzам дарёда улкан қайиқни жасурона бошқариб бораётган қайиқчи<sup>10</sup> каби тутади, охири бир кун тўлқин бору йўғини парчалаб ташлагач, кўзлари мошдек очилса керак.

Ҳозир ҳамон ёқа бўғишгудек алфозда қизишиб тортишаётган муҳлислар даврасида барисини қойил-мақом қилдим маъносида қошларини чимириб хаёлга толганди, сўнг якка дараҳт пастки шоҳидан бир неча дона ҳил-ҳил пишган нашвати узиб сумкасига солди-да, бир тутаб, бир тутамай ёнаётган Камрон Вали сари шошилди, пинжига тирғалиб сен пандавоқидан аммамнинг бузоги яхшироқ маъносида ўқрайди, баҳонада ҳамма маҳоратим хусусида холисона эҳтиром сўзлари айтиётган дамда сен не боис тилингни тишлиғанча безрайиб қолдинг демоқчи бўлди. Якка дараҳт сари қарай-қарай беҳад катта мукофот пули ажратган Тўра Охунни Дўлвор тақорори йўқ дурдона эканига ишонтирган Тарвуз домлани кувониб эслади, кўп қизиқ, Кўкантой томонидан кўзлари ўйилган ва кўчага кам чиқадиган устоз Дўлвор шаклу шамойилини нимага суюни баҳолади экан...

Сархушдек чайқалаётган Азлар Ниёз на қошиқ, на чўмичда турадиган турли мишишлар кўзгаётган Кўкантой бобида атай чурқ этмади, кўлидаги тилла тусли йирик нашвотини ғарчча тишлиғида-да, Садаф чорбоғида Тўра Охун ва Санам чинакам ҳайратга молик эзгулик дараҳтини парвариш этаётгани ва унинг тотли меваларидан тўйиб-тўйиб тановул қилаётгани туфайли тобора илиги тўлишаётгани, кучига куч қўшилиб, илҳоми қайнайтганини бафуржга таърифлай бошлади.

Омади чопаётганидан боши осмонда, фақат оромини бузәётган бир дардни тўқмаса чидолмайди, буни қаранг-а, сабру тоқат, қунт ва қатъият билан муттасил самарали изланиб, мусаффо иқбол осмонида, мангу сўнмас юлдузлар даврасида, умидли ёруғ юлдуз бўлиб порлай бошлагани, аттангки, тумшуғи остидан сал нарини кўролмай ҳовликувчи фахми пўстак ғаламислар кетини куйдирмоқда, ҳей дариг!

Кўхна дунё чиндан кажфеъл эрур, йўқса ҳатто қачондан буён кўзи мойини еб келган, қанча-қанча қарз олиб бир мири қайтармаган, ҳатто узоқ бир қариндоши қизини хотинликка олиб берган Зокир Ғиёсий ҳам бетига чарм қоплаб оёғига чил урмасди, миаси қатиги ачиган баччағар фақат панадан ё томорқасига тош отади, ёки оёғига чил уради, яқинда нуфузли даврада охири кўзларингни ўзим ўйман деворди, кала калланг узилгур бир оқшом тўйиб ичган-да, ўйламай-нетмай эндиғина жойига кўндирилган Дўлвор ҳайкалини мўлжаллаб чоптирган, энди бу ёғини фақат ўзидан кўрсин, Нуқра ғорида

<sup>10</sup> Мавлоно Жалолиддин Румий.

илону чаёнга таланиб ётибди, ёру ошнани пашшача билмай ҳаволаниш ва тузлуқса тупуриш оқибати шу-да...

Ҳалолинг бўлгур Азлар Ниёз илгари ҳам беданадек сайрарди, эндилиқда эса тилини янам қайрабди, ҳар бир сўзни ўқдай бемалол нишонга аниқ отиб маза қилаётир, ҳатто уялмай ўзидан бошقا жами рассому ҳайкалтарош зотини ҳажиқизга чиқарди, ана шуниси айниқса жуда ортиқча туюлди ва пичоқ сиягига қадалди, лаънати билан ёқавайрон ҳолда тебалашмай, иззати борида жуфтак ростлаши керак, ичбуруғми ёки кўксов бўлган литсей мудирини топиши ва шахсий кўргазмаси тақдирини ҳал қилиши зарур.

Жуда муҳим масалани унугтани ва боқибегам одамдай Садаф чорбоғида ўралалиб юргани аянчли эмасми, ахир, ғанимат вақти ва ўзини қадрлаши жоиз эканнини беш кўлдек яхши билади-ку, охири Азлар Ниёзни кўрмай ҳам, куймай ҳам деган ўйда ташқарига ошиқди, тез орада ҳали тузалмаган мудир билан шифохонада кечадиган суҳбат чоғидаёқ маслаҳат пишитишига ишониб лўк-лўк ҳансираб чопарди, фақат ҳовлиқиб яна тескари томонга бурилибди, бир пайт офтоб нурида осуда товланаётган кўп қаватли марказий қўргон қаршисидан чиқди ва нима қиларини билмай эсанкираб қолди...

### 33

Оврупча лойиҳа асосида курилган марказий қўргон шарқона меъморий услубда бутунлай қайта таъмир қилинибди, пўст ташлагани ва қиёфаси тамом ўзгарганини сезгандек викорли сукутга толганди, турли қавариқ шакллар чекилган бақувват деворлар орқали нафратомуз ва қайгули товуш бир маромда элас-элас сизиб ўтарди, кенг дунё ва ўзига сиғмай қолган Тўра Охун бўғилиб минғирлаётир, кечаси тушида Кўкантоя безовта қилган бўлса керак ёки сал муқаддам дереза орқали таҳдидли мўралаб ўтакасини ёрган...

Буюртмасини адо этиш, танловда қатнашишдан бўйин товлагани ва айниқса санъат музейида рўй берган ғаройиб воқеа Тўра Охун қонини қайнатиб юборганидан яхши хабардор, ҳозир бариси учун инжикланиб жавоб сўраса ва қонини ичса керак, хаёли пардек тўзғиб остона ҳатлади-ю, нозик дид билан безатилган кўркам хонада, хориж диванида ястаниб чилим сўраётган Тўра Охун билан юзлашгач, бунга тағин имон ўғирди.

Анчайин сархуш Тўра Охун соппа-соғ отасини кутилмаганда қора тупрок бағрига топширган ўғилдек мотамга кўмилганди, нозу ишвалари келишган сарв қоматига ярашган Санам билан қанот боғлаб учгудек бўлаётган Азлар Ниёз етаклашиб кирганда ҳам қовоғи очилмади, ора-чорада қалин парда тутилган дераза сари кўз ташлаб ғурданиб кўяди, сарғиш бармокларини турли муқомда қимирлатиб, қоранг ўчур Кўкантоя шу яқинда арвоҳдек пойлаётир деган маънода имо-ишоралар қиласди.

Заҳира эшиқдан паҳмоқ думини ликиллатиб Дўлвор чопқиллаб киргандан кейин Тўра Охун дилидаги чигил ечишгандай хиёл илжайди, хожаси аламзада ва дилгир эканнини сезган бўрибосар асабий ғингшиларди, искаланиб ва мўлтираб патли гиламда чўнқайган маҳалда, хипчабел оқсоч бутунича пиширилган ғозу ўрдак қўйилган кумуш патнис кўтариб келди, патнисни бафуржга олдига ўрнатгач, майнин табассум ҳадя этиб изига бурилди...

Шинам хонани иштаҳа қитиқловчи ёқимли ҳид қоплади, Комрон Вали оғзида сўлакай йиғилиб тез-тез ютинарди, худди шуни кутаётгандек, Дўлвор мамнун хурганча бирдан хужумга ўтди-да, юмшоқ эту имирға суюкларни ҳаял орасида ғажиб ташлади, сўнг лаб-лунжини ялаб, тўғарақ столни тўқирлатиб черта-черта ўтқир май сипқораётган хожаси атрофида иргишлий бошлади.

Қани энди мавриди бўлса-ю, думчаси сувлаб худосини танимай қолган Носир Охун билан бирга, Санам чилдирмасига ўйнагани оқибатида, дийдалар чоқ ситилиб эзилгани ва пора-пора диллардан тўкилган дўлу жалалар тошиқинга дўниб қадрдан қишлоғини бир ҳовуч тупроқдек супуриб кетганини ҳайқириб айтса бетига, оғат арафасида босар-тусарини билмай кўпларни тиканзорда эмаклатган укаси илкидан Нафисани тортиб олгани, дунё пасту баландини таниб улгурмаган шўрлик қизгина кўнглини вайрону умрини хазон айлаганини дангал шарҳласа, қисқаси, ичидা узоқ вақт мобайнида қатра-қатра йиғилган беадад аламу армонни тўкиб ташласа ва енгил тортса, афсуски иложи йўқ-да, авзойига қараганда Кўкантоя қайта-қайта ёдига тушаётир, товонидан то бошига қадар сим-сим тутамай ёнмоқда, бу аҳволида чурқ этишга сира имкон бер-

майди, Санам момиқ кафтида кўйиб узатган навбатдаги қадаҳни бир зарбда бўшатиб, газагига пишиллаб ғалати ишшайгач, ҳолига маймунлар йиғлашини чуқурроқ англади.

Кайфи ошган кезларда, сухбатдошини эрмак қилиб бирров тиши оқини кўрсатардида, илкис бозиллаб даҳанаки жангга киришарди, ҳозир эса негадир шошилмай, диван ёнида чўзилиб ғингший бошлаган Дўлвор билан ўйнашганча ниманидир мўлжаллари, сўнг дароз шишадан нозланиб май сузаётган Санамга сиркаси сув кўтармас думбулхўжа пайини қирқиши фурсати етди маъносидаги кўз қисгач, бирдан чакаги очилди...

Чиндан ҳам танлов якунланган кундан бўён балонинг ўқига ўхшайдиган Кўкантоя дастидан еган-ичгани заҳар, уйқуси азоб бўлаётган экан, тушида бир неча марта қичкириб қоқ тепаси ва бўғзига чангл ботирган, бир гал бехосдан миясини чўқилаб еган, ҳадемай ўнгидаги ҳам шунақа кулфат рўй бермаслиги учун ким кафил?!

Бугун ёки эрта иблис нафаси теккан, бўёғига жодугарлар қони аралашган картина оловга ташланмаса ўзига қийин, унақа дарди бедаво матоҳ тирик жонлар хаёлини пароканда қилишу ёруғ дунёни ваҳима ва қўркув чодирига буркашдан бошқасига ярамайди, ваҳоланки, фақат эзгулик манфаати йўлида хизмат қилувчи баркамол асарларга ташнамиз, махсус лойиха бўйича чорбоғда кўндирилган ва ихлосу маҳорат ўйғунлиги заминида туғилган Дўлвор ҳайкали шундай асарлар сирасига киради, хусусий коллекцияси айниқса ҳақиқий жозиба рамзи саналур, келгусига мерос бўлиб қоладиган мулкни бойитишида иштирок этмагани гуноҳи азим эмасми?

Диван ёнидан жилиб тўрда бемалол чўнқайган ва баъзан Санам қадду бастига ошиқона боқаётган Дўлвор бариси рост дегандек, тумшуғини чўзиб узоқ ҳурди, бўлиқ сочлари елкасида тўзиган Санам эса Комрон Вали юрагига аллатовур ғулу согланча гиламда пириллаб айланарди, сўнг жилмайиб қия қарашиб қиларкан, шуурига сиёхи ёлқин кўчди-ю, вақтли матбуотда ҳам кўкларга кўтариб мақталган коллекцияни кўргиси келди, кутилмаган фикри нимагадир яқдиллик билан маъкулланди ва тезда чорбоғ тўрида бўйлаган тўқ мовий гумбазли бино билан юзлашди.

Мармар увоги билан гул чиқариб сувалган кўш ошёнали иморат салобат бобида марказий қўргон билан бемалол беллашарди, гирдларини нурланувчи шиша безаклар зийнатлаган пештоқни қарийб тўла эгаллаган, мозаика усулида ишланган ва ажидабдабага мойил Тўра Охун портрети салобатини янада ошириб юборганди, тош нигоҳда кўхна дунёдаги ҳар неки неъмат камина маҳрига тушган маъноси жамлигини сезди-да, чурқ этмай бўйини ҳам қилиб олға босди, ёп-ёруғ ойнаванд фойе ва бошқа каттаю кичик хоналарда бирор қўймам буюмини тортиб олганда баттар ғашланди, ахир, Кўкантоя тажовизига учрамасдан бурун Тарвуз домла оғзидан бол томиб юқори баҳо берган тақрори йўқ жозиба ва ҳайрат олами эмас, дилни хуфтон айлагувчи ҳашаки силсила қошида туради.

Беҳисоб заҳмат ва маблағ эвазига тўплланган, асосан Азлар Ниёз ҳамда Зокир Фиёсий мўйқаламига тегишли картиналар тұгмача орқали бошқарип туриладиган, ўту сув ёки куму тупроқни фарқламас ягона дастурли темиртан конвейерида шошилинч тайёрланган, бир хил йўналиши ҳаракат, буйруқ ва вазифани англатадиган сўзларни тақрорловчи қўйирчоқлар мисол бир-бирига ўхшарди.

Нақшу нигори бежирим чорчўпга тортилган ҳар бир асар курилмаси меҳрибон худойим ёрлақаган тийран нигоҳли Тўра Охун, оқила маслаҳатгўй Санам ва қобил қўриқчи Дўлвор кўмагида, мисли йўқ шижиоат ва илму амалга суюни, юксак заковат чўқиси сари муттасил интилаётир тарзидаги тушунчага бўйсунганди; шакл билан мазмун орасида ястанган ҳаётий мантиқ ва суурурдан маҳрум бўшлиқ ўша тушунчани ютиб юборибди, беҳад тор туюладиган бўшлиқ аро иссиғу совуқ ранглар қалби ва йўлини йўқотиб қўйганди, безовта дил тафти билан омихта истиробу санчиқларни четлаб ўтган ранглар меъёрий тамойилдан жудо бўлганди.

Бир гурух картинада сохта зўриқиши курбонига айланган бўёқлар ҳарбу зарб қирраларини зиддиятли ҳамда мураккаб жараёнлар орқали талқин этишни истамаганга ўхшайди, натижада улар юраги фалаж, ўйлаш ёки фикрлаш даражаси юзаки кимсадек ноумид ва ҳорғин боқишишади, бошқа хил бир тоифа картинада сайқал топмаган дағал ифодалар тилу забондан жудолиги, холислик мезонидан йироқлашиб, хушомад ва қаллоблик минтақаси сари оғиб кетишгани айниқса таассуфга молик, анчайин бесўнақай белгилар баланд қоя кифтида қилт этмай қотган ва изгирин эсганда роҳат қиладиган муз парчалари янглиғи совуқ йилтиарарди...

Қайта-қайта нигоҳи Санам билан Дўлвор ёнида ўзини эмин-эркин сезиб кулаётган, кўкрак кериб нутқ сўзлаётган, Қора тулпорда саёҳатга отланган ёки шодланиб совға-

салом улашаётган Тўра Охун суратларига тушавергани боис сабр косаси тўлди, бурагатиб эркакча сўкингиси келди, ҳар замонда боши ари инидек ғувиллаб, юраги сим-сим санчиб қўярди, ахир, бир жойда тахласа улкан чўққи баробар хирмон бўладиган бунча хом-хатала асарни Тўра Охун газагига дори қилас эканми, тангри ҳақига қасамки, ҳар ким ҳар нима деб атаётган Кўкантой эмас, сариқ чақага қиммат мана шу нарсаларни ёппасига оловда куйдириш керак.

Кўнглида турфа шубҳа ва гина-гидир нишлаганини сезган Тўра Охун яна лабларини буриб тўрсайди, сўнг томдан тараша тушгандек қилиб ғалати таклиф айтди, худойим тўзим бергил, бугундан эътиборан коллекция ҳолатини назорат қилиш ва ҳар жиҳатдан манзур асарлар билан бойитиш вазифаси гарданида эмиш, бирламчи навбатда, иблис ва жодугар нафас уриб тилсум айлаган Кўкантой орадан кўтарилгач, бир неча хил вариант бўйича, барчани бирдек мафтун этадиган Тўра Охун портретини чизиши ва коллекцияга тақдим этиши керак, шу тариқа истеъдоди вояга етганини исботлаган кунда бошидан беҳисоб ақча сочилади, агар яна димоғу фироғ қилиб думини буриб кетса ўзидан кўрсин, ҳеч бир шикоятга ўрин қолдирилмай, Садаф чорбоғи довруғига довруқ кўшган якка дарахтга оёқ-қўлларидан михлаб ташланади, азиз жонинг озгина керак бўлса, қани олға, жайдари Винсент Ван Гог!..

Санамга зимдан қараб қўяётган Тўра Охун ўша мудхиҳи ниятини ҳозироқ амалга оширадигандек бўшашибди, сўнг ўзини қўлга олди-да, ҳар қанақа жазо парвойимга парсир келмас маъносидан соқолидан бир тола юлиб пуллаб юборди ва бафуржа ташқарига ошиқди, беш-олти қадам босмай, ногоҳ қулоқ-чаккасида шовла қайнади, сўнг қаҳру ғазаб аралаш тўнгиллаш эшитилди, анчайин шанғи овоз илгари чекига тушган жазоларни эслатаётганига ажабсиниб, камина учун барисидан кўнгил фуқароси бўлиш афзал деб ҳайқирди.

Бўсағада филдек икки нафар шотир арқон ва қатрон шимдирилган қоп ушлаб ёғочдек тек қотганди, оҳиста шитирлаётган қопни зимдан кузатиб истеҳзоли илжайди, сўнг хусусий кўргазма очиш буюрмас экан-да деган ўйда афсусу надомат чекар экан, томирлари бўйлаб иситма югуриб, ҳорғин руҳида таърифга сиғмас нафррат билан қоришик, барча дардини ифода этувчи оғриқ қўзғалди.

Аста-секин ақлу идрокини гирмон дағдаға қилиб турган мотамсаро олис кунлар залвари босди, тасаввури ойнасидан пурвиқор Зарбанд тоғ тизмалари поида, Санам макру ҳийлалари остида, дилгир ва зада бўлиб нажот кутаётган қишлоқ, гулпопукли жонон дўмбирасини черта-черта ширави товушда берилиб жирлаётган Вали баҳши, дўмбокқина чақалоғини бағрига босиб эркалаётган Роҳила отин, энтиқиб жарлик сари шошаётган ва ёнокларини дувиллаб ёш юваётган Нафиса элас-элас липиллаб ўтарди.

Эсанкираб Тўра Охун ва Санамга ўгирилган ҳамоно безовта қўнглида ногоҳ қалдироқ акс садо бериб, тизгинини узиб ҳамлага ўтган ёввойи тошқин пишқирди, сал кейин алам-ангиз хўрсиниқлар билан жўрлашиб янграган эзгин тарона жону жаҳонини ўртаб юборди-ю, коллекция жойлашган маҳобатли панел иморат қобурғалари қисирлаб синган тия мисол ўқраб юборди ва шинам хона саройдан қолишмас маҳобатли бўлмага эврилди, баланд шифтга тирадиган ўнлаб забардаст устун нақшу нигорлари кўз қамаштириб ярақларди.

Ҳар доимидек хаёлини остин-устин қилиб ташлайдиган ғаройиб туш кўраёттир чамаси ёки бирон эртак оламида адашиб қолдими, ҳамон тўлқин кифтидаги кемадек чайқалаётган бинода, эни ва бўйига кенгайиб бораётган жозибадор бўлмада, сезимларни айрича тирнайдиган сурурбахш ҳолат ҳукм сураётганди, ингичка ганч безаклар берилган, нимасидир афсонавий ҳимоя тўсинларини эслатувчи бақувват деворлар мозийга алоқадор қандайдир тилсум остидан чиқсанга ўхшарди ва, ёпирай, уларни минг йилларга чўзилган уқубатли изланишлари самараси, яъни кўнгли орқали ўтган поёнсиз йўл бўйлаб ўзи сари сафар қилишга ундан туркум эгаллаганди ва бу ҳам худойим кароматларидан бири бўлса керак.

Тобора тинчи бузилиб қисирлаётган бўлма қуироғида, қайси бир устунга суяниб, анчайин норғул кимса бафуржа ўй сураётганди, кўпдан бери қайчи тегмаган патак соқолини силай-силай мийигида кулиб қўяётган банда Мерган эканини билиб севинди, ҳатто у билан биргага, сирли йўсунда энг кейин туғилган ва туркум хотимасига ўхшаб кетадиган Карвон сари ошиқди ва ўзини кутлаб қўйишни лозим топди. Илгари тикила-вериб тўйганига қарамай, Карвонни илк маротаба кўриб тургандек, ҳайрати тошиб елка қисарди, ҳатто чексиз фурур ва завқу шавқдан руҳи юксалди, охири мундоғ ўгирилсаки,

сурмали қийик күзлари олма-кесак тераётган Санам пинжига суқилганча Тўра Охун ҳам уни қизиқсиниб кузатаётган экан, сўнг ўпкасини босолмай депсинди ва ҳатто тишларини ғичирлатди.

Қора тулпор соҳибини илгари бу қадар мискин ва афтодаҳол алфозда кўрмаганди, мудом отдан тушса ҳам эгардан тушмаган одам Карвон қаршисида қартайган ва оғир дардга чалинган кимсадек буқрайиб қолганди, картина курилмасига сирлилик бағишилаган улкан тошбақага, олис ёки яқин масофани фақат имиллаб босиб ўтадиган бу маҳлуқ косасида ўрнатилган шоҳона кўшқда бемалол кўр тўкиб ўтирган ва говорони ни ўйнатганча кўшик хиргойи қиласаётган қиёфадошига бўзариб тикилгани сайин афту ангори туршак янглиғ буришиб борарди.

Фақат у кўнгли ва ҳар неки кирдикорини тафтиш қилишга ундаётган Карвон ташиётган маънони чуқур илғагани даргумон, аммо суюк-сугига қадар қақшаб оғриётгани, ичида нимадир қирс синганини кўカリб кўпчиган рафтори бемалол ошкор этаётганди, охири аранг ўзини қўлга олиб илгари юрди-да, аста Ҳулкар рўпарасида тўхтади, бўғзига пичоқ тортилаётган бедовга қарагани тобу тоқати етмай, қақраган лабларини қимтиганди ҳолда Калхат ва Кўкантой сари йўналди.

Тошқин сабаблари ва оқибатлари хусусида яхлит манзара ҳосил қилган тўркум ўзагига алоҳида қувват ва сурур бағишилаган ҳар иккала картина жодуси Тўра Охун борлигини чирмовуқдай ўраганди, баҳонада бирин-сирин даҳшатли хотиралари кўзғалгани шубҳасиз, Кўкантойда акс этган шоҳлашаётган жангари кўчкорлар маъраши эшитилгач, бўйнига чўқмор тушгандек титраб-қақшаб афтини ўғирди, сўнг анча муддат сабру бардош олам ва айникса кўнгил мөҳварига қувват эканини исбот этаётган Чумолига маҳлиё бўлди, охири ботинида сўнгсиз оғриқ ва изтироб, ҳасрат ва надомат жамланган Фунча билан Ҳомила рўпарасида полу гирён бўзариб қолди...

Илгари тошқин олдидан бўлганидек, мусаффо осмон ногоҳ қарсиллатиб пўстагини қоқкан заҳоти, бутун бўлмани ёввойи тўлқин пишқириғи, таҳлика арапаш ёлборув, ҳайқириқ ва ингроклар қоплади, орада бот-бот эмизикли гўдак чириллаб йиғларди, гўдак нафаси ўчгандан кейин ярадор қайчигайдек Роҳила отин бағрини тиғлаб бўзлади, ҳаял ўтмай Нафиса нидо чекди, шўрлиғи худодан умри ва баҳтини паймол айлаган зотларни дўзахга гирифтор этишини ёлбориб сўраётганди.

Ўпқонга қулагандек типирчилади Тўра Охун бўёқлар оламида исён бошланганига имон ўгираётган Комрон Вали сари ўқрайди, сўнг сен нобакорни ялмогиз энанг камина қасдига тувган экан деди-ёв, кетидан танангни якка дараҳт танасига михлат-масам отимни бошқа қўяман қабилида оғзидан тупук сочиб тўнғиллади, кескин ҳукм бемаврид янграганди, аммо қовоғи солинган Санам ва энсаси қотиб ижирганаётган Азлар Ниёз мамнун бўлиши ҳамда бундан ортиқроқ одиллик ва қатъият бўлмас маъносида басма-бас чапак чалишиди...

Энди олисда майин янграб ёвуқлашаётган дўмбира нолиши бир маромда Комрон Вали дилига қўйиларди, эзгин оҳанглар аллатовур афсунга кўшилиб баралла янграганди, яна бутун бино денгизда довулга учраган кемадек лорсиллаб оғир-оғир чайқала бошлади, бўлма эса кучли шамолга кўксини тутган омонат чайлладек шовдираб силкинарди, мустаҳкам девору устунлар илкис юқорига сапчилаб, шарсимон қандиллар бир ўчиб ёнди-да, бутун туркум камалакдай бир ярқираб товланди.

Ёнма-ён илинган Калхат билан Кўкантой картиналари қирмизи ҳамда нопормон тусли чўғ оғушида чўпчилаб ҳансираётганди, ҳадемай нафис бўёқлар шамол тебратганди япроқлар мисол шивирлаб қимирлади ва ифодалар учун хос даҳлсиз чегарани ғайрату шижоати танига сифмаган йиртқич қушлар потирлаб ёриб чиқишиди, сўнг ғалати чақчайиб ва таҳдидли қичқириб, оғизлари каррақдай очилган Тўра Охун билан Азлар Ниёз устига отилишиди.

Зўмда қиёмат-қойимни бошдан кечирган нобакорлар асабий додлаб ва ҳиқиллаб азиз жонларини мислсиз мусибатга гирифтор этган ушбу лаҳзаларни лаънатлай кетишиди, ҳалигина порлаб турган кўзлари ўрнини эгаллаган ва тақдири азал ҳукмидан қочиб қутилиш амри маҳол эканини англатаетган қонталаш ўймоқчаларни титраётган кафтлари билан ёпиб зир-зир чопишарди наридан-берига, охири гандираклаб юзтубан иккилишиди ва мурдадек узала тушиб ётишиди.

Комрон Вали ғолиблик нашидасини суриб янада баландроқ пардада қичқираётган, ҳатто ўзаро суйканиб умбалоқ ошаётган йиртқич қушларни кутламоқчи бўлиб бир неча марта қўл силкиди, Тўра Охун билан Азлар Ниёз кўкракларини саҳнга бериб беҳолу

бемажол инграницашар экан, тепада улар сирли рақс ижро этаётгандек, шитоб чарх уриб учишарди, сўнг чуғурлашиб нимадир хусусда маслаҳат қилишгач, жадал суръатда куйига шўнғиб, барисини бепарво кузатаётган Санам жуссаси ва рухсорига чангаль уришиди, кошки бир ҳамладаёқ уни ҳам адойи тамом қилиб ер тишлатишса!..

Нақадар ҳайратга молик, қонсираган найзадек қаттол панжалар икки тарафлама берган аёвсиз зарб синиқ сувак тароқ билан хотиржам соч тараётган Санам учун чивин чаққанча бўлмади, ночор қолган күшлар яна ҳужум қилгани ботинмай, ранглар оламига қайтишгач, Санам қийиқ кўзларини афсус ичра бош чайқаётган Комрон Валига тикандек қадади ва якка дараҳт танаисига михланиш ёки тоабад Нуқрағори тутқуни бўлиш барибир пешонангга битилган ёзуқ маъносида ишвали сузилди, сўнг мен ёруғ дунёни букиш, тиз чўқтириш ва ағдар-тўнтар қилиш вазифасини зиммамга олган, ҳар бир қадамимда фитна тикани унадиган дахлсиз фариштаман ва галдаги тошқин янада даҳшатли бўлмагунча тинчимайман қабилида булбулдек сайради-ю, Тўра Охун билан Азлар Ниёз жасадлари атрофида йўргалаб қаҳқаҳа отди.

Комрон Вали гап мағзини чақди, тасаввурнида мушфиқ замин осудалик беланчаги-да мудраётган мусаффо кунда рўй берган оғат талотумлари қайта жонланди ва нигохи қайси бир картина га тушган заҳоти жисму жони ва руҳида гувиллаб мисли йўқ бўрон кўтарилиди, нилий тусли поёнсиз осмон дафъатан пўстагини қоқди, сўнг куйида нелар кечеаётганини билмоқчи бўлгандай бирдан ошиғич энкайди, бутун иморат қобурғалари синган түядек яна алам-ангиз ўқраб юборди, муттасил кенгаяётган бўлма эса тағин турфа нидоларга тўлди, тошқин суронларини ёдга солувчи кучли ҳайқириқ ажралиб янгарди, энкайган осмон бир парчаси ниҳоят дераза оша мўралагач, аввал Ғунча, кейин эса Ҳомила қўшалоқ нафис ёқутдек ловуллаб яллиғланди ва бўёқлар ҳаракати исёнга эврила борди.

Комрон Вали жонон дўймира нолиши эшила-эшила Оҳима маҳшаринг била ҳам етти дўзахинг куяр сатри заминида пинҳон жўшқин ва маҳзун оҳангларни етаклаб келганини яққол туйди, энди чексиз армонга йўғрилган тавалло ва ёлборув, бўзлаш ва оху зорлар ўша оҳанглар билан ўзаро жўрлашиб янгарди. Суурбахш мусиқий тарона қиёмига етган ва бутун борлиқни чулғаган дамда матодан ғуссали ва умидвор боқаётган Роҳила отин ва Нафиса кўзлари тим қизил шафак тусиға кирди, қорачиқлар тубидан ларzon-ларzon сачраган олов қандайдир сирли доира ичра учрашиди-ю, ногоҳ ҳайбатли чақмоқ бўлиб чақнади.

Комрон Вали чақмоқ ҳозироқ вуҷудини ўраб-чирмаб парчалаши ва ёқиб юборишини таҳминлади, чақмоқ эса кўзларини қамаштириб бўшлиқда бир дам осуда қотгач, бир шохи ўйноқлаб баланд шифт безакларини қўпориб ташлади, иккинчи шохи эса Тўра Охун ва Азлар Ниёздан йигирма қадамча нарида қиялатиб бепарво қараб турган, эҳтимол навбатдаги тошқинга замин яратувчи омилларни ўйлаётган Санам сийнасига санчилди.

Комрон Вали ноумидлик билан ичи сидирилиб хўрсинди, нуқул миясида ҳеч бало урмайди тарзидаги фикр ғимирларди, аммо Санам зумда маҳобатли оташга чулғанганини кўриб сергакланди, бир қошиқ сув билан ютгудек нозик қадду қомат саробдай ному нишонсиз йўқолгани, ҳатто ундан ёдгорлик бўлиб атиги бир ҳовуч кул қолмаганини билгач, ўзингга шукур, мурувватли ва меҳрибон эгам деб шивирлади, сўнг қизарган ёноқларини дувиллаб юваётган ёшларини тийолмай, хаёлга толиб синик кулаётган Мерғанни астойдил қучиб ўпди-да, тезгина одимлай бориб ҳамон лов-лов товланаётган Ғунча ва Ҳомила қошида тиззалади...

## Тамом

Тошкент  
2007 – 2012 йиллар

## Ғазал бўстони



### **Зикрилло НЕМАТ**

1961 йилда туғилган. Ўзбекистон Миллий университетининг журналистика факультетини ҳамда Ўзбекистон Республикаси ИИВ Академиясини тугатган. Ўзбекистон Республикаси ИИВ “Постда”, “На посту” газеталари ва “Қалқон”, “Щит” журнallари Бирлашган таҳририятининг боши мұхаррiri. Шоурнинг “Иккимизнинг ёниқ шиқимиз”, “Қайтар дүнө” (хикоялар), “Остонадан бошланар Ватан”, “Спитаменning сүнмас қўшиги”, “Эзгулик ўлкаси” тўпламлари ва “Онам эккан раийонлар”, сайланмаси чоп этилган.

## *Полеим пониин куптиб*

### **Ишқинг деб**

*Бир булбули сайронা бўлдим, сани ишқинг, деб,  
Ҳар гўшада ҳайрона бўлдим, сани ишқинг, деб.*

*Йироқ кетолмай бир дам, ёр, шамъи жамолингдан,  
Парвонадек гирёна бўлдим, сани ишқинг, деб.*

*Кезиб жунун саҳросин, чекиб Лайлум жафосин,  
Мажсун каби мастрона бўлдим, сани ишқинг, деб.*

*Излаб Ширин дудогинг, емирдим ҳижрон тозин,  
Фарҳоддайин мардона бўлдим, сани ишқинг, деб.*

*Ўт ичра Самандардек, ҳақ излаб қаландардек,  
Бир Машраби девона бўлдим, сани ишқинг, деб.*

*Май ичмай гулкосангдан, кетмам, деб, дарвозангдан,  
Охир поий остона бўлдим, сани ишқинг, деб.*

*Ҳажрингда, эй жонона, Зикрилло ёна-ёна,  
Ишқ ахлига афсона бўлдим, сани ишқинг, деб.*

### **Жоним бўлинг**

*Эй нигор, сайр айласам, ёнимда сайроним бўлинг,  
Ишқ аро лутф айласам, ширин сухандоним бўлинг.*

*Мен садоқат гулшанин кўзлаб йўл олсан, жонгинам,  
Бир умрлик менга йўлдош, нозли жононим бўлинг.*

*Даҳр аро неча ганим, гамларга бўлсан гар дучор,  
Барчасини бартараф этмоққа имконим бўлинг.*

Чиқса жоним ногаҳон бу ишиқ йўлида, эй нигор,  
Сиз мани жиссими аро, жоним бўлинг, жоним бўлинг.

Тонсаму Зикрий камол, бошимга қўнса баҳт қуши,  
Сиз мени бағримдаги энг баҳти инсоним бўлинг.

### Фигон

Етолмай ёр висолига дилим афтода оҳ чеккай,  
Чидолмай гам-фирогига куйиб, гамбода оҳ чеккай.

Азалдан ошиқ аҳлиниң алами қисмати шулким:  
Нигорим, ёри жоним, деб, ики дунёда оҳ чеккай.

Бири Лайлум, бири Зуҳром, дебон, ёр ҳажрида бўзлар,  
Ки, Мажнун даштда ўртанса, Тоҳир дарёда оҳ чеккай.

Менам Лайли наҳоримни согиниб волалар қилсан,  
Мени оҳу фигонимдан куйиб шаббода оҳ чеккай.

Бўлиб қон таҳ-батаҳ қалбим, майи ноб ихтиёр этсам,  
Менам ток қонидурман, деб, қўлимда бода оҳ чеккай.

Менга майу гулобингдан қуй энди, чархи қажрафтор,  
Умид, орзуларим буткул бўлиб барбод-а, оҳ чеккай.

Согиниб ёри жонимни, не тонг, Зикрилло ёш тўксам,  
Кўзим маржонлари титраб, шодаю шода оҳ чеккай.

### Келмасмусан?

Согиниб ёнгай дилим, оҳ, дилбарим, келмасмусан,  
Ёритиб кўнглим уйин, моҳ пайкарим, келмасмусан?

Неча йилким келмайин, бағримни кўп қон айладинг,  
Бағритошим, эй шўхи сийминбарим, келмасмусан?

Кечалар уйқумда ҳам номинг тилимдан тушмагай,  
Эй лаби болу сўзи қанд, шаккарим, келмасмусан?

Тобакай қонимни тўккай наштарин киприкларинг,  
Кўзлари жаллод ўшал, шўх ахтарим, келмасмусан?

*Зулфлари – қалбга ўйилган ўтли ишқим нақшидай,  
Сочлари сунбулгинам, мушк-анбарим, келмасмусан?*

*Келмасанг жсонон агар, тандин чиқиб кетгай бу жсон,  
Раҳм этиб жсонимга, эй жсонпарварим, келмасмусан?*

*Йўлларингга термулиб, Зикрилло зор кутгай сени,  
Хусн мулкига хоқону қайсарим келмасмусан?*

### **Дилрабонинг дастидан**

*Оҳким, девонаман бир дилрабонинг дастидан,  
Ишқ аро тўлғонаман шўх маҳлиқонинг дастидан.*

*Кипригин ўқлаб отар икки ҳилолин ёй этиб,  
Дилгинам бўлди яро, ул икки ёнинг дастидан.*

*Зулфлари бир жуфт илондек жсон қушибимни овлагай,  
Энди бул қушиб жсон берар, зулфи дутонинг дастидан.*

*Толеим тонггин кутиб, васлин умид эттим, ва, лек,  
Кунларим бўлди қаро қоши қаронинг дастидан.*

*Кўрмадим кўнгил бериб, ул бағритоидан бир меҳр,  
Тун-кун чекдим жафо ул бевафонинг дастидан.*

*Дўст-ёрлардин кечиб, танҳо ўзига дил бериб,  
Қолдим ошиносиз, нетай, ноошинонинг дастидан?*

*Базри қон бир лола янглиғ қовжисирад қалбим мени,  
Ўртаниб ҳижрон деган дарду балонинг дастидан.*

*Зикри Оллоҳ айлаб-айлаб қолмади танда мажсол,  
Энди мен қайга борай жавру жафонинг дастидан?*

\* \* \*

*Дедим: “Ишқингда куйдим, эй маҳваши жонона”.*

*Деди: “Отаида куймас, шам узра қай парвона?”*

*Дедим: “Ақду ҳушиимни олдинг-ку, эй париваш”.*

*Деди: “Билмасмисан, Қайс нечун бўлган девона?”*

*Дедим: “Ўтли ишқимни изҳор этай, севар ёр”.*

*Деди: “Садаф ичра дур сақланмасму пинҳона?”*

*Дедимки: “Висолингсиз жиссими ми тарк этар жон”.*

*Дедики: “Аҳли ошиқ экан бермасму мардона?”*

*Дедим: “Келгил, эй гўзал, ишқимга вафо айла”.*

*Деди: “Хусн аҳлига аҳду вафо бегона”.*

*Дедим: “Ғунча дудогинг ҳажрида ёндим, эй гул”.*

*Деди: “Булбул бўлурсан, ишқимда ёна-ёна”.*

*Дедим: “Сенсиз, нигорим, менга дунё керакмас”.*

*Деди: “Сенсиз, эй ёр, мен-да, нетгум жаҳона?”*



## Бир дараҳт новдалари



**Олланазар АБДИЕВ**

1963 йилда туғилган. Нұкис Дағлат университетінде филология факультетини битирған. Филология фанлари номзоды. “Маданият ва спорт” газетасынинг бош мұхаррри. “Биз баҳтли бўламиз” (1992), “Қызыл Қошантой” (1995), “Олттин балиқ” (2006), “Эльзахоним” (2008), “Оққүшлар” (2011) каби ҳикоялар тўпламлари ва романлари чоп этилган. “Шуҳрат” медали соҳиби.

## ЙИРТИҚ ЭТИК

### Ҳикоя

Овқат кириб, овқатдан кейин бир-икки пиёла чойни қайноқ-қайноқ ичганиданми, асаблари жойига тушгандай бўлди. Чарчоғи ёзилди. Отасининг чехраси ёришишини кутиб турганмиди, ёки бўлмаса, эрталабки бўлҳо-бўлда гаплашиб ололмаслигига кўзи етганми, катта ўғил отанинг ёнбошига келиб жойлашди-да, паст овозда секин шипшиди:

– Оға<sup>1</sup>, ўқишимнинг тўлов пули... қалай бўлляпти экан?

– Бир иложи бўлар, болам. Фирма раҳбаримизга инсоф бериб қолса, икки-уч маошимни олдиндан берар. Эсига солиб турибман.

– Оға, мен калта курткада совқотиб юрибман, – деди дастурхонини йиғиштираётган қизи. “Шу арзимни неча айтдим ўзи” дегандай ийманиб, ерга қаради. – Олиб бера оласизми, оға?

– Оға, менинг этигим йўқ, ҳалиям ёзги туфлида юрибман, – деди қаёқдандир етиб келган кичкинтойи йиғламсираб.

– Айтгандай, сен кассага бориб, маҳаллақўмнинг ёрдам пулни олмадингми? – деди Сатмурод хотинига ялт этиб қараб.

– Олдим. Рўзгорда хеч нарса қолмаган, чой, тузгача тугаган эди, оғаси, шуларга харж қилдим, – хотини айб иш қилган одамдай ерга қаради. – Эртага нариги кўчадаги ўртоғингиз Маден кеплин туширяпти, шанбада овулдаги қариндошимиз Курбонниёз ўғлини уйляяпти... Оғаси, уларга ҳам куруқ қўл боролмаймиз...

– Тўйга товукларнинг бир-икковини сотиб, тухумларини пуллаб, ўзинг бориб қайтасан. Биласан-ку, менинг тўйга унчалик хушим йўқ... Қўранинг ичи иссиқ шекилли, макиёнлар тухумлаб юришгандир, ахир?! – деди Сатмурод қизишиб.

– Тухумлаб юрибди, бироқ ҳар куни пишириб, дастурхонга чиқараяпман-ку, оғаси, бола-чақанинг оғзидан ортармикан? – инқиллади хотини.

– Уч-тўрт кун тухум емасдан турармиз. Тўйларингни эплаб ўтказиб ол, – деди-ю, бошини чанглаганича ҳовлига чиқиб кетди. Қон босими хуруж қилиб қолди.

Ташқарига чиқди-ю, кўз қурғур бир нуқтада турадими, уйнинг иккى тарафидаги икки кўшнисининг саройдай-саройдай ҳовлиларига тикилиб-тиклиб қаради. Хаёлга симайдиган дарражада ҳашаматли, ваҳимали ҳовлилар орасида ўзининг уйи товукнинг катагидай кичкиналигини кўриб, юраги қақшади. “Бу икковининг ўртасида кўзга ботган ярадай ярашмай турар экан, аввалроқ сотиб юборганимда яхши бўларди-я” – кўнглидан ўтказди у. Ростдан ҳам, мана шу қўшилар бундан беш-олти йил аввал бир-бири билан уришиб-жанжаллашиб қолган, “мен оламан-а, йўқ, мен оламан”лаб, кўчага чиқишган, сўнг икковиям Сатмуроднинг уйига калондимоғлик билан кириб келишган эди.

<sup>1</sup> Оға – қорақалпоқларда “ота” сўзи ўрнида ишлатилади.

“Менга сотасан-а уйингни!” деб, бир-бирига сўз бермай, анча талашишди.

– Нима гап ўзи? – деганди ўшанда Сатмурод.

– Уйингни сотмоқчи экансан-ку, менга сотиб қўяқол! Ўзим оламан! – деган биринчи қўшни.

– Қайси уйни айтаяспан?

– Мана шу уйингни-да, сотадиган бўлсанг менга сот, икки ҳисса кўп пул бераман! – чи-ранган иккинчи қўшни.

– Менга сотсанг, уч баробарига оламан! Ҳовлимни кенгайтиришим керак. Бўлмаса сенинг манави кулбаннга кўзим учиб тургани йўқ. Менга сотсанг, текислатиб, ҳовлимга қўшиб юбораман...

Ўшанда ҳам Сатмуроднинг боши оғриб, йиқилиб тушишига бир баҳя қолган эди. “Нега мен бехабарман-у, сизлар менинг уйимни талашиб юрибсизлар! Мен сизларга уй сотаман дедимми?” деб қўшниларига бақирмоқчи бўлган, бироқ уларнинг ҳайбатларидан кўрқкан. Қасдлашиб юришмасин, буларнинг қўлидан ҳар бало келади, деган.

– Уйимни сотмоқчи эмасман. Туғилиб-ўсган жойим, ахир! Мени кечирасизлар, – деб қутилган. Пул ҳавоси одамни бир гангитса қанақа бўлишини қўшнилар тимсолида кўриб тавбалар қилган эди ўшанда Сатмурод.

“Болаларимни ўқитаяпман. Худо хоҳласа, беш-олти йил ичиди улғайишиб, ишли бўлиб, кўп пул топиб, хўжалигимиз ҳам оёққа туриб қолар...” – деб ўзини юпатганлари ҳозир яна эсига тушди. Ҳаммамиз ҳам шундай деймиз-у, бироқ ҳозир, айни шу лаҳзаларда Сатмуродга (ўзига эмас, болаларига!) фалон-фалондан пул керак эди. Үқиш учун тўлов пули, йўл ҳаки учун пул, пальто, этик учун пул, озиқ-овқат учун пул керак. Ҳар гал ёмғир ёқканда уйнинг шифтидан чакка ўтади, қор суви ўтади – демак, таъмирлаш учун пул керак. Шифер қоқтираман деса, эх-хе, неча сўм кетади? Шуларнинг барига пул керак, пул, пул, пул... “Эски этигимни яматиб кийишга ҳам рози эдим, бироқ шунинг ўзигаям пул керак. Бунча пулни қаердан топаман? Ким беради?! Ҳай, Оллоҳ-худойим, Ўзинг ёрлака! Қатордан кам қилма!

Кузнинг кечки изғирини таъсир этдими, Сатмурод юрагининг зирқираганини сезди, тавба, худди нимадир бўладигандай. Нимаям бўлсин, ахир...

Шу пайт кўчадан ғизиллаб ўтаётган бир машина ғийқиллаб тормоз босиб келиб, нақ Сатмуроднинг пахса девори тагида тўхтади. Машина эшигининг қарсиллаб очилгани, ҳайдовчи йигитнинг машина тепасига сақраб чиқиб, кўча томондан Сатмуроднинг ҳовлисига аланг-жаланг қараётгани кўринди. Кейин йигит Сатмуродга кўзи тушди-ю, қўлидаги каттагина қопчани ҳовли ичига отиб юборди. Воеа шу қадар тезлик билан рўй бердики, нима бўлганини Сатмурод англаёлмай ҳам қолди. Қопча учиб келиб, аввал Сатмуроднинг бошига тегди, кейин оёқлари остига гурсиллаб тушди. Нотаниш йигитнинг овози эшигилди.

– Шошиб турибман! Изимдан қувиб келишяпти, оға! Пулни тез яшир, бу сенга омонат! Бир-икки кундан кейин келаман. Келмасам, ишлатаверинглар. Машина катта тезлик билан йўлга тушди. Шунинг орасида қувишиб-ҳайдашиб келаётган икки-уч машина ҳам кўчанинг бурилиш жойида бир секинлаб, кейин зўриқкан овозда ғувиллаб ўтиб кетди. Сатмурод нималар юз берганини англаб етмаса ҳам, оёғи остига тушган қопчанинг ичи тўла пул эканлигини сезди. “Тавба, худди эртақдагидай бўлди-ку!” деб анчагача анграйиб турди-да, қопчани қўлига олиб, уйга кириб кетди.

Неча чақиримдан югуриб келгандай, ҳарсиллаганича тўрдаги хонага ўзини урди. Қопча оғзидағи ипни бўшатиб, ичидагиларни ерга тўкиб ташлади. Бари – бели букилмаган банкнотлар. Санаб охирига етолмайсан. Жуда кўп!

– “Чин кўнгилдан йиғласа, сўқир кўздан ёш келар”, деганлари рост келдими, ёки Сатмурод оққўрак-поккўрак бўлиб кўкка ёлворганининг натижасими, бунисини бир Яратганинг ўзи билади, лекин воқеанинг бўлиб ўтгани аниқ эди. Ишонмай деса, мана даста-даста саноқсиз пуллар сочилиб ётиди. Ишонай деса... Тавба-е, тавба! Сатмурод ҳам, хотини ҳам туш эмасмикан, дегандай ёнбошларини чимчилаб-чимчилаб қўришди, кафтларини тишлаб қўришди. Охири, шуларнинг барি рост эканига ишонишиди. Ва...

Оиланинг биринчи навбатдаги эҳтиёжларига, институтнинг тўлов пулига, янги пальто ва этикка, ўзининг йиртиқ этигини тикиришга, тўёнага деб, осмондан тушган пулдан қарзга деб олиб, ишлатишди. Қолган пулга тегишмади. Пул жуда кўп эди, тугайдиган эмас, шунда ҳам Сатмурод нафсига ҳай бериб, сабр қилди.

Орадан кунлар ўтаверди. Қопчани ташлаб кетган йигит қорасини кўрсатмади. Ё бирорни юбормади. Ўн кун, йигирма кун, бир ой... икки ой... ўн ой, бир йил ўтиб кетди. Йигитдан хабар бўлмади. Сувга чўқдими, кумга ботдими, гум бўлди.

“Тирик бўлганида, шунча пулни излаб-сuriшириб бир келарди. Ўша куни машинада қочаман деб офатга учраб, қайтиш қилдимикан? Бироқ, қазо топган бўлса ҳам, шунчалик

кўп пулни сўраб-суриштириб кимдир, қачондир шу кўчадан ўтиши керак эди, ахир. Сўроқсиз, хабар-ўчарсиз иргиб тушаверадиган пул – қанақа пул экан у? Балки, ким биллади дейсиз, ўша йигит тириқдир? Яна бир йил кутайин-чи, шунгачаям келмаса, илож йўқ, ҳукуматга топшириб юбораман-да”, деган фикрга келди у.

Номаълум йигитнинг ким эканлигини Сатмурод жуда билгиси келди. Ўфрими, каззобми, йўлт тўсарми, порахўрми? Балки уйини ёки машинасини сотиб, каттакон пулга эга бўлган-у, бироқ ўша лаҳзанинг ўзида қарокчиларга учраган бир пешонаси шўр одамдир, ким билсан!?

“Қаёқдан тўпланган пул бўлса ҳам, бироқ шу пуллар мен учун ҳалол эканлиги аниқ, сабаби, менинг олдимга бу пуллар ўз оёғи билан келиб тушди...”

Хотини билан неча маротаба машварат қурди. Охири бир қарорга келдилар: йигит ке-либ, бу пулнинг қандай пул эканлигини айтмагунча, хазина топиб олганлари ҳақида ҳеч кимга чурқ этиб оғиз очмаслик керак. Яқин кунлар ичida қурилиш фирмаси ташкил қилиб, Сатмурод оиласви тадбиркорликни йўлга кўйди, манави пулларни шунга қўшади – айлантиради, ўргилтиради, топган фойдаси билан қопчадаги пулни тиклайди, агар фойда ошиб кетаверса, ана ўша фойданигина харж қиласди.

У ана шундай “тактика” билан режа тузиб, қопдаги пулдан яна “қарз”га деб пул олди. Шундай қилиб, белига қувват эниб, “бисмиллоҳ” деб енгни шимариб ишга киришди.

Сатмурод чаққон, саводли, ишнинг кўзини биладиган тадбиркор чиқиб қолди. Бунинг устига меҳнаткашлиги ҳам қўл келиб, сал кун ичida ишлари юришиб, чўнтакларига пул кира бошлади. Ҳозир ким кўп – уй қураман, ҳовли тиклайман, офис безатаман деб яхши уста излаб юрганлар кўп. Сатмурод мана шундай қурилиш-безакловчи фирма очиб, ёш-ёш, қобилиятили йигитлардан гурухлар тузиб, уларни иш билан таъминлашни йўлга кўйди. Пул оқиб кела бошлади. Уч-тўрт йилнинг ичida каталакдайгина уйининг ўрнида замонавий қўринища тикланган, қўшнилариникидан ҳам ҳашаматли қилиб ҳовли тиклади. Ке-йин антиқа бир иш қилди: пуль билан очилиб-ёпиладиган каттакон дарвозасининг устига йирик этигини осиб кўйди, қизиги, бу этикларнинг бир пойи кўча томонда бўлса, иккинчиси уй тарафда эди. Албатта, чиройли қилиб тикланган евроманзарали уйнинг бежирим дарвозасига қаққайган бир пой этик ярашибгина тургани йўқ. Уйни томоша қилгани келганлар, қўшнилар, қариндош-уруглар кулишиб, “Сатмурод оға, манови этигингни олиб ташласангчи, сира ярашмаяпти” деса, Сатмурод ҳам дарров жавоб қиласди:

– Э, тураверсин. Ҳеч бўлмаса, мен тирик вақтимда кўзим тушиб тургани маъкул. Сўнг, майли, ўзлари билади. “Аёзхон, ҳолингни бил, кумурска, йўлингни бил” деган гап бор-ку, ахир. Эрталаб ўғилларим, келинларим, қизларим машинада ишларига кетаётib, албатта этикка кўзи тушади. Шунда менинг рўзгор тебратаман деб қандай ахволларга тушганимни ҳам эсларига олар, ахир. Одамзод қизиқ, йигитлар-ов, одамзод қизиқ, чўнтағи сал қаппайиб, пули кўпая бошласа, кечаги кунини унутади, қўшнилари олдидан кеккайиб ўтадиган бўлиб қолди. Шундай пайтда дарвоза олдида осилиб турган этикка кўзи тушса, кўнглига шайтон соглан ҳовур босилиб, кечмиш кунларини эслай бошлайди. Кўзини босаётган ёғни артиб олишяпти..

Бу этикнинг данғара<sup>1</sup>сининг эшиятган одамлар қизиқсиниб, Сатмуроднинг кўчасидан машинасини ҳайдаб ўтадиган бўлишди. Баъзилар кула-кула бош чайқаб кетса, баъзилар машинадан тушиб, ўйланиб ҳам қолишади. Сатмуроднинг эски этигини куриб, тавба қилгандай, ғалати бир тусда машиналарини секин ҳайдаб кетишади. Ишқилиб, этикка кўзи тушганиларнинг ҳеч бири аввалгидай манмансираб, босар-тусарини билмай қолаётгани йўқ. Мендан ўтадиган бой борми?! деганлар этикни кўргач, сал дами босилиб, ўзларига келиб олишяпти.

Қайсиdir бир йили ноябрнинг изғиринли кунларидан бирида Сатмуроднинг дарвозасидаги кўнғироқ жиринглади. Сатмурод бир қарашданоқ келган меҳмонни таниди.

– Уйга кир, иним! – деди у салом-алиқдан сўнг. Чой ичгач, Сатмурод гавдали йигитнинг олдига икки қопчада пул кўйди.

– Менинг пулларим бир қопчада эди-ку, оға! – деди йигит.

– Иним-ай, “қозонинг қозон туғди”, деган гап бор-ку, ахир. Сенинг пулларинг ҳам пул туғди, олавер, бу пуллар ҳаммаси сенини!

Қорақалпоқчадан  
Музаффар Аҳмад таржимаси

<sup>1</sup> Данғара – овоза, шов-шув деган маъноларда.



## Ижод лабораторияси

### ШЕЪР ЗАҲМАТИ

Бадиий адабиёт инсоннинг бутун борлигини, руҳияти ва қалбини тўлалигича акс эттиради. Шеърият юракнинг энг ичкин дарди, изтироб ёки кувончини тўйгулар рангида бергани учун ҳам ўқувчи қалбига тез етиб боради. Шеъриятнинг қалбга тез етиб борувчи кучи бадиийлик билан ўлчанади. Ҳар қандай сўз, дилга ўт солавермагани каби, ҳар қандай сўзлар тизмаси ҳам шеър бўлавермайди.

Ўзбекистон Қаҳрамони, ҳалқ шоири Абдулла Орипов адабиётнинг азалий қоидасига қатъий амал қиласди, яъни, ҳар бир сўз, ҳар бир мисра устида соатлаб, кунлаб фикр юритади, шеърни қайта-қайта ишлайди. Абдулла Орипов, эндиғина, ижод оламига кириб келаётган кезларида, устоз шоир Максад Шайхзода ёнига чорлаб: “Абдулла Ориф ўғли, ижодингиз дуруст. Шу ўринда, бир гап доим ёдингизда турсин, шеър ёзганда асосий эътиборни сўнгги мисрага қаратинг. Бутун шеър давомида бўрмоқчи бўлган фикр ёки кайфият охириги мисрада мухтасар акс этсин, шеърнинг охириги мисраси гўёки унга қадалган олтин мих каби бўлсин”, деган экан.

Масалан, Абдулла Ориповнинг “Чала иморат” номли шеърини олайлик. Бу шеърнинг ёзилиш тарихини ўрганишда шоирнинг кечмиш кунлари, воқеликнинг шеър ҳолатига кўчиш сабаб-оқибатларини ўрганиш биографик методга таянади. Айнан бу метод ижодкор руҳиятидаги чегарасиз импрессионизм “ички мен”нинг очилишига, адабиётшунос Узоқ Жўрақулов таъкидлагандек: “ижодкор биографиясидан фақат ахборот сифатида фойдаланмай, балки бунда ижодкор биографияси бир бутун тизим ўлароқ ижод моҳиятини очишга хизмат қиласди”.

Бу борада Абдулла Орипов шундай дейди: “Руҳ ритми шеърда мужассам бўлиши лозим. Шеърларнинг ҳаммасини ийқанда ҳаёт мозаикаси пайдо бўлади”.

“Ҳаёт мозаикаси” – ҳаёт йўли, шоир ижодида тўлиқ акс этади.

Ўз юртингда, ўз бошпаннингга эга бўлиш учун “ўзгалар муруватини” кутиб яшашдан оғирроқ иш бўлмаса керак. Бу ҳолат тасвирини Абдулла Ориповнинг “Ўй” шеърида учратамиз:

Ижроқум уй бермиш,  
Кўзларингда ёш...  
Шунчалар кўпими迪 дилингда дардинг?  
Етар, таъзим билан эгаверма бош,  
Етар, юрагимни эзиб юбординг.

Шоирнинг лирик қаҳрамонга бераётган далдасида, ўша даврнинг оғриқли нуқталарига бир уй баҳонасида наазар ташлаётганига гувоҳ бўласиз. Бунда, маълум маънода,



**Руҳсора  
ОРИПОВА**

1986 йилда туғилган.  
2003-2007 йилларда  
Ўзбекистон Миллий  
университетининг  
ўзбек филологияси  
факультетида ба-  
калавр босқичида,  
2007-2009 йилларда  
эса магистратурада  
ўқиган.

2010 йилда аспиран-  
турага қабул қилиниб,  
“Лирикада биографик  
асос ва унинг бадиий  
талқини (Абдул-  
ла Орипов ижоди  
мисолида)” мавзу-  
ида илмий ши олиб  
бормоқда.

шоирнинг биографияси ҳам акс этган дейиш мумкин. Талабалик йилларида ижарада яшаган шоир, уйланиб, фарзандлик бўлгунга қадар ижара уйларда саргардан бўлгани, шундай таъсири мисралар яралишига сабаб бўлган бўлса, ажабмас. Унинг таъкид тарзидағи саволлари кейинги мисраларда лирик қаҳрамонга далда беради. Аммо, бу далда билан шоир кифояланмай, бу умид ижодкор қалбида бир неча қайсар саволлар пайдо қиласди. Аслида, шу Ватаннинг фарзанди бўлсангу шу юрт, шу борлиқ ҳаммаси ўз мулкинг бўлса-ю, сен уни бировлар қўлидан йиллаб кутиб олсанг.

*Ижроқўм уй бермиш,  
Багоят савоб,  
Лекин кўрмай сени муте шаклида.  
Ҳақиқатнинг тагин изласанг шу тоб  
Мутлақ сеникидир уйлар, аслида.*

Ушбу шеър фақат шоиргагина тегишли дард эмас, балки шоир ҳам ўша уй кутган миллионларнинг биттаси бўлганини кўрсатиши учун аҳамиятлидир. Шеърда ўша кечинмалар ва ҳолатлар тасвири акс этганини таъкидламоқчимиз.

2002 йилнинг август ойида шоир “Чала иморат” номли шеър ёзди.

Шеър неча йиллар давомида битмай, қаровсиз, кимсасиз ҳолда ётган, худуди ўраю тошлардан иборат, каламушлару қушларга макон бўлиб қолган чала иморат ҳақида ёзилган. Ушбу шеър уй қурилиши тарихи билан боғлиқ. Уй қурилиши учун ўн йил вақт кетган, ҳали битмай туриб, емирилиб бораётган чала иморатни бутун қилгунча неча ёзу қишлоарни ўтганидан “сўз очадиган” бу шеър шоирнинг биографияси билан узвий боғлиқдир. Уй қурилгунча шоирнинг қанчадан-қанча асаб толалари емирилгани, қурилишни неча мартараб тўхтатиб қўйилгани ўйнинг тайёр бўлишига на моддий, на маънавий томондан имкон ва ишонч бўлмаганига ўзимиз гувоҳмиз. Шеърни чуқур ўрганиш жараёнида, унинг хомаки ва тайёр нусхалари билан танишиб чиқдик. Шеър уч вариантдан иборат. Мавжуд бўлган сатрлар кейинги вариантда учрамаслиги, ҳар бир сатр, жумла неча маротаба қайта ишланганлигини мисоллар ёрдамида кўрсатишга ҳаракат қиласди. Шеърнинг хомаки қўлёзмасида:

*Оғзин очиб ётар чала иморат,  
Атрофи ўраю гўнгдан иборат, – деган мисралар бор.*

Кейинги ишланган вариантда иккинчи сатрдаги “гўнгдан” сўзи ўрнига “тошдан” сўзи қўлланилган, негаки, шеърда мужассам бўлган ҳар бир сўз ўз бадиийлигини йўқотмаслиги лозим.

*Тунда йўловчилар четлаб ўтгайлар,  
Инсу жинсдан ёқа тутгайлар.*

Ушбу сатрлар ҳам қайта ишланиб, “йўловчилар” ўрнини “қўшнилар”, “инсу жинсдан” сўзи эса “калима қайтариб” тарзида ўзгартирилади. Аммо шоирнинг ушбу таҳрири шеър эълон қилинган китобда йўқ. Аввалги ҳолат ўз ҳолида қолган. Чала иморатнинг харобалигини тасвирлашда шоир, уни реалликдан узоқлаштирасликка ҳаракат қиласди ва юқоридаги сатрлар ўрнини куйидаги сатрлар билан бойитади:

*Ҳар ён чакалакзор, бурган ва янтоқ,  
Остона ўйилган, узилган равоқ.  
Хотирами, дейсан, у қаттолов жангдан,  
Ё ёдгор асрлар қолдирган чангдан?*

Биринчи вариантда шеърнинг навбатдаги мисраси шу шаклда бўлса:

*Қора туйнуклардан увиллар шамол,  
Фижирлар омонат, том ҳам bemажол.*

Юқоридаги сатрлар иккинчи вариантга келиб, бирмунча ўзгартирилади. Яъни:

*Қора туйнуклардан увиллар шамол,  
Қамиш том ғижирлар махзун, bemажол.*

Кўриниб турибдики, бу ерда шоир “маҳзун” сўзи ўрнига, “ўксик” сўзини қўлламоқчи бўлади, лекин бу фикридан қайтган холда, “маҳзун” сўзини ўз ўрнида қолдиради. Кейинги сатрларни таҳрир қилиш жараёнида, шоир қофияларни ҳам қайта ишлаганини кўришимиз мумкин.

Илк вариантда:

*Баҳор, ёз ўтади чала иморат.*

Аҳвол ўша-ўша ҳолдан иборат, – каби тасвирланган бўлса, кейинги вариантда:

*Баҳор ёз ўтади ҳамон у чала.*

Қушлар уй қурмишдир гала ва гала, – тарзида ўзгартирилади. Бундан қониқмаган шоир: “Кушлар уй қурмишдир гала ва гала” сатрини “Каламушлар тўп-тўп, қушлар ҳам гала” сатрига алмаштиради. Шеърнинг равон ўқилиши учун ҳар бир сатрдаги сўзлар кетма-кетлиги нафақат моҳирона тузилиши, балки мазмунни бойитиши билан ҳам бадий мукаммаллик касб этади.

Дастлабки вариантда шеърнинг навбатдаги сатрлари бундай ёзилган:

*Ташландик бу уйнинг соҳиби кимдир,*

*Ё фалак, бу савол жавобин билдири?*

*Бойқуш ярим тунда беради садо,*

*Саволга бир жавоб айтгандек гўё.*

Шеърнинг ишланган варианatlарида сатрлардаги айрим сўзлар таҳрир қилиниб, ўзгартирилганинг гувоҳи бўламиз. “Ё фалак, бу савол жавобин билдири” мисрасини шоир: “Ё фалак! Бу ҳолнинг сабабин билдири” дея таҳрир қиласди. Бундан англаш мумкинки, бу ҳолат фақатгина саволга жавоб эмас, балки ушбу ҳолатнинг пайдо бўлишига сабабчи омилларга чуқурроқ эътибор беришга ундайди. Кейинги сатрдаги: “Бойқуш” сўзи ўрнини “Бир қуш” эгаллайди, бунда ноаниклик даркор бўлиб, “Бойқуш” аниқ бир образни тасвирлаб бериб, ўқувчи тасаввурини чегаралаб қўйиши мумкин эди. Шоир кейинги сатрдаги “савол” сўзига эгалик қўшимчаси -имни қўшиб, “айтгандек” сўзи ўрнига “қилгандек” сўзини қўллади:

Шеър сўнггида шоир куш тилидан муаммонинг ечимини беради, шеър:

*Шарт эмас саволнинг нечун, негаси,*

*Ё шоир, ё марҳум бунинг эгаси? – деб ниҳояланса, ишланган вариантида:*

*Не керак гапингнинг нега, негаси,*

Ё шоир, ё марҳум бунинг эгаси? – тарзида якунланади. Бунда нафақат сатрдаги сўзлар, балки муносабатни ҳам бирмунча ўзгарганини кўрамиз. Шу мақсадда тугалланган шеърни тўлалигича келтирамиз:

*Оғзин очиб ётар чала иморат,*

*Атрофи ўраю тошдан иборат.*

*Ҳар ён чакалакзор, бурган ва янтоқ,*

*Остона ўйилган, узилган раевоқ.*

*Баҳор, ёз ўтади, ҳануз у чала,*

*Каламушлар гуж-гуж, қушлар ҳам гала.*

*Ташландик бу уйнинг соҳиби кимдир?*

*Ё фалак! Бу ҳолнига сабабин билдири?*

*Бир қуш ярим тунда беради садо,*

*Саволимга жавоб қилгандай гўё:*

*– Не керак, гапингнинг нега, негаси,*

*Ё шоир, ё марҳум бунинг эгаси?!*

Бу шеърнинг ёзилиш жараёни ҳақида тўхталар эканмиз, Абдулла Ориповнинг ижодий лабораториясига назар ташлаш баҳонасида, шоирнинг сўз устида ишлаш принциплари, унинг сўзга бўлган талаб ва масъулиятини ҳис қиласмиз. Зоро, ҳақиқий шоир сўзининг, каломнинг қадрига етади. Ҳазрат Алишер Навоий ҳам сўз таърифидаги кўп ва хўб тўхталиб, уни “гўҳари шариф” деб улуғлайди, ҳақиқий, бадиий етук, оҳорли шеърнинг яратилиши, ижодкордан қанчалар заҳмат, улкан меҳнат талаб қиласди.

## Болалар дунёси



### **Oриф ТҮХТАШ**

1976 йилда туғилған. 1993-1998 йиллар давомида Самарқанд Давлат университетидә журналистика ихтиосослиги бўйича таҳсил олган. Унинг “Ғунчалар табассуми”, “Куёш ўюли” ҳамда “Кўнгилга ташриф” деб номланган шеърий тўпламлари чоп қилинган.

## Чундай деган экан

### **Шафтолининг дегани:**

– Мени, дерлар, шафтоли,  
Кўп мевалар қатори  
Мазалиман, тотлиман,  
Нархи баланд отлиман.

Мақтаниши бўлар, десам,  
Минг бир дардга дориман.  
Ўғирлаган сиз бўлиб,  
Яна мендан нолиманг.

Мақсадим – хурсанд қилмоқ  
Сиз хўранда дўстимни.  
Бирон-бир сўз айтдимми,  
Шилсангиз ҳам пўстимни?!.

### **Рубобнинг дегани:**

– Одамлардай  
Бошим бор.  
Лек, иккита  
Шохим бор.

Торимни  
Сайратаман,  
Дилларни  
Яйратаман.

Мен куйлайман:  
“Тинг-тинг-тинг”.  
Қани –  
Даврага тушинг.

**Қўзиқориннинг дегани:**

Ўзим ялпоқ,  
Боида “қалпоқ”,  
Ёмғир ёғса  
Ўсаман.

Сариёгда  
Пиширсангиз,  
Ширин бўлгум  
Роса ман.

**Қулоқнинг дегани:**

– Қулоқ деган бир номга  
Эгаман, биласизлар.  
Мен орқали кўп гапни  
Эшишиб, куласизлар.

Фахрлидир вазифам,  
Бундан жуда розиман.  
Лек баъзан “икки” олган  
Боладан норозиман.

Чунки барча муаллим,  
Жазо йўлин топишган.  
Қўллари фақат менга  
Ёпишигани-ёпишиган.

Мени бошга кўтариб,  
Кўча-кўйни кезасиз.  
Куннинг совуқлигин ҳам  
Каминадан сезасиз.

Яхши эшиитмайди, деб,  
Дог суркаманг шаънимга.  
...Бирор гап айтдингизми,  
Тушунмадим, а, нима?!.

**Олманинг дегани:**

– Танишайлик, мен – олма,  
Номимга қулоқ солма.  
Олавер, иккиланмай,  
Иштаҳанг бўлсин карнай.

Рекламага ҳожсат йўқ,  
ТАъмим роса ёқимли.  
Ортганини қуритсанг,  
Кишида ейсан қоқимни.

**Арининг дегани:**

Мен ариман, ариман,  
Мендан хафа Наримон.

У билмай асабимни,  
Кўзгади газабимни.

Хозир хафа ишиимдан,  
Чунки еди нишиимдан.

**Нуқтанинг дегани:**

– Мен нуқтаман,  
Мен нуқта.  
Ўрган аввал  
Сен пухта.

Гапларнинг  
Хар бирида,  
Шай тургум  
Охирида.

Бўлса агар  
Гап сўроқ,  
Бошимда  
Турап ўроқ.

Гап ундов  
Бўлганда бок,  
Тепамда турап  
Таёқ.

Вергулларда  
Думим бор,  
Боиқа дўстим,  
Кимим бор?!

## Адабий жараён миңтақалари



**Муҳаммаджон  
ХОЛБЕКОВ**

1950 йилда туғилган. Самарқанд Давлат университетининг роман-герман филологияси факультетини тугатган. Филология фанлари доктори, профессор. Унинг “Ўзбек адабиёти Францияда”, “Амир Темурнинг Европа қироллари билан ёзишиллари”, “Уильям Шекспир”, “XX аср модерн адабиёти манзаралари” каби рисолалари ишларига маълум. Шунингдек, “Француз адилларининг эртаклари”, Вольтернинг “Задик” қиссаси, Мериме, Монассан, Моруа новеллалари унинг таржимасида чоп этилган. Ҳозирда Жиззах ДПИ инглиз тили ва адабиёти кафедраси мудири ва профессор лавозимида фаолият кўрсатиб келаяпти.

## ЛОТИН АМЕРИКАСИ РОМАНИ

(Габриэль Гарсия Маркес ижодига чизгилар)

Лотин Америкаси адабиётининг йирик вакили, “сеҳрли реализм” адабий оқимининг асосчиларидан бири, колумбиялик машхур адаб Габриэль Гарсия Маркес номи тилга олингандаги, замонавий китобхон тасаввурнида, аввало, унинг қиёфаси ва ижоди гавдаланади.

**Габриэль Гарсия Маркес** (1927) Кариб денгизининг сўлим қирғофида жойлашган Аракатака шаҳарчасида дунёга келган. Иш топиш илинжида катта шаҳарга йўл олган отонаси, эндигина туғилган Габриэлни бобоси – истеъфога чиқкан полковник ва меҳрибон бувиси тарбиясига қолдириб кетишиади. Болалигидан эркин ўсган, атрофдаги оламга “кўзини катта очиб қараган” Габриэль, ўтмиш ва ҳозирги кун ҳақида тасаввурга йўғрилган сеҳрли хаёлларга чўмган бобоси, уйнинг муҳитига, шоирона қилиб айтганда, “худди до-нишманд мўйсафиддек мудраб қолган” эски уйида эшигтан эртак ва чўпчаклар, афсона ва қизиқарли ҳикоялар оламига бутунлай шўнғиб кетган эди. Табиийки, бу муҳит ёзувчининг ижодига таъсир этмасдан қолмади. Габриэль, айниқса, бувиси билан жуда инок эди. Неварасини жону дилидан яхши кўрган бувиси кичкина Габриэлга жуда кўп қадим афсона ва ривоятларни сўзлаб берарди. Улар эса, ўз ўрнида, боланинг хотирасида муҳрланиб, бўлажак ёзувчининг кўпгина асарлари негизини ташкил этди. Телеграфда ишлаган калтабин отаси, уй-рўзгор ташвишидан бошини кўтаролмаган муштипар онаси бир вақтнинг ўзида ўн олти фарзандни тарбиялаш билан овора эди. 1936 йил кичкинотай Габриэлни Аракатакадан олиб кетишиган ота-она унга жўяли тарбия ва таълим беролмадилар. Дастлаб, уни Барранкилья шаҳридаги Сан-Хосе интернатига топширадилар, бу ерда у ёлғизликнинг “неъмат”ларини кўзёшлари билан “татиб” кўрди. Сўнгра, уни Сипакира шаҳридаги коллажга ўқишга беришиади. У ерда Габриэль шеъриятга қизиқиб қолади ва коллажда чиқадиган газетада фаол қатнашади. Баҳтили тасодиф туфайли дўстининг онаси шаҳар кутубхонасида ишларди ва Габриэлни мутолаа учун кутубхонага бепул киритарди. Макондо образи, айнан, кутубхонанинг жимжит ва чанг босган муҳитида туғилган бўлса, ажаб эмас. 1947 йил ёш Габриэль Колумбия пойтакти, осмонўпар тоғлар орасида жойлашган, рутубатли об-ҳаво қоплаган Санта Фе де Боготанинг кўркига кўрк солувчи, колониал услубда қурилган

ва “инқилобий ғоялар ўчоги” деб аталған Миллий университетнинг ҳуқуқшунослик факультетига ўқишига киради.

“Ҳаёт ҳақида сўзлаб бериш учун яшаш” номли охирги ҳужжатли романида Гарсия Маркес Богота ҳақида шундай ёзади: “Богота ўша пайтлари зулмат босган, одам қадами етмас беномнишон шаҳар эди. Шаҳарга XVI асрда конкистадорлар зулмидан қочган ҳиндулар асос солган эдилар. Менимча, ўша пайтлардан бери осмонни қоплаган булуллар тарқалмас, шивалаб ёқсан ёмғир эса бир кунга ҳам тинмасди. Шаҳарнинг савдо маркази атрофида жойлашган сон-саноқсиз қаҳвахоналарга кириш таъқиқлаб қўйилганди”.

Ушбу ғамгин кайфиятдаги сўзлар дард-алам, ташлаб кетилганликни, ёлғизликини англатмасди, асло. Аксинча, ёш Габриэль уддабурон, ташаббускор, хушумошали, одамлар билан тез кириша оладиган, тил топиша биладиган некбинлар сирасидан эди. У иход қилишини давом эттириб, Боготада чиқадиган “El Espectador” газетасида ўз мақола ва ҳикояларини эълон қилиб борди.

Дарвоқе, Гарсия Маркес қаламига мансуб илк “Учинчи итоаткорлик” (1947) номли ҳикоянинг яратилиш тарихи Аракатака реаллигига чуқур сингиб, ушбу ҳаётбахш чашмадан ҳовучлаб илҳом сувини ичади: “...Хира фонуси билан йўлни аранг ёритиб келаётган охирги трамвайга Чапинеро бекатида ҳақиқий чалишоёқ фавн кириб, бўш жойга ўтириб олди. Трамвайда мудраб ўтирган тўртта-бешта йўловчилардан ҳеч ким уни кўриб таажжубланмаганингига эътибор бердим. Шунинг учун бўлса керак, уни якшанба кунлари болалар боғида ҳар хил майда-чўйдаларни сотиб юрган ва атайлаб ясаниб олган савдогарга ўхшатдим. Бироқ фавннинг ҳақиқатан мавжудлиги, қўл чўзса ушлаб қўриш мумкинлиги ҳеч қандай шубҳага ўрин қолдирмасди: унинг чиройликкина шоҳчалари ва текисланган соқолчаси аниқ эчкинигiga ўхшарди. Трамвайга кириб келганида эса, туёқчалари тақиллаганини ўз қулогим билан эшитган эдим. Унинг олдидан ўтаётби, терисидан тараалаётган ўткир бадбўй ҳидни ҳам сездим”.

Бу ҳикояда Франц Кафканинг таъсири сезилиб туради, чунки ўша йиллари Гарсия Маркес Гарбий Европа модернизм адабиёти, хусусан, унинг Лотин Америкаси адабиётига кўрсатган таъсирига бағишлиган жиҳдий тадқиқот устида иш олиб боргани маълум. Ёш қаламкашга ғамхўрлик кўрсатган газета билан иходий ҳамкорлик узоқ давом этди ва икки тарафга, сўзсиз, катта фойда келтирди. 1955 йилда газетада унинг “Бир ўлимдан омон қолган ҳарбий дengizchinnig ҳикояларига асосланган саргузаштлар ҳақида менинг ҳақиқатим”, деб номланган ўн тўртта очерки босилиб чиқади. Уларда колумбиялик ҳарбий кемаларда контрабанда ўтказиш фактлари фош этилгани боис, ҳукумат ва ҳарбий доираларда катта сиёсий можаро кўтарилиди. Кўплаб ҳарбий ва сиёсий арбоблар истеъфога чиқарилди. Бу очерклар, бир оз вақт ўтиб, аниқроғи, ўнг қанот муҳолифотчилари – ҳарбийлар гурухи етакчиси Роҳас Пинилья ҳукуматни ағдариб, ҳокимиятни ўз қўлига олганда, газета ёпилишининг сабабларидан бирига айланди. Бироқ унгача ҳали анча вақт бор эди.

Марказий ва Жанубий Америка мустамлакаларида мустақиллик учун кураш боရаётган йиллари Колумбияда фуқаролик уруши бошланади. 1948 йил қирғинбарот тўқнашувлардан ўзини олиб қочган Гарсия Маркес Картахен-де-лас-Индиас шаҳар-часида кўним топади ва у ердаги институтда ҳуқуқшунослик таълимими олишини давом эттиради. Айни пайтда, “Universal” газетасида ҳам ишлайди. Қудратли давлатларнинг таъсирига тушиб қолган ҳамда сиёсий, молиявий-иқтисодий манфаатлар тўқнашув майдонига айланган Колумбияда Гарсия Маркес иходий фаолият билан бирга ижтимоий-сиёсий фаолият ҳам олиб боради. Ўқишини муддатдан олдин тугатишга мажбур бўлиб, ўзини адабиёт ва журналистикага бағишлишга қарор қиласди. 1950 йилда Барранкилья шаҳрига бораркан, “El Heraldo” газетасининг мухбири сифатида тўқнашувлар марказига тушиб қолади. Бир вақтнинг ўзида “Cronica” ҳафталигига сиёсий-ижтимоий мавзуларга бағишлиган рукнни (бўлимини) ҳам бошқаради. Бир неча марта унинг ҳаёти қил устида бўлган эди. Шунга қарамасдан, у ўзи танлаган йўлдан тоймади, заҳмат чекаётган оддий халқ билан ҳамнафас яшади. Айнан, шу пайтлари адаб “Ўй” деб номланган катта асарга кўл уради. Эҳтимол, ушбу хомаки чизгилар, бетартиб қайдлар ва ёзувлар машхур (у ҳақда қўйида фикр юритамиз) романнинг пойдевори-

ни ташкил этгандир. Курш олиб борган томонлар вақтнчалик сулҳ тузиб, давлатда омонат тинчлик ўрнатилган пайтида Гарсия Маркес билимини тұлдириш, таълимими охирига етказиш билан овора бўлиб, жуда кўп китоб ўқииди. Илмий ишида белгиланган йўналишдан четта чиқмасдан Эрнест Хемингуэй ва Уильям Фолкнер, Жеймс Жойс ва Виржиния Вулф, Франц Кафка ва Марсель Пруст ижодини пухта ўрганади. Айтиш мумкинки, ушбу машхур адилларнинг ижоди унинг дунёқарашига, дунёни ҳис этишига, қолаверса, бадиий тафаккурига, услугбининг шаклланишига катта таъсир кўрсатади.

1950 йилларда у маҳсус мухбир сифатида Италия ва Францияга боради, маълум вақт у ерда яшайди, ижод қиласи. Қайтиш чоғи эса, Колумбияда вазият кескинлашгани боис Венесуэлла пойтахти Каракасда тўхташга мажбур бўлади ва шу тариқа ватанига қайтиши узок йилларга чўзилиб кетади. 1955 йили дўстлари кўмагида Гарсия Маркеснинг “Хазон барглар” номли қиссаси нашрдан чиқади. Бу асарида у ўзини жиддий насрнависдек кўрсата олди. Қиссанинг мазмуни ҳам ўзгача эди. Аслида, “хазон барглар” деб, ёзувчининг қадрдан шаҳрида ишлаб пул топиш ва қоринни тўйдириш, кенг маънода, ҳаётда ўз жойини топиш илинжида шаҳарма-шаҳар кезиб юрган дарбадар мусофириларни аташарди. Бу асарда илк бора Макондо шаҳарчаси тилга олинади. Ёзувчи қўлидан чиқкан роман ва қиссаларда тасвирланган воқеа-ҳодисалар, айнан, шу шаҳарда рўй беришини унинг ижодидан хабардор бўлган ўқувчи яхши билади. Шунингдек, бу асарда Гарсия Маркес ижодида марказий ўрин тутувчи – ёлғизлик мавзуси аниқ-равшан кўрина бошлайди.

Юқорида айтилганидек, 1955 йилдан бошлаб, “El Espectador” газетаси мухбири сифатида ишлаган Гарсия Маркес Европанинг кўплаб давлатларига боради. 1957 йилда у Москвада ўтказилган Ёшлар ва талабалар ҳалқаро фестивалида қатнашади. Дунёда тинчлик ўрнатиш, қитъаларда яшаётган турли элат ва миллатларни бирлаштириш, маданий алоқаларни боғлаш йўлида босилган катта қадамдек намоён бўлган ушбу муҳим воқеадан олган таассуротларини Маркес бир қатор очеркларида тасвirlайди. Римда яшаган пайтлари эса “Экспериментал кинематография маркази”даги режиссёрлик курсларида ўқиб, маълум кўникмага эга бўлади ва бир нечта ҳужжатли фильмни суратга олади. Иш юзасидан Парижда юрганида, Колумбияда навбатдаги тўнтариш содир бўлиб, “El Espectador” газетасининг ёпилгани, ўзи билан бирга ишлаган дўст ва ҳамкасларининг сиёсий таъқибга олингани ёхуд ватанини тарк этгандари ҳақида хабар топади. Шундан сўнг, у Парижда қолиб бир қатор газеталарда фаолият олиб боради. Бу йиллар адид ўз ижодий изланиш, ўз услубига сайқал бериш борасида тинимсиз меҳнат қиласи. Ёзувчи, мукаммал даражадаги бадиий ифодалиликка эришиш мақсадида, ўша пайтлари бошланган “Полковникка ҳеч ким ёзмайди” қиссасини сал кам ўн бир марта қайтадан ёзади. Ушбу изланишлар самараси ўлароқ, 1957 йилда кўллэзма оқقا кўчирилади.

1957 йилда Гарсия Маркес озодлик ҳавосидан енгил нафас олган Каракасда яшаркан, “Momento” журнали билан ҳамкорлик қиласи. Унинг ҳаётида тинч ва сокин дамлар хукм суро бошлайди. У ҳали 1946 йилда, талабалик даврида танишган ва умрбод бирга бўлишга аҳду паймон қилган Мерседес Барча Пардо билан 1958 йилга келиб оила қуради. Адид қисқа вақт Мексикада яшайди. У ерда фильмлар учун сценарийлар, журналлар учун мақолалар ёзиб, бир амаллаб кун ўтказади. 1959 йилда Нью-Йоркда ишлаб юрган кезлари унинг бирин-кетин икки ўғли дунёга келади. 1961 йил Мексикада чиқадиган “Mito” журналида адилнинг “Полковникка ҳеч ким ёзмайди” қиссаси, бир йил ўтиб эса, “Гранде Онанинг дағн маросимлари” номли ҳикоялар тўплами босилиб чиқади.

1959 йил Гарсия Маркес Куба ҳукумати тасарруфидаги “Пренса Латина” информацион агентлиги билан ҳамкорлик қиласи, унинг мухбири сифатида кўпгина мамлакатларда хизмат сафарларида бўлади. Гарсия Маркеснинг бетиним ҳаёти, узок ва яқин мамлакатларда бўлиши, сафарлардан олган таассуротлари адид дунёқарашини янада кенгайтирган бўлса, ажаб эмас.

Тан олиш керак, Буэнос-Айресда илк нашр этилган “Ёлғизликнинг юз йили” (1966) романи ўз муаллифига оламшумул шуҳрат билан бирга, тижорат йўлида ҳам мўмайгина даромад келтирди.

“Ёлғизликтинг юз йили” романи жаҳон адабий жараёнида муаллиф кутганидан ҳам ортиқ довруғ ва ном таратди.

Романинг яратилиши ўзига хос тарихга эга. Унинг охирги режаси 1965 йилда, узоқ фикр-мулоҳазалардан сўнг тўлиқ шаклланган эди. Шундан сўнг, ёзувчи автомобилини сотади-да, оила боқишини турмуш ўртоғининг зиммасига юклаб, ўзи деярли ўн саккиз ой кабинетига “қамалиб олади”. Эҳтимол, у ўзини Вальтер Скотт, Виктор Гюго ёки Эрнест Хемингуэйга мензагандир. Ким билсин. Номи улуғ бу ёзувчилар машхур асарларини яратганларида, айнан, шундай йўл тутган эдилар.

“Esquire” (“Эсквайр”) журналига берган интервьюсида адид шундай дейди: “...Қарамоғимда хотиним ва жажжи икки ўғлим бор эди. Ўзим PR-менежер бўлиб ишлардим ва онда-сонда киносценарийларни таҳрир қилиб турардим. Китобни ёзиш учун эса ишдан воз кечиш лозим эди. Мен машинамни гаровга кўйдим ва пулларни Мерседесга топширдим. Ҳар куни у қандай бўлмасин менга қоғоз, сигарет, умуман, ишлаш учун зарур бўлган нарсаларни етказиб турарди. Китоб ёзиб бўлингандা биз ёр-биродарларимиздан 5000 песо қарз бўлиб қолганлигимиз маълум бўлди. Бу катта пул эди. Айни пайтда, менинг жуда муҳим китоб ёзаётганим ҳақида овоза тарқалган бўлиб, атрофдаги дўкондорлар бу ишда баҳоли қудрат кўмак бериб, ўз ҳиссаларини кўшмоқчи бўлганликларини маълум қилишиб. Чучварани хом санашибди! Қўллөзмани ноширга жўнатиш учун 160 песо керак бўлиб турганида ихтиёrimизда бор-йўғи 80 песо қолувди. Ўшанда, мен Мерседеснинг хамир қоришитирғичи ва соч куритадиган фенини гаровга кўйдим. Бу ҳақда хабар топган хотиним: “Роман ёмон чиқмаса майлига эди”, деб мени юпатган эди. Ўшанда, роман жаҳон адабиёти сара асарлари қаторидан ўрин олишини ким ҳам билибди, дейсиз”.

Аурелиано Буэндия оиласининг олти авлоди ҳаётида содир бўлган ғайриодатий, ғайриахлоқий, ғайритабии, ақл бовар қилмас, қонунга зид воқеа ва ҳодисаларни тас-виirlаркан, Гарсия Маркес юксак бадиий маҳорат билан Буэндия оиласига у ёки бу даражада мансуб кишилар ҳаётга умид-ишонч билан қарайдиган шодмон ва сабр-бардошли кашшоф (жаннат боғидек сўлим гўша Макондони Аурелиано Буэндия биринчи бўлиб топган)лардан борган сари насли айниётган разиллар, ерда бесаранжом-бесаришта ҳаёт кечираётган, аранг кун кўраётган девоналарга айланётганини кўрсатади. Романда Аурелиано Буэндия сулоласи тарихида замонавий маданият замирида ётган индивидуализмнинг гуркираб яшнаши, тараққий этиши ва завол топиши жараёни кузатилади. Бу асослими, йўқми деган саволга жавобни ахтариш айни пайтда вақтни зое кетказишибир. Асарни ўқиган ҳар бир ўкувчи ўзича хулоса чиқаради. Айтмоқчимизки, Гарсия Маркеснинг аксар асарларида кўтарилаётган ёлғизлик ҲАЁТ деб номланган машаққатли йўлда инсонни муқаррар кутиб турган охирги, хазонрезга ўхшаш ҳаёт палласи, унинг хотимасидир. Аурелиано Буэндия сулоласининг сўнгги вакили ҳаёт билан видолашгач, бирпасда кўтарилган тўполон шамол қурт-қумурсқа ва чумолилар кемириб, куунга айлантириб ташлаган Макондони ер юзидан учирив кетди.

1967 йилда босилиб чиқсан романнинг биринчи нашри ҳақида Чили шоири Пабло Неруда: “Эҳтимол, бу роман “Дон Кихот” давридан кейинги испан тилидаги улкан ғалаба, кутилмаган янгилиқдир”, дея ўзининг ижобий фикрини билдиради. Муаллиф эса мутлақо бошқа фикрда эди. Интервьюда мухбирнинг: “Агар сиз меҳр-мурувватли, саховатпеша сехргар бўлганингизда нима қилган бўлар эдингиз?”, деган саволига, у тўғридан-тўғри, вижданан: “Ёзганларимнинг ичидан “Ёлғизликнинг юз йили” романини чиқариб, ёки ташлаган бўлардим. Мен бу китобни ёзганимдан уяламан, чунки менга маълум сабабларга кўра уни яхшилаб ёзишга вақт етмади”, деб жавоб беради. Адид, ўз фикрини давом эттирапкан, жумладан, шундай дейди: “Ақл-идрок нуқтаи назаридан қараганда, “Бузрукнинг кузи” романимнинг бадиий савияси анча юқори. Ҳар ҳолда аминманки, “Бузрукнинг кузи” – мени тоабад унутилишдан сақлагувчи асаддир. Полковник Аурелиано Буэндия ким бўлган – тарихий шахс ёхуд кўчанинг номими, деган саволга боз қотирилмайдиган, умуман, эсга олинмайдиган пайти “Бузрукнинг кузи” мени қутқаради. Маъсума Гўзал Ремедиос оппоқ, шахват доғи тегмаган чойшабда кўкка кўтарилиши ёки бир-бирига яқин қариндош ота-онада бутун авлод бошига тушган лаънатнинг аломати ризо – манҳус калтакесак туғилгани ҳақида ҳикоя қилувчи роман “адабий зилзила” деб аталиши мутлақ нотўғридир”.

Нима бўлганда ҳам, ёзувчи олифтагарчилик биланми ёки дилидагини яширмай, очиқчасига гапирайтими, йўқми, билмаймиз. Бу муҳим эмас. Танқидчилар миф яратиш санъати, афсоналар ижодиёти ва “сехрли реализм” бадиияти хусусида баҳс-мунозара юритган бир пайтда Гарсия Маркес ўзи ёзган китобларда ҳамма нарса ҳаётдан “кўчириб” олинган, деб таъкидлашдан чарчамайди.

Дарҳақиқат, “Ёлғизликнинг юз йили” романининг дастлабки 8000 донаси бир ҳафта ичida тарқаб кетди. Унга нисбатан “адабий зилзила” иборасини ишлатган перулик адаби Марио Варгас Льоса сўзларига қараганда, ушбу романда бадиий тўқима маҳсули – дастлаб қишлоқ, кейинчалик шаҳарга айланган Макондо – Лотин Америкаси, унинг асосчиси Аурелиано Буэндия ўз авлодлари билан эса – дунё тимсолига айланди. “Ёлғизликнинг юз йили” – бу ҳақиқий адабий чангальзор, сехр-жоду, мажоз ва афсонадан иборат фантастик маҳлуқот”, деб ёзганди америкалик танқидчи Уильям Макферсон. У Лотин Америкаси адабиётининг дурдона асари, “сехрли реализм бадиий йўналишининг ёрқин давоми”, дея эътироф этилди.

Дарҳақиқат, “сехрли реализм” деб аталмиш бадиий йўналишининг ўзига хос хусусиятлари – бу ғайриоддий характер ва ғайритабии, таъбир жоиз бўлса, “мўъжизавий” воқеа-ҳодисаларни аслига монанд, “реалистик”, то майда тафсилотигача тўғри, ҳеч бир хаспўшлаш ёки бўрттиришга йўл кўймаган тарзда тасвирлашдир. Гарсия Маркеснинг икрор бўлишича, “реал ва фантастик бўлиб кўринган нарсалар ўртасида ўтказилган аниқ чегарани бузишга қарор қилдим, чунки мен гавдалантириб кўрсатмоқчи бўлган дунёда бундай ғов-тўсиқ йўқ эди”. Унинг қаҳрамонлари учун “насроний одобахлоқ”, “жумҳурият анъаналари”, “чет эл валютаси етишмовчилиги”, “ижтимоий тараққиёт” каби тушунчалар замонавий ақл, онг ва “яратувчанлик қобилияят”ининг маҳсулидир. Уларга эса инсу жинс, “ёмон ва яхши” арвоҳларга ишониш, афсунгар жодулари ва ёмон одамларнинг “кўз тегиш”и каби тушунчалар анча яқин, чунки улар шундай “сехр”лардан иборат дунёда яшайдилар.

Романда юз йил ёлғизликка маҳкум этилган Буэндия суполасининг тарихи муфассал ҳикоя қилинади. Муаллиф ҳар доим ҳар хил – машҳур денгиз қароқчиси Френсис Дрейк<sup>1</sup> давридан бошлаб, турли тарихий даврларга мурожаат қилади. Роман сюжети қизиқарли воқеалар билан шунчалик тўйинтирилганки, амалда фабула (тасвирланган воқеалар силсиласи)ни қисмларга ажратиш имкони йўқ, романнинг ҳар бир сахифасида муҳим воқеалар юз беради.

“Ёлғизликнинг юз йили” романини идрок қилиш, “мағзини чақиш” бошқа модернист ёзувчиларнинг интеллектуал романларига қараганда, анча осон ва мароқли. Гарсия Маркес ўз вақтида телесериаллар учун сценарийлар ёзгани шунчаки кўнгилхушлик, вақтчоғлик машғулоти бўлмаган, балки унинг ижоди учун маҳорат мактаби вазифасини ўтаган. У тўлиқ англаган ҳолда “сара жамият” вакилларига эмас, балки оддий ўқувчиларга мақбул қилиб матн яратади. Шу сабаб роман оммабоп китобга айланди. Аслида, сценарийнавислик нуқтаи назаридан қараганда, Гарсия Маркесни ҳақиқий постмодернист ёзувчи, десак бўлади. 1969 йил америкалик танқидчи Лесли Фидлер қаламига мансуб постмодернизм манифестидек янграган “Чегараларни босиб ўтинглар, жарликларни кўмиб ташланглар” мақоласидаги асосий фикр сифатида “оммавий” ва “элитар” санъат ўртасида чегараларни йўқ қилиш талаби кўтариб чиқилган эди.

Бу жиҳатдан қараганда, Гарсия Маркеснинг “сехрли реализми”, мифология ва диний хурофотларига асосланган онгги ва тафаккурига йўғрилган бадиий методи оммавий китобхонга қаратилганлиги билан алоҳида ажралиб туради. Ижодкорнинг фикрича, китобхонга дунёни, айнан, шу тарзда тасвирлаш тушунарли бўлган. Масалан, Хосе Аркадио тунларни бедор ўтказиб, аллақачон ўлиб кетган лўли Мелхиседек (Маликсидқ) билан гаплашиб чиқиши ўқувчини ажаблантиради. Бироқ “сехрли реализм”нинг оддий реализмдан фарқи шундаки, унда қандайдир бир ғалати, реал ҳаётда мумкин бўлмаган воқеа-ҳодислар рўй берганлигига эмас, қолаверса, улар одатий, ҳар куни бўлиб турадиган воқеа-ҳодисаларга айланганлигига, яна – темир

<sup>1</sup> Френсис Дрейк (1540-1596) – машҳур денгиз қароқчиси, Елизавета саройида катта эътибор қозонган, инглиз флотильясига кўмандонлик қилиб 1588 йил Испаниянинг “Енгилмас Армада” флоти устидан ғалаба қозонган, адмирал унвонига сазовор бўлган.

буюмларни ўзига тортувчи магнит кучи, майда нарсаларни катталаштириб кўрсатувчи лупа, "замонамизинг буюк кашфиёти"дек тақдим этилган муз, сув ва овқат орқали юкувчи уйқусизлик дарди, хуллас, шу ва шунга ўхшаш бошқа нарсалар қандайдир сеҳрли нарсадек англанганлигидадир.

Бу аснода, Гарсиа Маркеснинг ўз холаси ҳақидаги хотиралари диққатимизни тортади: "...У аломат аёл эди. Кунлардан бир кун у очик айвонда кашта тикиб ўтирганида, битта ажина-жиннинг ўхшаш жувон каттакон тухумни кўтариб келди. Тухумда ўсимтаси бор экан. Бу нарса жувонни, дастлаб, ҳайратга, сўнгра, қўркувга солди: "Муқаддас Биби Маръям ўз паноҳига олсину, бу ўсимтада шайтоннинг қўли бўлса-чи?!.. Бу тухум инсу жинсларнинг иши бўлгани турган гап", деди у. Нима сабабдан билмадиму, лекин холамнинг уйи қишлоқда сеҳр-жодудан ишлари бўйича ўзига хос маслаҳатхонага айланган эди. Ҳар сафар фавқулодда нарсага дуч келиб ёки ғалати воқеага учраб, жавобини тополмасдан, одамлар бизнисига келиб сўрашар эди. Холамнинг бу чигал масалаларни осонликча, ортиқча куч ишлатмасдан ҳал этишидан ҳангуманг бўлиб қолар эдим. Кўз ўнгимда бўлаётган сеҳр-жодудан азбаройи қўрқиб, қаерга яширинишни билмасдим. Нимаси биландир бу сирли ва мўъжизакор маросимлар мени ўзига тортарди. Тухум кўтариб келган жувонга қайтайлик. Жувон холамдан сўради: "Қаранг, нима учун тухумда бундай катта ўсимтада бор? Холам жувонга сирли боқиб, кўзларини юмиб, бўғиқ оҳангда: "Бу қонхўр аждаҳонинг тухуми. Кўрада олов ёқинглар", деб буйруқ бердилар. Холам, алланималарни пичирлаб, тухумни оловга ташлаб юборди ва тухум куйиб, палағда сасиб, бир пасда йўқ бўлиб кетди". Ушбу табиийлик, софдиллик, содалик "Ёлғизликнинг юз йили" романига калит берган бўлса, ажаб эмас. Бу романда ҳам даҳшатли воқеалар ва мудҳиш манзаралар тасвирланади, бир вақтнинг ўзида афсонавий ва ҳайратомуз, ғалати уйдирмалар ҳикоя қилинади.

1982 йилда Гарсиа Маркес адабиёт соҳасида Нобель мукофотига сазовор бўлди. Нобель кўмитасининг расмий баёнотида: "...фантазия ва реаллик қоришиб бутун бошли қитъанинг ҳаёти ва муаммоларини ўзида акс эттирган роман ва ҳикоялари учун", дегувчи сўзлар бор. Нуфузли мукофотни топшириш маросимида Швеция Фанлар академияси вакили Ларс Йюлленстен ўз нутқида: "Кўп ийллар мобайнида, Лотин Америкаси адабиёти шундай куч-кудратни кўрсатдики, уни бошқа адабиётларда учратиш амримаҳол. Гарсиа Маркес асарларида... испанча барокко, европача сюрреализм ва бошқа модернистик оқимларнинг таъсири аралашиб кетган... нафис услубни юзага чиқарган, энг муҳими, оптимистик рӯҳда янграйди... Гарсиа Маркес ўз сиёсий қарашларини яширмайди, у иложисиз, бенасиб қолганлар тарафида туриб, уларга жабр-зулм ўтказиш ва улардан иқтисодий фойдаланишга қарши чиқади", дейилган.

Жавобан сўзланган нутқида эса, Марказий ва Жанубий Америка ҳаёти, шартшароити хусусида тўхталаркан, Гарсиа Маркес туб ва кўчириб келинган халқларни эксплуатация қилиш мавзусига ҳам жиддий эътибор қаратди. "Ўйлайманки, – дейди у, – нафақат Лотин Америкаси ҳаётининг адабий ифодаси, балки объектив воқеилиги ҳам Швеция Фанлар академиясининг диққат-эътиборига лойиқдир". Фикрини давом эттиаркан, Гарсиа Маркес: "Ҳеч ким бирор учун ўлиш ёки яшаш қарорини қабул қилмайдиган, муҳаббати ҳақиқий, баҳти эса – амалга ошадиган, юз йил ёлғизлика маҳкум этилганлар эса, охир-оқибат, баҳтли яшаш ҳуқуқини ўз қўлларига олган утопия яратгани учун жавобгарликни ёзувчи ўз зиммасига олади", деб, ҳақиқатга қанчалик яқин эканлигини яна бир карра исботлайди.

Кўпгина тадқиқотчилар Гарсиа Маркес ижодига Франц Кафка, Жон Дос Пассос, Виржиния Вулф, Альбер Камю, Эрнест Хемингуэй ва, айниқса, Уильям Фолкнер таъсирини алоҳида таъкидлайдилар.

Ҳақиқатдан ҳам, Гарсиа Маркес ўз ижодида уларнинг услуб ва бадиий тажрибалиридан моҳирона фойдаланади. Унинг ижодида XX аср ўрталарида майдонга келган ва инсон ҳаётининг фалсафий тушунча ва категориялар тилида ифодалаб бўлмас мутлақ ноёблигини биринчи планга чиқарган фалсафий йўналиш – экзистенциализм руҳидаги оҳанглар – "ташлаб кетилган"дек ҳис этилаётган ёлғизлик, шахсий қадр қимматни, инсонийлик хислатларни сақлаб ёки кундалик турмушнинг икир-чикирларига бутунлай шўнғиб, унга бардош беришда яқол кўринади.

Айрим тадқиқотчилар Гарсия Маркесни буюк ёзувчи, унинг шоҳ асари – “Ёлғизликнинг юз йили” романини эса – жаҳон адабиёти зарваракларида мангу қолажак асар деган фикрга асосли шубҳа билдиришади. Масалан, 1983 йилда америкалик мұнаққид Жозеф Эпстайн “Изоҳлар” (“Commentary”) номли адабий-бадиий, ижтимоий-публицистик журналдаги “Шундай ҳам зўрмисиз, Габриэль Гарсия Маркес?” номли мақоласида романнависнинг композицияни тузиш маҳоратига тан беради, аммо “унинг тийиқсиз фантазияси, “санъаткорона” услуги охир-оқибат мөъддага уради”, деб муҳтасар хулоса қиласди. “Ижтимоий-сиёсий аҳамиятидан холи олиб қараганда, – давом этади Жозеф Эпстайн, – Гарсия Маркес ҳикоялари ва романлари маънавий-маърифий соҳасида аҳамиятини йўқотади, одоб-ахлоқ меъёрларидан чиқиб кетади. “Буюк колумбиялик” ўз болалигининг жумбоини ечиш мақсадида, бутун ҳаёти давомида изланади”. Ҳа, ахён-ахёнда шундай бетакаллуф фикрлар ҳам учраб туради.

Тўғрисини айтганда, Гарсия Маркес яратган адабий маконда ҳукм сурәттган одоб-ахлоқ хусусида жиддий фикр-мулоҳаза юритишнинг ҳожати борми, йўқми, деган савол туғилади. Илк иирик асари “Хазон барглар” қиссасидан тортиб, то “Ҳаёт ҳақида сўзлаб бериш учун яшаш” (2002) деб номланган охириги ҳужжатли романнигача бўлган давр мобайнида, Гарсия Маркес ҳеч қаҷон маънавият, одоб-ахлоқ мезонлари хусусида фикр-мулоҳаза юритишга жазм қилмаган эди. Шунга қарамасдан, унинг асарларида очиқдан-очиқ беҳаёлик, ахлоқсизлик ҳам йўқ эмас.

Ўзининг сон-саноқсиз интервьюларида ушбу адабий ҳодиса хусусида савондан қочиб қутулолмаслигини яхши билган Гарсия Маркес ярим чин, ярим ҳазил тарзда жавоб беради: “Ўйлашимча, Карпентьер “сехрли реализм” деб, аслида, реаллик дегувчи мўъжизани, айни, Лотин Америкаси, хусусан, Кариб денгизи мамлакатлари реаллигини шундай номлайди... У – сехрли... Ҳа, ишонинг менга... Бу ерда шунақаси бўлиб туради...”

Оддий қилиб айтганда, Гарсия Маркес бадиий тўқиманинг унга кераги йўқлигига ишонтироқчи бўлади. 1979 йилда Гаванада яшаган пайтлари, “Bohemie” журнали мухбири Мануель Переира билан сұхбатда Гарсия Маркес шундай дейди: “Фантазия – бу Уолт Дисней. Мени эса бу нарса умуман қизиқтирмайди. Агар менинг асарларимда бир грамм фантазия тополсалар, мен хижолат чеккан бўлардим. Бирорта китобимда фантазия йўқ. Масалан, “Ёлғизликнинг юз йили” романидаги Маурисио Бабилоњаининг сариқ капалаклари билан боғлиқ бўлган машҳур саҳнани олайлик. У ҳақида: “О, нақадар гўзал фантазия!” дейишади. Жин урсин, у ерда ҳеч қандай фантазия йўқ! Бўлмаган гап! Аракатакадаги уйимизга ҳар замонда бир уста келиб турганини жуда яхши эслайман... Бувим кўлига латтани ушлаб, оқ капалакни ҳайдаб кўчага чиқаролмаяпман. Бу уста ҳар сафар келганида капалак уйга учиб киради...”

...Таъкидлаш лозимки, Гарсия Маркес ижоди Колумбия ва Венесуэлла минтақасида етакчи мавқе тутган адабий анъаналар билан узвий боғлиқ, айни пайтда, мухолифлари ҳам бор. Бир томондан, унинг машҳур ўтмишдоши, “ям-яшил жаҳаннам” адабиёти асосчиларидан бири Хосе Эустасио Ривера ҳамда Лотин Америкаси адабиётида етакчи мавқе тутган “бадавийлик – цивилизация” қабилидаги анъанавий мифологемани кўтариб чиқкан Ромуло Гальегосларнинг бадиий тажрибаси Гарсия Маркесга фойда келтиргани аниқ. Бошқа томондан эса, унинг услуги ҳам, бадиий тўқимаси маҳсули бўлмиш Макондо образи ҳам Эрнест Хемингвэй ва Уильям Фолкнер таъсиридан холи деб бўлмайди. Юқорида таъкидланганидек, Гарсия Маркес ҳеч қаҷон “Шимолий американлик марди калон”ларнинг ижобий таъсирини инкор этишга журъат этолмаган. Лекин Уильям Фолкнернинг Йокнапатофаси билан у таниш бўлмаганида ҳам, Макондо шаҳарчаси, барибир, унинг тасаввурида туғилар эди. Ахир, баҳтли тасодиф туфайли, Хуан Карлос Онеттининг тасаввурида, бир вақтнинг ўзида ҳам хаёлий, ҳам жўшқин ҳаёта монанд Санта-Мария шаҳарчаси пайдо бўлди-ку. Бошқача айтганда, Макондо – тор маънода, экватор иқлимида яшаётган, тропик чангальзорлар қоплаган, бирварақайига икки – Атлантика ва Тинч океанлари пўртана тўлқинларига, енгил шабадада мавжланиб қуйилаётган садоларига чўмилган Колумбия, кенг маънода эса, викорли төғ, серсув дарё, жазирама сахро, ям-яшил дашту биёбонларнинг сехрли

диёри – Лотин Америкасининг тимсолига айланган шаҳарчадир. Макондо кўп жиҳатдан Гарсиа Маркес туғилиб ўсган Аракатака, қолаверса, у тақдир тақозоси билан бир неча вақт яшашга мажбур бўлган, ишлаган ва ўз кўзи билан кўрган кўплаб катта ва кичик шаҳарларга ўхшайди. Ўша жойларнинг иқлими, муҳити, табиати, яшаш тарзи унинг 1950 йилларда яратилган ҳикоя ва қиссаларда ўз аксини топган ва Гарсиа Маркеснинг энг машҳур романига ўзига хос дебоча бўлган десак муболага бўлмайди.

Қалин чангальзорларнинг одам қадами етмас ичкарисига бориб Макондо шаҳрига асос соларканлар, “Ёлғизликнинг юз иили” романни персонажлари, қайсиdir бир маънода Х.Э.Риверанинг “Гирдоб” номли роман қаҳрамонлари босиб ўтган йўлни такрорлайдилар. Бироқ ўз қаҳрамонларини “ям-яшил жаҳаннам” чакалакзорларига ғарқ этаркан, Гарсиа Маркес вақти-соати келгунча табиатнинг қарши ҳаракатини ҳис этиб кўришга имкон бермайди. Аурелиано Буэндия сулоласининг биринчи вакили ва унинг содиқ ҳамроҳлари “бадавийлик”нинг “цивилизация” билан тўқнашувидан вужудга келиши эҳтимоли – хавф-хатарни сезмайдилар. Қалбларида индивидуализм деб аталмиш иллатнинг уругини олиб юрганларини хаёлларига ҳам келтирмайдилар. Макондода, дастлаб, ҳамма ўзаро тенг, тўкин-сочин дастурхон атрофида фаровон ҳаёт кечиришади... Бироқ бундай хотиржам ва сокин, роҳат-фароғат ҳаёт узоққа бормайди. Макондони, нафақат, нафс балосига йўлиқиши, балки шаҳватпарастлик, тийиб бўлмас ҳирс, бадахлоқлик, риё, золимона ҳокимиятчилик, амри фармонлик каби иллатлар зулматга айлантиради. “Ердаги Боги Эрам”дан ҳеч кимни ёқасидан олиб қувмайдилар – у ердан ўз ихтиёри билан кетишади. “Жаннатдан ташқарида”ги беҳад катта дунёда яшаб кўриш иштиёқи шу қадар кучлики, уни тўхтатиб, йўлини тўсиб бўлмайди. Роман давомида “нариги дунё чопарлари”, “цивилизация нишоналари” Макондони тўлқинга ўхшаб босиб олаверади. Цивилизацияга яқинлашиб, туташ нуқталарни, ўхшаш жиҳатлар борлигини аниқлаш, унинг заҳарли ҳавосидан нафас олиш, ҳалокатга етакловчи меваларидан татиб кўриб Макондо ҳамма нарсани: қонли урушларни, сиёсий фитналарни, қирғин келтирувчи эпидемияларни, “банан ширкати” ўрнатган адолатсиз, шафқатсиз тузумнинг оқибатларини ҳам бошидан кечиради.

Демак, дастлаб, Макондо – Боги Эрам, жаннатмакон юрт. Лекин бу сўлим гўша, тўкин-сочин ўлка, ҳаётбахш заминда яшовчилардан айримлари катта дунёга қочишини, озодликка чиқишини орзу қилишади. Бундай “гуноҳ”нинг, аникроғи Одам Ато ва Момо Ҳаво инъом этган нозу неъматлардан юз ўғиришдан бош тортиш, итоатсизликни намойиш этишнинг оқибати – муқаррар ёлғизликдир.

Бу ҳаёт прозаси. Уни тийиб бўлмайди. У “санъаткорона”, юксак маҳорат билан ишлов берилган, сайқаллаشتирилган. Эҳтимол, у, американлик танқидчи Жозеф Эпстайн таъбири билан айтганда, ахлоқсизлиги билан меъдага тегар, лекин қўшиқдан сўзларни олиб ташлаб бўлмайди. Қайсиdir бир маънода, Колумбия реаллиги аллақачон Гарсиа Маркесни “ёзиб” бўлди. У Колумбиянинг сехрли, фусункор қунларининг ширинахан, хушовоз қўйчиси бўлиб қолаверади.



## Наср

**БАХОР**

*(Гулбахор Таваккарова)  
1972 йилда туғилған.  
1996 йил  
Фарғона Давлат  
университетини  
тамомлаган.  
Хозирги кунда  
Марҳамат  
туманиндағы  
18-умумтағым  
мектебіда она тили  
ва адабиёт фани  
муаллimasи.*

**ИШҚ МАНЗАРАЛАРИ****Бадиа**

*Аё сиз, жон чекиб, ҳар лаҳза изларсиз Илоҳийни,  
Ани излашга ҳожат йўқ, Илоҳий – сиз, Илоҳий – сиз!*

**Жалолиддин Румий**

**БИРИНЧИ МАНЗАРА****Ҳақиқат**

Йигит дайди итнинг ёнига ўзидаги охирги бурда нонни қўйди. Танида устихони чизилган ит нонни ютоқиб нафас олган каби шошиб еди, ушоқларини-да ялади. Кўзларида яна илтижо аксланди. Йигит эса унинг пойига чўқди, ориқ оёқларини кўлларига олди. Ит ўзини ортга ташлаб, нари кетди. Йигит унинг тупроқдаги изларини кафтларига олиб кўзларига суртди, елкалари учеб-учиб йиглади.

– Ҳой йигит, нонни итга берадирми! Боз устига, унинг изларини қўзга суртиб йиғламоқдасен! Эсингни еб қўйганмисан ёким? – дея танбех бердилар одамлар.

Йигит сас бермади.

– Ақлдан озибди бечора, – хуносага келишди эси бутунлар ва итни ҳайдаб юборищди.

– Уни ҳайдамангиз! Урмангиз! Майли, мени савалангиз!  
Ахир, у... Оҳ, ахир у Лайли қўчасининг ити!..

Мажнуннинг охидан осмонлар титроққа келди...

**ИККИНЧИ МАНЗАРА****Маърифат**

Уни Ошиқ дедилар. Аммо, доно кишилар унинг ишқини инкор этдилар: бу қандай ишқидирки, ундан лаззат топилмаса! Яккаш хижрон азоби, ғойибона вasl умиди... Мумкин эмас! Нечун жонни қийнамоқ! Ёшлини, умрни совурмоқ!.. Мушк ифори тарағлан гул бадан, ширин нафаслар, ақлдан оздиргувчи олов дудоклар, ёқимли эпкиндай нозлар, ишвалар – мана бу ишқ! Инонмасмен ўзгасига. Бу ўзни алдамоқ, эҳтимол, риё. Ўзгалардан ўзни устун қўймоқ – буюклиқ даъвоси. Оллоҳга сигинмоқлик рост. Бунинг боиси жаннат умиди, азобли дўзахдан қўркув. Қолгани бекор! Ёруғ дунёда аёл деган Фирдавс бордурки, ундан ҳеч ким воз кечмас. Бу кеч ошиқ даргоҳига шундай бир малакни киритинг, токи, такаббур ошиқ ақлдан озсин, ишқни ишқ десин, хаёлни хаёл...

\* \* \*

*Кеча келгумдир дебон, ул сарви гулрў келмади,  
Кўзларимга кечатонг отқунча уйку келмади...*

Ошиқнинг маъюс нигоҳи шам олови беланчагида тебранди. Соғинчу фироқ азобида эриб бораётган жисму жони шам ҳолига қиёс эди. Шу дам эшик табақаси аста очилиб, хона ёқимли эпкинга тўлди. Остонада нафис ним пушти либосда узун олтин зираклари рақс этиб турган малак пайдо бўлди. Малак юзини ярим тўсиб турган ҳарир рўмолини илгақдан бўшатиб, ипак қўлларини кўксига босганча салом берди. Унинг хусни таърифига сўз ожиз эди. Новрастада алиф қадди, бору йўқлик миёнасидаги нозик бели, учишга шайланган қўш кабутардек... Малакки, бу ёруғ дунёга доир эмасдек эди гўё. Ошиқ ҳайрат тўла кўзларини ундан узолмасди. Пари унга яқин борди:

– Ҳазратим, бу кеч кўнглингиз хобгоҳида тунасан, ҳайдамассиз? Кўпдинки, сизнинг ғойибона ишқингизда ўзимни-да унутибмен.

– Сенга ошиқдирмен, – деди Алишер. Қизнинг кўзлари ёнди, лаблари қанот ёйди.

– Сенинг кулингдирмен, сенингсиз нафасим ҳам малол. Биргина ижодинг шунчалар беназир ўлса, сенинг хуснинг мени не кўйга соладир!..

Парининг нигоҳида ҳозиргина жилваланган ҳузур бир зумда таажжуб ила алмашди. Ошиқ қўлларига қаламдан эшкак тутди, оппоқ денгизда сузаркан, даргоҳидаги пари билан бирга бутун оламни унугланган кўйи сўзлар мавжида висол соҳили томон оқиб борди...

## УЧИНЧИ МАНЗАРА

### Тариқат

Тонг шафақни артди. Оламнинг бир чети қорадан аста сиёҳ рангга эврилди. Китобини бағрига босганча кўзларини уйку элтган йигит сесканиб уйғонди. “Тонг отмоқда! Нечун ухлаб қолдим!Faflatda қолибмен! Устоз ҳозир чиқиб келадирлар. Қандоқ қилиб таҳоратга совуқ сув тутадирмен!” У шошганча қумғон тагига шоҳ-шаббаларни синдиридида, олов ёқмоққа тутинди. Аксига тунда ёмғирдан намиқсан новдалар ёнмоққа эринди. Тонг шошади. “Кечириңгиз, пирим, кечириңгиз, устоз!” – йигит ўз-ўзига сўзлаган кўйи қўллари ҳаяжон ва аламдан титради. У ҳозир устози кўзига қарамаслик учун бу даргоҳдан қочмоққа-да тайёр. Аммо бундан кетмоқлик ҳам гўё нафас олмаслик каби мушкул эди. Қумғонни бағрига босганча чорасиз йиғлади. Зум ўтмай устози ҳужраси эшигининг “ғи-иқ” этган товуши унинг гуноҳига ҳукм ўқиди гўё. Зинадан пастлаётган пирнинг ҳар бир қадам товуши йигитни ер қадар ҷўктира борди. У ориқ қўллари билан қумғонни бағрига қаттиқроқ босаркан, кўксидаги бир нима гўё шармисорлик оловида ловиллаб куйди. Ниҳоят, ёнига келган улуғ зот унга томон кўл узатди. Йигитнинг ҳолини сезгандек жилмайди, меҳр тўла нигоҳлари билан гўё унинг киртайлан кўзларидан ўпид, бошини силлади. Бир сўзга-да ожиз қолган Маҳмуд<sup>1</sup>, ночор ҳолда қумғонни устозига узатди. Пири комил таҳорат оларкан, сувдан иссиқ ҳовур кўтарилиди...

## ТЎРТИНЧИ МАНЗАРА

### Шариат

Аёл қалби меҳр, садоқатга лиммо-лим эди. Ишонч – унинг борлиғи, қалбида ўн саккиз минг олам қудрати бор эди. Бир замон унинг кўнгил минораси қулади. Эссиз, беназир, мумтоз минорадан синиқ парчаларгина қолди. Аёл лабларини маҳкам тишлиди. Аммо ожизлик имтиёзи боис ингради, чўккалаб қалбининг синиқларини тераркан, Яратгандан ранжиб унсиз йиғлади. Чеҳраси саҳрорек сарғарди. Йиллар жааранг-жулинг кўнғироқли карвондек ўтиб борди. Кўксидаги қум барҳанлари аро маъносиз шамоллар узоқ кезинди. Аёл ҳатто йиғламай қўиди. Худони-да эсламади. Аммо бир кун кўксининг овлоқ четида нимжонгина майсага қўзи тушди. Яшил рангни унугтаёзган нигоҳлари қайта нурланди. Бу мўъжиза эди. Аёл ҳайқириб юбормади, севинчини ошкор этиб тошмади, фақат жимгина ютиниб-ютиниб йиғлади... ва қайта ЯШАЙ бошлади. Энди яшамоққа нажот бор! Аёл зоти гўзал туйғуларсиз яшолмайди, яшаса-да гул эмас, тиканли янтоқдай

<sup>1</sup> Маҳмуд Худойи – тасаввуф намояндаси.

яшайди. Унинг кўнгил водийисида яна баҳор эпкинлари эсди. Бу ёқимли, аммо хатарли ҳам эди. Кун сайнин аёлнинг қалби лиммо-лим тўла бошлади. Шунда акаси АҚЛ билан кенгашди. Ақл уни китоб оламига олиб кирди, ундан замонлар оша мозийга олиб кетди. Аёл Румий, Навоий, Машраб, Нақшбандий каби улуғ зотлар даргоҳида оқсочлик қилди. Мўътабар зотлар сұхбатидан қулогига тушиб қолган маънолар унинг қалбини силтаб ташлади, тиззапаридан жонни олди. Неча юз йиллардан бўён уларга боқий ҳаёт баҳш этиб келаётган ҲАҚИҚАТНИ пайқагандек эди. Аёл учун энди замон ва макон чегаралари ғойиб бўлди. Илк бор ўзини ожиза – аёлгина эмас, ИНСОН эканини англади. ҲАЁТ, ҚАЛБ, МУҲАББАТ ҳақидаги қарашлари ўзгарди. Ўтмишдаги изтироблар яраси оғримай кўйди. Аммо энди тинчи йўқолди. Ўша мозийдаги улуғ зотлар каби ўзининг ҳам инсон эканлиги қалбидек қуондек уйғониб келарди. Уларга ўхшамоқ истагидан ҳаё этсада, қайсар қалби ИНСОН деган ёрлиги билан ўз истакларини асосламоқчи бўларди. Ақл – улуғлик, қалб – гўзаллик талабида. Иккисининг уйғунылиги эса ИШҚИ ОЛИЙ эди.

Унинг кўзларидан нимадир кўтарилиди. Қай томон қарамасин, улуғ бир мусаввирнинг асарларини кўрди: боши узра эгилган дарахтнинг биргина яшил япроғида улкан дараҳт акси ёки узун дарёга кўйилаётган сонсиз ирмоқлар тасвири... яна ҳар бир япроқ чизгилари қайтариқсиз эди... Ҳайратдан нафасини ичга ютган кўйи яшил суратнинг ортига қарамоққа ўзида куч топди. Япроқ ортида эса... бутун бошли дараҳт турарди... “ОЛЛОХ УЛУҒДИР!” – дея олди у. Жаҳонда гўё бундан бошқа бирон сўз қолмаган эди. Шу ондан ўша улуғ зотни излади, уни ўз қалбидек кўрмоқ истади. Одамови каби сукутга чўқди. Танҳоликдан ором излади. Мусофирдек жавдирағ яқин кимнидир соғинди. Уни оятлардан, ҳадислардан излади. Жойнамоз устида ҳам Уни кутди. Йиллар ўтди. У эса ҳар замон қалбига интиқ қулоқ тутаркан, “тиқ” этган товушни ҳам илғамоқ учун нафасни-да секинроқ опди. Жим-жит... тунда ўлдуззор коинотдан кўз узмади, кундуз булувлар ортидан излади. Қани у?! Ичдами ё ташда?!. Хабар йўқ... Хўрсинди. “Мен ҳеч ким эмасман... менинг қалбим “жаранг” этгувчи чинни эмас, арzon сопол – лой... У менга назар этмас. Унинг не-не ошиқлари бор”. У ўз ҳолидан гоҳ кулди, гоҳ йиғлади... Паришон ҳолда ишга борди. Уй юмушларини ҳам кўнгилсиз ҳолда бажарди. Ҳатто энди жойнамоз узра ҳам мургилай бошлади... Вақтлар ўтди. Борган сари лаззатли таомлар, бежирим либослар, қимматбаҳо зебу зийнат, темир улов орзуси кўнглида рақс этди... Ҳушни ўғирлагувчи рақс эди бу. У ҳамон асов тулпордек кўкка сапчиётган руҳини занжирлар билан боғлаб ташлади. Охларига қулоқ солмади. Үқиш лозимлиги учун намоз ўқиди. Тутиш кераклиги учун рўза тутди – вассалом. Бир кун сўнгги урфадаги кўйлакни кийди, кўш-қатор олтинларни тақди, пардоз-андозни-да унутмади. Бугун курсдош дугоналари билан учрашади. Йўлда кетиб бораракан, бежирим туфлисисининг “так-тук”идан хуазурланди. Кечга қолмаслик учун тезлади. Ўзидан олдинда оғир, кир бозорхалта кўтариб олган кекса аёл қийшайганча базур кетиб бораради. Унинг олдидан енгил қадамлар илиа тез ўтиб, бир зумда илгарилаб кетди. Аммо кўксисида таниш бир ғашлик айланди. Сабабсиз аччиқланди. Беихтиёр тўхтади. Кўнглида яшириниб ётган қайсар бир туйғу уни ортга қайтишга зўрлади. Шу дамда у кескин иккига ажралди: бир бўлаги ортда қолиб кетган кекса аёл томон судраса, иккинчи бўлак аксига ундарди. Қийин ҳол эди бу. Аммо негадир у... ортга қайти. Кекса аёл юкини ерга қўйиб нафас ростларди. Қасмоқ бозорхалта эса, эгасидан-да абгор эди. Унинг қадами сустлашди “наҳот, мен шундай туришда анави халтани кўтарсан?.. Ярашмас... Ҳозиргина ҳавас билан қараб қолган ҳу, анави қизлар кулсалар-чи... ўша абгор аёл билан ёнма-ён кетамани? У менга ким ўзи? Бир томондан кеч қоляпман-ку... “У тўхтади. Кибр унинг кўлларидан тутди. Аммо шу пайт кўксисида кўпдан бўён сабр этиб келаётган, “миқ” этмай кўйган гунг кўнгил “дод” деб йиғлаб юборди, занжирларни узиб улоқтириди, исён кўтариди. У кўксидаги бундай тўполнондан даҳшатга тушиб яна йўлида жадаллади. Кекса, абгор аёлнинг қасмоқ халтасини тез кўлига опди-да, манзил томон юрди. Юк оғир эди. У-да бир томон қийшайган ҳолда илдамларкан, ўйлаганидек атрофдаги одамларнинг истехзоли нигоҳлари оралаб кетиб бораради. Аммо энди бу нигоҳлар ўзининг аввалги маъносини йўқотган, гўё йўлда ётган кесаклар сингари аҳамиятсиз эди. Бирдан унинг кўз олдида дунё қўёш нуридан-да ёрқинроқ нур билан ёришгандек бўлди. Кекса онахон манзилга етиб кўлларини дуога очди. Абгор аёлнинг кўзларида эса... бу кўзларда улуғ бир ЗОТ унга миннатдор қараб турарди. Бу ЗОТ у неча замонлар қидирган, сарсону интизор этган, бетимсол гўзал – ҲАЛЛОҚИ ОЛАМ эди...



## Ён дафтардан

# ЛИБОС ХОС БҮЛСА

### Либос хос бўлса

Адабиёт янги ва яхши тояларни куйламоги керак. Шундагина у қалбларда, онгларда эзгу ҳис-туйғулар, фикрлар уйғотиб, кишини ром этади. Бад ниятни минг бадиият билан ифодаласанг ҳам худди гўзал либос кийган ялмогиз кампирдай хунуклигича қолади.

### Бухоро кўчалари

Бухоронинг ҳар қарич ерига олимуму уламолар пойи теккан. Унинг кичик, тор кўчаларида ҳам бир олам тариху ҳикмат бор. Буюк ва боқий обидалари-ку ноёб ва нодир мозийнинг, илму санъатнинг муazzам ва муҳташам мужассама (ҳайкал) лариdir. Шу тор кўчаларни кезган, ёдгорликлар сиру сеҳрини дилдан сезган, ҳис этган одам, Бухорони бир айланиб чиқса, ўзи ҳам ярим алломага айланиши ҳеч гап эмас.

### Нур ва соя

Табиатда нур ва соя, оқ ва қора, тун ва кун каби зиддиклар бор ва бу табиий. Инсон ҳамиша нур ва зиё сари бориши керак. Зеро, қўёшга юзма-юз юрган одамнинг юзи нурли, сояси эса орқада қолади. Олдига соя тушмайди. Шу каби, яхшилик, эзгуликка юзланган одамдан ҳам ёмон нарсалар соядек ортда қолади. Табиийки, бундай кишиларнинг доимо юзи ёруғ бўлади.

### Сақланинг

Оғизга ёмон ва ҳаром нарсалар киришидан сақланамиз. Шу каби, оғиздан ёмон ва ҳаром нарсалар – сўзу жумлалар чиқишидан ҳам сақланмоқ керак. Зеро, оғизга кирган ёмон нарса жисмоний саломатликка зиён қилса, чиққани ўзга кишининг таъбини хуфтон ва дилини вайрон этади.

### Самимий тилак

Ҳозиржавоб ва зукко дўстим Эргаш Очилга мен кейинги пайтда китобхўрлик касалига чалиндим, шекилли, китоб ўқимай туролмаяпман десам, у “Бу ажойиб касаллик, асло тузалманг”, деди.

### Кўзимиз гавҳари

Матбуотда (“Даракчи” 16.04.2009й) “Инглэйтган бола” деб номланган сурат ҳақида ёзилган. Чет эллик бир рассом чизган



### Дилшод РАЖАБ

1964 йилда туғилган.  
Низомий номидаги  
Тошкент Давлат  
педагогика  
институтида ўқиган.

Журналистика  
соҳасида “Олтин  
қалам” халқаро  
танлови совриндори  
(2011 йил). Шоир,  
филология фанлари  
номзоди. Унинг  
“Қорқиз совға  
келтирди” (1989 йил,  
ҳаммуалифликда),  
“Ҳазилкашлар  
даврасида” (1991,  
ҳаммуалифликда)  
китоблари ҳамда  
кўплаб илмий ва илмий-  
оммабон мақолалари  
чоп этилган.

бу сурат кўп нусхаларда бўлиб, ким уни сотиб олиб, уйига осиб қўйган бўлса, ёнгин бўларкану сурат ёнмай қоларкан. Бу ҳолни кўплар атайн синааб кўриб, ишонч ҳосил қилган экан. Бундай сирли, ғайри табиий ҳодисалар бўлиб туради. Назаримда, суратни мусаввир бор қалб ҳароратини бериб, ёниб-кўйиб яратган. Ҳа, аслида, кўзимиз гавҳари бўлган болажонлар йигласа, жабр-зулм чекса нафақат уй, бу дунёга ўт кетади-я...

### Собитлик

Японияда каратати деган дарахт ўсаркан. Унга қайси дарахтни пайванд қилишса ҳам, барибир, каратати япрогини чиқааркан. Қизик. Бу ҳар қандай таъсир, ҳолат ва вазиятда ҳам ўзлигини унутмайдиган событ инсонларга ўхшайди.

### Қараш

Ҳамма вақт эмас-у, баъзан нарса-ҳодисага бир томонлама қараб баҳо, таъриф берамиз. Натижада, хато қилиб қўйиш мумкин. Ҳолбуки, унга ҳар томонлама эътибор қилинса, бутунлай бошқа, ҳатто аввалгисидан тамоман фарқли, зид фикр-хулосага келиш мумкин. “Талқин” деган бир битигим бор эди:

*Дедингки: бу чорраҳа —  
Уруш-ажралиш жойи.  
Тўртта йўл тўрт тарафга  
Кетгандир бошин олиб.*

*Озгина ўйлаб сўйла,  
Қара, қандай чироили:  
Тўрт ёқдан келган ўйллар  
Боши биринкан жой бу!*

### Бандилик

Боғлиқлик, бандилик нақадар хунук! Бироқ боғланган бир даста гул дилларни яйратиб юборади. Инсоннинг Яратганга бандилиги ҳам шундай гўзалдир.

### Тилчининг лутфи

Баъзилар тош агар ойнага тегса, уни синдириб чил-чил қиласди, дейди. Рост. Лекин бундай қилиш нодонлик. Нодоннинг иши. Ҳар бир ишни асталигу усталик билан бажариш керак. Ўша “тош”ни секин “ойна” ёнига олиб келинса, “тошойна” бўлади. Лекин нодон (тескари ўқисангиз ҳам), барибир, “нодон”да. Унинг кўлига ҳеч вақт тош бериб қўйиш керак эмас.

### Узоқни кўзлаб

Ўқ узоқ-узоққа учиси учун камон таранг тортилиб, кўпроқ эгилади. Худди шу каби узоқни, катта мақсадни кўзлаган киши кўпроқ меҳнат қилиши керак.

*Дилшодман, гар ранги сомондирман мен,  
Ким айтди: эгилдим, тамомдирман мен.  
Узоқни кўзлаган ўқ бор кўксимда,  
Эгилган эсам гар, камондирман мен!*

### Ҳаёт

Қиз бола – палахмон тоши, дейдилар. Қайга отсанг, бориб тушади. Яна “борган жойида тошдай қотсин” деган гап ҳам бор. Бу – қиз ҳаётининг “тош даври”. Кейин “темир даври” бошланади: рўзгор озорларига, баъзи қайноналарнинг “қайнаш”ларига чидаш, эриб-уваланиб кетмаслик учун темир ирода керак-да.

Ҳа, жоним қизим, “олтин давр”га етгунча анча меҳнат, машаққат чекишига тўғри келади.

### **Баъзан...**

Эргаш Очилга “одамнинг ёмони йўқ” десам, у “баъзан одамдан ёмони ҳам йўқ” дейди.

### **Ўтда ёнмас, сувда ботмас**

Халқимиз бошидан не кунлар кечмаган. Ўз ибораси билан айтганда ўт балоси, сув балосига ҳам дуч келган. Босқинчилар дастидан Бухорою Самарқанд ёнган, Хоразм сувга бостирилган...

Лекин халқ кучли иродаси, эътиқоди, сабр-тоқати ва матонати боис бу оффатлардан омон чиқиб келди. Эртак-афсоналарда ўтда ёнмас, сувда ботмас ботир-баҳодирлар таърифланади. Бу – чинакам халқимиз тимсоли. Энди бу баҳодир муроду мақсадига етди. Мустақил бўлиб, фаровон ҳаёт кечирмоқда. Шукрки, бу эртак эмас, чин ҳақиқат.

### **Ҳолат**

Бухоролик авлиё-алломалар ҳақида ўйласам, улар Бухоронинг тор, жин кўча-ларидан чиқиб, кенг дунёни “забт” этганига қойил қоламан. Шоирлигимга бориб, бу жин кўчаларни “авлиё кўчалар” дегим келади.

### **Соябон**

Куз кунларининг бири. Тўсатдан қучли шамол туриб, чунонам жала қўйди-ки... Гўё еру кўқда Нуҳ тўфони бошлангандай. Ҳамма жонхолатда ўзини панага урган. Мен ҳам бекатда паналаб, кўнглимни алланечук ҳадик-хавотир чулғади: тўфон босса-я.

Бир пайт қўл телефоним чақириб қолди. Уйдан, қизчам боғчадан келиб менга телефон қилаётган экан. Кўнгироқдай овози дилимдаги хиракиқни бирдан тарқатиб юборди: “Дадажон, кўчадамисиз? Зонтигиниз борми?”

Кўнглим ёришиб, хавотирим ўрнини ёруғ умид эгаллади: шу меҳр бор экан, асло тўфон бўлмайди, ҳаёт тугамайди.

“Зонтигиниз борми?” Меҳр тўла самимий сўзлар менга энг зўр соябон бўлди, гўё. Бу соябон не-не ёғинларда менга паноҳ бўлғуси.

### **Китоб – Офтоб**

“Қуёш нури кирмаган хонадонга тез-тез табиб кириб туради”, деган гап бор. Бу қуёшнинг инсон саломатлиги учун нечоғли муҳим ва аҳмиятли эканини билдиради.

Китоб – офтоб деган гап ҳам бор. Китоб кирмаган хонадонга ҳам жаҳолат қадам қўяди, ин қуради. Маънавий жиҳатдан носоғлом бўлган бу муҳитга эса кейин тез-тез ташвиш ва кулфатлар “ташриф” буюради.



## Адабиётшунослик



**Дилмурод  
КУРОНОВ**

1960 йилда туғилган. Филология фанлари доктори, профессор. 1987 йилда Андижон Давлат тиллар педагогика институтини тамомлаган. Олимнинг “Руҳий дунё таҳлили”, “Истиқол дарди”, “Адабиётшуносликка кириши”, “Чўлтон насрни поэтикаси”, “Адабиёт надир?”, “Farб адабий таңқидий тафаккури тарихи очерклари” (ҳаммуалифликда), “Адабий жараёнда мом синдроми”, “Адабиётшунослик лугати” (ҳаммуалифликда) каби китоблари нашр этилган.

## ЗАВҚИМДАН БИР ШИНГИЛ

Таниқли адаб Аҳмад Аъзамнинг ижодий изланишлари каминаниҳамиша, нимадесам экан, ҳайратга солиб, аникроғи, шошириб келган. Мундай қарасанг, ёзгандлари оддий нарсалар-у, нимасидир биз кўниккан нарсаларга ўшамайдигандек, онггинизда муқимлашган назарий қоидаларга кўпам мос келмайдигандек туюлаверади. Ҳозир, ёзувчининг “Ҳали ҳаёт бор” китобини ўқиб туриб, шу туйгу яна янгиланди...

(...адашмасам, бу туйгу дастлаб “Одамнинг оласи” ҳикоясини ўқиш асносида пайдо бўлганди, шекилли. Сабаби, унда мазмун янгича эди: оддий бир одамнинг оддий бир куни, қаҳрамони ҳам ғалатироқми-ей... мақтайнин десанг, биз мактаб ўрганган қаҳрамонларнинг ҳақи кетиб қолади, ёмонлай десанг – бунинг. Ҳаммадан ҳам унинг ўша ҷоғлар биз асири бўлиб юрган севги ҳақида айтганлари: аввал хўп гашингга тегади-ю, китобий-стереотип қарашларингни бирдан парчалаб юборганини сезмай қоласан... бир кулгинг, бир ийғлагинг келади. Ўйлаб қарасам, ўшанда, Шерқўзининг гапларини беихтиёр “ӯғил бўлиб” эшитганман, ҷоғи: “Ҳе, содда болам! Ҳотин деб ўлиб-тирилиб пул ўйғасан, тушириб ҳам оласан. Тўйдан кейин уч-тўрт ҳафта, чилланг чиққунча яшинмачоқ ўйнаб, қувлashiб ҳам юрасан. Кейин... бошланади – рўзгорнинг униси кам, буниси кам. Бир вақт қарабсанки, севги дегани донга қўнган чумчуқдек пир-р этиб учиб кетибди...” Қизиқ, ҳозир “Одамнинг оласи”га бугуннинг назари билан қарай олмаяпман, ҳарчанд уринмай, ўттиз йил наридаги таассурот босиб кетаётгандек... афсуски, ўша таассурот энди яхлит эмас, парчаланиб кетган – уни ўртоқлашиш имкондан ташқарида. Илож қанча, бошқача айтолмаганим боис “ёзувчининг маҳорати шундаки, ўқувчи тасвирланётган воқеага бефарқ қарай олмайди, беихтиёр унинг иштирокчисига айланади” қабилидаги навбатчи, навбатчи бўлсаям рост гаплар билан чекланаман, маъзур тутинг.

...ёдингиздадир, 80-йилларнинг охирларида кўп қатори Аҳмад Аъзам ҳам ғоят фаолглашди: “Бу куннинг давоми”, “Асқартоғ томонларда”, “Ўзим билан ўзим” – бари шунинг маҳсули. Шу ўринда муҳим бир нуқтани айрича таъкидламоқ керак: кўпчилиқдан фарқли, Аҳмад Аъзамда публицистиклек эмас, таҳлилий нигоҳ кучайди ва у жамиятда мавжуд ҳолат моҳиятига қаратилди. Муҳими – турли ракурслардан: “Бу куннинг давоми”да ўқувчи исмсиз қаҳрамон – У(н)га четдан назар солди, “Асқартоғ томонларда”да воқеликни Маҳдининг нигоҳи орқали кузатди, ниҳоят, “Ўзим билан ўзим”да беихтиёр “мен” мавқеидан туриб қарай бошлади. Яъни, ёзувчи гўё “том усти-

га том босиб” боради: қаламга олинган ижтимоий дардга ўқувчини босқичма-босқич яқинлаштириб, ўзига сездирмайгина шахсий дардига айлантиради.

Балки, айтгандаримдан “нуқтаи назар билан боғлиқ мазкур усууллар атайин, муайян мақсадни кўзлаб қўлланган, бу эса ёзувчининг маҳоратидан дарак”, деган фикр келиб чиқар. Албатта, шундай дейишга асос етарли. Лекин мен буни маҳоратдан кўра бошқа нарсага – самимиятга йўйган бўлардим. Зеро, бу асарлар, улардаги образлар ёзувчи фикрларини ифодалаш учун иллюстрация эмас, йўқ, унинг учун шуларни яратиш жараёнининг ўзи – изланиш, моҳиятга яқинлашишдир. Айни шу нарса – ёзувчининг ижод онларидағи маънавий-рухий изланишлари жараён сифатида акс эттирилади, натижада, ўқувчи сабоқ олувчи эмас, балки изланишларнинг бевосита иштирокчи сига айланади – икки ўртада ҳамфирлик, ҳамдардлик асосидаги самимий мулоқот, кўнгил ошнолиги юзага келади. Дарвоқе, ушбу асарлар яратилган 80-йилларнинг адоги фикр ахли учун чинакам маънавий-рухий изланишлар даври эди. Ҳаммасидан ҳам қандайдир беш-олти йил давомида тафаккуримизда юз берган ўзгаришлар шиддатини айтинг! Назаримда, Аҳмад Аъзам шу учала асарда ўзгаришлар шиддати ва моҳиятини муҳрлаб кўйишга улгургандек:

биринчисида, У: “бундай яшаб бўлмайди” деган қарорга келади;

иккинчисида, Маҳди: “одам бир нарсани тубдан ўйлаб олса-ю, ҳеч нарсани ўзгартирмаса, яна шундай яшайверса... Йўқ, мумкин эмас”, дея эртадан ҳаракат бошлашга ҷоғланади;

учинчисида эса, ўзгаришни ўзидан бошлаган: “кўнгалини худди уй кўтартгандек” сарышта қилиб, “кўнгалимининг тубидан шунақа туйғуларим топилаётирки!.. Шунчалар бадавлат эканимни ўзим билмай, қашшоқ-бенаво юраверган эканман”, дея ҳайрон турган, энди, ўзини дунёни кўнглига мувофиқ ўзгартиришга қодир ҳис қилаётган одамни кўрамиз... Эҳтимол, жоиз эмас кўринар, шундай бўлса ҳам айтгим келди: мазкур фикрлар Аҳмад Аъзам асарлари эълон қилиниши билан пешма-пеш ўқилганда туғилган. Ўшанда, “Бу кун... ва унинг давоми” номли бир мақола ёзган ва унда учала асарда аслида бир одамнинг ижтимоий тафаккурда шиддатли ўзгаришлар кечган қисқа бир даврдаги маънавий-рухий тадрижи кузатилган, деган фикрни ўтказишга ҳаракат қилгандим. У пайт таассуротларим ҳали оҳорли бўлганигами ё қаҳрамонларнинг маънавий-рухий изланишлари кўнглимга ёт эмаслигигами, ҳар тугул, наздимда, дурустгина мақола чиқкан ва юқоридаги фикр етарли асослангандек эди. Лекин, таҳириятлар фикри ўзгачароқ бўлди, чоғи, умид билан жўнатган кўлёзмалар бедарак кетди, аксига олиб, ўзимда нусхаси сақланмаган... “Йўқолган пичноқнинг сопи олтин”, дейдилар, шунданими, ўша мақолам ҳануз жуда бўлакча ёзилгандек туюлаверади-да...)

...энди, оҳорли таассуротларга келсак. “Ҳали ҳаёт бор” қиссасини ўқиркан беихтиёр Гоголнинг “Ревизор”и ёдга келади. Унда ҳам ҳамма гап битта воқеа – нашриётнинг оддий бир ходими Аъламнинг марказкўмдан йўқланиши атрофида айланади. Шу биргина воқеа ва ўша воқеага нашриёт ходимларининг муносабати... “Ахир, қисса дегани бундай бўлмасди-да! – беихтиёр назарий бисотимни титкилай бошлайман. – Қиссада бир-бирига боғлиқ воқеалар занжирдек тизилгучи... бу воқеаларнинг бари асосий қаҳрамон билан боғлиқ... улар ўша қаҳрамон характерини очиб беришга хизмат қилгучи... яъни, қиссадаги воқеалар восита, пировард мақсад қаҳрамон бўлгучи эди...” Хуллас, назарий қоидалардан келиб чиқсан, бу қисса эмасдек. Лекин... маза қилиб ўқиганингни ҳам инкор қилолмайсан-да, одам! Э-э, шу, адабиётшунос деган номинг бор, ўрганиб қоларкан одам, маза қилиб ўқиганингни бир ён суреб, йўл излайверасан экан: Ҳикоями? Қиссами?.. Яна, ҳақиқатдан узоқроқ бўлсаям эҳтимоли йўқ эмас, эртами-индин: “Қисса дегани мундоқ бўлур...”, дея ҳижжалаб тушунтирганингда, бирон талабабининг: “Фалон қисса-чи?” деб қолиши ҳам бор...

(Фахмллагандирсиз, ҳануз танқидий асарни кенг омма ўқийди деб ўйлаб юрганимдан бўлса керак, буларни: “Олимона гаплар кимгаям керак, асар ҳақидаги гапингни айта қўймайсанми?!?” деган эътиroz дафъига, узрҳохлик мақсадида айтаётирман.)

...ҳолат шундайки, жанрни белгилаб олиш чиндан ҳам зарур экан. Фикримча, “Ҳали ҳаёт бор” асари – қиссанинг насримиздаги янги бир кўриниши, унда ҳикоя ва драмага хос поэтик хусусиятлар уйғунлашгани ҳолда қисса проблематикаси етакчиллик қилади. Ҳикоядаги каби унда битта воқеа қаламга олинган, воқеа ўз ҳолича эстетик қиммат касб этади (яъни, қиссадан фарқ қилароқ, воқеа қаҳрамонга нисбатан восита эмас).

Драмадаги каби унда битта воқеа – Аъламнинг марказкўмдан йўқланиши драматик конфликтли ҳолатни юзага келтиради: барча персонажларнинг хатти-ҳаракатлари шу билан боғлиқ, воқеанинг изчил ривожидан кўра, у юзага келтирган ҳолат муҳимроқ. Яъни воқеанинг изчил ривожи эмас, ҳолатнинг ички ривожи устувор. Шунга кўра, сюжет эпизодлар – драмадаги каби алмашиниб турувчи кўринишлардан таркиб топган. Ҳар бир кўринишда муайян персонажлар иштирок этади, уларнинг қиёфаси драматик ҳолат билан бевосита боғлиқ ҳолда очилиб боради. Тўғри, ушбу эпизодларни қаҳрамон – Аълам билан боғлиқ сюжет чизиги бирлаштиради. Бироқ, гарчи сюжет ўзагини ташкил қиласа-да, Аълам чизиги фоят ихчам: ҳовлисида кўмир ташиётганида хабарчи боради – ишга келиб нима гаплигини аниқлайди – ариза бериб ишдан кетади. Яъни, асар структурасида бу чизиқнинг ёрдамчи функцияда экани атайин таъкидлангандек. Ҳолбуки, мабодо бадиий ният ижросида, муаллиф концепциясини ифодалашда шу чизик доминантлик қилганида, назарий қоидаларга тўла мувофиқ ҳикоя яратилган бўлур эди. Ният эса бошқа, яъни, бутун бошли бир жамоа – жамиятнинг бир ҳалқаси қиёфасини, маънавий қиёфасини чизиш, худди шу нарса асарни ҳикоя жанри доирасидан чиқаради. Зеро, асар қаҳрамони Аълам деганимиз билан, у фақат структура нуқтаи назаридангина ушбу мавқени эгаллаган, концепция нуқтаи назаридан эса ЖАМОА қаҳрамон бўлиб чиқади. Айни шу жиҳатлар “Ҳали ҳаёт бор”ни қиссанинг ўзига хос янги бир кўриниши дейишимизга асос беради.

Аслида-ку, қисса асосида оддийгина воқеа ётади, ҳаётда бунга ўхшаш воқеаларга кўплаб дуч келинади ва кейинча, шунчаки латифа мисоли эслаб, кулиб юрилади. Дейлик, агар нашриёт раҳбарига сим қоқкан Гулімоҳ Юлдузовна: “Камолов Аълам ҳали ҳам сизда ишлаяптими?” деб сўраган маҳал, столидаги бошқа телефон жиринглаб қолмаганида (шундай бўлиши мумкин ва табиий, ахир, балки унга ҳам юқоридан сим қоқишиандир, балки уйидан, балки бошқа – аҳамияти йўқ), нашриёт ари уясидек тўзиб кетмаган, қиссада ўқиганимиз машмашалар ҳам йўқ эди. Мантиқан қараганда, Гулімоҳ Юлдузовна муддаосини айтмасдан: “Кейин гаплашамиз!” дея гўшакни кўйган экан, бунчалик ҳавотирга ўрин бўлмаслиги керак эди. Бироқ, қиссада тасвиirlанган муҳит (давр) шундайки, ундан доим ҳам мантиққа ростликни излаш бефойда. Зеро, бу муҳитда “юқори – ҳаммавақт ҳақ”, у қуидагиларни хоҳлаган кўйга солиши мумкин. Қуий: “ўйнашмагин арбоб билан...” нақлини дастуруламал билади, юқори қаршисида “қўл боғлаб” туриш одат, мутелик ҳамманинг қон-қонига сингиб кетган. Шу боис ҳам нашриёт директори учун йўқлов табиий ҳол эмас, шўрлик: “бир иши бордир, сўрагандир, ҳали айтар”, деб қўяқолишга ожиз, калтакнинг бир учи ўзига тегишидан ҳавотирда. Ажабланишга ҳеч ўрин йўқ: муте инсон ўзини ҳамиша айбдор ҳис қилади (исталган вақтда айбдор қилиниши мумкин-да), чунки у юқори қаршисида гўё онадан туғилгандек бир алпозда – иштонсиз, чўпдан ҳадик олиб яшашга мажбур. Шу жиҳатдан қаралса, директор ва озими-кўпми “масъул”лиги бор бошқа ходимларнинг ўзларини муҳофаза қилишга қаратилган (ва бизга нотабиий кўринган) ҳаракатлари улар учун табиий зарурат бўлиб чиқади. Демак, шу ҳолни келтириб чиқарган муҳитнинг ўзи норасо. Аффус, нашриёт (муҳит)да ҳамма шунга кўнган: бирлари кўнгангина эмас, мавжуд ҳолат ва ундаги ўз ўрнини сақлаб қолиш учун андишани бир четга суриб қўйиб, жон-жаҳди билан тиришади; бошқа бирлари лоқайд томошабин бўлиб туради. Таъкидлаш жоиз, ёзувчи персонажларнинг хатти-ҳаракатлари, гап-сўзларини четдан туриб, гўё бетараф тасвиrlаса-да, уларнинг руҳияти ўқувчи кўз олдида шаффоғ ҳолда намоён бўлади. Шу боис ҳам ёзувчининг айтиши шарт эмас, ўқувчи: “бундай яшаб бўлмайди, бундай яшаш инсонлик шаънига нораө!” деган фикрни уқиб олаверади. Сираси, бу Аҳмад Аъзамга хос маҳорат қирраси... (Дарвоqe, биргина одам, кўнглида эркинлик туйғуси ўлмаган Аъламгина мавжуд аҳволга кўнмайди – ариза ёзиб ишдан кетади. Тўғри, бу қаҳрамонлик эмас, муҳими, ёзувчи ҳам буни қаҳрамонлик дея талқин қилиш фикридан ийроқ. Зеро, ҳақиқатда бу ўзини инсон ўлароқ ҳис этган, тириклик маъноси тирикликина эмаслигини англаган киши борки қилишга бурчли ҳаракатdir. Фикримча, қисса қаҳрамонининг орқа планда қолдирилиши ҳам шу фикрни таъкидлашга хизмат қилади) ...айтмасданоқ ифодалаш маҳорати.

“Қатагон йили” ҳикоясини ўқиб: “Аъламнинг ҳаракати қаҳрамонлик эмас”, дея ҳукм чиқаргандা, бироз шошмадиммикан, деган андиша туғилади кишида. Ҳикояни ўқиркан, беихтиёр яқин ўтмишдаги “пахта компания”лари эсга келади: қулф осилган идораю

муассаса эшикларидаги “ҳамма пахтада” ёзувлари... ёпилган бозорлар... тұхтатиб қўйилган автобус йўловчиларининг “йўл ҳақи” учун пахтазорга ёйилиши... шанба-бозор кунларидаги кўчаларни тўлдириган автобус карвонлари... – айтиб нима қилдик, булар кўпчиликнинг ёдида ҳали. Хуллас, 1982 йил ноябрь ойидаги зарбдор кунлардан бири, “Далаларда яккам-дуккам бирчигит қолган, совхоз октябрь ойи ўрталарида планни дўндириб бажарган-у, элу юрт ҳали-ҳамон шу бажариқни тўлдирилмай жон-ҳалак, бўл-ҳа-бўл ҳиқилдоққа келган”. Асаблар тараңг, бунинг устига кеч куз изғирини ачитиб турган бир пайт оиласи билан уйига – Тошкентга қайтиш учун улов пойлаб турган ҳикоячи билан милиционер ўртасидаги даҳанаки жанги қаламга олинган ҳикояда, шу холос.

Юқоридан “одамлар юрмасин кўчада” деган топширик берилган – ҳамма пахта ҳосили учун курашиши шарт! Яхши эслайсиз: шўро даврида “план”дан кейин “мажбурият” дегани бўларди. Ўшанда “мажбурият” деб юраверган эканмиз-у, сўзнинг моҳиятга нақадар мослигига эътибор қилмас эканмизми-е?! Чинданам “мажбурият” дегани кўпроқ турли даражадаги “бюро” ва “штаб”лардаги дўк-пўписалар, раису биргатларнинг зуғумлари, мелисанинг ҳайбати билан бажарилмасми?!.. Ё ҳар қадамда илинган қизил матодаги шиорлар, радио-телевидениедан янграган чорловлар шунчалар кучли... Ҳай, майли, бу бошқа масала. Хуллас, мелисага “одамларнинг кўчада эмас, далада бўлиши”ни таъминлаш юқлатилган. Шўрлик қуюшқондан чиқилаётганини билади, лекин ўзига юқлатилган вазифани сўзсиз бажаради: “Энди... ишимиз шу-да. Бажар, деса – бажарамиз. Топшириқ қаттиқ”. Мундай қарасанг, мелиса юқорининг топширигини оғишмай бажаради, пахта сиёсати ҳаммага тенг дея барчадан итоат талаб қилади, дағдагалари кўрқулик; одамлар ҳам унинг талабини бажараётгандек, айни соғда, у билан сичқон-мушук ўйнаётган мисоли эвини қилиб тирикчилик юмушига ҳам унайдилар. Сираси, Сайд бово “эшонбомизнинг уллари” билан кўришишга жаҳд қилмаганида, ўз навбатида, “таварриқ одамнинг боласи” ҳам чолнинг гапига кулмай қўяқолса, олам гулистон эди – ҳаётнинг “сичқон-мушук” ўйинига монанд оқими давом этаверарди. Лекин бундай бўлмади: Сайд бово ниятидан қайтмади, ҳикоячимиз эса кулиб юборди-да! Ҳудди шу нуқтада мелиса йигитнинг битта қиёфаси кўз олдимиизда мукаммал суратланади:

“Бу ерда мен рухсат берсам куласиз!”

Кўряпсизми, қаршимиизда, энди, шунчаки бир милиция нозири эмас, балки нақ ҳоқими мутлақ турибди: қўйиб берсанг: “Мен рухсат берсам нафас оласан!” дейишдан ҳам тоймайдиган алпози бор. Шўро замони ҳақида гапира туриб “мустабид тузум-мустабид тузум” дея нолиймиз-у, асли тузум дегани шунчаки мавхумот эканлигини кўпда ўйламаймиз. Ҳолбуки, мустабид тузум ҳам мен, сен ва у – биздан ташкил топади. Үнда яшаган ҳар биримиз қай даражада муте бўлсак, шу даражада мустабид ҳам эдик, зеро, мутелик билан мустабидлик бир-бирини тақозо этувчи эгизак тушунчалардир. Қаранг, мелиса йигит марказий газета мухбiri (яъни, ўз тушунчасида юқорининг вакили) билан гаплашаётганини англаши биланоқ, вужудидаги мустабид изсиз йўқолди: “Бошдан шуни айтмайсизми?” дея ўзини оқлашга, узрҳохлик қилишга ўтади. Ана энди унинг додини тингланг: “Мана, кечаги бозор, қор уриб турибди. Одамлар инсофинг борми, қартишка-партишка олиб олайлик, бир соатгина оч, деб чуввос ёпишишиди менга. Қорку, э-рталақ бўлса, шу ҳавода ким ҳам далага чиқарди, дебман. Майли, ярим соат муҳлат, бозорларингизни қилиб олинглар, лекин хафаҷилик йўқ, дедим.” Ҳа, мелиса йигит бир лаҳзагина ҳамқишлоқларига юқорининг вакили эканлигини унугиб муносабатда бўлди ва... балога қолди: “Одамлар энди дарвозадан кириб, савдони бошлаган эди, бабиллаб қора “Волга” кепқолди. Одамларга ҳеч нарса дегани йўқ. Менга қараб: “Онайни фалон сани! Санга шапка кийдиргани онасини!” деб ке-етди!..” Эндиғина ҳаммани бир оғиз “рухсат” дейишига маҳтал қилиб турган мелиса йигитни бу қадар тўзитиб сўқаётган райком бува бўладилар. Ким билсин, бундан сал илгарироқ бошқа бирори, дейлик, пахта топшириш графиги бажарилмагани учун унинг-да онасини айбдор қилганми? Эҳтимоли аспло йўқ эмас, зеро, мустабид тузумда “мушт кетди” қоидаси амал қилади: куйи поғонадаги шўрлик аввал “Энангни қози...” дея аламини ютади, сўнг... ўзидан қуидагига сочади. Эҳ-ҳе, қурғур алам сочган билан тугай қолсайкан, кўнгилга тошдай чўқавергани ёмон. Мелиса йигитнинг алами ҳали янги, кўнгли ҳануз йиғлаб

турибди: “*Майли, шу одамларни деб сўкиши эшиштаман*” дея ўзини овутмоқга ҳаракат қилади, лекин: “*биронтаси, эй инсон, сўксанг, ўзини сўк, онасида нима айб, демагани ботиб кетади*”. Кейин ҳамқишлоқларидан гина қилишга ҳаққи йўқлигини ҳис қилиб, алами бир баҳя кўтарилади: “*Э-э, бечораларга нима ҳам дейман, ҳаммамиз шундай*”. Қаранг, мелиса йигит хўрлик кўргач, ўзини ҳамқишлоқлари билан битта қайида ҳис қилади, лекин кўнглида йилт этган исён учқунини дарҳол сўндириб, ўзини шу қисматга кўнишга чоғлайди: “*Кетворай десам – иш бу, тирикчилик деган нарса бор. Ҳе, майлида, биз бир кичкина одам, мелисаликни ҳам қилиш керак, барибир. Бетни қалин қилиб юрибмиз-да...*” Мана, кўз олдимиизда мелиса йигитнинг иккинчи қиёфаси ҳам суратланди: у ҳам бошқалар каби муте бир одам... (боя “*ҳар биримиз қай даражада муте бўлсак, шу даражада мустабид ҳам эдик*”, дегандим, шу фикрга яна қайтгим келди. Можаро муросага дўнгач, ҳикоячи “*халидан бери кўнглини босган бир ғашлиқ, ўжар бир гуноҳкорлик туйғуси*” ҳақида сўзлайди, гувоҳномасини кўрсатганига уялиб кетганини айтади. Тўғри, ҳикоячи ўзини ҳимоя қилди, лекин бунга гувоҳномани кўрсатиб, мелиса йигитга унинг ўзи каби, яъни, мустабидаларга хос мумомала қилибгина эришди. Кўнглини нохуш кайфият чулғагани, уят ҳисси, аслида, шундан эмасми?!.) Энди, юқоридаги андишага келсак, тан олақолай, “*Аъламнинг ҳаракати қаҳрамонлик эмас*”, деганим хато: ўша шароитда ҳам ички әркинлигини сақлаб, инсонлик шаънини баланд тутиб яшашнинг ўзи қаҳрамонлик бўлмасдан нима, ахир?!

Машғулотларда, сингадиган давраларда бир қарашда оддийгина ҳаётий ҳолатда ҳикмат кўришу моҳиятига теран назар соглан ҳолда унга бадиий-фалсафий қиммат бағишлиаш Аҳмад Аъзам ижодий манерасига хослигини таъкидлаб келаман. Янги китобини ўқиб, бир жиҳат назаримдан четда қолганини сездим. Мен ёзувчи хаёлоти билан боғлиқ, чамаси, “*Ўзим билан ўзим*”да ниш берган ва, кейинча, иккита шох чиқариб ривожланган жиҳатни назарда тутаман. Бу шоҳларнинг бири – лириклиқ, яъни, воқееликни тасвирилаш эмас, муносабат ифодалашнинг олдинги планга чиқиши... (Ҳа-я, “*Ўзим билан ўзим*” эълон қилинган пайтлар шапалоқдай бир нарса ёзиб, унинг лирик асар эканлигини исботлашга уринган, ўзимни янги гап айтотган санаб, қувониб юрганим бор. У пайтлари рус адабиётидан дарс берганимгами ё рус тилида ёзиш урф бўлганигами, мақолани русча ёзиб: “*Жанровое своеобразие поэмы А.Аззама “Наедине с самим собой” деб атабман. Номни қаранг! Давомини ёзмаса ҳам бўлаверадигандек эди-ёв...*”) Китобга новелла деб киритилган “*Гул кўтариб кетаётган эркак*”да худди шундай: унда эпик асарга хос воқеабандлик, баски, ҳикоячи йўқ, унда кўзи тушиб турган ҳолатни мушоҳада этаётган муаллиф – лирик субъект бор, яъни, у моҳиятан лирик асар. Шоҳларнинг иккинчиси – хаёлда яралган воқеанинг қаламга олиниши: “*Соясини йўқотган одам*”, “*Нотўғри туш*” ҳикояларида шундай. Албатта, улар шунчаки хаёлот маҳсули эмас, балки шу воқеелик таъсирида, у ҳақдаги ўй-қарашларни, Ўзни ифодалаш воситаси ўлароқ яратилгандир. Аҳмад Аъзам янги китоби муқовасига: “*Кўп ишни қилиб кўрдим, турли юмушга қўл урдим. Лекин ҳеч бири ёзишга, ёзиш берадиган мashaққатли завққа тенг келмайди...*” деган изҳорини ёздириб кўйибди. Ҳақиқатан ҳам китобга ёзувчи, назаримизда, адабий жараёндан бироз четлашиб қолгандек, “*турли юмушга қўл уриб*” юрган вақтлари ёзилган асарлари киритилибди. Муаллиф “*ёзиш берадиган завқ*” ҳақида айтибди, илло, ўқиш берадиган завқ ҳам бундан кам эмас. Шуни ўйлаб, китобга кирган асарларнинг айримларига, шунда ҳам муҳтасар тўхталдим – ўқиб оладиган завқингиз ўзингизники бўлсин, дедим-да.



## ДАРБАДАРЛИКНИНГ БЕДОР ТАЛҚИНИ

Исажон Султон яратган романни ўқирканман, ҳазрат На-воийнинг “Фарҳод ва Ширин” достонидаги бир муҳим эпизод қайта-қайта ёдимга тушаверди. Ҳозирга қадар кўрганим илмий-ижодий тадқиқотларда негадир алоҳида тўхталилмаган (балки биз билмаган манбаларда бордир) бу лавҳа маъно-мақсадини англаш йўлидаги ҳаракатларимдан ўзим учун қониқарли на-тижа чиқавермагани туфайли ҳам шу ҳол юз берган бўлса, ажаб эмас. Бошқача айтганда, “Фарҳод ва Ширин”даги бош қаҳрамон Фарҳоднинг ўлими эпизоди шахсан мен учун ҳамон жумбоқлигича – англашилмай қолмоқда. Бир-бирига тулаш икки мақсад – Ширин ишқи ва комиллик йўлида не ранжу синовларни бошдан ўтказган Фарҳод умрининг сўнггида ўзи бағрини босиб юргани саҳролардан, метини ва тешаси билан жисмини ёргани тоғлардан, юрганда юзини чангга булғагани осмондан, ариқ қазишдек хунарини намойиш этишда уқубат тортиргани метини ва тешасидан, ғариблиқда қийналган кун-ларида унга қурдош бўлган дарранда ва паррандалардан, хулласи, бутун жумлай жаҳондан узр сўраб тазарру қилар экан, “сўзлари шу ерга етганда, яна аччиқ-аччиқ йиғлаб” тонг елига бундай дейди (кўпчилик ўқувчиларга тўлароқ тушунарли бўлиши учун мазкур лавҳани профессор Ваҳоб Раҳмонов таб-дилида беришни маъкул топамиз):

“ – Эй, тонг ели, тур, Чин ва Хито мамлакатига етиб бо-риб, ер ўп. Мен сенга хоқон қошига унинг ўғли номидан бор демайман, балки ғариблиқда ўлган бир хаста қул номидан бор, хоқоннинг бошидан куюндеқ айланиб, ўзингни садқа қил. Сўнг мана бу сўзларни айт: “Сенинг ул овораи бехонумонинг, бағрингдан пайдо бўлган бир қатра қонинг оламдан кетиб, умидсизлик билан, юзингни кўрмай, армон билан ўтди. Унинг бағридан қонлар кўзёшлига қўшилиб оқди. Бошига фалакдан кўп оғир ишлар тушди...”

Менинг тўғримдаги хабарни эшитиб, онам изтиробга тушиб, менинг қайғумдан тошларга бosh уриб, ғавфоси дунёга ўт солгудай, оҳу вовайлоси ҳар томонга етгудай бўлиб, мен – ёввойига хитобан “Қўзим!” деб, ҳеч кими йўқни “Ёлғизим!” деб, соғинса, ғам ва ташвишлари ошиб, юзидаги тутган пардаси юзидан учиб кетса, ғам билан парвариш топган ўғлини эслаб, тўққиз қават парданинг ичидан югуриб чиқса, “Жоним ипига боғланганим!” деб, юзларини тилим-тилим қилса, юла-юла соchlаридан айрилса, бундан Чин ўлкасига қора мушук ўрнига ҳидли кофур сочилгандай бўлса, шунда сен, эй, тонг ели, менинг нафасимни тутун қилиб олиб бориб, халойиқ кўзидан уни яшириш учун уни парда қил! Унга менинг номимдан шундай дегин:

“ – Эй, юзинг жонимнинг қуввати. Изининг гарди кўзимга сурма бўлган, она! Тангри менинг вужудимни йўқлиқдан бор қилган экан, менга бу дард ва ҳасратлар ўзи етарли эди. Сен орқамдан эргашиб юрсин деб, ажойиб бир фарзанд кўриши



**Раҳмон ҚўЧКОР**

1961 йилда туғилган.  
Ўзбекистон Миллий  
университети  
филология  
факультетини  
тамомлаган.  
Филология фанлари  
номзоди.  
“Истеъодд қадри”,  
“Мен билан  
мунозара қиласангиз”,  
“Қарз берилган  
нур”, “Мағкура  
полигонларидаги  
олишув” сингари  
китоблар  
муаллифи. Ҳозирги  
кунда Тошкент  
Давлат юридик  
институтининг  
доценти.

жуда ҳам қаттиқ орзу қилдинг. Мендай бир фарзанднинг ташвиши билан бўлиб, бир нафас ҳам кўнглинг севинмади. Ҳамиша интизорлиқда ва доғда бўлдинг. Бошқа болалар майсазор ва боғларда ўйнаб юрса, менга кичик ёшимданоқ дарду доғ насиб бўлди. Озғин танинг менинг дардимни тортгани-тортган, сен эса менинг додимда ўртанини ўзингга шиор қилиб олган эдинг. Ёқут тилаган эдинг, бир парча тош топдинг. Қуёш сўраган эдинг, бир бўлак ўтга эга бўлдинг. Мен қанча улғайсам, шунча бечора бўлдим, диёримдан, мулкимдан ажралиб овора бўлдим. Менга бу овораликни фалак ўзи берган экан, сенинг ишинг фироқимдан ўртаниш бўлди. Сенга бир умр куйишнинг ўзи етмагандай, ташвишидан куя-куя хасга айландинг, кул бўлдинг. Менинг сенга келтирган шунча азобларим сойлари етмагандай, кўзёшларим сели билан ўз каъбамни буздим. Мен кимман? Менга ўлим ҳам ҳайф. Мен халқнинг менга куйиши, куйинишига ҳам арзимайман...”

Балки, билган одамнинг оддийгина, жўнгина жавоби бордир, бироқ биз учун ҳамон жумбоқ бўлиб турган бу ҳопни қандай изоҳлаймиз? Фарҳоднинг бу тазаррусини ҳам унинг комиллигига, ўлимга тик қарай оладиган мардонаворлигига, ота-онасига меҳрибон ўғилу табиатга шафқатли инсон бўлганига йўйиб қўя қолиш мумкинмикин? Бу манзарани ўлим талвасасига тушган, ўзлигидан айрилаётган ҳар бир банда қисматида бор табиий ҳолатнинг бадиий инъикоси, деб талқин этиш шоир дарду дунёси миқёсларини торайтиришга олиб келмайдими? Навоийдек мутафаккирнинг “Хамса”дек эпик полотно марказига жойлаган достонини шугина маъно-муддаолар билан яқунлаши мумкинмиди? Агар бу саволларга “йўқ” деб жавоб берсак, унда Фарҳод қайғусининг илдизи қаерда? Шоир Иқбол Мирзо тили билан айтганда: “Қайдан келаётир уюр-уюр ғам, Қайдан кўчаётир палахса ҳасрат?..”

Айни ўринда, Навоийнинг ўзидан ўқиганимиз куйидаги эътироф ёрдамга келмасмикин:

*Кўзни ўкуш саъй ила забт этгамен,  
Етса кўнгил забтига иш, нетгамен?*

Бу ерда гап забт этилмоғи, ҳайратга тўлдирилмоғи лозим бўлган фақат ўкувчи-мухлиснинг кўнгли ҳақида эмас, балки эпик асар қаҳрамонининг, демакки, фоят чигал, мурракаб УМУМИНСОНИЙ КЎНГИЛнинг забти – талқини тўғрисида ҳам бормоқда, десак, қаттиқ адашишга йўл қўймасмиз, балки.

Навоийнинг Фарҳоди – илму маърифатда, ҳунару фазилатда комиллик касб этган инсон умр шомидаги сўнгги нафасларида “Мен кимман?” деган аччиқ савонни бermоқда.

ХХI аср ўзбек ёзувчиси Исажон Султоннинг “Боқий дарбадар” романида, Гобидағи Инсон такомили маркази томонидан юқори технологияларни кўллаш орқали сунъий бино қилинган барҳаёт одамнинг ўзини яратган инсониятга қарата айтган биринчи саволи ҳам худди шундай янграйди: “Мен кимман?”

Ҳолбуки...

Ҳолбуки, юзаки қараганда, ҳаммаси оддий нарсадан, оқибатини ўйлаб ўтиришга-да эриниб қилинган ҳаракатдан бошлангандек:

“Маҳқум бир дамгина нафас ростлаш учун этиқдўзнинг деворига суюнди.

– Ҳали сен менинг деворимга суянадиган бўлдингми? Имиллама! – деб қичкирди этиқдўз ҳам ва шиддат билан олға интилиб, уни икки кўллаб итариб юборди. Муборак Киши ерга йиқилиб тушди, аммо лом-мим демай келаётган Ўлим лашкарининг жаллодларидан иккитаси уни яна оёққа турғизиши.

Этиқдўз ўзининг қилған ишидан мамнун, тиржайиб турар эди.

Шунда... Шунда Муборак Киши куйи эгилган бошини кўтарди, унинг тиник ва нурафшон нигоҳи билан этиқдўзнинг олазарак кўзлари тўқнашди.

Ва у этиқдўзга қараб шундай деди:

– Турғин ва равона бўлгин!

(“Мен-ку имилламайман, аммо сен маҳшар куни келишини узоқ кутасан...”, – дейилди унга.

“...Энди сен то қиёматга қадар ер юзида бетиним дайдишга маҳкум этилдинг”, – дейилди унга.

“Ҳамда сенинг қиласидиган ишинг – ҳеч нарса, ҳеч нарса, фақат ҳеч нарса”, – дейилди унга”.)

Киши, агар истаса, этикдўзни оқламоққа керагидан кўпроқ сабаб, бошқаларнинг оғзини ёпиб ташлайдиган қат-қат далилларни бемалол топади. (Зоро, одамзод пайдо бўлибдики, бу сингари кирдикорларни оқлаш ёхуд “тушунтириш” учун сабаб ва далиллар топилган, яна топилаверади.) Тўғри-да, ахир, этикдўз ўша Муборак Кишини борйиги деворидан итариб юборди, холос. Уни этикдўзниң кўчасига келгунга қадар кимлар хўрламади, кимлар мазахламади-я. Умуман, уни хўрлашга, мазахлашга нишон қилиб кўйган ҳукмни бечора этикдўз эмас, жуда “улуф зот”лар эълон қилди-ку! Қолаверса, ҳали Муборак Кишининг кўл-оёқ сүякларини синдириб, ҳар бири бармоқдек келадиган михлар қоқиши ният қилиб турган кимсалар ишга киришмаган. Муборак Кишини Тангрининг зурриёти деб сифингувчи миллионлар, миллиардлар ҳали туғилмаган. Яна, қолаверса, асарнинг ўзидаёт, этикдўзниң ичидәёт турибди ўша “ҳалоскор сабаб” – “Менда ҳам айб йўқ. Ҳамма ёқда айғоқчилар изғияти... уларнинг назарига тушмаслик учун номига бўлса-да койиб кўйишим керак. Аслида... бошқаларни хавф остига кўйиб мужда олиб келадиган киши муборак бўлармиди?! Амалдорлар қилмишмни кўришиди, эрта-индин суриштирувlar бошланади, жосуслар барча воқеаларни оқизмай-томизмай етказишади... ва ҳеч ким менга тегмайди...”

Ха, энди, унга ҳеч ким тегмайди. Бандаси не, энди, ҳатто ажал ҳам унга яқинлашмайди, энди, унинг лаблари то қиёмат қадар ўлим шарбатини ҳўпломайди...

Шундай асарлар бўладики, уларда акс эттирилган воқеалар, уюштирилган интригапар, яратилган қаҳрамонларнинг фикру ўйи ва ҳаракати – буларнинг барча-барчаси недир бир ҳақиқатни, муаллиф ўқувчига етказмоқчи бўлган муайян бир мақсадни англатишига, изоҳлашга, юқтиришга хизмат қиласди. Бундай асарларнинг “анатомияси” юзлаб деталлардан териб чиқилган буюмни, асбобни эслатади. Мана шу буюм, асбоб фойдаланишга, ишга яроқли бўлиши учун ўҳуд бу деталь ўйлаб топилмоғи, уларнинг қаериандир ўз жойини эгалламоғи шарт бўлгани сингари, бояги асарнинг бозғояси – айтилмоқчи бўлган муҳим фикр тўла-тўқис ўқувчига етиб бориши учун ҳам турли воқеалар, интригапар, конфликтлар, қаҳрамонлар уюштирилади, “териб чиқилади”.

“Боқий дарбадар” романни тўғрисида эса бундай деб бўлмайди. Бу романда, айнан, тескари манзарага дуч келамиз. Яъни, унинг муаллифи (яна ҳам аниқроғи – муаллиф ижодий тафаккури) ҳозирга қадар кўрган умри давомида йигиб-тергани, ўзига оғирлик қилган шунчалик кўп савол, зиддият, ҳикмат, ибрат, фикр, ўй-мулоҳаза, иштиоҳ, гумон, тахмин, кўркув, ваҳм ва яна бошқа инсоният ақли, онгги, туйғуси, ҳиссиётига доир кечинмалар қатламини яратадики, уларнинг ҳар бири тўғрисида алоҳида китоб битмоқ, кунлаб мунозара олиб бормоқ мумкин.

Бу ўринда, асарнинг биргина эпизодик образи – Тиёншон бағридаги ғорда истиқомат қилувчи Авленинг ўз ҳузурига мўъжиза кўрсатишини талаб қилиб келган, агар кўрсатмаса ўлдиражагини айтиб таҳдид қилган одамга очган мана бу ҳикматини мисол келтириш мумкин:

“ – Сен ўзинг дунёда нима исташингни билмассанг, мен бечора банда қаердан ҳам билайнин... Қара, оламда ҳамма нарса мукаммал бир тартиб билан ҳаракатланиб турибди. Баҳорда бу ердан турли-туман наботот униб чиқади. Саноғини Тангридан бошқа ҳеч ким билмайди. Шунча набототнинг униши учун керак бўлган сувни томчи-томчисигача ўлчови билан булултлар олиб келиб ёғдирса, ҳатто сен кудратини кўриб ҳайратланишинг ёки эски тупроқларнинг ичидаги бор-йўқ жасадлари билан ювиб, бошқа жойларга озуқа бўлиши учун олиб кетадиган ўҳуд ҳар иккаласи учун ҳам бўронлар эсса, селлар оқса... Қўёш керагича қиздирса, дов-дараҳту ўт-ўланнинг чангланиши учун қанчада асалари ва ҳашарот керак бўлса, шунчалик яратилса-ю, гулларни чанглантиришидан ташқари яна бол ҳам тўпласа ва ўзининг мавжудлиги ва ҳаёти билан яна унинг қудратидан хабар бериб турса... Сен айттаётган мўъжиза мана шу низомга қарши равишида, шу тартибни бузуб пайдо бўладиган ҳодисадир. Айт-чи, эй Тангримнинг бандаси, биргина менинг авлиё эканимга ишонишинг мана шу низомнинг бузилишига арзийдими?.. Ҳаётингнинг бошидан охиригача, гўдаклигиндан то кексайгунинггача ҳаёт ҳикматини, унинг марҳаматини англолмасдан, унинг пардалари ортидаги сирларига бир марта бўқолмасдан дарбадар кезсанг-у, сенинг бу тутуминг мўъжиза талаб қилишинга ҳуқуқ бера оладими?”

Асардан кептирилган шу биргина парчадан ҳам англашиладики, Исажон Султон ўқувчи – инсоният билан рамзлар тилида сўзлашмоқни, дарду дунёсини унга юқтирмоқни истайди... ва тўғри қиласди. У яратган ҳикоя ва қиссалар мисолида айта оламизки, асли-

да, ёзувчи анъанавий усулларда ҳам бемалол бадиий дунё яратса билади, бу юмуш унга ортиқча оғирлик туғдирмайды. (Қолаверса, айни, романнинг ўзида ҳам шундай деталлаштирилган тасвир намуналари борки, улар бу фикримизни тұла тасдиқлаб турибди.) Бироқ “Боқий дарбадар” орқали юқтирилмоқчи бўлган ўй, ташвиш, дардлар бадиий иншонинг, айнан, шу йўсунини талаб қиласиди. Зеро, устоз адабиётшунос Иброҳим Ғафуров сухбатларнинг бирида тагдор-маъноли ишора қилганидек: “Энди, мусича ҳақида ёзиб, дунёни қойил қолдириб бўлмайди”.

Нега?

Негаки, дунё, одамзод, худди шу Иброҳим Ғафуров яна бир сухбатда лутф этганидек, гўзаллик, эзгулик олдидан мутлақо бепарво, беписанд ўтиб кетишини ўзининг ҳаётий аъмоли қилиб олганига анча бўлди. Ҳолбуки... ҳолбуки, тўхташ керак! Ўйни жамламоқ, қаёққа кетилаётгани, бу йўл не манзилларга олиб бориши хусусида жиддий ўйламоқ мавриди аллақачон келган.

“Йўл” дедик. Ёдингизда бўлса, машхур гуржи режиссёри Тенгиз Абуладзе яратган “Тавба” (“Покаяние”) фильмининг охирги эпизодида кекса йўловчи аёл билан деразаси йўлга қараган ёш жувон ўртасида қисқагина шундай сухбат кечади:

“ – Бу йўл ибодатхонага олиб борадими?

– Йўқ, хоним.

– Агар олиб бормаса, бундай йўлнинг нима кераги бор?..”

Рамзий маънога тўла бу савол ҳозирги пайтда бутун инсоният бошида қуондек айланадиганини англамаслик мумкин эмас. “Боқий дарбадар” романидан ибтидода танланган, яна ҳам тўғрироғи, Яратган томонидан белгилаб берилган саодат йўлидан одамзод улоқиб кетгани бир қавм тақдири тимсолида кўрсатилган эпизод ҳам ўрин олган:

“ – Бизлар кўп йиллар аввал йўлга чиққанимизни биласан, – деди Чол, тунги йўловчига. – Сен туғилмасингдан икки минг йил аввал бошланган бу дарбадарлик. Сафар манзилини биладиганлар ўша маҳалларда дунёдан ўтиб кетдилар. Тахмин қила оладиганлар ҳам аллақачон тупроққа айланганлар, балки уларнинг зарралари ҳозир шамолга кўшилиб учиб юрган бўлса, не ажаб?!.”

Баъзан одамни шундай хомхаёл олиб қочади: қанийди, худди бир оилада бўлгани сингари барча миллат ва элатларнинг ишонган вакиллари бир жойга жамланса-да, инсониятнинг ҳозирга қадар босиб ўтган йўли, эришилган натижалар ва йўл қўйилган хатоларни бирма-бир муҳокама қилишса. Шу аччиқ сабоқлардан келиб чиқиб, бугун қаёққа йўл тутилганига ҳушёр қараб, бу йўл инсониятни саодатга олиб бормаслиги аниқлигини эътироф этиб, кейинги наслларнинг ҳаққи-хурмати йўлни бошқа томонга – чинакам баҳтиқбол манзилига буриш, бунинг учун ким нима қилмоғи, қачон ва қандай қилмоғи лозимлиги келишиб олинса. Шундан кейин ҳамма лафзида туриб, бир-бирига ишониб, елкама-елка олдинда хатарли жар кутмайдиган ёруғ манзил сари юрилса...

Айтганимиздек, бу бор-йўғи бир хомхаёл эканига ақлимиз етади. Бироқ хомхаёл бўлмаган реал таклиф қани? Одамзод не фикру йўлар, истак ва ҳоҳишлиар етовига тушиб қолган бугун? Нафс қуткуси, оламга эгалик даъвоси, мутлак (хатто Яратган ҳукмидан ҳам) эркинлик замзамаси, ҳеч нарсадан парҳез қилмаслик аъмоли, дунёпарастликка мукласидан кетиши... буларнинг барчаси инсон зотини яна қандай айнишларга – деградацияга дучор этади? Дунё миқёсидағи маънавий дарбадарликдан, ўзи ўтирган шохни енг шимариб аррапашдек бехосият талвасадан бир нафас тўхташнинг, ўша нафасни ростлаб атрофга боқмоқнинг, яна сал ортиқча ҳаракатданоқ ирилиб кетиши тайин бўлган тириклик шохининг остида одамзодни туби кўринмас жарлик кутаётганидан огоҳ бўлмоқнинг имкони, фурсати қолдими? Инсоният тақдирига даҳлдор бирор-бир масалада чин қаёқда-ю, ёлғон қайда, у ёхуд бу ҳодисанинг асл сабаби, келиб чиқиш илдизи қаерда, дунё миқёсида бўлаётган адолатсизликлар, хунрезликлар, босқин ва таловлардан кимлар манфаат кўради-ю, ким оғзини очиб томошабин бўлганига-да хурсанд... – аниқ жавоб қолмаган, бу жавобни аниқлаштириш имкони ҳам йўқ қилиб юборилган бу замон унинг эгаларимиз деб юрган ва келажак зурриётларни қандай фалокатлар сари улоқтиради?

Мутолааси фикру ўйимизга оғир тош бойлаб, худди шундай оғир саволлар гирдо-бига ташлаган “Боқий дарбадар” романни, айтилганидек, дикқатимизни бирор ҳаётий воқеанинг, у ёхуд бу қаҳрамон тақдирининг эпик бадиий талқининг эмас, балки қисмати қил устига келиб қолган одамзод наслининг кечаги ибратли, бугунги бошбошдоқ ва эртанги билиб бўлмас тақдирига шахсан даҳдорлик масаласига қаратади.

Бироқ фақат дахлдорликни ҳис қилмоқнинг ўзи етарли бўлганда-ку, масала бу қадар чигаллашиб кетмас эди. Ҳамма гап инсоният аталмиш яхлит организмни ташкил этган, бир қараганда, бу гигант организм миқёсида мутлақо кўзга кўринмас зарра ҳисобланмиш ҳар бир одамнинг ўша азалий савол қаршисидан кўз юмиб қочмаслигига, тирикчилик номини олган одамхўр агрегатга бош-сёқни жуфтлаб шўнгиз мажбуриягини бир муддат енгиб, “Мен кимман?” деган сўроқقا бошни тик тутиб жавоб беришида қолган. Бу миллиард жавоблар эса оғриқсиз, хижолатпазликсиз, армонсиз, вовайлосиз кечмаслиги тайин. Ҳудди шу туфайли ҳам ўша миллиард бош бир жойда қовушмайди, азалий савол ёнидан силлиққина сирпаниб ўтишга, яхшиси бояги агрегат домига бош-кет билан шўнгиф ўзни чалғитишга ҳаракат қилинаверади.


Мана шу шароитда, ўзбек ёзувчиси ўзга қитъадаги дарддоши – Габриэл Гарсиа Маркес тилидан нажотнинг бир толасига ишора қилмоқчи бўлади:

“Ўзингга яқин инсонларни кўллаб-қувватла, қулоқларига сенга қанчалар керак экан-ликларини шивирлаб айт, уларни эҳтиёт қил, “афсус”, “мени кечир”, “раҳмат” ва “марҳамат” деган сўзларни ва ўзинг билган ҳамма хуш каломларни айтиш учун вақт топ. Ҳеч ким сени фикрларинг боссигина эслаб ўтирумайди. Парвардиgorи Оламга, ҳиссиётларингни тилингга чиқара олишинг учун донолик ва куч-кувват сўраб илтижо қил...”

Исажон Султоннинг “Боқий дарбадар” романи бир мақола доирасида таҳлилу талқин этиш мушкул бўлган асарлар сирасига кириши аниқ. Ҳозирча фақат шу нарсани айтиш лозимки, дунё, одамзод тақдири борасида жиддий ўй суришга куввати етадиган бу ёзувчи ўз тафаккурида, кўнглида тўлиб-тошаётган фикрларини, ҳиссиётларини тилига чиқаришда донолик ва куч-кувват касб этиб бормоқда. Миллий адабиётимиз учун энг муҳими, бизнингча, мана шу жиҳатдир.

Дарвоқе, сухбатимизни ҳазрат Навоийнинг талқину таҳлили ниҳоятда мураккаб бадиий олами тўғрисидаги муроҳаза билан бошлаган эдик. Унинг ниҳоясида ҳам мутафаккир бобомиз мисраларини ёдга ола қолайлик:

Сўзим хўб эрса раҳмат айла ҳамроҳ,  
Ва гар дедим ёмон: Астагфируллоҳ...





**Зулхумор  
МИРЗАЕВА**

1976 йилда туғилган.  
1999 йили Тошкент  
Давлат университети  
(ҳозирги  
Ўзбекистон Миллий  
университети)  
ўзбек филологияси  
факультетини  
имтиёзли  
тамомлаган.  
Филология фанлари  
номзоди. Зулхумор  
Мирзаеванинг “Оппоқ  
тун”, “Денгиз-у  
уммон оша”, “XX аср  
ўзбек адабиётининг  
Америкада  
ўрганилиши”  
китоблари, етмишидан  
ортиқ мақолалари  
нашр этилган. Айни  
пайтда, Ўзбекистон  
Республикаси Фанлар  
академиясининг  
Тил ва адабиёт  
институтидаги  
катта илмий ходим  
лавозимида фаолият  
курсатмоқда.

## ХХ АСР ЎЗБЕК АДАБИЁТИДАГИ АЙРИМ РАМЗИЙ ИФОДАЛАРГА ДОИР

**(Хорижий ўзбекшунослар тадқиқотлари мисолида)**

Маълумки, ХХ аср ўзбек адабиётида қаҳрамон фожиаси – ўлими тасвирини ифода этувчи кўплаб асарлар яратилган. Айrim ўринларда ўлим мотиви миллий озодлик йўлидаги ички ва ташки курашларни акс эттиришда, муаллиф концепцияси ни ҳаракатлантиришда энг муҳим йўналишлардан бири бўлиб хизмат қилган.

Миллий адабиётимиз намуналарида шахс фожиаси, фожилик тасвиридаги символик моҳият масалалари тадқиқида эътиборли кузатишлар олиб борган, хорижлик янги авлод ўзбекшунослари, америкалик Роберта Мария ва Аҳмет Оғирлардир. Улар муайян бадиий асар тадқиқида унинг ижтимоий-сиёсий, эстетик тушунчалари моҳиятини англашга хизмат қиладиган масалаларни вазифа қилиб қўяди. Шундай вазифалардан бири – ўзбек жадид адабиётидаги **ёлғиз фарзанд** (асосан ўғил) ва унинг **ўлими ёки пароканда** бўлиши билан боғлиқ тасвиirlардаги ички моҳиятни тафтиш этиш масаласидир. Роберта Мариянинг фикрича, ХХ аср биринчи чорагида яратилган ўзбек адабиёти намуналарида, хусусан: “Уткан кунлар” (Отабек, Кумуш), “Кеча ва кундуз” (Зеби, Мингбошининг тўрт хотинидан ягона фарзанди, Мирёқубнинг ягона ўғил зурриёти) каби асарларда “ёлғиз фарзанд”нинг ифодаланиши ва унинг тақдири фожия билан якун топиши талқин этилади.

Дарҳақиқат, ХХ аср миллий адабиёт намуналарида эътибор қаратасак, уларнинг аксариятида, “ёлғиз фарзанд” ва унинг фожиага юз тутиши билан боғлиқ масала ижодий анъана даражасига кўтарилганлиги кузатилади. Роберта Мария эътиборидан четда қолган “Падаркуш” (Тошмурод), “Бахтсиз куёё” (Бахром), “Заҳарли ҳаёт” (Марямхон ва Маҳмудхон) каби асарларда ҳам сюжет “ёлғиз фарзанд” тақдири асосига қурилганлигини кузатиш мумкин.

Шу ўринда, “ёлғиз фарзанд” муаммоси ўзбек мумтоз адабиёти, жумладан: “Фарҳод ва Ширин”, “Лайли ва Мажнун” ва ҳалқ оғзаки ижоди намуналари (масалан, “Тоҳир ва Зухра”)да ҳам анъанавий мотив даражасига кўтарилганлигини таъкидлаб ўтиш жоиз.

Кўзгунинг иккинчи томонидаги образли тафаккур тушунчasi эса, Роберта Мария қўйган муаммо воситасида тиниқлашиб, анъанавий услубда китобхон ақлини кўзғатади. Адабиётунос олим Дилмурод Куронов бадиий асарнинг актуал ва туб эстетик қатламлари хусусида тўхталиб, актуал қатлам асарнинг ижтимоий-сиёсий моҳиятини акс эттириб, у бевосита асар яратилган даврнинг ижтимоий-сиёсий мақсадларига қаратилиши, актуал қатламнинг юзадагиси “қизил кўзойнакли” китобхон учун, тубандагиси хос ўқувчи учун мўлжалланган, деган фикрини айтган. Демак, муайян асарлардаги “ёлғиз фарзанд” муаммоси ва унинг ҳалок ёки пароканда бўлиши тасвирида акс

этган образли тафаккур тушунчаси актуал қатламнинг тубандагисига хос бўлиб, анъанавий китобхонлар эмас, балки маҳсус аудитория учун мўлжаллангандир.

Албатта, хориж олимларининг асосий ўрганиш обьектлари ҳисобланган: “Падаркуш”, “Чин севиш”, “Ҳинд ихтилочилари”, “Заҳарли ҳаёт”, “Бахтсиз куёв”, “Ўткан кунлар”, “Доктор Муҳаммадиёр”, “Кеча ва кундуз”, “Қутлуғ қон”, “Тушда кечган умрлар” каби асарларда ўлим мавзусининг анъана дарајасига кўтарилиши турли хил сабабларга асосланади. Шунингдек, бадиий асардаги барча қаҳрамонлар тақдири ўлим билан якун топсада, ҳар бир асардаги ўлимни келтириб чиқарган сабаблар, унинг оқибатлари, вазият-ҳолатлар ифодасидан кўзланган эстетик мақсад, қаҳрамонлар маънавий-руҳий олами каби факторларга қўра, фожия сабаблари (ёки сабабчилари)ни ҳам турли хил нуқтаи назар билан изоҳлаш мумкин. Жумладан, Беҳбудийнинг “Падаркуш”, Абдулла Қодирийнинг “Бахтсиз куёв”, Ҳамзанинг “Заҳарли ҳаёт”, Чўлпоннинг “Доктор Муҳаммадиёр” драма ва ҳикояларида маънавий инқироз, саводсизлик, ақидапарастлик оқибатида ўлимга юз тутган қаҳрамонлар тақдири жамият ва одамларнинг муайян кесими мисолида қаламга олинган. Умуман, XX аср ўзбек адабиёти, хусусан, жадид адабиётининг айрим намуналарида ўлим мотивининг сюжет марказига кўтарилишида ўша давр ижтимоий-маънавий инқирозининг даҳшатли оқибатларини ҳалққа воситали тарзда кўрсатиш орқали миллат онггини уйғотиш, мустамлакачиликка қарши кураш foяси ётади. Бу асарларда қаҳрамонларни руҳий таҳлил қилишдан қўра, воқеа баёни устуворлик қиласди.

Шу жиҳатдан, илк фожиавий драма муаллифи Беҳбудийдан тортиб, Фитрат, Ҳамза, Қодирий, Чўлпонгача бўлган муаллифларнинг трагик мавзуларда ижод қилиши мутлақо тасодифий эмасди. Мазкур асарлар ўша давр ва жамият учун жуда муҳим ижтимоий-маърифий огоҳнома эди. Муаллифларнинг ижтимоий-эстетик мақсад-муддаолари ўз асарлари воситасида, инсоннинг юрагига етиб борадиган, кўзини очишга, ўзлигини англашга, энг муҳими, яқин келажакда уларни кутаётган изтиробли фожиаларнинг даҳшатли оқибатларини кўрсатиб беришдан иборат бўлган. Образли қилиб айтганда, бирон-бир жиддий фожия сабаб бўлмагунча муайян “қўргон” нинг мустаҳкам девори ўприлмайди. Аслида, ўша фожия симптомлари ички факторлардан изланса, моҳиятни ойдинлаштириш осон кечади. Шунинг учун ҳам жадид адабиётининг айрим намуналари сюжети марказида экстремал вазиятлар таҳлили, яъни, ўлим турган. Қолаверса, Аристотель қайд этганидек: “*фожиавий асар изтироб билан инсон руҳини покловчи муҳум ва тугал воқеа тасвиридир*”.

Қолаверса, муаллифлар муайян бадиий асардаги қаҳрамон ўлими воситасида зиддиятларга тўла ҳаёт моҳиятни акс эттириш, “ўлим” жудолик, айрилиқ ва реал хавфдан иборат ёқимсиз ҳодиса эканлигини намоён этишни ҳам мақсад қилганлар. Бунга Абдулла Қодирийнинг “Ўткан кунлар”, Чўлпоннинг “Кеча ва кундуз”, Ойбекнинг “Қутлуғ қон”, Ўтири Ҳошимовнинг “Тушда кечган умрлар” романларини мисол қилиш мумкин.

Америка ўзбекшуноси Аҳмет Оғир Ойбекнинг “Қутлуғ қон” романидаги бош қаҳрамон – Йўлчи ўлими хусусида қизиқарли кузатишлар олиб борган. Олимнинг таъкидлашича, романдаги бош қаҳрамон ўлими тасвирида икки хил рамзий ифодани кўриш мумкин: олим дастлабки рамзий моҳиятни бадиий асар матнида акс этган, испомдаги “ғазот” (мусулмонларнинг коғирларга қарши жангги) тушунчаси воситасида очишига ҳаракат қиласди ҳамда фикрларини Шокир ота ва Йўлчи орасида бўлиб ўтган суҳбат асосида исботглайди. Олим даҳрийликка қарши курашнинг муқаддаслиги ва мазкур жангда қурбон бўлган мусулмоннинг шаҳид кетиши каби бадиий матнида акс этган қарашларга таяниб, қўйидаги хуласага келади: “Бош қаҳрамон ўлими шаҳидлик моҳияти ҳақида ҳали тўла тушунчага эга бўлмаган аммо ўзларини мусулмон сифатида ҳимоя қилаётган одамлар (эътиқод кишилари З.М.) орасида шаҳидлик ҳиссини уйғотишга ёки мазкур йўлда муайян қарор қабул қилишига сабаб бўлади. Шу жиҳатдан одамлар Йўлчи ўлимида ўзига хос (сирли) диний моҳият (диний мотив) мавжуд, деб қарайдилар. Шокир ота таъкидлаган: “*Қутлуғ қон, уни юзга, кўзга суриш керак... бу ҳикматли қон, қутлуғ қон. Унда сир кўп*” каби “ҳикматли” ва “сир” сўзларида жуда кучли диний коннотация (ички моҳият) мавжуд”.

Маълум бўлятикли, адабий қаҳрамон ўлимида акс этган рамзий моҳият тафтишида матн ва унга боғлиқ бўлган воқеа-ҳодисалар Аҳмет Оғир учун муҳим методологик аҳамият касб этмоқда. У ташки матн асосида реал воқеликнинг ички мазмунидаги яширин моҳиятни очишига ҳаракат қилган. Бироқ, диний эътиқодда қон тўкилиши мутлақо

тақиқланиши, бирор-бир кишининг ноҳақ ўлдирилиши бутун бир жамият инқизози сифатида баҳоланишига етарлича диққат қаратмайди. Ойбекнинг жаҳолатни куч билан маҳв этиш концепциясида шўроча синфий кураш ғоясининг таъсири кучли эканлигини назардан қочиради. Аммо, шу ўринда, таъкидлаш лозимки, Аҳмет Оғир символик образлар ҳаракати нафақат бадиий асар матни, балки ички хусусиятларга эга бўлган яна кўплаб бадиий чизгилар, бадиий ғоя ҳамда асардаги умумий эмоционаллик билан ҳам боғлиқ эканлигини тўғри англаган.

“Озод туйғу”ни ёқлаган олим: “Аммо, бош қаҳрамон ўзининг ўлими заминида “шундай сир, чукур мазмун ёки рамзий функция бор”, деб ўйлашларини истамаса ҳам, ушбу воқелик одамлар орасида чиндан ҳам мана шундай сифатга (туйғуга) эгалигини кўрсатади. Ушбу озод туйғулар йўли китобхонга бош қаҳрамон моҳиятини осонроқ тушуниш учун кўмак ёки стимул беради. Яна шуни алоҳида айтиш керакки, Йўлчи ўз ўлими рамзий ишора бўлиб хизмат қилганлигини тасдиқламайди, аммо айтиш жоизки, бу рамзий тасвир одамларга мазкур курашда иштирок этиш имконини беради”.

Шубҳасиз, Йўлчи адабий қаҳрамон ўлароқ, китобхон ўйларига даҳл қилиш имконидан мутлако маҳрум. Аммо, ижодкор етакчи концепциясининг китобхон фикр-ўйларини ҳаракатга келтирувчи стимул вазифасини ўташи масаласида олим мантиқли мулоҳаза юритган.

Аҳмет Оғир ушбу ўлим концепциясининг иккинчи символик моҳиятини Катерина Клакнинг бир-бирига қарама-қарши концепцияларда юзага чиқадиган “Қандай” (*What is*) ва қандай бўлиши керак (*What ought to be?*) формуласи асосида англашга ҳаракат қилади. Олимнинг фикрича, мазкур романда Ойбек ушбу концепция воситасида, рус маданияти ва социалистик реализм анъаналарида мавжуд “უлиш” ва “қайта тирилиш” фалсафасининг романдаги ўрнига алоҳида эътибор қаратади. “Ўлим ва ажралиш, ўлиш ва қайта тирилиш – ўзини қурбон қилиш орқали бошқаларга янги ҳаёт ҳадя этиш – шўро даври адабиёти намуналарида мистик вазифани бажарган. Қаҳрамон матнда ўзини қурбон қилса, у жамоа учун яна қайта туғилиши вазифасини бажаради. Йўлчи ўлими ҳам романда мана шундай коллектив функцияга эга. Йўлчи ўзини келажак учун, озод келажак учун қурбон қилди”. Тўғри, шўро даври адабиётида бош қаҳрамоннинг умумий ғоя йўлида ўз жонини қурбон қилиши ифодаси кўп. Лекин, озод келажак ғояси шўро адабиёти учун “инқилобий ғалаба”ларга афгор оммани эргаштириш мақсадини кўзлайди. Бинобарин, дин “афюн” саналган адабий-мағкуравий сиёсат ва унинг бадиий инъикоси бўлган шўро даври романни, хусусан, Йўлчи ўлимидан мистик мазмун излаш унчалик ўзини оқламайди. Қолаверса, Йўлчининг стихияли исёни моҳиятида коллектив манфаатларидан кўра, шахсий нафрат симптомлари кучлироқ. Ойбек эстетик идеалида ўз ифодасини топган тонг (озод ва эркин ҳаёт) золимлар жазосини олиб, адолат барқарор бўладиган кун, қайсиdir маънода, янгиликлар ваъда қилаётган тўнтаришлардир. Демаки, у “жамоа учун яна қайта туғилиш” фикридан йироқдир. Шундай экан, адабий қаҳрамонни ижодкор эстетик идеали ва қаламга олинган тарихий даврдан узиб талқин қилиш дуруст эмас.

Кўринадики, Аҳмет Оғир Йўлчининг ўлими билан боғлиқ рамзий мазмун талқинида даврнинг оғир ижтимоий-психологик, муаммоли вазиятлари акс этганлигини тўғри белгилагани ҳолда, тарихийлик принципига тўла таянмайди. Йўлчини реал заминдан узиб, идеал шахсга айлантироқчи, давр сиёсий-ижтимоий, гуманистик конфликтларини ташувчи воситачи тарзида тушунтироқчи бўлади. Унинг жонли бир инсон ўлароқ, ўз тийнати, ҳаёт тарзи, муҳаббат ва нафрати мавжудлиги, ижтимоий муаммолар моҳиятини теран англаб, муайян ғоя йўлида қурбон бўлиш ва одамларни эргаштириш даражасида идеаллашмаганлигини назардан қочиради. Зотан, Йўлчини идеаллаштиришдаги сунъийлик муаллиф етакчи концепциясига зид равишда амалга оширилган эди.

ХХ аср ўзбек адабиёти намуналарида акс этган қаҳрамон ўлими муаммоси Роберта Мария тадқиқотларида яна бир ўзига хос услубда ечилади. Адабий қаҳрамоннинг ўз ажали билан ҳалок бўлмаслиги масаласига диққат қаратган Роберта Мария тадқиқотларида фожия тасвирида жонли ҳаёт картиналарини кўришга мойиллик кузатилади. Унинг таъкидлашича: “бадиий асарларда акс этган образларнинг ўз ажали билан ҳалок бўлмасликлари (ёки фожиага юз тутмасликлари)ни тасвиirlашда жонли йўналишлардан фойдаланилган ва Марказий Осиёдаги оиласларни мажозий йўл билан тасвиirlаш орқали муаллифлар ўша йиллардаги ўлим даҳшатини ҳам бадиий

асарларга сингдириб юборган. Аммо, бу мажозга йўғрилган ижтимоий-бадиий мақсад муаллифларга ёрдам бермади".

Роберта Мария Марказий Осиё ҳалқлари адабиётида ижтимоий-бадиий мақсад акс этганига диққат қаратади. Рамзий ифода моҳиятида реал фожиа тасвири мужассам деб билади. У адабиёт реал ҳаётта тезкор амалий таъсир қилади, деб ҳисоблайди. Шу боис ҳам, давр фожиаларининг поэтик ифодаси на ҳаёт ўзинини ўзгартириди, на муаллифларни қатағонлар чангалидан асрой олди, демоқчи бўлади. Бироқ, унинг адабий қаҳрамонлар фожиасига сабабчи бўлувчи ("Ўткан кунлар" романидаги Зайнаб, Хушрўйбиби ва "Бой или хизматчи" драмасидаги кундош Пошшай каби) "катализатор образлар"га диққат қаратиши аҳамиятлидир. Чиндан ҳам Шарқ адабиётида "рақиб", "кундош", "садоқатли ёр", "фидойи ошиқ" каби образлар воситасида фожиани тезлаштириш ҳоллари мавжуд. Бироқ, улар муқаррар фожианинг ягона омили саналмайди.

Бироқ, олиманинг адабий қаҳрамон қисматини тўғридан-тўғри давр ва ижодкор қисматига боғлаши ўзини тўла оқламайди. Чунки бадиий матн ҳамиша ҳам ўз ижодкори истагига бўйсунмайдиган, ички ривожланиш қонуниятларига эга ҳодисадир. Масалан, Абдулла Қодирий Кумушни ўлдиришдан ўзга чора топа олмаган, ўзи ижод қилган қаҳрамон қисматига ачиниб кўзёш тўкишдан тийила олмаган эди. Қолаверса, қатағон сиёсати Марказий Осиё ҳудудларидан анча четга чиқади. У ҳатто ўз ижодкорларини ҳам маҳв этади. Демак, адабий восита талқини муаллиф қисмати ёхуд муайян давр ғоявий интилишлари доирасидан кенгрок миқёсларда изоҳлашни талаб этади. Зотан, Кумуш ёки Фоғир фожиасини Беҳбудий, Ҳамза, Фитрат, Қодирий, Чўлпонлар аянчли қисматига боғлаш ўзини тўла оқламайди. Бундай хулоса муаллиф ва адабий қаҳрамон ўртасига тенглик аломати кўйишдек бир томонлама ёндашув оқибатида келиб чиқсан.

Аҳмет Оғир Ўткир Ҳошимовнинг "Тушда кечган умрлар" романни қаҳрамони – Рустамнинг фожиасини кўйидагича баҳолайди: "Ёзувчи романнинг дастлабки қисмларини асосий қаҳрамоннинг ўлими билан бошлайди. Демак, романнинг бошқа қисмлари тўғридан-тўғри асосий қаҳрамон ҳақида эмас, балки унинг баҳтсиз тарихи ёки оғрикли, азобли ўтмиш ҳаёти хусусидадир. Баҳқача қилиб айтганда, асосий қаҳрамон романда ҳикоянинг фаол иштирокчиси эмас. Назаримизда, Аҳмет Оғир бу ўринда, ҳикоячи (баёнчи) шахсининг реал вақтга муносабати масаласига эътибор қаратган кўринади. Олим Рустам фожиасига даҳлдор ички симптомлар хусусида тўхталаркан, у қаҳрамон ўлими сабабларини шўро даври ваъда қилган "замонавийлаштириш", "модернлаштириш" лойиҳаси, Фарб дунёсига қўйилган қадамнинг фожиавий оқибатларида кўради.

Аҳмет Оғирнинг қаҳрамон ўлими тадқиқида, романда акс этган даврни қиёсий йўсинда таҳлилга тортиши ва мустамлакачилик табиатидаги муштараклик ҳақидаги фикрлари асосли. Аммо, у, айни ўринда, бадиий ҳақиқат ва ижтимоий-сиёсий реалликни айнанлаштириб кўяди. Натижада, дунё кўрган, тафаккурида фикрий силжиш содир бўлган ва илгаригича яшашни истамаётган миллат кишиси образи ҳаракат-интилишлари замидаги маъноларни илғай олмайди. Рустам образи моҳиятини чуқурроқ англаш учун унинг тутумларидаги оммавийликдан фарқланувчи жиҳатларга диққат қаратиш, бунинг сабабларини излаш лозим эди. Бизнингча, асл рамзийлик ҳам, шафқатсиз реализм ҳам ўша давр сиёсати малайлари уйғонган миллый тафаккурни, эндиликда, жиловлашни эплолмаётгани билан боғлиқ сабиқ империя инқизори жараёнини кўрсатишда ўз аксини топган. Афсуски, бу империя сўнгги талвасаси олдида Рустамни зурриётсиз қолдириш, яъни, миллат келажагига болта уришга уриниш даражасида тубанлашди. Макон ва замондан бегоналашган, истиқболдан умидсизланган Рустамнинг стихияли исёнида ҳам унинг шахсий норозилиги ўз ифодасини топган. Демакки, миллат вакиллари индивидуаллашганлиги билан боғлиқ ишора мужассам.

Хулоса қилиб айтиш мумкинки, америкалик олимлар XX аср ўзбек адабиётидаги қаҳрамон ўлими, унинг фожиага юз тутиши билан боғлиқ талқинларида асосий эътиборни ғоя ифодасига қаратадилар. Аммо, муайян воқелик ёки тасвир усусларини янгича йўлларда талқин қилишдаги изланишлари, муайян бадиий асардаги яширин санъатни ошкор қилиш имкониятини кенгайтиради. Ўзбек сўз санъати намуналарининг миллый адабиётшунослигимизда нисбатан кам тадбик қилинган назариялар асосида тадқиқ қилиниши, хориж тадқиқотларида индивидуал концепциялар қийматини белгилайди.



**Мұхәмәт  
ХАМОРОЕВА**

1974 йылда туғилған.  
Термиз Давлат  
университети  
филология  
факультетини  
тамомлаган.  
Филология фанлари  
номзоди.  
“Мәденинг ранггин  
лаҳзалари” китоби  
нашр этилған.

## **АМИР ТЕМУР ОБРАЗИ ЯРАТИЛГАН ҲИКОЯЛАР ХУСУСИДА**

Тарихий шахслар характеристидаги ибратли қырраларни ўрганиш, тарихий воқеалар ҳамда буюк шахслар ҳәётидаги даврлар синовидан ўтган, машхур тарихий сиймоларнинг бадиий адабиётдаги образини тадқиқ этиш адабиётшунослик фанининг долзарб вазифаларидан саналади. Бинобарин, Амир Темур образини тарихий ҳақықат нұктаи назаридан ўрганиб, уни бадиий талқин этишда ижодкорлар еришган ютуқларни таҳлил қилиш ҳам адаби жараён ривожи билан боғлиқ мұхым хуласалар беради.

Мустақиллик берган имкониятлар туфайли, ўзбек адабиёттида Амир Темур образини яратышга алохидა эътибор билан қаралмоқда. Хусусан, бу борада, ҳикоя жанрида асарлар ҳам бунга ёрқин далилдір. Мисол тарзида мурожаат қилағынан бўлсак, атоқли адиб Асқад Мухторнинг “Инсонга қуллуқ киладурмен” ҳикоясининг композицияси жаҳонгир Амир Темур ва оддий нағмасоз Айри Кўбуз ўртасидаги мубоҳасага асосланади. Албатта, бу кичкинагина асарда Амир Темур характеристерининг барча қырралари ёрқин ва тиник очилиши қийин. Аммо ёзувчи Амир Темур характеристерини катта маҳорат билан яратади. Ёзувчи талқинидаги Амир Темур сиймоси тарихий ҳақықатта, ниҳоятда, яқин. Ижодкор Амир Темур ҳәётининг ҳар бир лаҳзасини китобхон кўз ўнгига намоён этиш учун шундай рамзий белгилар топадики, улар асносида, яъни, Айри Кўбуз наволаридан рамзий белгилар орқали ўз қаҳрамонлари тимсолини акс эттиради. Белгилар орқали қаҳрамонлар дунёсида пайдо бўладиган образлар мантигини мажозий равишда тасвирлаб кўяди.

Амир Темур билан Айри Кўбуз ўртасидаги мубоҳасадан кўзда тутилған мақсад шуки, бунда, Амир Темурнинг тарих олдидаги хизматлари, марказлашган давлат тузганлиги, гўдаклиги ҳақидаги афсоналарга бўлған муносабат ярқ этиб кўзга ташланади. Таҳлил учун сұхбатдош Айри Кўбузнинг қуидаги доно фикрларига эътибор қаратдик: “Барибир, эл, Амир Темур Аллоҳ таолонинг баргузидасидур, дерлар. Зоро, Зуҳал ила Муштарий буржида таваллуд топибсенким, Аллоҳи муборак еру кўкни шул соатда яратмишдир. Нужумотнинг бу ҳолати ҳар саккиз юз йиллиқда бир келурким, аларнинг чехрасида нури илоҳий зуҳур ўлғай. Аввало, Искандари Зулқарнайн, андин сўнгра, Мұхаммад Алайхиссаломувасаллам ва дағи сен, қиблагоҳ”.

Оддий нағмасоз билан Амир Темур сұхбати орқали ёзувчи ҳаёт фалсафасини кўрсатмоқчи бўлған. Айри Кўбуз оламда барча нарса оміхта, дейди. Амир Темур қарашларида бурилиш ясаган тунги наволар ҳам олам сеҳрига оміхта, дейилади. Амир Темурни бир вақтлар шафқатсиз, тошюර, жаллод, қонхўр, деб, жар солғанларга, жавоб тариқасида, ёзувчи қуидаги ишонарли деталдан моҳирона фойдаланган: “Мана, сен жанг олдидан Қуръони масжиддан варақ очиб, оят ўкурсан, – деб давом этди Айри Кўбуз, – менинг ҳаётим сени тааммулга солур. Қариялар сўзидин бу ҳолга тушдинг. Инчунин, бағритош эмассен. Менга шу керак. Бир умр жони ҳузур-ҳаловат кўрмай, жанг жадал, қонли қиронлардан дийдаю бағри тош қотган бу инсоннинг кўнглини сал бўлса ҳам юмшатиш ният эди бу девонага. Жаҳонгирларга бош эгмадим, инсонга қуллуқ қилурмен, деди, шоир”.

Ёзувчи Амир Темур характеристига бермоқчи бўлған тавсифни

Айри Қўбуз ўз тили билан ифода қиласди. Айри Қўбуз ҳатто ўз ўлимини Амир Темурни бир гунохдан асраб қолди, дейди. Бу билан Амир Темур шахсининг буюклигини келажак авлодга кўрсатмоқчи бўлади. Бахши ички дунёси билан ҳикоядаги Амир Темур характеристи орасидаги тафовут унчалик катта эмас. Айри Қўбузнинг сўнгги сўзларидан: “Кўп жаҳонгирларни кўрдим, аммо мен уларга бўйсунмайман. Қайга борсам, ўзимдан иложи борича яхши ном қолдиришга ҳаракат қиласман. Жаҳонгирга эмас, инсонга қуллук қиладурмен”, деган маъно англашилди. Воқеалар ривожи давомида Айри Қўбуз ҳарактерида кўркинч, ҳайрат, шаддодлик хислатлари намоён бўлади. Айри Қўбузнинг сўнгги сўзларини эслаган Амир Темур ундан хаёлан нимани яшириб кетдинг, деб сўрайди. Айри Қўбуз олдинда уни ажал кутаётганлигини каромат қила олмаганини сезади. Бу билан ёзувчи охир-оқибат улуғлар, даҳолар жойи ҳам бир сиқим тупроқ бўлажагини, шу боис, умрни бекор ўтказмай, инсонни ўзидан бирон-бир из қолдиришга чақирмоқчи бўлади.

Амир Темур образи яратилган ҳикоялар орасида Урфон Отажоннинг “Хумоюн қабул” ҳикояси ҳам алоҳида ўринни эгаллайди. Айниқса, асарда Ҳофиз билан Амир Темур учрашуви назокат билан чизилган:

“ – Сиз мадҳ этмиш Самарқанд мевалари Шероз мевалари каби бафоят тотлидир, – дея сўз бошлади Амир Темур Ҳофизга қараб. – Мавлоно, мен икки кун шаҳарни сайр қилдим, аммо ғазалларингизда васф қилинмиш Шерозни кўрмадим.

– Амирим! Ул ғазал ёзилган даврда Шероз дилкушо эрди, бунга кўп йиллар бўлди, – маъюс жавоб берди Ҳофиз”.

Суҳбат асносида, Амир Темур Ҳофиз ғазалларидаги айрим куфр ўринларга урғу беради, буюк шоир уларни тасаввифий мазмунда эканини айтиб, ўз талқинини баён қиласди. Нихоят, сўз Ҳофизнинг машҳур ғазалидаги Самарканду Бухорога кўчади:

“ – Мавлоно, – Ҳофизга мурожаат қилди Соҳибқирон. – Сизнинг бул ғазалда ёдга олганингиз Самарканду Бухорога таклиф қилурман. У ерларнинг гўзларни, олий иморатларини ўз кўзингиз ила кўрурсиз...

– Ташаккур, амирим! Қарип қолдим, хастаҳолмен. Узок сафарга чиқмоғим мушкулдур. Йигитлик чоғларимда Бухоро ва Самарқандни, Шошин кўрмоқ орзуим бор эди. Афсус, боролмадим. Энди эса қарилек оёқларимга киshan бўлмиш.

– Пирим Зайниддин Тойободий Сизни Шоҳ Шужоъ таъқибидан қуткармишлар. Аммо ашъорингиз мафтункор ва шириндор, мавлоно. На илож ихтиёр Сизда, – деди Амир Темур”.

Ҳофиз Амир Темурнинг ранжиганини сезади ва ўзи китобат қилган Ҳусрав Дехлавий “Хамса”сини унга совға қиласди.

Амир Темур ғоят лутфкорлик билан Ҳофизга унинг янглишганини эслатади. Урфон Отажон томонидан акс эттирилган ушбу тасвирда инглиз адабаси Хильда Ҳекхэм келтирган истеҳзо йўқ.

Лекин инглиз адабаси Хильда Ҳекхэмнинг “Етти иқлум сultonни” асарида, айнан, шу тасвир юкорида айтганимиздек, бошқача йўсунда акс эттирилади. Муаллиф икки машҳур тарихий шахс ўртасидаги ривоятларга айланган мулоқотни айнан келтирган: “Айтишларига қараганда, Темур шоирни ўз ҳузурига чақирибида-да, ғазаб билан дебди: “Мен дориссалтанат Самарканд билан Бухорони обод килмоқ учун Ер куррасининг талайгина қисмини фатҳ қилдим, минглаб шаҳарларни ва ўлкаларни вайронага айлантиридим, сен нобакор бўлсанз, ўшал Шерозлик жононнинг биттагина холига бу шаҳарларни баҳш этадиган бўлдингми?”

Хильда Ҳекхэм Амир Темурнинг кечиримли бўлишилигини, айни, Ҳофиз билан бўлган сұхбатида эмас, балки, Тўхтамиш билан боғлиқ муносабатларида кўрсатади: “Соҳибқирон Ўрусхонга қарши курашда ўз тарафида Оқ Ўрда аслзодаларидан иттифоқни пайдо бўлганидан фақат қувонди, албатта. Зеро, Ўрусхон сиёсий мухолиф бўлишдан ташқари ўз ҳузурига қочиб борган исёнчи жалойирларга ҳам бошпана берган эди. Темур Тўхтамишини худди ўз ўғлидай кутиб олди. У шаҳзодага олтин буюмлар, қимматбаҳо совғалар, отлар, қурол-аслаҳа, фахрли либослар, заррин камарлар, бебаҳо тақинчоқлар, туялар, ўтов ва чодирлар, куллар инъом этди. Мовароуннаҳрнинг Оқ Ўрдага туташган сарҳадидаги Ўтрор ва Сигноқ Тўхтамишга ҳадя этилиб, унинг ихтиёрига лашкар ҳам берилди. Тўхтамиш бир неча бор Ўрусхонга ҳужум қилиб кўрди, аммо ҳар гал мағлубиятга учради. Лекин Темур ҳар бир меваффақиятсизликдан сўнг, бу тутинган ўғли ихтиёрига яна янги-янги лашкар берар ва янада кўпроқ совға-саломлар инъом этарди”.

Кўринадики, адабиётда энг кичик жанрлардан бири саналмиш ҳикояда Амир Темур образининг бутун қирраларини ёритиб бериш мушкул. Юқорида қайд этилган ҳикояларда Амир Темур образининг маълум бир жиҳати ёритилганлиги мухим. Ва, бу жиҳат мазкур жанрда давом этиши, табиий.

## Ёднома



### **Рахматулла БАРАКАЕВ**

1954 йилда туғилган. Низомий номидаги Тошкент Давлат педагогика институтини тугатган. Унинг “Боболардан болаларга”, “Жонажоним, шеърият”, “Абдулла Авлоний ва ўзбек болалар адабиёти” ҳаммуалифликдаги, “Тошкент шоурлари” номли монография ва риссолалари чоп этилган. Ҳозирда ЎзФА Алишер Навоий номидаги Тил ва адабиёт институтида ишиламоқда. Филология фанлари номзоди.

## **ЗАФАР ДИЁРНИНГ ЗАФАРИ ИЖОДИ**

Умумадабиёттинг ажралмас қисми бўлган болалар адабиёти оналарнинг болаларига айтган аллаларидан, болаларнинг ақл-заковатини шакллантиришга хизмат қиласидан тез айтишлару топишмоқлардан бошлаб, оғзаки ижод намуналаридан ўзига хос ёзма адабиёт сифатида шоёнлик топди. Ўтган асрнинг ўттизинчи йиллари эса болалар адабиётимизнинг том маънодаги шаклланиш даври бўлди.

Зафар Диёр ана шу давр болалар адабиётининг ўзига хос саҳифаларини яратган ижодкор эди. У бор-йўғи ўттиз тўрт йил умр кўрган, йигирма йилга етар-етмас ижод қиласа-да, шу қисқа давр мобайнида истеъоддли шоир, носир, драматург сифатида болалар адабиётимизда ўз ўрнига эга бўлди.

Зафар Диёрнинг ижодий йўли ўтган асрнинг ўттизинчи-қирқинчи йилларига тўғри келади. Бу давр адабиёти ҳақида фикр юритганда, аввало, бадиий адабиёт тўлалигича шўро сиёсати манфаатларига бўйсундирилганини қайд этиш жоиз. Ижодкорлар хоҳиш-истакларидан қатъий назар, ҳалқ ҳўжалигининг барча соҳаларидағи ютуқлар, илм-фан, маданият ва маърифат соҳаларидағи ижобий натижаларни шўролар тузумининг афзалликлари сифатида мадҳ этишга мажбур эдилар. Зафар Диёр ижоди ҳам бундан мустасно эмас. Бироқ, ҳар бир ижодкор асарлари орасида том маънодаги бадиияти, самимияти, бадиий адабиёттинг эстетик-маърифий моҳияти биринчи ўринга кўйилганилиги билан ажралиб турадиган асарлар бўладики, улар даврлар бўхронидан ўтиб, китобхонларни инсоний фазилатлар руҳида тарбиялашга, умрбоқий қадриятларни куйлашга хизмат қиласеради. Зафар Диёр ижодида ҳам шундай асарлар оз эмас. Уларда ота-боболаримизнинг яратувчилик меҳнатини мадҳ этиш, ёш авлодни оталар ишига садоқат руҳида тарбиялаш манфаатлари етакчи мавқе касб этади. Жумладан, “Пўлат қанотлар”, “Лола”, “Парвознома”, “Қаҳрамоннинг ўлими” шеърлари қаҳрамонлик ҳақидаги энг яхши, ғоявий-бадиий пухта шеърлардан ҳисобланса, “Китоб, менинг дўстимсан!”, “Биринчи қадам”, “Лагерь қўшиғи”, “Богчамиз”, “Сентябрь қўшиғи” шеърлари ёш авлодни илм-маърифат нуридан баҳраманд бўлиш сари етаклашга хизмат қиласиди.

“Богчамиз”, “Биринчи сентябрь”, “Сентябрь қўшиғи”, “Биринчи қадам” шеърлари боғчадан илк бора мактаб сари йўл олаётган болалар тилидан ёзилган. Уларда мактаб ва ўкув куролларига муҳаббат, савод ўрганиш қувончи ва бир ёш улғайиш масъулияти ўз аксини топган. “Лагерь қўшиғи” ва “Каникул кунлари” шеърларида эса ёзги таътилда оромгоҳлар қучоғида ўйнаб-кулиб дам олган, янги куч-ғайратга тўлиб, қадрдон мактаби сари ошиқаётган ўқувчиларнинг қувончлари акс этган.

Ўша шеърлардан бирига сиз ҳам назар солинг:

**Яшна, Ватан,  
 Жон Ватан,  
 Сенга шараф-шон Ватан!  
 Сенсан –  
 Бизнинг онамиз,  
 Ҳадя сенга жон ва тан!**

Шоирнинг “Ватан” деб номланган ушбу шеъри Иккинчи жаҳон уруши йилларида ёзилган. Маълумки, ҳар бир даврнинг ўз етакчи мавзулари бўлади. Бу мавзуларда яратилган асарлар қиммати эса, аввало, конкрет давр воқелигини қай даражада жонлантира олганини билан ўлчанади. Шу маънода, Иккинчи жаҳон уруши даврининг асосий мавзуси – Ватан мадҳидир. Инчунин, шу даврда яратилган Ватан мавзуидаги ёзувларда вояга етаётган ёш авлодни туғилиб-ўсланган, киндик қони тўкилган она тупроққа садоқат руҳида тарбиялаш, унинг ҳар бир қаричини қадрлашга ўргатиш руҳи устуворлик қиласи.

Бироқ, Ватан мавзуси Зафар Диёр ижодига уруш муносабати билангина кириб келган тасодифий мавзу эмас. Унинг “Серкуёш ўлка”, “Ўзбекистон” сингари шеърлари ҳам юртимизнинг умумлашма поэтик тимсолини яратишга бағишлиланган. Бундан ташқари, шоирнинг ўттизинчи йилларда битилган бир қатор шеърларида диёrimiz гўзалликларини бутун оламга кўз-кўз қилган, ёш авлодни Ватанни янада яшнатиш учун яратувчилик меҳнати сари чорлаган йил фасллари Ватан гўзаллиги билан ҳамоҳанг тасвирланади. Табиат ва ҳайвонот дунёси тасвирида ҳам ўзгача бир меҳр барқ уриб туради. “Январда”, “Арча қўшиғи”, “Баҳор келди, ўртоқлар”, “Гунафша”, “Қушлар қўшиғи”, “Қанотли дўстлар” сингари шеър ва қўшиқлар шулар жумласидандир.

Шоирнинг “Арча қўшиғи” шеърида янги йил арчаси атрофида қувнаб ўйнаётган болалар шодлиги, хурсандчилиги тараннум этилади. Шуну ҳам айтиш жоизки, мазкур шеър ўзбек адабиётидаги арча байрами, янги йил арчаси тасвирига бағишлиланган илк асарлардандир. Шеър болалар тилидан ёзилган бўлиб, уларнинг баҳт, қувонч қўшиғи каби янграйди:

**Чаман-чаман боғларнинг,  
 Бизлар жамбил, райҳони.  
 Бизнинг қувноқ қўшиқлар,  
 Жаранглатар ҳар ённи.**

Дарҳақиқат, фарзандларимиз “чаман боғ”нинг обод Ватанимизнинг энг гўзал ва сўлмас гуллари “жамбил, райҳон”ларидирлар. Фақат уларгина “қувноқ қўшиқлар” айтиб, “ҳар ённи жаранглатиб”, баҳти ёшликни мадҳ этишлари мумкин. Ушбу фаҳриянинг болалар тилидан айтилиши ва “жамбил, райҳон” сингари тақрорланмас ўхшатишлар эса шеърнинг самимияти ва ғоявий-эстетик аҳамиятини янада оширган, ёш китобхонга тўла етиб боришини таъминлаган. Бу фикр “Баҳор” шеърида янада ёрқинлаштирилган. Гул Ватан, гулзор Ватан баҳорда янада кўрк очиши, унинг фарзандлари гулу булбуллари эркинликни, баҳт-саодатни куйлаши шеърнинг бошидан охиригача қизил ип бўлиб ўтади:

**Яна гулга  
 Тўлгай Ватан,  
 Биз қўйнида яраймиз;  
 Гул новдага  
 Кўниб турган  
 Булбул каби сайраймиз...  
 Биз шу кўркам  
 Гулбаҳорнинг  
 Гўзал асл гуллари!**

Шу руҳ табиат гўзалликларини Ватан гўзаллиги билан боғлаб тасвирлаш шоирнинг ушбу мавзудаги деярли барча шеърларига хос бўлган хусусиятлардир. Мазкур шеърда ҳам ёш боланинг ўсиб-униб келаётган беғубор гулга, Ватаннинг ушбу гуллар билан янада чирий очган гулзорга, фарзандларимизнинг Ватан гўзалликларини куйлашдан чарчамайдиган

булбулга ўхшатилиши тўла маънода ўзини оқлаган, шеър бадииятини оширишга хизмат қилган.

Шунингдек, Зафар Диёрнинг ҳайвон ва паррандаларга бағишлиланган шеърларида ҳам шунга ўхшаш икки мақсад кўзга ташланади. Уларнинг биринчиси, болаларга ҳайвон ёхуд паррандаларнинг ўзига хосликлари ҳақида маълумот бериш бўлса; иккинчиси, болаларни табиат ва ҳайвонот дунёсига меҳрибонликка, уларни авайлаб-асрасш ва кўпайтириш ҳамда қадрдонлашишга ундашdir. Ҳар иккала мақсад ҳам аслида тарбияга бориб тақалади. Тарбиянинг куруқдан-куруқ панд-насиҳат тарзида эмас, балки гўзал бадиий шаклга солинган шеър тарзида берилиши мақсадга тезроқ етказишини ва ёш китобхоннинг бадиий дидини ҳам чархлашини истеъодди санъаткор тўғри англаган ва асарларида буни акс эттирган.

Болалар адабиёти бир вақтнинг ўзида ҳам эстетик, ҳам маърифий аҳамият касб этар экан, у ёш авлодни илм-фан нуридан баҳраманд қилиш орқали маънавий камолотга етказиш сираларига ҳам масъулдир. Болалар шеъриятимизда ушбу мавзудаги асарлар етакчилик қилиши ҳам шу боисдандир. Бу асарларда илм-маърифат таърифланади, унга эҳтиромлар билдирилади. Улар орасида Зафар Диёрнинг “Китоб, менинг дўстимсан!” номли шеъри алоҳида ўрин тутади. Шеър бола тилидан ҳикоя қилиниши, чуқур самимияти ва ўйноқилиги, равонлиги ва мусикийлиги билан ажралиб туради. Зеро:

*Гулшан аро мен ила  
Сұхбатларинг чиройлик,  
Қатта-кичик эл аро*

Улфатларинг чиройлик, – дейиш, фақат китобга ўртоқ бўла олган болагагина хосдир. Ҳар бир тўртлиқдан сўнг такрорланувчи:

*Шунинг учун дейманки,*

*Китоб, менинг дўстимсан!* – нақароти эса шеър оҳангини янада мусикийлаштирган, китоб яхши сифатлар жамулжами эканлиги таъкидини мантикий асослаган. Ушбу шеърдаги жонлантириш санъати (китоб билан сұхбат) шеър бадииятига кўрк бўлиб тушганки, бу бадиият унсурлари бирлашиб, шоир ижодиётини гўзал гуллардан сараланган сархил гулдастага ўхшатишга асос бўлади.

Зафар Диёрнинг ўттизинчи йиллар ижодиётida ҳажвий ва аллегорик тарздаги дидактикастарлар ҳам алоҳида ўрин тутади. Бунда, аввало, юмор ва мажозийликда болалар адабиётининг баъзи ўзига хосликлари намоён бўлишининг таъсири кўринади. Шунингдек, ҳажвнинг тарбияда катта ўрин тутиши ҳам ижодкорларни улардан унумли фойдаланишга ундаган бўлиши табиий бир ҳолдир. Шоирнинг “Зарар эмасми?” шеъри бу мавзудаги ёзувлар орасида ажралиб туради. Унда болалар кувноқ кулги билан тоза-озода юришга, шахсий гигиенага амал қилишга ўргатилади ва ўз камчиликларини тузатишига ундалади.

Иккинчи жаҳон уруши даврида шеърият болалар адабиётининг етакчи жанри сифатида болалар руҳий дунёсини чуқур ифодалай олди. Зафар Диёр бу йилларда “Бизнинг куролимиз” (1941), “Бизнинг оила” (1942), “Совға” (1944) сингари шеърий тўпламларни яратди. Бу тўпламлардаги келажакка ишонч руҳи билан суғорилган қатор шеърларда тасвирдаги лиризм кучайиб, бола қалбининг катта воқеаларга муносабатини аниқ акс эттира олиш даражасига кўтарилид. Бу давр шоир ижодининг юлдузли, энг сермаҳсул ва камолотга эришган даври бўлди.

Зафар Диёр қисқа умр кўрган бўлса-да, унинг ёш авлод шахсиятини шакллантиришга хизмат қиладиган аксарият ёзувлари бугунги кунда ҳам ўзбек болалар адабиётининг энг гўзал саҳифаларини ташкил қиласди.

Истиқлол шарофати билан миллий, маданий, адабий қадриятларимиз тикланаётган, ёш авлодни ота-боболаримизнинг энг яхши фазилатлари руҳида тарбиялаш имкониятларига кенг йўл очилган бугунги кунда, ўзининг самимий ва беғубор шеъру достонлари билан ҳалқимиз қалбидан жой олган шоир – Зафар Диёрнинг ижод йўлига яна бир карра назар ташлаш “яхши қўшнидан сўрагандан кўра, ёмон уйимииздан ахтариш”нинг ўзига хос моҳият касб этишини тасдиқлади. Шу маънода, Зафар Диёр асарлари бугунги кунда ҳам, эртага ҳам фарзандларимизни, шоирнинг ўзи бир шеърида таъкидлаганидай: “ўзбек ўғли ёр ўғли, асл ботир ўғли”, бўлиш руҳида тарбиялашга астойдил хизмат қилаверади.

# АБАДИЯТГА АЙЛАНГАН ЛАҲЗА

**Эссе**

\*\*\*

“Вақт жуда шафқатсиз. Унинг ўз қонунлари бор. Тарих тарозисига бир солиб кўринг-чи, инсон умри бир киприк қоқкудек лаҳзага тўғри келармикин? Лекин ҳикмат шундаки, инсон ўша бир киприк қоқкудек лаҳза – умрни абадиятга айлантира олади...” Бу фикрлар эгасининг номи ортиқча изоҳга муҳтож эмас. Жуссаси ихчам бўлишига қарамай, ҳайбати, салобати кучли эди унинг. Қошларини чимирганда, шогирдлари тугул, ҳамкаслари ҳам ботиниб сўз дейиши маҳол бўлган бу олимни Тошкентдан Қозонгача, ундан олис Оврупогача адабиёт билан шуғулланган ҳар бир мутахассис яхши билар эди ва бугун ҳам яқдил эътироф этадилар. Асарлари дунёнинг уч қитъасидаги ўн бир мамлакатда чоп этилганию бир неча ҳалқаро академиялар аъзоси бўлгани ҳам бунинг далилидир.

Устоз адабиётшунос Бегали Қосимов чин маънода ватанпарвар эди – танпарварлик билан муроса қилаолмас эди. Ҳақиқий миллатпарвар эди – миллий адабиёт ривожига борлигини бағишлилаганинг сабаби шунда. Бу фазилатлар унга бутун интеллектуал салоҳиятини баҳшида этгани – маърифатпарвар жадидлардан юқсан бўлса, ажаб эмас. Бинобарин, у зоҳирда ҳам, ботинда ҳам ўтган аср аввалида фаолият кўрсатган маърифатпарварларга ўхшаб кетарди. Ўзбекистон Қаҳрамони Озод Шарафиддинов уни: “Сўнгги жадид”, деб атагани бежизмас.

\*\*\*

Ватанга муҳаббат киндик қони тўқилган жойга муҳаббатдан бошланади. Қашқадарё воҳасининг Денов қишлоғида вояга етган Бегали Қосимов ўзи туғилиб, ўсган юрт тарихини жуда чуқур билар эди. Бу ерлардан Касбавий, Паздавий тахаллусли ўнлаб, юзлаб олиму уламолар, шоиру удаболар етишиб чиққанидан фахрланарди. Болалиқдаги орзуси улар сингари олим бўлмоқ эди. “Бир вақтлар, Касби – бу нима дегани экан, деб қизиқкан эдим, – дея хотирлайди олим. – Машхур маърифатпарвар аллома Заки Валидийнинг ёзишича, касбийлар Ўрта Осиёда яшаган энг қадимги ҳалқлардан бирининг номи экан. Қизиқ, наҳотки, Ўрта Осиёнинг дунёга маълум бўлган илк қавмларидан бирининг номи шу ер билан боғлиқ бўлса? Шулардан чамалаб айтаманки, атрофимиздаги тепаларда сир-синоат кўп... Европа олимлари ҳам, Шарқ олимлари ҳам Касби ўз даврида Қаршидан катта бўлганини айтадилар. Масалан, академик Бартольднинг ёзишича, бу жойлар сувнинг энг қуий оқимида жойлашгани учун ҳам обод, овга бой эди. Бобур мирзо ўзининг “Бобурнома” асарида бу атрофда “мурғаки Қарши” деб аталган қушлар кўплигини айтади”.



**Нурбой  
ЖАББОРОВ**

1966 йилда туғилган.  
1990 йили Тошкент  
Давлат университети  
ўзбек филологияси  
факультетини  
битирган. Филология  
факултети доктори,  
профессор. “Шуҳрат”  
медали билан  
тақдирланган. Ҳозирги  
кунда Ўзбекистон  
Миллий университети  
ўзбек филологияси  
факультети декани.

Бегали Қосимов киндиқ қони томган юрт үтмиши, бу ерда яшаган эл кечмиши ҳақида чуқур билимга эга эди. Қисматини шу замин, унинг бугуни ва эртаси билан чамбарчас боғлиқ деб ҳисоблаган, элдошлари қувончини ўз қувончи, улар ғамини ўз ғами дея ҳис этган ватанпарвар зиёли эди у. Мозийга бу қадар қизиқани сабабини, назаримда, шунинг билан изоҳлаш мумкин. Устоз Озод Шарафиддиновнинг мана бу эътирофи ҳам фикримизни тасдиқлайди: “Суҳбатдошимга яна бир бор қойил қолдим – мен унинг билимдонлигини билар эдим, аммо ўз қишлоғини, унинг тарихини, қадриятларини бу қадар эъзозлашини билмас эдим. Демак, унинг ёшлик йиллари шунчаки ўйинқароқлик билан ўтмаган экан. Бегали болалик кезлариданоқ синчков, ҳар нарсага қизиқадиган, ҳар нарсанни таг-туги билан чуқур билиб олишга интиладиган одам бўлиб ўғсан экан”.



Отаси – Абулқосим Мұхаммадмурод ўғли ҳам эскичадан, ҳам янгичадан хабардор, мадраса кўрган, ўқимишти киши бўлган. Олимнинг хотирлашича, касб-хунарга лаёқати баланд бўлиб, чорвачилик, дехқончилик, ҳатто дурадгорлик бобида ҳам ушбу касб-кор эгаларидан қолишмаган. Шеъриятни, сўзни, сўз маъносини чақиши яхши кўрган. Шеър машқ қилган. 30-йилларнинг касри билан икки маротаба қамалган. Олим отасининг қамоқда ёзган шеърларини ҳозирги имлага кўчириб, укаларига тарқатгани ҳақида ёзган эди. Маълум бўладики, адабиётга, сўз санъатига меҳр Бегали акага қондан ўтган.

Онаси – Ҳимматой ая, устознинг таърифика, битмас-туганмас хазина бўлган. Эртаклару кўшиқларни яхши билган. Ҳаддан ташқари кўнгилчан, фарзандларига беҳад меҳрибон бўлган. “Кўнгиллари титраган симобдай қалқиб турад эди”, деб эслайди олим.

Бегали Қосимов ана шундай оиласи мухитда вояга етган. Бу мухитдаги тарбия унинг илмдаги камолотида бош омил бўлганини тасаввур этиш мумкин.

\* \* \*

Курсдошлари, тенгдошларининг эътирофича, Бегали ака талабалик йилларида ҳам вақтни қадрлаган. Вақтни беҳуда юмушларга сарфламаган, исроф қилмаган.

Ўзбекистон Қаҳрамони, ҳалқ шоири Абдулла Орипов мана бундай хотирлайди: “Биз бирга ўқидик. Илм-ижод бобида баҳоли қудрат хизмат қилдик. Кечагидай ёдимда: биз у билан бирга олис Қашқадарёдан Тошкентга дорилғунунга ўқишига келдик. Кириш имтиҳонларини топшириб талаба бўлдик. Ҳеч эсимдан чиқмайди, Бегали билан иккаламиз ҳам жуссамиз кичик, нозик қадди-қоматли ўспиринлар эдик. Университетнинг ўша маҳалдаги ректори, улуғ олим, академик Обид Содиков бизларга: “Болаларим, тагин бир йил ўзларингни жисмоний чиниқтириб келсаларинг яхши бўларди, ҳали жудаям кичкина экансизлар”, деганлари ҳамон ёдимда. Биз эса: “Йўқ, домла, биз ўқигани келдик, ўқишига қурбимиз, қувватимиз етади”, деб туриб олганмиз. Хуллас, мана шу тарзда Тошкентдай шаҳри азимда ижара уйларда туриб, иссик-совуқ кунларни биргалиқда бошдан кечириб ўқидик, таълим олдик... Бегали курсимиздаги энг пешқадам, энг зийрак, зеҳни ўтқир талабалардан эди”.

Барча фанлардан намунали ўқиган Бегали Қосимов адабиёт тарихига, айниқса, қизиқиши катта эканини намоён этади. Профессор Ғулом Каримовдай талабчан устознинг назарига тушиб, талабалик йиллари ёқ, унинг яқин шогирдига айланади. Миллатимиз тарихидаги ёрқин ҳаракатчилик бўлган жадидчиликни ўрганиш у кезлари бениҳоя хатарли бўлган. Шунга қарамай, устоз Ғулом Каримов ёш шогирдини ана шу мураккаб мавзуни ўрганишга йўналтириди.

Бу ҳаракат ўша давр Туркистон ижтимоий турмушининг барча жабҳаларини қамраб олган эди. Мазкур даврда юзага чиққан на сиёсий, на маданий бирор ҳодиса

йўқки, жадидчиликнинг таъсир доирасидан четда қолган бўлсин. Табиийки, бундай кенг миқёс касб этган, Ватан ва миллатнинг нурли истиқболи учун курашни бош мақсади қилиб олган ҳаракатни шўролар замонида ўз номи билан ҳаққоний ўрганиш имконсиз эди. Шу боис, жадидчиликни ўрганиш мураккаб ва зиддиятли жараённи бошдан кечирди. Ўша замонда, ўз даврининг энг пешқадам ҳодисаси деб баҳоланганд жадидчилик, ўтган аср 20-йиллари иккинчи ярмидан буржуа идеалогияси сифатида қораланди, бу ҳаракат ва унинг намояндаларини авлодлар қалбидан ўчиришга зўр берилди. Бироқ миллат фидойи фарзандларини унутмади. 1956 йили ижтимоий ҳётда озгина илиқлиқ пайдо бўлиши биланоқ, зоҳирда қоралаб бўлса-да, жадидчилик ўрганила бошланди. 1985-1991 йиллари бу ҳаракатни холис ва ҳаққоний ўрганиш масаласи кун тартибига қатъий қўйилган бўлса, миллатнинг мустақилликка эришиши уни ўрганишни янги босқичга кўтарди. Бунда бутун интеллектуал салоҳиятини, иқтидорини жадидчилик ва жадид адабиётини тадқиқ этишга сафарбар қилган фидойи олим Бегали Қосимовнинг ўрни алоҳида.

\* \* \*

Бугун мамлакатимиз ва хориждаги бу соҳа мутахассислари яқдил эътироф эта-дилар: жадидчилик ва жадид адабиётини ўрганиш бўйича илмий мактаб Ўзбекистон Миллий университетида яратилди ва унинг асосчиси Ўзбекистон Республикаси фан арбоби, филология фанлари доктори, профессор Бегали Қосимовдир. Устоз Озод Шарафиддинов таъбири билан айтганда: “Бутун Ўзбекистондаги миллий уйғониш даврини, унинг адабиётини ўрганишни истаган ёшлар Бегали атрофида уюша бошлади, бутун бир илмий мактаб шаклланди”.

Бу илмий мактаб жадидчилик ва жадид адабиётини ўрганиш бўйича ўзига хос тадқиқот тамоийларига, анъаналарига эга. Жадидчилик ва жадид адабиёти илмий мактаби ўзбек адабиёти тарихини тадқиқ этиш бўйича профессор Фулом Каримов асос соглан илмий мактаб негизида шаклланди. Бегали Қосимов устози Фулом Каримов раҳбарлигида шўролар замонидаги чекловларга қарамай, жадидчиликнинг етук намояндаси – Мирмуҳсин Шермуҳамедов ҳаёти ва ижоди бўйича номзодлик диссертациясини ёқлади. Ўша кезлари, табиийки, жадид адабиётини ўз номи билан, асл ҳолича ўрганиш имкони ўйқ эди. Бироқ фидойилик, мақсад йўлида қатъият бўлса, имкон топи-лар экан. Миллий уйғониш даври ўзбек адабиёти “инқилобий адабиёт” истилоҳи билан тадқиқ қилина бошлади. Зоро, замон беҳад мураккаб ва зиддиятли эди. Миллатнинг неки фазилати бўлса, унинг ҳаётидаги нимаики ёруғ нарса бўлса, инқилоб шарофатига йўйилар эди. Бу истилоҳ эса, жадид адабиётини ўрганишда янгидан-янги имкониятлар эшигини очди.

Бегали Қосимов ана шу ном остида докторлик диссертациясини ҳимоя қилди, “Излай-излай топганим” монографиясини яратди. Бу монография жадидчиликни ўрганишда янги босқични бошлаб берди дейилса, асло, муболага бўлмас. Шўролар замонида XX аср бошлари ўзбек адабиёти атиги тўрт ижодкордан – Ҳамза, Айний, Завқий ва Аваз Утардангина иборат қилиб қўйилгани эътиборга олинса, мазкур монографияда юзга яқин ижодкор номи тиклангани, улар ҳақидаги илмий ҳақиқатлар юзага чиққани нечоғлиқ аҳамиятли экани аён бўлади.

Миллий истиқлол жадидчилик ва жадид адабиётини, наинки, ўз номи билан ўрганиш имконини берди, бу соҳада илмий мактаб яратилиши учун ҳам мустаҳкам за-мин ҳозирлади. Натижада, профессор Бегали Қосимов раҳбарлигидаги бу илмий мактаб қуйидаги муҳим натижаларни кўлга киритди:

Биринчидан, “Миллий уйғониш даври ўзбек адабиёти” истилоҳи илмий муомалага олиб кирилди. Бу давр адабиёти миллий маданиятимиз тараққиётининг ўзига хос дав-ри экани хужжатлар асосида далилланди. XIX асрнинг иккинчи ярми – XX аср бошлари ижтимоий ва адабий ҳаракатчилиги ҳар бир босқичининг хос хусусиятларидан келиб чиқиб даврлаштирилди.

Иккинчидан, 1993 йили профессор Бегали Қосимов ташабbusи билан Тошкент Давлат университетида “Миллий уйғониш даври ўзбек адабиёти” кафедраси ташкил этилди. Кафедра қисқа муддатда, шу давр адабиётини тадқиқ этиш бўйича, наин-ки, мамлакатимизда, ҳатто хорижда ҳам эътироф этилган илмий марказга айланди. Хориждаги кўплаб фан ва таълим муассасалари билан, жумладан, Германиянинг

Хұмбольдтлар университети билан яқындан алоқа үрнатилди. Профессор Бегали Қосимов Хұмбольдтлар университетида, немис олимаси Ингеборг Балдауф Миллий университет үзбек филологияси факультетида дарс ўтдилар. Турция Араштирма маркази ва Отатурк Култур маркази билан ҳамкорлик самарааси ўлароқ, олимларимиз томонидан Туркияда нашр этилган 33 жылдлық “Түрк дүнөсі адабиеті” қомусида үзбек адабиеті ҳақида 1000 дан ортиқ илмий мақолалар чоп этилди. Мазкур қомуснинг таҳрир ҳайъати аъзоси ва үзбек адабиети бўйича мутасаддиси, профессор Бегали Қосимов Араштирма марказининг муҳбир аъзоси, Отатурк Култур марказининг фахрий аъзоси этиб сайланган.

Олим раҳбарлигидаги кафедра, бундан ташқари, АҚШ, Франция, Россия, Қозогистондаги жадид адабиети билан шуғулланувчи олимлар ва илмий марказлар билан ҳамкорликда фаолият олиб борди. Профессорлар Бегали Қосимов, Шариф Юсупов, Улуғбек Долимов ва бошқа кафедра аъзоларининг илмий мақолалари мазкур мамлакатларнинг нуфузли нашрларида чоп этилди.

Бу илмий мактаб вакилларининг саъй-ҳаракати билан миллий уйғониш даври үзбек адабиётининг Мирмуҳсин Шермуҳамедов, Абдулла Авлоний, Беҳбудий, Фитрат, Чўлпон, Сиддиқий-Ажзий, Сидқий-Хондайликий, Мустафо Чўқай ўғли, Каримбек Камий, Тавалло, Ибрат, Ажзий, Сўғизода, Абдулҳамид Мажидий, Ҳожи Муъин, Вадуд Маҳмуд каби йигирмага яқин йирик намояндлари асарларини тадқиқ этиш, нашр қилиш ва оммалаштириш бўйича катта ишлар амалга оширилди. Бу ижодкорлар ҳаёти ва ижодий мероси бўйича номзодлик, докторлик диссертациялари химоя қилинди.

Бегали Қосимов раҳбарлигидаги жадидшунослик ва жадид адабиети илмий мактаби вакиллари үзбек миллий уйғониш адабиётининг йирик намояндлари асарларини оммалаштириш билангина чекланмади. Бу адиблар мероси ўрта ва олий мактаб дастурларига, дарслекларига киритилди. Профессор Бегали Қосимов “Миллий уйғониш” монографиясини яратди. Олим раҳбарлигига олий ўқув юртлари учун “Миллий уйғониш даври үзбек адабиети” дарслиги, бир қанча ўқув кўлланмалар чоп қилинди. “Ўзбек миллий уйғониш адабиети материаллари” сериясининг нашри йўлга кўйилди.

Ҳар қандай илмий мактаб анъаналари давом этган тақдирдагина чинакам илмий мактаб мақомини олиши мумкин. Бу илмий мактаб адабиётшунослик ва ёндош соҳаларда янги илмий йўналишларга ҳам замин вазифасини ўтади. Жадид адабиётшунослиги (Ҳ.Болтабоев, Б.Каримов, И.Фаниев, У.Жўракулов), жадид драмаси (Ш.Ризаев, У.Сайдов), жадид педагогикаси (У.Долимов), жадид матбуоти (Б.Дўстқораев, Ҳ.Сайдов), янгича маърифатпарварлик ва жадидчиллик (Н.Жабборов), жадид тарихшунослиги (С.Холбоев) сингари илмий йўналишлар шулар жумласидандир.

Жадид адабиети бўйича чет мамлакатлар учун ҳам мутахассислар тайёрлаб берилгани олим асос солган илмий мактабнинг халқаро эътирофига яна бир далиллар. 2002 йили туркиялик тадқиқотчи Фатма Ачик, 2008 йили хитойлик Турсун Курбон мазкур давр адабиети муаммолари юзасидан диссертация химоя қилдилар.

Мазкур далилларнинг ўзиёқ кўрсатиб турибиди, жадидчиллик ва жадид адабиётини ўрганиш бўйича профессор Бегали Қосимов асос солган илмий мактаб анъаналари муносиб давом эттирилмоқда.

\* \* \*

Бегали Қосимовнинг ёш олимлар үрнак олиши зарур бўлган фазилатлари кўп эди. Илмий ҳалоллик унинг учун эътиқод даражасига кўтарилганди. Асарларида, ҳатто ўзининг раҳбарлигига ёқланган диплом ишига ҳам ҳаволалар берилгани бунинг исботидир. Ваҳоланки, шогирдларининг ишини ўзлаштиришдан тап тортмайдиган, бу ҳам етмагандек, бошқаларнинг фикрини ҳам ўғирлайдиган “олим”лар камми? Устоз Бегали Қосимов бундан парҳез қиласиди.

Ўзининг илмий қарашларига зид бўлган фикрни, асосли бўлган тақдирда ҳам, қабул қила олиш – чинакам улуғ олимларгагина хос фазилат. Фақат илм майдонининг шери шогирднинг ана шундай хуласаларини эътироф этмоғи мумкин. Бегали Қосимов ана шундай олим эди. Биргина мисол. 1999 йили камина университет үзбек филологияси факультетида домла раҳбарлик қилаётган “Миллий уйғониш даври үзбек адабиети” кафедраси доценти сифатида иш бошладим. Факультет олимларининг анъ-

анавий йиллик илмий конференцияси ўтказиладиган бўлди. Каминанинг “Зокиржон Фурқат ижодида мустамлака сиёсатига муросасиз муносабат талқини” мавзууда маъруза қилишим режалаштирилди. Ростини айтсан, катта ҳаяжон билан келдим конференцияга. Гарчи анча-мунча янги маълумотлар аниқлаган, улар Фурқат ижоди ҳақидаги мавжуд қарашларни ўзгартириши мумкинлигини ҳис этсан ҳам, кўнгилда бир андиша бор эди. Бу фикрларимни устоз Бегали Қосимов қандай қабул қиласди? Ваҳоланки, ўша кезлари чоп этилган 10-синфлар учун “Ўзбек адабиёти” дарслигида домла Фурқат чор Россиясининг илм-фан ва техника ривожида эришган ютуқларига маҳлиё бўлиб, унинг мустамлака сиёсати моҳиятига етмаганини афсус билан таъкидлаб ёзган эди. Энди эса, бир шогирди бу фикрларнинг зиддини исботламоққа ҷоғланса-я?! Буни қабул қилиб бўладими?

Конференцияга келар эканман, хаёлим ана шундай ўйлар билан банд эди. Ниҳоят, маъруза учун каминага сўз берилди. Минг истиҳола билан фикрларимни баён этишга киришдим. Фурқатнинг “Муножоти мусаддас” асаридаги “куффор банди ичра сонсиз тугунда қолган” юртга ачиниб, “Бечоралар на қилсун бўлса сиёсати Рус”, тарзидаги исён руҳи билан сугорилган мисралари, “Бегим” радиофли ғазалида “Келди зоғу қолди булбуллар навосидан, бегим” сингари изтироблари, “Бўлди” радиофли мухаммасида “Ҳамани эмди кўз тутгони бир соҳибқирон бўлди” дея миллатни озодликка, ҳурриятга олиб чиқувчи йўлбошли зарурлиги ҳақидаги орзулари талқини хусусида сўзладим. Сўзлар эканман, устознинг “Бўлди, тўхтатинг энди”, дейишини кутаман. Бироқ...

Бироқ маъруза ниҳоясига етган сари, устознинг юзи ёришиб бораётганини сездим. Конференция сўнгига музокарада Бегали Қосимов: “Бугунги маърузалар ичida менга энг ёққани Фурқат ҳақидагиси бўлди. Мумтоз адабиётимиздан энг йирик беш ижодкорни ажратиш зарурати туғилса, шубҳасиз, улардан бири Фурқат бўлади. Узоқ йиллардан бўён мутахассис сифатида мени бир фикр изтиробга солиб келар эди: “Наҳотки, шундай улкан ижодкор мустамлака сиёсатининг моҳиятини англаб етмаган бўлса?” Шу боис яқин-яқингача шоир ҳақида худди шундай мулоҳазаларни ёзид келдик. Бугун мендаги ана шу иштибоҳ тарқади. Бу гапларни секин айтиб бўлмайди. Бу фикрларни бонг уриб айтиш керак. Токи, шоир ҳақидаги асл ҳақиқат юзага чиқсин”.

Тўғриси, ҳайратда қолдим. Жўссаси унчалик катта бўлмаган Бегали Қосимовнинг салобати менинг кўз ўнгимда бекиёс даражада катталашгандек туюлди. Унинг учун илмий ҳақиқат ҳамма нарсадан устун эканини билиб, устозга бўлган ҳурматим аввал гидан ҳам юз карра ошди. Одамнинг ҳаётида юлдузли онлар кўп ҳам бўлавермайди. Мен учун ўша кун ҳаётимнинг ана шундай нодир саҳифаларидан бўлиб қолди.

\* \* \*

2004 йил 25 сентябрь. Саҳар соат учлар эди чамамда. Кечқурун нима сабабдандир ўчиб қолган телефонимиз бирданига ишлаб қолди – совуқ жиринглади. Уйғониб кетдим: устоз Улуғбек Долимовнинг овози... Нима бўлганини англаёлмай, довдираб қолдим... Кейин эса машинаси бор танишларимдан бирига телефон қилиб, Бегали Қосимов вафот этганини, Қорақамишга боришимиз зарурлигини айтдим. Нозик бир жойга ошга боришини айтиб, узр сўради. Ҳайронлар қолдим. Наҳотки, Бегали Қосимовдай олим вафот этсао бемалол ош ейиш мумкин бўлса-я?! Бошқа бир дўстимга телефон қилдим, унинг машинасида йўлга тушдик. Шу қадар изтироб ичидаманки, дод солиб йиғлагим келади...

Устознинг жасадини васиятига кўра, яқин дўсти, машҳур шифокор Жуманазар Бекназаровнинг машинасида Қашқадарёга кузатдик. Зудлик билан адабиёт ва ижод аҳлига имкон даражасида хабар берган бўлдик. Ўзимиз ҳам тилшунос Зиёдулла Ҳамидовнинг машинасида йўлга тушдик...

...Бегали Қосимов улғайган ҳовлига тупроқ йўл орқали борилар экан. Тупроқ йўл бошланган жойдан то устознинг уйига қадар бир неча чақирим йўлга сероб қилиб сув сепилган. Сув ерга сингиб, чанг кўтарилемас даражага келган. Бу қишлоқ аҳлининг ўзларидан етишиб чиқкан олимга бўлган эҳтироми эди...

Жанозага тумонат одам йиғилди. Жаноза ўқилишидан аввал олимнинг ибратли ҳаёт йўли эсланди. Айниқса, Абдулла Ориповнинг сўзлари юракларни сел қилиб юборди. Бу одатдаги айрилиқлардан эмаслиги аён эди.

*Күнларим тийрадур, оқшомлар пурғам,  
Бир-бир кетаётур жўраларим ҳам, – деган мисраларини тинглаганда, ичимдан  
келган ўкирикни аранг босдим... Шу тарзда, устозни чин дунёга кузатдик...*

\* \* \*

...Бегали Қосимовнинг табъи назми ҳам бор эди. Ҳеч қачон шоирликни даъво қилмаган, бирор марта ҳам шеърларини матбуотда чоп эттиргаган бўлса-да, шеърий иқтидори унча-мунча шоирдан кам эмас эди. Балки, бу хусусият унга отадан ўтгандир. Ҳар ҳолда, устознинг ёзган шеърлари теран маъноси, бетакрор бадиияти билан ажралиб туради. Мана, умрларининг охирларида ёзган шеърларининг айрим бандлари:

*Биламан, ҳар кимга бу он келадир,  
Сўнгги сўз айттурга имкон келадир,  
Виждон-ла юзма-юз иймон келадир,  
Қувончлар чекиниб, армон келадир,  
Комида яширин аламли нидо,  
Ул видо онидир, видо, алвидо!*

*Зангор хаёлларга тўлганда дунё,  
Нозли келинчакдай тўнганда дунё,  
Жаннатдан бир тимсол бўлганда дунё,  
Ўз-ўзига мафтун қолганда дунё,  
Оҳиста қалбимга кирди бир нидо,  
Ул видо онидир, видо, алвидо!*

*Боғимда қулади азамат чинор,  
Чинорки, мен учун ҳам номус, ҳам ор.  
Фарзандлар толбаргдай, кўзёш шашқатор,  
Бундан аламлироқ қандайин дард бор?..  
Бехосдан тилимга кўчди бир нидо,  
Ул нидо – видодир, видо, алвидо!*

\* \* \*

Инсон умри чексизликка нисбатан қиёсланганда, лаҳзанинг ҳам неча миллиарддан бирига тенгdir, эҳтимол. Лекин, бошқа яралмишлардан фарқи шундаки, у ана шу беҳад оз муҳлатда оламга татирли ишларни бажаришга улгуриши, ўз номини абадиятга муҳрлаши мумкин. Бегали Қосимов қисқа умри давомида, катта илмий мерос қолдириди.

Олимнинг қабристондаги хоки устига ўрнатилган мўъжаз лавҳада мана бундай сўзлар битилган: “Унинг азиз вужуди Ватан тупроғига, муқаддас рухи эса миллат қалбига кўчди”. Бегали Қосимовнинг энг катта орзуси ҳам шу эди. Гарчи, фоний дунёдан бақо оламига кўчган бўлса-да, устознинг асарлари, уларда илгари сурилган ғоялар миллат қалбида доимо яшаб қолади.






## Гулқайчи

# СИЛАНГ ФАРИШТАСИ

Гоҳида эр-хотин уйда ёлғиз қолсанг, нима қилишингни билмайсан. Хотининг минғиллаб уй супуради, кир ювади, сен эса креслога чўкиб, мириқиб журнал ўқийсан ва шу маҳал жиддий иш ҳам топилиб қолади:

- Ҳой хотин, нега радиони йўнайсан?
- Ёш боламанни йўнаб? “Машъал”га оляпман!
- Ўзи “Машъал”да турибди-ку!
- Вой-бў, намунча бақирасиз, олинг матоҳингизни! Журнални улоқтириб, сакраб турасан.
- Зарда қилма, бузасан!
- Сиз ойим олиб берган телевизорни ҳар минутда муштласангиз майли-а!
- Ия, ҳали сеники-меникига бориб қолдингми?
- Рост-да, сиз нима опсиз, ҳаммасини менинг уйимдаги-лар қилишган.
- Ҳали шунақами, радиони-чи, кир машинани-чи?!
- Сервантни отам қилганлар!
- Оёғинг остидаги гиламни ҳам меники дерсан?! Пилемесни аканг обергандир-а?
- Ҳа, бўлмасам-чи, туғилган кунимда...
- Э, уни қаранглар, туғилган кунида эмиш!.. Ахир, у пилемес аллақачон запчастга айланиб кетди-ку! Славик...
- Ҳа, ўша Славик берган пулга Янгибод бозоридан арzonгаровини сотиб олгандингиз. Ўзингиздан қўшмагансиз ҳам...
- Қўшганман!..

Бошланди! Гўё аёвсиз олишаётган икки душман томон пулемётлари тўхтовсиз отишма бошлади. Гоҳ у томон устун келади, гоҳ бу томон кучланиб кетади. Ярим соатлар давом этган “отишма”дан сўнг сен ҳам чарчайсан, хотининг ҳам андак толиққандай бўлиб бир чеккада тумшаяди. Шип-шийдам хонанинг бир бурчагига сенга тегишли, иккинчи томонига аёлинингга тегишли ашқол-дашқоллар уюми пайдо бўлган. Манглай терингни сидирасан-да, дераза олдида турган журнални кўлингга оласан. Креслога чўкмоқчи бўласан. Ие, қизик бўлди-ку, кресло нариги уюм ашқол-дашқол, қақур-куқирлар остида қопти-ку! Тўғри-да, креслоям у томонга тегишли. Аёлингнинг аммасими, амакисими, ишқилиб биттаси совға қилганди-да!.. Индамай бориб, ўзингга тегишли уюм устига чўкасан.



**Абдураҳмон  
ИБРОХИМОВ**

1950 йилда тугилган. Тошкент Давлат университети кимё факультетини тамомлаган. Айни пайтда Ўзбекистон Фанлар Академияси қошидаги Биоорганик кимё институтида катта илмий ходим бўлиб ишилаб келмоқда.

Унинг “Уйингга бүгдои тўлгур” ҳажсиялар тўплами (2011), “Жийда ғули” (2012) номли қисса ва ҳикоялар китоби чоп этилган.

Хотининг кутилмаганда дик этиб ўрнидан туради-да, устингга бостириб келади. Ҳали нима гаплигини тушуниб етмасингдан қўлингдаги журнал юлқиб олинади.

– Ҳа?

– Журнал меники, унга мен ёзилганман!

– Шунақами!

– Шунақа!

– Еч бўлмаса!

– Вой, нимани ечаман?

– Оёғингдагини, шиппакни! Мен олиб берганман!

– Вой, ордона қолсин! Олинг шиппакларинг ҳавода кетма-кет учиб, деворга урилади-да, тап-тап этиб паркет устига тушади.

– Пайпокларниям сиз обергандингиз чамаси... Э, йўқ, буни саккизинчи мартда Зарина қизим совға қилганди!

– Заринандан сўра-чи, пулини ким берган экан?

– Құрумсоқ, ҳали пайпоқни пулиниям миннат қиласизми?!

– Құрумсоқ сенсан, ўзинг бошламасанг, менам миннат қилмасдим. Ҳўш, яна нима қолди бўлишмаганимиз...

Худди шу аснода хонага қийқириб дўмбоқ ўғилчанг югуриб киради. Ва кирган ерида таққа тўхтайди. Икки уюм қақур-куқир, ашқол-дашқолга қараб қолади-да, бирданига “урре!” дея чапак чалиб юборади. Икковинг ҳам унга анграйиб қарайсанлар.

– Дада, ойи, кўчиб кетамизми? – Сен ҳам, аёлинг ҳам жимсизлар. – Дада, бувимни ҳам олиб кетамизми? Ойи, янги уйимиз қаёқда?

Эр-хотин бир-бирингга ялт этиб қарайсанлар. Эшиқда оқ дока рўмол ёпинган нуроний кампирни кўриб, ўрнингдан сакраб турасан. Хонага нурли, файзли бир нима оқиб киради.

– Ҳа, болаларим, тинчликми?

– Ҳа, шу... озроқ... уйни... – чайналади хотининг.

– Келинг, ойижон... Уйни бир... – дейсан гарданингни қашлаб.

– Вой, тотув бўлган бўйларингга қоқиндиқ-а! Байрамга уй қутаряпсизларми?..

Эр-хотин бир-бирингга қараб олиб, баравар бош иргайсанлар. Хотининг чехрасидаги яширин қулимсирашни илғаб, дадилланиб кетасан.

– Ойижон, келинингизни кўрмайсизми, бир кунлик дам олишимдаям тинч қўймайди. Қаранг, оёқяланг бўлиб олганини кўринг уни!..

Хотининг пиқ этиб кулади.

– Индамасам, креслодан тургилари келмайди!

– Амманг оберган креслодан!

– Аммаммас, амаким!..

– Адашибман, узр!

– Уззуқун журнالдан бош қўтармайдилар ўзларига қўйиб берсам...

– Ёмонми ўқисам, ахир унга сенинг пулинг кетган, азза-базза обуна бўлгансан!

Хотининг шарақлаб кулиб юборади. Ажабланиб қарайсан.

– Ҳа?

– Обунага ойижонимни нафақа пулларидан ишлатганман. Ўзлари берганлар, – дейди кула-кула.

– Э, хайрияте! Ойижоним омон бўлсинлар менинг баҳтимга!

– Ҳаммамизнинг баҳтимизга денг!

Аёлингнинг нимкосали гапини дарров илғаб, мот бўлганингни англайсан. Тезгина бориб қақур-куқирлар остидан ҳалиги креслони ажратиб оласан-да, дераза тагига қўясан.

– Ойижон, сиз дам олиб туринг.

– Биз ўғлингиз билан бир пасда...

– Йўқ, сен ошхонангга чиққин, мен ўзим эплайман.

– Мен дадамга ёрдам бераман, – дейди ўғилчанг ғайратланиб.

Чехрасидан шукронга нур ёғилиб турган онажонинг дуога қўл очади.

– Илоё, баҳтинглар бекам бўлсин. Ўйинглардан фаришта аримасин, болажонларим!..